

國家文物局

清代傳記叢書



明文書局印行

清代傳記叢刊·綜錄類⑦
周 駿 富 輯

國朝耆獻類徵初編

(三)

卷二〇六至
卷二一二

(清)李桓輯



明文書局印行

國朝耆獻類徵初編卷二百六目錄

監司二

趙廷標

范印心

杜淡

邵煥元

谷應泰

張九徵

蔣永修

徐可先

張能鱗

顧鏞

華章志

邱俊孫

崔爾仰

朱廷瓌

林嗣環

陸振芬

王垓

徐惺

皇朝通志卷之...

--	--	--	--	--	--	--	--	--	--

國朝耆獻類徵初編卷二百六

通奉大夫前署江西巡撫江西布政使司布政使湘陰李桓輯
監司二

趙廷標

趙廷標浙江錢塘人順治三年由選拔貢生知福建永定縣邑初
歸附凋敝殊甚廷標請援郡省糴粟煮賑民困稍甦六年粵大埔
逸寇江隴率眾萬餘人犯縣城廷標誓眾死守賊掘地入則豬池
水以待地礙不得發賊用雲梯乘城則於垛眼懸柵墮之相持三
月食垂盡值立春日廷標乃廣張鼓樂開城門迎春於東郊賊懼
有伏遂遁廷標密遣兵閒道往伏兩山閒出不意夾擊敗之追至

龍際岩殺奪殆盡七年擢湖南衡州府同知尋署府事時經兵亂田畝榛蕪廷標爲請蠲荒民漸復業九年大饑多方賑恤生全者無算大兵平西南經略以廷標薦十八年擢雲南迤東道分巡安普諸蠻爲土官所誘競作不靖廷標決策行閒遂復維摩舊地其甯州彌勒巴盤八甸咸驚恐乃移檄諭之悉罷捕逐之令諸持田器者皆爲良民持兵者乃爲賊單車巡行安撫由是諸路悉平康熙十年調廣東按察司副使分巡廣東南韶道安普民暨峒蠻聞其去至塹所行道發巨石塞城闕願少畱廷標慰諭再三乃得行適兩廣八排諸嶺寇起聞廷標至立解散連州復亂鎮臣以剿捕事委之至卽就撫分巡使者舊有柴薪錢吏籍其贏以獻屏弗受

資給民之窮獨無依者踰年以憂去十八年授湖南驛鹽道捕獲劇賊斬其渠魁餘悉縱令歸農湘東民變轉掠百里偏沅巡撫韓世琦欲撫定之策非廷標不可乃語之曰湖南民望君如歲曷一行乎廷標單騎往諭皆投竿泣悔因散遣之事稍定倡修嶽麓書院繕舍宇寘田以廩諸生俾肄業其中親爲策勵嘗行部至衡郡父老聞之舉手加額曰三十年慈母至矣皆羅拜車下廷標舉帷慰勞有若家人俄遷布政司參政督陝西糧儲道時已抱疾士民相率請畱會武昌兵變羽書至湘潭猶彊起視事月餘病益篤乃乞免歸抵家而卒事 聞贈嘉議大夫 賜祭葬

右 國史館本傳

故嘉議大夫陝西督糧道布政使司參政趙君請疾歸杭州康熙二十八年己巳十一月七日卒於家距生明萬曆癸丑享年七十
七孝子承燠等稽首請銘先是君配許恭人以康熙二十一年壬戌四月十一日已先君卒於長沙官舍距生甲寅歲滅君年一稔
曾謁予宗仲知祥符縣事際可誌其文樞堂未書丹也至是謀合
壤而並請予銘剖於石君諱廷標字叔文少就試於兩浙提學副
使黎君補諸生值光祿公卒於官君丁年走京師持父喪歸錢塘
世祖章皇帝建年之三 詔選天下奇才異能者授府縣官君
鄉貢應 詔除福建汀州府永定縣知縣縣久藪賊又天下初定
甌越疆新開居民易飢飢爲奸君嬰城一年府例頒春將迎之東

郊守者難之君覆甲隍閒而集諸耆老率兒童伎樂張綵設仗關
闔闔以迎賊不疑有備羣趨之覆起掩殺輒環數十里會學使行部
君復樹新幟前導獵獵出郭迎學使賊皇惑不知所爲相視不敢
前已而散去遷湖廣衡州府同知至則知府通判推官皆以事去
君攝府廳事湖南烽火接嶺徼當獻賊草殺後齒膏原野君設法
救卹外扞逋寇而內養遺孑如是有年會閣臣洪公經略五省駐
節長衡閒諮詢文武有用之士督撫以君應薦第一時賊眾距武
岡州踰十萬竇慶告急遷君長竇分守道開牙竇慶會文武將帥
多不和君極力救解不得適君以事還衡州竇慶陷君遂落職
今天子御極王師平西南經略洪公請君從順治辛丑奉簡

命兵備安普撫爨焚諸蠻而甯州彌勒州各土官誘諸蠻反征蠻
軍四出請君監軍君決策行閒復故時維摩地安慰巴盤八甸閒
諸蠻以甯晉布政司參議管通省驛鹽事無何調廣東按察司副
使分巡廣肇南韶道安普民暨盤州西堡諸蠻塹其路發巨石塞
君所出城闔曰願畱君勿以君行君慰諭之去會川湖兩廣八排
嶺大讞未決君臨界會折定爰書具題彌月事竣連州寇起鎮臣
失勦捕方略以委之君諸寇聞君至卽就撫督撫嘉其績方會題
閒以憂去服闋補長沙驛鹽道當是時長沙陷賊久甫及恢復而
王師進辰龍關軍書旁午一切芻蕘械杖舟師竿役征繇去來
者駱驛於路君砥力給辦不誤晷刻而民之被調者不致流散然

而心力竭矣時滿學士暨兵部督捕侍郎董錕湖南薦君能使併
理糧儲道事會湘東有司催科亟激變巡撫韓君四顧曰事棘矣
此非趙副使往不可謂君曰湖南民望君如慈父母久矣忍不一
行慰斯民心乎君曰諾遂乘一騾戴星往民望見君皆投竿涕泣
訴悔罪狀君散遣之返乃大修嶽麓書院營堂室市田蓄廩米使
諸生讀書其中湖南文教爲之一開自 今上踐阼早爲監司歷
西南烽火二十八年中間兩攝司事而未卽於真每調劑闕乏卹
荒補災籌軍政所需而計其贏絀雖兵興之際所至無爭取功而
轉饑不絕軍賴以振乃三遷監司未經大用而遽至於病康熙戊
辰遷布政司參政督陝西糧儲道事君聞報以病牒上九郡耆幼

爭先詣督撫軍門投牒請畱會武昌兵變羽書來湘潭君強起視
事晝課儲侍夜巡警以防竊發如是者累月而病愈甚乃勾督撫
請於 朝疏未及覆遽去時戊辰冬月明年春抵家病不起君趙
姓世居餘姚高祖登由餘姚遷錢塘以舉人官陝西興安州知州
授奉政大夫曾祖琪光祿寺大官署正封承德郎祖鈺龍驤衛經
歷授徵仕郎父維清光祿寺丞授文林郎累 贈中憲大夫湖南
按察司副使母金氏累 贈恭人繼母張氏累 封太恭人兄弟
七長廷樞廣東高雷廉總兵官都督僉事次廷機江南泗州都司
僉書授明遠將軍次卽君也次廷楨江南鎮江府知府次一柱湖
廣沔陽州同知殉難卹 贈奉政大夫又次廷相陝西甘肅鎮

右營遊擊將軍又次廷林四川江安縣知縣配許氏 封恭人恭人者東安望姓以高祖官蘭谿縣知縣遷杭州曾祖應亨刑部員外郎祖仲譽山東鹽運司同知父文胄福建泰甯縣知縣皆以甲科世其家明萬厯閒君父光祿公入成均與泰甯公爲同舍生友愛願以子女爲婚嫻恭人年十六歸君既隨君赴永定任值賊圍城城外火光燭官廨矢集於幃侍婢皆失色君入室恭人正容謂君曰妾之殉君猶君之殉國也卽城破引案閒佩刀曰吾了於此誓不以此軀刺賊刃矣蓋堅君志也先是恭人事姑孝當君遷衡時幼弟林爲江安知縣張太恭人者君繼母也愛林赴江安去恭人以不得迎養常恨恨及君遷安普恭人前請曰聞安普地和宜

養老太恭人在川久失扶持是地去川近迎養之便遂迎張太恭人至安普已而君弟柱以郎襄寇亂殉難太恭人聞變將歸沔陽恭人曲畱之越數千里周卹其子婦及 皇恩賜祭葬將理葬事於是太恭人決意東下而恭人隨之事太恭人於沔陽若干年暨君任廣東恭人念太恭人老不欲行太恭人迫遣之登車而下者三居常不樂聞訃後一慟而病遂於奔喪之次哀毀不能起嘗設饗鋪薦於庭女奴掖之跪卽以手承恭人頰稽手搏地伏且泣薦爲之溼已而卒方君任衡衡民多流亡君外理戎事及入室必聞恭人以招徠爲言有婦女被鹵者必勸贖之君大度而疏於財且坦白無城府與人謙讓不小立崖異而恭人復勸之施且屬以利

平下物故筦鍵財貨出入金錢者數十年而身無兼衣至親戚故
舊以孤嫠待給與配偶失時喪葬無力者卽舍養以應而當夫橫
逆之加置之不校恭人之善成君志如此子七皆恭人出長承燠
考選知縣次承煒後弟相遊擊將軍早卒次承燦考選知縣次承
焯候推都司次承焯考授縣丞次承熺次承燾皆考選知
縣孫十九長大坤考選州同知次大壩考選知縣次大陞錢塘學
增廣生次大環大塊大墀大均大垓大坊大圻大堪大壩大壑大
埏大塏大埧大在大埜大機皆未仕曾孫十業鉉業鉉業釗業銑
業鐸業錡業鎬業錚業欽業鐘皆自幼承燠以下所娶皆名族女
女六孫女十六曾孫女四其所許字皆世家子弟某年某月某日

葬於某原銘曰

騎天水氏大以杭歷仕數世同袁楊君兄弟名跨五常弱把柔翰
彊曲斯殉城治郡凌疆場何者非國疏附行惟君起家以才望揮
絃卻敵闔海傍青幡插花階羽揚文教旣揆來衡陽曾檄巴蜀通
夜郎樓頭賤並諸羅戕手伐銅鼓平竹王夜散鈴櫜晝聚糧十年
心計畱湖湘流澤甯讓杜與羊書勒幟與版並詳及其死也杵不
相恭人助德不易量慈母出牧模在房飛矢集鑑羽集箱尙譬大
義同匡襄只憐孝行過樂龐萱薑錫蜜佩幌縹搖苗萬里猶相將
越四十載孝事嫜竟以孝死尤可傷楚郊蘭秀杜並芳足媿大節
中外良以茲子姓咸茂長亦與蘭杜好比芳子忝 國史歸梓桑

橐筆僅此載樞堂義輪舒馭迴且翔且歸若木同埋藏

右墓誌銘毛奇齡撰

國朝通志卷之二十一

范印心

府君諱印心字正其先河內人後徙溫侍御公諱安之五世孫也府君以己卯舉於鄉越丁亥成進士起家山西崞縣知縣升戶部主事又晉員外郎權西新關稅務授郎中超擢僉憲備兵杭嚴俄遷山西口北參議以萋斐解任事白再補河東道丁內艱以歸尋卒府君精敏強毅長於政事初至崞起敝扶衰會有姜瓖之變府君倡眾固守目不交睫者七晝夜僞檄日三四至手碎之斬其使以待 王師身親矢石鬚髮爲白近崞城邑摧陷殆盡崞歸然獨存在主政遣視榆林兵餉舊例餉發不時或至假貸以佐糗糧府君請於開府按時支撥遂爲定例至今士卒感德權西新持大

國朝文獻通考卷之九十一
三十一
體不尙苛細杭有湖山之勝婦女蕩漿嬉遊又俗尙鬼有所謂五
通神祠者府君嚴檄戒飭立毀淫祠數十杭俗爲之一變然亦以
是取忌矣晚年監郡河東黜奸清蠹吏畏民懷晉甯三十四屬巖
憚之若神明府君孝友性成叔父無嗣府君窺大母意買妾以慰
之推宅讓產無幾微見於顏面居官居鄉其濟厄扶危者無算讀
書不釋手在金陵購經史子集數千卷諸往還裁答揮毫立就書
法迢逸詩詞高妙未嘗輕以示人生平喜表章遺文刊邢昉石舊
集於金陵刊賀仲軾春秋歸義於武林其在河東搜摭府庫藏書
捐俸鳩工補缺正譌無虛日生萬庀己酉卒於康熙戊申壽六十
歲己酉入名宦庚戌崇祀鄉賢

右墓表子瑤撰

右墓表子瑤撰

杜渙

明天啟中有直臣曰江西左布政使杜公詩以不建逆奄魏忠賢
祠罷聲聞天下事具明史方伯公生贈參政公若昧有子七人君
行在第三諱渙字子濂別字湄村世濟南濱州人生而英特方七
歲塾師授李翰蒙求讀竟悉諳其典故十一歲補博士弟子員丁
父艱服闋中順治乙酉鄉試丁亥復行會試 賜同進士出身筮
仕真定府推官君年甚少恆山又畿南望郡數決大獄爰書如風
習老吏亡敢詆謨者張忠勤公存仁以兵部尙書總督直隸山東
河南調集諸道兵平榆林賊覆其巢穴凡所俘獲皆付君執訊君
言於制府謂大亂之時脅從者眾渠魁旣戮餘者當使歸農以布

國家威德一切殲之徒獲曠土何益獄成多所縱釋尙書初疑之旣而寤謝曰君年少敢肩鉅如是吾不及也所全活數千人居三歲以治行高等考授禮科給事中先是河決荊隆口東北趨海水勢溢溢入東兗濟南諸郡灌縣邑官亭民田亡算君抗疏論劾河道方某請專遣大臣行河且言疏上游以去其壅導支流以殺其勢然後乘水涸併力塞之疏入得旨特命工部尙書劉昌工科都給事中許作梅往監視數月底績又疏言瀕河田土被水患最酷宜停徵以甦民力皆報可在掖垣十閱月疏數十上會有旨以廷臣出親民事君與焉補分守溫處道參議處在萬山中俗僻陋而溺女淹喪錮婢三事尤爲民病君湖望集士民反復開

諭爲改喪葬婚嫁之禮一從儉約女婢滿二十歲責其擇配俗爲之變遷副使備兵通薊通密邇京師豪室巨猾膠牢固結號爲難治君不苟不吐風流令行僕區法嚴民易懼罪爲立保甲之令什伍相保奸無所售司密薊兩鎮餉絕腴削之弊秋抄例一點兵飲食秣莖無所騷騷有冒名尺籍者爬剔無隱將弁畏愛之至於催漕濬河不憚匡襄王文通公永吉督倉場恨得君晚會天津道屬小園艘失事諉罪通薊遂奪二級註誤去官事尋白復以副使備兵淮海兩淮鹽筴甲天下官其地者率緣以爲利鹽艘自場捆載之眞州例由備兵使者驗放君曰鹽有專司吾何與焉吾自有海防與民事耳言於巡鹽御史力辭之自是驗放專歸轉運人服其

廉又出私錢造救生船高寶湖中以拯覆溺全活歲數百揚屬十
縣各置義冢五畝貧民始獲葬地羣歌舞之會有裁併之 旨改
補巡視甯紹海道至是凡再渡浙江矣時改文武相見禮往往相
抗不下君至卽交歡大帥兵民帖帖亡詬諍者遷分守江鎮道左
參政兼攝龍江西新二關旣又遙攝揚州關務持大體捐苛細值
淮揚方築壩濬河課稅不登而裁併之 旨又下矣家食十二載
居母憂盡禮三年喪畢補分守開歸道參政兼理驛傳鹽法時滇
黔用兵乘傳旁午驛騎告斃者接踵君檄各驛於額外得倍畜之
官給芻秣又請開府咨部令諸州縣得市馬塞上馬旣蕃息則又
時其水草節其勞逸又勅追鋒車以贏駕之省馬力之半中州食

鹽舊分隸長蘆河東山左兩淮四運司厲政多端而緝私販爲甚
越本邑一步則捕之煎土一斤則捕之巡役攜鹽密置人家則又
假乞水火誣捕之君察知奸私以律反坐鹽政肅然先是君鞅掌
王事勞瘁致疾會羽檄交馳不敢以休沐請康熙辛酉冬雲南平
巡撫中丞以君病入 告遂致仕歸歸四年卒君性孝友與兄弟
析產田取其近先壟而瘠者宅取其故者先祠在焉曰吾以便奉
祭祀也參政階得廕子舍子而任其弟杲嘗以母夫人命置蓮室
詢知其士人女也贈匳而嫁之夙負知人鑒戊子順天同考首得
周體觀爲海內名士爲推官援孫承恩於理爲給事中免吳國對
禮部磨勘更推獎之順治戊戌二君皆進士及第執弟子禮終其

身家世工書君書尤適媚得大令之神詩有奇氣類山陰徐渭南
城陳允衡撰國雅取君詩歷卷人以爲定論君風流儒雅吐屬無
一俗語願當官屹屹不可搖撼在淮海時某中丞者細人也惡君
強項數較轢之終不爲屈生天啟壬戌六月十九日卒康熙二十
四年乙丑十一月初八日得年六十有四階大中大夫歷官河南
布政使司參政 贈祖父皆如其官祖母程 贈淑人母張累
封太淑人配孫氏累 贈淑人繼齊氏累 封淑人男子二人亮
曾知縣章曾太學生出爲人後女子六人崔林琮李頤王士彰王
溎閻有繫李容麟其壻也以康熙二十六年十二月十六日葬於
城西北祖阡杲亮曾來請銘銘曰

城南之杜去天尺五下杜樊川多名宰輔遷於琅槐始別爲祖巖
巖方伯涕唾闢豎文孫繼之繩其祖武居門下省袞職是補一斤
不復觚稜夢阻歷試江海甌越吳楚梁宋之郊人歌杜母大難旣
平公亦解組海山兜率爰復其所渤海之濱如堂如斧觀彼九原
吾將誰與

右墓誌銘王士禎撰

--	--	--	--	--	--	--	--

... ..

FBI

郜煥元

明季詩學榛蕪歷下竟陵爭餽互熿寢淫五六十年 國初猶沿
餘習江北七子出然後詩道寢昌長垣郜公其一人也公既以聲
詩鳴河朔聞海內知與不知皆曰郜公今詩伯也跡公生平弱冠
通籍逾壯懸車家食垂四十年士論之重公者謂公澹榮利難進
易退高於世所稱名士一等而不知公固具文武才饒幹濟塵一
試而歸未究其用而竟優游泉石以老有識者所以歎公之難及
而不能不爲當代用人者惜也公沒之明年公子驥遴走使二千
里來請予爲之傳公諱煥元字凌玉學者稱雪嵐先生先世自山
西長治縣徙大名府之長垣遂占籍爲長垣人曾祖永春明嘉靖

王成進士累官按察使祖和鳳蚤塲父獻珂崇禎庚辰進士官吏部主事子告不仕晚更號潛菴公幼穎敏崇禎己卯登賢書年甫十七爲寶林劉公所拔劉公才士每語人曰吾得一小門生髮方覆眉蓋自詡得人也由是小門生之號籍籍京師入 本朝丁亥成進士謁選得山西太原令太原故土城庫不及尋而地當汾潞衝公至議增築甃以甗石眾迂之公不爲阻未幾有姜瓖之亂城西南隅未完者尙三百丈時值嚴冬公捐俸三百金命熾火甃炭於陣閒烘甗炬灰出凍堅以沸湯沃之晝夜趣工三日而城成當是時大同告變甯武應朔相繼陷遠近震驚公嚴飭守禦申條約練丁壯三百人可以戰烏銃三百杆可以擊俄有傳僞檄至縣揚

言招安公大怒立命索賊斬以徇賊逸去乃手碎其檄焚之詰朝
集眾關壯繆祠下刲羊歃血自誓與城俱存亡詞氣激昂吏民感
奮公乃奏記撫軍曰職按今日賊勢以西山爲盤踞之窟開色諸
口爲出掠之門萬山崎嶇紆迴五七百里官兵進剿實難爲今日
計惟於開色諸口屯勁卒數千建大將旗鼓聲足以奪其魄實足
以扼其衝原太汾潞俱可恃以無恐若如今日倏去倏來兵疲於
調發民受其騷騷非策矣是歲順治五年十二月也明年正月忻
州定襄陷巡道王公死之未幾交城陷未幾沁源又陷徐溝祁縣
太谷相繼陷原益孤立公再奏記撫軍請援兵略曰原距省四十
里爲省會門戶無原是無省會也今清徐祁太盡爲賊有孤城危

如果卯且賊游騎薄城者職輒奮擊遁去賊憤必謀大舉乞速發
滿兵救援背城借一事猶可爲不則職死不足惜如封疆何撫軍
見事亟先遣三百騎馳至將軍羅某率滿兵三千繼至與賊遇戰
於花蒼村互有殺傷大軍入城賊亦偪城下夜半攻西南隅城上
礮矢如雨賊不得登五鼓復焚南門門燬堞亦圯公急調西門精
騎五百引滿外向張兩翼待之賊逡巡不敢入又身率烏銃手從
城隙擊斃數賊賊稍卻乃運木石撤門扉窒隙塞瑕誓死守諸將
見賊勢張甚議棄城走公爭之力又以乏芻辭公曰城外青麥足
供芻秣脫慮病民吾請於臺以貯麥易之諸將語塞會端重王統
兵至忻口公遣使告急王帥師日馳二百里賊嚴陳以待王躍馬

靡兵從山嶺馳下大呼陷陳賊披靡刈其眾數萬遂解太原之圍
餘賊遁晉祠王命刊木豎柵環賊壘列營困之公募無民數百穴
其墉傅以火藥震迅如疾雷從地中發當者糜碎血攻三晝夜拔
之盡殲其眾積尸滿山谷晉水爲之不流王師尋下沁源交城汶
水諸郡縣漸次告復自去冬至是年五月公城守凡六閱月不解
甲併日而食者動累旬日是役也微公捍孤城以當賊衝全晉幾
殆王呼勞曰封疆危而復安紆 天子西顧憂實君功爲多隨列
上功狀得行取會新罷巡方改補刑部貴州司主事久之以考選
出視學湖廣公至則釐正文體蒐拔寒畯絕苞苴竿牘所賞識多
知名士前後成進士爲名臣不可枚數今大家宰熊公賜履官贊

張君希良其著也撫軍某以童子百名屬公公拒不應曰以朝
廷名器媚當道吾義不敢撫軍銜之造蜚語中公罪且不測臺諫
交章訟公冤 上敕廷臣會勘事得白撫軍以言事不實鑄九級
謫外而公亦竟投劾歸矣 今上初追錄晉中城守功樞部以公
名上公歎曰二人春秋高吾奈何以三公易一日耶堅辭不起家
居以著述自娛閒出遊訪名山水秦晉齊魯以及大梁吳越閒足
跡幾徧後若干年卒於家年七十三嗚呼使公得竟其用其功名
豈僅著一邑與世言文士虛聲鮮實濟如公者豈僅僅文士乎哉
初與公並稱七子者多一時偉人尤著者彭禹峯而述中州人宋
荔裳琬山左人申胤盟涵光與公同畿輔人皆崛起大江以北故

稱江北七子云

論曰憶庚申予客青社與公邂逅逆旅論詩投契辱與公爲忘年交嘗並轡登雲門山踞崖石把醜賦詩甚樂也屈指十六七年予幸後死乃爲公作傳可感也夫公事吏部公篤孝迨老孺慕不衰吏部公捐館公年六十六矣躡踊哭泣水漿不入口或援家禮六十酒食如常以勸公涕泣不應嗚呼非純孝能乎哉狀又稱公令太原時親王嘉公功賜以一女子趙氏公詢知爲士人婦訪其夫還之是亦足傳者

石家傳邵長蘅撰

按國初官制視學者爲按察司提學僉事亦有以副使兼提學者

國朝通志卷之八

八

谷應泰

谷應泰直隸豐潤人聰明能強記少工制舉文長益肆力經史於書無所不窺順治四年進士授戶部主事尋遷員外郎授浙江提學僉事校士勤明所拔多一時名俊陸隴其其尤粹者也杭州擅湖山之勝應泰衡校之暇輒登臨眺覽搦書舍爲遊息地既去官浙人懷之爲修葺勿置應泰嗜博覽思采集有明一代典章事實購得山陰張岱石匱藏書用袁樞通鑑紀事本末例爲明紀事本末八十卷時明史未經 欽定靡所折衷如紀惠帝遜國歷載黔滇遊蹟懿安后死節而以爲青衣步入成國公第皆不免沿野史傳聞之誤然排比次序首尾秩然每篇論斷倣晉書體以駢偶成

文遺詞隸事曲折詳盡可謂取材博而用力勤矣又著築益堂集傳於世

右 國史館本傳

順治丁酉谷戶部應泰督浙學時得平湖陸清獻公卷評其上云胸無寸書見不類字便如爰居之駭鐘鼓矣磊落英多我正以不類賞子

右紀聞陳康祺撰

張九徵

公姓張氏諱九徵字公選號曰湘曉其先爲中州人元末有字善甫者始遷鎮江府丹徒縣爲其縣人子德明仕明建文時爲戶科給事犒師東昌遇燕兵被執不屈斷臂死數傳至泱泱子柏以出粟賑饑授布政司經歷三子公考季也以公貴 封旣又以公子侍郎貴得兩世 贈典公年二十九舉順治乙酉鄉試第一時初經喪亂人多廢學科舉之文猶沿明季蕪詭之習公文宏雅博大爲一代模楷王文貞公在翰林一見深器重之丁亥成進士踰年爲行人司行人頌 詔福建又二年 世祖章皇帝親政視學奉命之闕里宣衍聖公又二年考選爲吏部文選司主事熟諳掌

故入其驚異郎中宋某曰張君爲秀才時已爛熟胷中矣未幾宋
被謫去正副選郎皆闕人公以主事典選輿論翕服旋升員外明
年升驗封司郎中冬調考功時安邱以閣臣掌部務龔端毅爲都
御史公佐之主察人服公明乙未以封公年高請養未抵家聞訃
再期哭泣卜葬未食墨猶殯阼階以是迄不赴補亡何海寇作亂
犯鎮江提帥兵少戰潰公與筮御史重光嬰城守禦副將高謙知
府戴可進著異志願語城下曰眾皆欲降獨某某不從爾賊謂曰
惟爾等速圖之公與筮聞之急趨下城而門牡已啟賊蜂擁入筮
縋城去公微服出城東門日暮得一艇脫身走常州謁巡撫蔣公
言海寇烏台易破宜速進兵又至浙江趣督撫嚴兵堵賊歸路未

錢賊敗果如公畫始賊入城名捕公不得繫家眾焚掠公舍時封
公樞在堂火將及回敵不熱如有神護康熙二年補稽勳司郎中
秋調文選益都孫文定公柏鄉魏公先後爲冢宰咸加敬禮令甲
初更吏部郎與他曹一例以方面推補明年公以河南按察司僉
事出視學政公在吏部歷資十餘年聲譽赫焯時論以爲旦晚臺
閣願得平調士大夫無不惋歎公略不介意河南兵荒後文治日
衰公設立條格獎拔孤寒倡明禮教兩河人士歎爲百年未有黜
中牟潘岳祀典祀尙書鐵鉉於鄧州求其裔孫奉祀增置社學擇
師教郡邑子弟令誦小學家禮二書辨正字體舛譌習灑掃進
退之節以培初學根本又斥俸錢廣購書籍置學中便諸生就讀

國朝文獻通考卷之百一十一
三
一時風氣以變事竣考覈爲天下第一當擢京堂有尼之者乃止
會撫臣疏舉卓異 詔賜蟒衣 兪部議需次超遷公已誓墓不
欲出矣康熙十七年 詔舉博學鴻儒冢宰郝恭定公少宰通州
張公列公名上比疏下督撫促赴 召公引疾控辭 詔不許公
復懇辭於是部議病痊赴 召 詔報可公引疾時貽友人詩有
云少不如人何況老身將終隱又焉文又遺懷云虛名空笑羊公
鶴肥遜深慙梁伯鸞京雒少年爭獻賦伏生接武賈生難人以是
知公不出之意決也公邃於史凡所指陳歷代治亂得失之故及
故明人物如指諸掌聽者終日忘疲公子侍郎總裁史局公手疏
示侍郎大指事功推新建才略推江陵經濟推王三原又論周文

襄和易近人不免經權互用惟王端毅爲無間端毅雖疾惡如仇而虛心靜氣人人樂效忠告海忠介遠不能及徐華亭年四十爲少宰延攬朝士眾譽翕然歸之其精神實出前後諸公之上後惟葉福清似之時勢各殊故設施亦異其爲機警則一也又言江陵爲治政尙嚴密巡方審錄至以多決囚爲功當國者不可雜用申韓之學如此卽矯其弊而爲寬縱又傷治體蓋皆篤論云居平教子具有規範故侍郎兄弟均以文行顯名侍郎被 眷優渥每得寵賚必進之公公榮 君賜輒貽書以 主恩難報勤職盡瘁爲訓每日擇交最難張德遠能親君子不能遠小人當以爲終身之戒癸卯秋閣編修以不錯題字卷誤被貼主司坐吏議屢譴

詔許覆試公愀然曰罪及主司而自干進可乎既不入式公意始帖然嘗述陳仲醇言教諸子曰美酒速飲而無味積薪居上而先焚仕宦之途惟宜漸進此語頗得黃老意宜深味也公雖家居乃心王室瀆逆之變憂思況瘁每飯不忘侍郎時省覲假歸公趣令治裝謂老悖狻狷必當懸頭竿杪况廟堂宵旰非臣子家食時也侍郎在翰林凌晨進講日旰乃出最勤苦性淡泊不肉食日處糲一孟公貽書曰此非養身之道食不厭精汝未讀鄉黨篇耶退直後宜靜坐片刻養神節勞勿以膏自焚也古樂府殺君馬者路旁兒謂竭馬力以娛路旁耳目也吾慮汝之馬力竭矣侍郎聞命悚懼爲稍節勞加一餐焉公好急人難三郟婚喪以佐匱請者

日踵門必盡力周卹擇師教其子弟之貧者歲饑捐賑其里人收
育棄嬰造舟濟涉凍者予衣餒者予食孳死者予槥里人賴之實
有盜謀劫其室同謀者先期以告詰之則嘗凍受衣者也郡中數
起大獄公每陰爲救解己亥年沙洲失業山田之人計畝以粟濟
之沙洲既復業山田連歲大旱公言於有司令洲民如數還償全
活甚眾所著撰有閩遊草艾衲亭存彙文陸堂文彙各如干卷文
陸者有幕文待詔陸平泉之意江甯通志則應總督永甯于清惠
公禮聘與纂修筆削者也余甲午充貢與公長子編修同入太學
謁公邸舍一見待以國士余試失利公笑曰爾豈風塵中人勉旃
自愛余兄弟與編修侍郎交好公聞甚喜余過京口引余遊鶴林

北固劇談累日夕王子京兆之役公子仕可名在第二公手書謝
曰兒子成名得足下爲座師乃眞足喜自此凡進退出處及有事
蓄疑未決必以咨稟公傾心相告疊疊不倦嘗曰范希文善教子
以胡翼之孫明復石守道李泰伯爲堯夫兄弟師友自然學識日
進吾諸子他日當有成就足下其共切磋又言范蜀公謂仕宦不
可廣求人知受恩多則難立朝矣劉忠宣亦持此語然若果有知
己詎宜背負如魏知古之待張說明皇薄之是已又言張江陵爲
館師令門人與上計吏往還詢知郡國阨塞營伍戶口財賦爲他
日經濟不宜徒守章句爲無用之學又言君邑鄉先生葉文莊公
掌兵科與于忠肅共講兵事一日議不合廷劾忠肅遜謝而已前

輩虛懷如是非有矯飾文莊公嘗訪一新進士方與同年圍碁厲聲曰君輩初釋褐當知吏事乃博奕遊戲取碁局投之於河陶荆州惜分陰吾曹當知此意也公鏃礪獎借手書盈尺居常維念公之期許有非淺劣所敢承者蓋深愧荷其言公訃至余哭之侍郎邸舍寶主拾踊瀕行余送之復相向哭侍郎以公行狀爲屬曰我先公知子也按古者累行以論謚謂陳其生平行迹爲作謚之本唐時士大夫沒質狀其行事上太常請謚史館立傳苟行不應子謚並爲之傳者不作也故下位高節之士往往有狀貴公鉅卿反或不必要盡有其行應子謚並爲之傳宜無過公者今令甲非大臣官一品例不得請謚若上之史館取信後之執筆爲史者及以請

墓文故不宜闕余辱公知其何可無述也公生於明萬厯四十六年戊午卒於 皇清康熙二十三年甲子享年六十有七配何氏 果 封淑人子男子六玉裁丁未進士內國史院編修加一級前卒娶蕭氏 贈安人繼娶申氏 封安人玉書辛丑進士經筵講官禮部左侍郎兼翰林院學士加一級支二品俸娶吳氏 贈淑人玉禾貢生候補行人司司副娶蔣氏仕可丙辰進士候補中行評博娶繆氏恕可戊午舉人娶于氏繼娶徐氏與可例監生娶何氏繼娶徐氏子女子四皆適名族孫九人孫女五人謹狀

右行狀徐乾學撰

公於明代人物能縷舉其世系子文貞公玉書總裁明史大抵稟

承家學爲多

右鶴徵錄張維屏錄

國朝詩林卷之四十一

三

國朝言行錄卷之二

三

蔣永修

康熙戊午宜興蔣公來視學三楚景星時奉 召入覲未及謁公
明年拜 恩南還公適來郡始得挹厥風裁讀其在衡陽時回雁
石鼓續春陵行諸詩知公問學經濟越三年公歸道山又三年晤
公次子別駕景祁出示公遺像神采如生按公諱永修中 世祖
章皇帝御極之四年會試進士授應山令時山寇突起雲夢孝感
皆陷公不請兵援恐爲羸民困率父老子弟扞禦孤城修築雉堞
壞墮者三百三十餘丈卓異第一 賜衣內召會外艱歸服闋對
策太和殿授刑科給事中浙江大帥疏爭文武相見禮公抗疏彈
擊且言不宜開藩鎮驕縱 上以引藩鎮爲嫌立命至南海子回

話公從容啟奏 上大悅曰真諫官朕正用著此輩人耳歷吏戶
都給事多所獻替 今上改元二年出同知瑞州府擿奸發伏禽
高安巨盜數邑以甯升知平越軍民府龔服生苗七十餘砦歲癸
丑升山東按察副使提督學政復以內艱歸起補江西學政改湖
廣方是時滇逆初奔士子驚魂未攝公先履危疆於燿火相望之
中以文定武前此所未有也 新恩考察應誓卿寺執志謙抑遂
拜陝西行省參政未赴而卒鄉賢名宦皆崇祀公有女孫許字湖
北布政子星徐公之孫未昏聞訃入門守貞家教淵源逮及笄穉
有如此者瞻公遺像感激欷歔敬志梗槩而綴以贊辭

維公遙裔系自山亭神明上滌姬旦雲孫柝源深遠厥祥誕生從

經衡史緯武綱文韋絲遜仕百里干城鹽亭健令隆慮神君公在
諫院罷臥鳳鳴禮爭大體議必持平江郡探丸公迺出丞仁願救
戢雜邦用甯黎峩嶮擊羅鬼是鄰椎首喙息砩角卒耕玉華叛作
震懃黔荆詩書牆壁鬢席狐榛墨烏稍集罄鴻數驚簪茲疲楚
帝用儒臣潔己端矧師嚴道尊湯湯江漢與與莪菁公歸道山多
士涕霑哲人雖隕典型尙存公二令子揚雲長卿家學節孝施及
笄纓齊女嫁衛訃遇城門我心匪席獨爨終身節錄公善形筦弗
勝庶幾後禩感覽斯文

右遺像贊顧景星撰

皇朝通志卷之二十一

三

徐可先

在昔士大夫有少壯登朝坐致通顯壽考令終作者順其子孫之所稱揚虛美隱惡使後世考其軼事以爲金石之刻竹帛所書舉不足信者往往然矣至如一郡邑之守令忠信慈惠施於人人而名位聲勢無能動人遂至幽隧之文靡託汗青之紀闕如又可歎也司馬遷之傳循吏以千百年之久而寥寥數人人不數事豈非其无赫赫之名而易以湮沒與若吾宗兄梅溪殆古之循吏與子弗忍其無所聞於後也乃爲之次敘其生平使其子納之壙中敘曰君姓徐氏諱可先字聲服別號梅溪常州武進人韓愈言徐氏十望其九皆本於偃王君先世由山東轉徙淮陰陽羨卒家於常

之小畱至君九世蓋自東海郊來也世以文學儒行爲郡名家曾
祖行祖元傑皆諸生有名考諱廷端篤志高尚母蔣太恭人君生
周歲失怙育於外氏稍長乃歸七歲能屬文號爲神童願以才自
馳騁不肖事舉子業至二十五歲乃補博士弟子員家貧授經自
給乙酉舉於鄉力不能餬車北上至丁亥再行會試始成進士除
東鹿令定鼎之初羣盜充斥君設方略撫其魁其下數千人皆散
爲良民會有 詔畿輔縣悉用漢軍爲令調君龍泉龍泉盜尤劇
前令不能制城外皆崇山大溪虎狼蛟蜃窟穴其中爲民患俗尙
穢鬼巫覡生女多溺之君始至曰寇敢爾其謂我文吏無能爲乃
陰以兵法部勒鄉勇擐甲持弓矢出不意直搗賊巢賊駭相顧愕

貽叩首願輸王稅不復反君乃籍鄉勇爲獵戶以擒賊之賞賞擒
虎者虎患亦息乃梁溪上凡三里許民用無水死勸民無溺女聚
眾講讀鄉約於學宮罷淫祠若干所在龍泉七年民俗丕變 覃
恩敕授文林郎以卓異升刑部主事晉員外郎郎中加一級 覃
恩誥授朝議大夫廕一子入監讀書明年出守登州登州自明季
被兵以來諺稱山不生草木田不繁五穀民不居瓦屋士不知夜
讀君曰此不可以武治吾當以漸蘇息之治之期年禾麻棲野家
有儲蓄三年政成弦誦達於四境會 覃恩誥授中憲大夫以父
病乞休歸而色養者十年父憂服除乃赴補河間府時軍興郡當
孔道 詔使旁午禁旅時出民苦驛騷自君下車市無改肆荒政

馬政皆以素備故臨事無遽其餘略如治登州時以治行尤異累
增秩至七級甲子冬擢按察司副使提學山東是時君年已懸車
方欲請老適以人言遂歸郡民遮留以萬計歸後若干年卒君生
於萬厯乙卯卒於康熙己巳配謝氏 封恭人繼室倪氏男子子
二人曰人鳳以君蔭入監中康熙壬戌科進士禮部主客司主事
曰鸚廣東肇慶府通判女子子二人孫男五人孫女九人昏嫁皆
名族銘曰

官至二千石壽七十有五曹郎郡倅競爽踵武雖其止於是亦奚
不足於君所

右墓誌銘徐乾學撰

張能鱗

稼書陸先生荅先生書曰恭惟先生學貫天人聲徹內外隴其自
某年某處得瞻高山私心向往年來南北間隔無由執鞭茲幸承
乏靈邑得與令郎朝夕其事莅任之始又蒙不鄙遠辱台翰重以
尊刻曷勝忭慰儒宗理要一書補近思之缺去性理之煩真足爲
學者指南衍義補刪筆削精嚴有功文莊不淺讀青齊政略諸書
則皆得之涉歷體驗又令人爽然自失矣受教宏多肅此奉謝又
荅先生書曰先生當代名賢不遺葑菲山僻下吏荷蒙垂盼俯賜
教言感佩何如每讀青齊政略剔弊釐奸澄源端本無一不中俗
吏之膏肓愚駑之姿獲此鞭策受益宏多但瞻之在前忽焉在後

抱愧良深耳至大集中扶持正學諸篇直指金谿姚江爲禪此尤
世俗所依回而不決得大君子之論定可以爲學者指南矣令郎
英年好學以謝室芝蘭衍孔庭詩禮將來名業正未可量但靈壽
一邑荒涼殊甚學宮尤極蕭條近奉部文有修學紀錄之例雖不
必因此起見而整頓黌序亦羽翼聖門中一事也不識先生亦爲
令郎一助手便中瀆布統祈台鑒不宜貞庵魏先生序張西山文
集曰天運邳隆有聖君主持於上則必有賢臣輔翼於下而尤賴
有正大真醇之儒於古昔聖賢心學之宗講明而闡繹之然後道
統與治統相維而成久安長治之盛此歷代所以尊崇而矜式之
而越在有宋則周程張朱爲最著說者謂其得孔孟之心傳續千

古之絕學誠非誣也然非真知灼見尊信而不惑奚克臻此哉張君玉甲系出橫渠後自其先世徙居京師家學淵源卽以西銘正蒙爲窮理盡性之階梯入籍以後宰試武林典禮南宮俱有賢聲視學三吳三吳爲文章淵藪往者士子競好綺靡工於鞞峴張君則力追古道以致知力行之學身先多士而猶恐其無所緣以入也復著孝經衍義儒宗理要二書俾之循誦服習不爲歧途所惑而東南之士風無復有風雲月露之繽紛矣遷蜀少參有滅寇功補任青齊齊俗習於舊染難以猝治如鬪雞走狗六博蹴鞠以及師巫詛呪淫祠誕說之流不可勝紀張君深念王政之大當先敦養故莅任以後惟漸次爲之勸諭而譬解使之盡棄其舊而謀其

新而異端曲學尤在所禁其要在敦學校重農桑崇孝弟興教化使人皆知繼善成性之本指以不至放僻邪侈而已此豈非明體達用道統與治統相表裏者乎至於五經之論三教之說朱陸之異同諸子之緒言分別取舍皆窮源極渺而其文章如布帛菽粟自然典雅光氣璀璨又其餘也向者余亦嘗從事於程朱之學矣今視張君之正大真醇持論不刊而猶覺余之僅得其郛郭而未窺其精微也然或者且曰張君之學僅見於一方而猶未及於天下也儻得躋公卿熙庶績理學文章霑旬海內使海內儒者皆知有周程張朱以定其趨向而漸臻於孔孟之闡奧其於聖學不益高大而光明乎噫治之興也自上達下化之行也由近及遠傳所

謂觀於鄉而知王道之易易也今日者天子方放黜浮靡敦崇實行安見張君之學不且由一方而漸及於六合以內漸及於四海以外而因以導太平盛治於無窮也哉吾是以信張君之爲輔翼世運之人也

右學案唐鑑輯

張能鱗字玉甲號西山本順天宛平人遷居河南濬縣順治丁亥進士康熙己未舉博學鴻儒未遇仕至川南道副使

右河南文徵小傳蘇源生輯

國朝詩苑卷之六

卷之六

三

顧鏞華章志

顧鏞字常孟江蘇無錫人順治四年進士授戶部主事歷郎中出守興化興化邊海亂後苦寇盜備弛而役困鏞至稽舊法密植巨木椿於三江汎環之若城復置營舍於楓亭驛要口驛莆仙交割所也籍漁船刷蠹日盜息役平境以大甯官至廣東學使會奏銷案起註誤歸同邑華章志字惟貞順治十六年進士由戶部主事遷刑部浙江司郎中擢貴州提學僉事歿於官在黔時振興文教士林悅熙祀貴州名宦

右傳秦瀛撰

邱俊孫

公諱俊孫字德峻別字額之姓邱氏淮安山陽人也明崇禎己卯舉人癸未成進士順治戊子授刑部雲南司主事歷晉河南司郎中吏部有奸胥號四天王者所爲多不法諸曹郎知之莫誰何公捕而杖其脊尙書黨公崇雅器之曰真鐵面也癸巳遷漢陽府知府當是時西南方用兵屯戍騁騷芻糗不暇給公令器具各有所司竅敝者輒補之凡供應所需倉卒責左右立辦人不爲困上官按事晴川閣索焚香鑪報無有又索籐牀公引吏至署內見所臥折腳牀木板垢敝粗具而已上官聞之慙服是後無苛求漢陽守者有妖僧詐稱奉敕來車徒數百人勢甚張所過郡縣皆爲煽惑

爭逢迎恐後至漢陽謁公公坐堂上一見辨其僞怒叱之下縛置獄中力請巡撫入告乃伏誅公故饒吏才數十年疑獄手自剖決胥吏具文案無敢訛法者初抵任卽誓城隍神曰事不明神相之心不公神殛之至今楚人猶傳其語在漢陽六年擢山西布政使司右參政分守冀甯道未行遂解組歸去之日士民泣送百里外旣歸卜築於平橋之東偏杜門修內行性儉樸自少壯及老無聲色之好食無兼味衣不喜紬縠一袍澣濯經十寒暑不忍棄先是王師下江南六合令罹於法當事出偏師將屠之而以公監其軍公極言無他狀自馳往城下說其父老出迎城賴以全其好陰行善事多此類也病革時揮女子子婦使去曰禮男子不死於婦

人之手遂卒時康熙丙寅十月初六日也年八十一子男九人叔子象升乙未進士累官翰林院侍講調大理寺左寺副季子象隨甲午拔貢 召試博學鴻儒授翰林院檢討皆爲時聞人澄中與象隨爲同年友知其家世最詳故備著之云

論曰史稱建武中一札十行與諸長吏相咨問故一時循良輩出無難也公當 國家初勦時勢倥傯而能不動聲色供大役摘大奸非具過人之才者能然乎觀其省供億與民休息抑亦他日龔黃之亞也聞其撫六合時所活不下數十萬人其子孫克世宜哉

右傳李澄中撰

158-072

158-072

崔爾仰

聞喜子高崔先生既沒之三年其孤端等寓書京師以銘壙之文屬余謂余辱交於先生久庶幾知先生者余不敢辭嗚呼銓曹握天下人才進退之柄提學使者握一省人才進退之柄二者均國家治本所繫不得其人以任之未有不卒至於債轅折軸者也我朝三十年來任斯職者接踵相望而兼歷者蓋寡故事吏部郎無遷轉他曹及秩滿升監司郡守之事其以例歲出爲監司者又往往不能爲學使蓋吏部郎之歷他曹復出爲學使皆自吏部與五曹郎一例遷轉始於子高先生兼歷二秩實勝厥任惜乎天戾其年而使其業卒未竟也方癸卯冬先生之以晉州守入銓司也家

大人實以假滿再入吏部典選事先生至相倚如左右手時銓法紛更惟先生議與大人合每補銓一八更定一例必執舊典與持異議者誣諉辨論不少屈如品級考之更定供卯法之初行其間謬戾錯迕多所牽制先生皆力持之傳不失國家大體而後已功令重懸賞格招徠乞降之人闖越閒投誠至者歲無虛日先生曰高爵厚祿以待降臣廟堂之仁也顧其仕籍既無可鉤考而降者自署官秩輒稱三事大僚高者得驟躋監司其次亦不失爲郡佐朝廷名器可若是其濫耶於是嚴覈符牒譏察印劄僞冒者肅然一清是時柏鄉魏公寶爲冢宰先生爲公及門高弟嘗以二程遺書手屬先生校訂其以理學經濟期先生者甚厚旣官銓曹爲

之長益相推重意欲屬先生典選顧格於例不得行乙巳竟遷戶部浙江司郎中時家大人業以例出爲河南學使先生每見書俛仰時事戟手太息深嘆銓政之體日輕仕進之途日雜區區一己之出入軒輊固非所論也未幾遭外艱去戊申復補戶部廣東司郎中己酉典四川鄉試庚戌出爲浙江提學道僉事先生自念秉持古道不能隨事歇轍間詢家大人在中州事益慨然三嘆以謂得行其志之難或曰昔崆峒滄溟皆負海內盛名出爲學使惟公勛之先生曰崆峒以諫謫起江右失歡僉中丞鄭方伯幾中於禍滄溟在陝西與殷中丞爭文移不得竟拂衣去某之迂拙倍甚於是其能免乎雖然謹守繩墨砥礪廉隅可自盡者此而已矣其他

何計焉既至浙頒示條約申飭月課修繕學校以浙東諸郡爲冒
籍託足之地首試台嚴杜冒濫嚴較課不數月宿弊悉除自督撫
大吏以下皆翕然稱之比至茗溪勞瘁邁疾食格格不下咽矣猶
强起竣事而病益不支越旬日遂卒浙士民聞者無不咨嗟隕涕
先生諱爾仰字子高世居聞喜縣南邱村曾祖永甯祖東曾父
贈奉直大夫直隸晉州知州俊母馮太宜人先生之學以明理盡
性爲宗自幼游元修成公之門得其指授沈酣於性理大全諸書
明體達用措諸行事事奉直公及馮宜人盡孝事其兄盡悌遇族
黨子姓有恩戊子舉孝廉會土寇竊發身至賊庭以至誠動之遂
降其眾筮仕晉州勸學墾荒訓鄉勇停贖醵治行爲畿輔第一在

戶曹主粵東展界之議開復粵諸生通糧者百四十餘人得脫於
罪生平行誼指不勝屈孝感熊先生誌之詳矣茲不復贅特節舉
在銓曹與爲學使時事此二秩者旣爲國家人才根本之地而先
生理學經濟悉見端於此且書從家大人後聞之尤詳故不禁觀
縷述之嗚呼先生真無媿於古人清修真節介然不易其操者與
先生生於故明天啟五年十一月二十七日卒於康熙十年六月
初一日年四十有七以某年月日葬於某原配李氏 封宜人子
六人長端次靖己酉舉人次章次毅次集次賢銘曰
繫先生行瀉備植孝友寡求伎師道立經術粹年不永德無媿名
千仞視百世辛亥卒壬子殯

國朝通志卷一百一十六

右城銘張玉書撰

三十一

朱廷璟

關中之學經術則高陵三原辭賦則北地武功起衰正始震動當世而所爲古文不無少遜焉豈才有難兼抑川嶽之氣不盡暴故積而俟其後以予所交太史朱公其文體高而義潔質而闕雅而不腴有典有則如其爲人視吾鄉先進諸賢所謂相須殷而相得乃無缺者耶朱氏之先山西之洪洞人元末避亂徙居富平故縣治之西郭遂爲富平人數傳至公之七世祖景春景春生全全生志清志清生文章文章生武客武客生公王父濬庵公諱崇德以子貴封都察院右僉都御史崇禎十六年殉難疏聞贈右副都御史濬庵生公考西崑公諱國棟繇進士歷官兵部右侍郎出鎮昌

平加從二品服俸贈右都御史其勳庸譜系具載新鄉許太僕孟
縣薛少宗伯志表中配邢夫人生公順治三年舉於鄉六年登劉
子壯榜進士選庶吉士八年授國史院檢討 馳恩父母如其官
十年改工部都水司主事擢吏部驗封司主事調文選司主事十
二年新令擇才外任加一級授山西布政使司右參議分守口北
兵備道 覃恩階朝議大夫 賜誥爾世升山東按察使司副使分
巡登萊海防道十六年升河南布政使司左參政分守河北道十
七年罹太淑人邢夫人憂歸終喪康熙四年補廣西分守左江道
餘如故七年春代藩伯述職京師會撤天下諸道使者竣事復於
楚而歸待次里居凡十年竟不起云初司馬公艱於嗣令蕪湖日

親禱江神其夕邢夫人感異夢誕公公生而寢然弱不好弄性至敏四歲能誦文周折如成人明年受毛詩輒解大義值司馬公爲給諫所與遊皆海內豪俊每讌集必立公於側有所叩矢口而對會稽倪文正公孟津王文安公皆深器之公愈益折節向學與寶雞黨太保子恂如華陰王司馬子宏撰有關中三童子之稱後侍司馬公榆關延侍御涉江陳公爲師陳高自標尙不輕許人一見公文矍然曰曠代才也司馬公移軍都兩月病卒公侍湯藥治含襚訖無少憾扶柩而西徒步數千里道旁觀者至爲流涕抵家公年十有七耳當是時國家未造綱紀久弛公又驟失厥考終鮮兄弟人懷覲覲而里中貴胄方盛飾裘馬治具相矜過公之門倪笑

萬端公掩關讀禮衰服茹淡若罔聞也已逆渠自成破秦藩僭號械致士大夫迫予之官否則徧加榜掠攫其金無已時公適宕山右間變以母夫人故痛哭南邁至臨晉城已空山行失路有老人止之月餘從閒道還省母一夕邑令捧僞汝侯劉宗敏檄趣公往見宗敏於賊中最虐度不免嚴戒僮僕勿驚太夫人昧爽託他事隨賊騎去俄賊戰河上大敗蒼黃奔散公獲脫焉先是富平多名公卿彪炳史籍然無由庶常起家者公以高第讀書中祕閣數百年之風氣具詞林儀仗迎養母夫人京邸一邑榮之屬疆宇初平銳精古文館課之篇彬彬復古而公嘗弁冕同舍生皆推讓之矣爲水部典陶外器紡績堅固完好有聲於大司空爲司封遷首曹

時安邱憲石劉公以相國筦銓而劉故館中師雅知公相得歡甚
公悉展其長釐掌故祛弊端請託不行輿論稱允適劉復入相代
者鐵山王公王頗自負曹屬必引置弟子列公獨以太宰事王王
銜之客有爲王說公者公曰吾以禮自處所以重王公非簡也王
聞益銜之及擇廷臣才望歷試外藩遂密奏公姓名時王方得
君而公竟以少參飭兵上谷無愠色王因大悔求見公急例省郎
爲外大夫出都持刺謁太宰太宰受刺不受謁王豫囑闈者伺公
至卽延入握手道肺腑盡釋前郤又先之於所往卒爲至交比奉
母之宣鎮宣罷監司久法制蕩然公甫下車黜墨吏擿奸民振舉
大綱數月而治督府仲若張公薦之略云律已正馭下嚴撫實語

也既而兼懷隆自懷來奉太淑人詣登道署太淑人春秋高雞鳴
公衣冠趨寢所請盥櫛繼進以粥食畢掖登涼輿則騎而從其後
里許數問飢渴安否太淑人顧左右覆以蓋稍覆仍麾去烈日霖
雨四旬弗倦抵登兵缺數月餉聚謀海祠守偵其狀夜白公拘之
公不可曰事未彰而拘之是速亂也翌日閱守庫所蓄與缺相當
乃召諸弁唱給之皆大悅餉至仍如茲納守庫無何海艘陷瓜儀
侵江甯傳言分突山左而營將遠在西川一日夜候騎數十至公
出理疆事入侍太淑人舉止雍容既解嚴太淑人弗聞也嘗有羽
檄中夜來事甚急將吏相顧失色公飲酒賦詩自若而密增沿海
守戍人藉以安遁寇于七羽翼徧登陽受撫而內實叵測前行部

者至其地稱病不見聞公來卽蒲伏聽約束公戒而遣之瀕行語
代者曰此見瞻顧非常他日必爲海上憂宜漸除之莫卒圖也後
御者失策果如公言移璽懷將太淑人以去凡七閱月四至衛源
再供軍食微金責詰盡日不休夜歸則吏抱牘甲乙陳於前篝鐙
次第審之事訖太淑人熟寐矣密詢侍者起居乃就寢質明復馳
去信郡王休兵河內供億靡辦而太淑人疾且作公憂形於色謁
王王遣人問參政何憂公以情告王顧撫軍命太守代公董餉公
歸侍太淑人太淑人疾革以卒公屏勺飲者數日西旋臨河送者
數萬人其年營司馬公新阡成奉母邢夫人合葬哀毀骨立遂患
齒痛終身苦之然其邱隴一如禮法蓋司馬公薨未幾恤典甫下

而天下亂故坊表之外不敢有所私樹也畢服入都異時同位寥寥而後進多據津要公寓遠寺絕賓客益肆力於古久之補左江先友人自都移書虛河東促公公恥與奔競者同故遲其行例猶當得南陽公恬然曰仕不擇地粵西山水佳吾自樂之賦左江四詩人傳誦焉至潯獠獍錯處漢法不能繩公清淨鎮之迄以安堵旁屬萬山幽邃往往藏大慙察其尤著者遣吏召之各如期至按輕重置以罪餘悉散去不問盜遂息其入 覲也去桂林百里闕裁缺再辭不獲終事而還十年以來絕口不談世務所居自壺若寢若偏若別墅皆徧布圖書手一卷翫習如素士日鈔盈几寒暑不輟閒遊西園招同人燕歌其中逮夕忘返今茲歲在彊圉大荒

落春三月臥疾七月辛卯大漸以卒距生天啟五年七月丙子年五十有三公至孝事司馬公及母夫人委曲得其歡心喪葬盡禮歷官二十年不以中外易志公事未畢不敢嘗食爲政持大體不矜苛察而吏自不欺不市惠而所在戴之如父母御軍暇整賞罰以信往文武多相齟齬公所至宣府河北佟鮑二帥咸有飲醇之嘆性沈毅言不妄發行不旁顧臨大事從容有斷銷患未萌人卒賴之事上官方介不阿故東撫某恣睢齊魯間蔑視藩臬大吏見公則敬接之粵督某暴甚獨稱公正士繇筮仕至宦成清慎自矢遇屬員儀稍豐卻而不視曰此必貪吏否卽有他故干我或蔬粟則受其最寡者曰不如是人疑我矣嘗過梧梧使者董公奎武餉

以酒中途啟視皆白鏹 覲旋漢上董已物故卒返其子粵荒徼
達官多患貧恆貿易自贍公不屑也金撫軍語之曰朱君誠廉從
者得毋病乎公以拙於謀生對一座大笑還渡洞庭中流風起檝
者患舟輕借鄰鐵二千斤載之始濟粵故產胡椒蘇木沈檀諸珍
貨歸之日未嘗蓄把握有所須取之肆中重然諾好施予戚友有
急必竭力佐之在外遇鄉人尤軫厥困上郡劉子漢客名宿也其
兩兄官粵客死貧不能歸公故不識劉爲捐貲返二喪暨其帑焉
厚視故舊溫縣張公斗司馬故吏公至懷首卹其家同年修武龍
圖范公崑山震坤諸公早世其子竝幼見必撫背勉之給諫季公
天中東謫公以他事不預祖道語及輒泣然曰吾負斯人雅擅人

倫之鑒遵化汪公之洙秦州陸公舜上元鄧公廷羅長汀黎公士
宏瀆安商公顯仁同安洪公承甸河內賈公光德臨潼呂公振之
皆所特拔士後多至卿尹功伐足紀云家食則夏葛冬褐乘羸馬
從二小奚遇者不知其貴人非公事不至邑令邑宰雲中郭公夙
重公數造其廬詢以興革大故公閭閻而言無一語涉私元日必
糾宗人祀祖於廟祀畢以次拜尊屬或難公貴固辭公執子弟禮
並諸諸弟姪有小過不假以色既改待之如初鄉人以忿就質者
每望廬返與人交落落穆穆雖褻莫之敢慢而中懷坦白久處未
有不竭其情者且人人自以爲得公矣論學之外無所不及惟朝
政得失官司短長禁勿道尤恥談貧富策計然客或笑語移辰無

敢以賈嚮之說進者生平喜讀書卷帙連屋無一不屢更繙閱而
罔無污損之迹至非先正格言則不一寓目見鼎彝字畫諸名蹟
摩挲不置顧子弟在側則又推遠之曰嗜此固善於權子母然貪
之均癖也善飲竟夜不醉作字端楷雖一削草不苟曰卽此爲正
心之助蒸人于歸四十年相敬若賓終始無違言待其子身爲義
方情極憐之而訖無所寬假庭訓有云立身務圖遠大爲學切忌
淺率又曰乘此春日須努力學問吾第後數十年始知斯道惟勵
怠惰戒滿假乃臻實詣耳所爲詩俊整自成一家無片言襲人文
爾雅深厚庶幾漢京方之廬陵南豐得唱嘆之神無擬議之陋晚
年諸作尤爲入室焉於書無所不貫卓有依歸而不輕詆訶人所

著循寄堂集十六卷古文函始四十卷古文函餘十五卷仕學箴
語一卷間默堂文約一卷鏡波園花木譜一卷其餘評選若干俱
未梓藏於家配楊氏果 封淑人康彊善飯男子子二長樹滋次
樹善女子子二將以十月辛未就窀穸於邨之東北阡葬有日矣
表弟長君樹滋齋所述行實來問銘憶公弱冠與予先後受知邑
大夫觀察翔山崔先生並有國士之遇而楊若田皆予所自出公
預鄉薦予得以淑人末戚數相過從又二十年序公之詩於燕臺
比倦遊還山中當公休沐而遊日益密兩人有所製非走書相正
卽躬自往來賞奇析疑不愧古人公已矣予誠譾陋顧知公之久
而兼善長君莫予若者乃不敢辭据所見聞合之長君之狀撰次

如左其詳則有狀存焉公諱廷璟字山輝里中舉初官稱太史公
銘曰

朱氏之先聿潛厥德司馬肇興盡瘁王國爰及太史令聞允塞校
書石渠萬夫之特翱翔天曹好是正直秉鑒攸孚衡材不惑數參
大藩載驅南北以旬以宣靡有遺力孔翠華躬羔裘素絨政在四
方文爲世則歲戾龍蛇陽逢薄蝕百身莫贖七月永息雖顯於位
而施未極胡豐於才而年是嗇相彼東原新封動色樹表前坊干
秋同式莫高匪荆惟浮配食漆沮匪遙二澗來卽嶽峙如屏川流
汨滅啟佑後人繩繩翼翼

右墓誌銘李因篤撰

林嗣環

林公名嗣環鐵崖其字順治己丑進士歷任廣東提刑按察司副使分巡兵備道兼理學政駐節瓊州瓊州在海外兵民雜居維時李撫軍瑞吾最賢而兵頗橫有兵毆民者林笞其兵而僱其民於衙內一時將領甚憤擁眾入林署爭之林端坐不爲動但引頸向將領曰惟殺我無多言我懼死不笞爾兵也兵將唯唯而退舊藩造二人入林署言事連騎至公坐不下林詰之故誤各與三十杖舊藩大怒賴撫軍曲爲解乃免時同城有高總戎者林與之抗禮不少下林往顧高干旄甫及門高卽啟門出迓高來顧林林時視事或偃仰必從容而出一日高具酌林極晏而赴之及庭一揖罷

卽曰倦甚請少休乃就寢別館相相酣臥比醒已三更矣高肆筵設席梨園之外繼以小優已而出家伎佐酒林歡甚問高曰此優皆何處人耶高曰卽瓊州人也林停杯放箸舉聲痛哭一庭皆驚高怪問公何爲者林哭曰爾辱我我不堪也問何爲相辱林曰余監瓊瓊民皆吾子女爾酌我而令我子女歌舞我何辱如之卻席而起林高互揭得旨各降四級林爲長三寸木版朱漆金書欽降四級使二役持之以謝瓊海之客蓋林居官時凡所投刺及上下文移啟劄皆用紙長三寸纔能容其條記居恆曰吾無從得錢買紙其用長三寸木版署官銜爲前導蓋行之已久矣李撫軍嘗招之及席卽擁几而臥將罷飲同列推之乃覺撫軍但曰彼倦

耳其疏放如是其後林高復辨於朝各杖戍遇赦免林客武林遂家焉當在獄時適與周元亮侍郎同繫二人從狴狴門隙中傳遞唱酬詩句已而笑曰不圖吾兩人詩筒乃在此詩具元亭集中迨客武林諸當事爭延致之得其一字畫以爲榮無何當事皆去林僦屋西湖上貧以死妻子客寓晨夕不繼林樞暴露無收葬之者丁巳余來湖上尙見其二子辛酉次子又死噫悲矣余與林同譜從未識面但從諸集見其一詩一序今搜其全集尙存四冊皆曹秋岳侍郎所訂正余旣爲其子畢嫻乃葬之於昭慶寺西五里龍潭上因記所聞於王巢雲副使者志其居官崖異如此巢雲謂伊蓋聞之蕭舍之災嘗云

右傳唐夢賚撰

陸振芬

陸振芬字令遠本姓林居辰山弱冠入幾社陳子龍夏允彝以爲不凡順治六年成進士會兩粵未平廷議當破格用人令隨大兵進討振芬奏對稱 旨特命爲惠潮巡道是年十二月 王師克南雄七年三月度大庾嶺抵韶州府巡撫李栖鳳傾心倚毗每事必諮焉時韶陽以南俱送款獨省城未下督兵攻破之遂同總兵郭虎等由省城至惠州府勦撫歸善海豐諸寨未至諸寨窺兵寡弱來拒夾師而進振芬選精銳數百繞出其旁獲一隊諸寨股粟於是諭以禍福投順者踵至至海豐辭進抗守不下振芬與鎮兵駐五坡驛總兵班某兵亦自羊躡嶺合攻之兩日城遂下石碣衛

等處相繼歸服八年抵潮州任兩月內聯結諸鎮檢制土官招集
流亡簡省徭役民始有更生之樂時亂後法嚴府縣往往濫禁無
辜振芴定以逢五十日清理二年之內囹圄一空九年平遠失守
振芴會師復之總兵郝尙久於廣東未附時投誠素懷不軌是年
冬間撤以爲水師副總兵遂連海寇結土賊僭制營建帥府振芴
察其逆謀屢牒平南靖南二藩及巡撫早圖弭變弗應十年春尙
久遂自誓爲新秦侯圍道署振芴以大義諭之不從乃密遣家人
告急請兵七月都統率兵至潮振芴約爲內應九月十四日晚掖
外兵而上出其不意尙久授首事平引疾歸里優游四十年始卒
先是廣東惠來張庚振芴署學政時試童子所識拔者也康熙二

十七年秋庚以舉人來令青浦首謁振芬振芬告以地方利弊語不及私子三長祖彬字孝質天性惇摯收養從子族孫之孤苦及族嫂之孀獨無依者葬其疏屬十一喪康熙四十八年水災貸金糴米五百餘石轉貸之藉舉火者數百家好行其善不恤勞瘁卒年七十有七

右傳王昶撰

王垓

康熙甲子歲正月十有二日浙江按察司副使膠州王公以疾卒於甯波官舍公之子錦銓鎮將以三月初一日奉公喪歸膠州乞銘於世之大人先生而葬焉屬錫嘏爲之狀錫嘏乙卯之役出公門下獲侍公者十年雖不文其何敢辭公諱垓字某別號巢雲其先由湖廣麻城徙膠州遂爲膠州人曾祖諱心學贈大同府通判祖諱楫陝西乾州知州 贈中大夫父諱文炤松江府通判 贈中大夫母宋氏繼母趙氏俱 贈淑人公累世仕宦皆清白吏家無餘資通判公生六子公爲之長當通判公老而家居公教授生徒以脩脯供叔水衍衍色養自力於學戊子舉山東鄉試己丑成

進士授行人司行人大行故清暑藏書數千卷居其職者非奉使
馳四方則酒食邀遊公與同官月爲會出署中書讀之參互校讐
爲笑樂未幾有冊封琉球之役琉球懸阻大海風土饒樂其君
長自號中山王非得朝命不足以號令其國每一易世輒奉貢
請封惟謹然其地直福建南由漳州出海舟行大洋天風簸蕩島
嶼出沒有大小古米山之險往者或不能達以故人憚行順治十
一年琉球請封疏至同官有所避就公資未當使慨然願往奉
旨加一品服偕給事中張學禮出使入境宣諭朝廷威德進
退有禮王以下皆聳服臨行餽公黃金九十兩固卻不受使還拜
通判公牀下曰此行幾驚吾父然在官不避難臣職也兒何敢辭

升戶部廣西司主事歷員外郎中督臨清鈔關課稅有法商旅不
擾改授科員裁缺補陝西道御史巡視北城輦轂之地五方雜處
公以時稽察姦宄肅清康熙八年七月丁通判公憂回籍服闋十
二年七月補兵科給事中轉戶科掌印給事中時適當三藩叛逆
四方雲擾之際度支皇皇調兵食不給公在戶垣會計天下錢糧
出入多寡之數以爲開不如節節不如覈因請停無益之驛站查
銷算之價值苦心蒿目以佐軍興萬一至其於民生休戚如賑饑
荒贖難民諸疏又未嘗不慷慨持大體也凡公所上封事屏人屬
草疏上輒焚之曰吾不欲畱此以沽名也典試浙江矢公衡校所
得多知名士公引與語煦煦如家人父子士以此樂親公十七年

八月奉 旨外轉十八年十月補授浙江按察司副使分巡甯紹
道浙東故瀕海苦海患數十年寅卯之交巨寇接境地方驛騷又
海上游踪飄忽靡定時或闖入內地遭其蹂躪二郡之民瘼矣公
至按行邊界整飭斥堠象山諸邑瀕海困苦鳩形鵠面之民環聚
而訴馬首公下車撫慰諭有司經理其業民賴以生在甯波五年
潔己自勵日啖蔬茹壹意與民休息俗好訟小忿構鬪張皇險膚
公槩不爲動其或有所冤抑懸鼓於門聽民得自擊擊聲聞公立
出堂皇召兩造質曲直數言剖決去庭無宿獄往來會城路由紹
興艤舟河側問民疾苦窮簷蔽屋之中人人得自達凡有追攝符
檄皆下屬邑不遺一吏卒曰民自奉法耳柰何令若輩擾吾民史

卒帖帖白日臥不能名一錢也訟獄讞決悉捐贖緩著爲令自公
之來二郡年穀順成家戶豐穰漸有起色實陰受公福云嗚呼公
落落一諸生抗志自奮列爵於朝爲天子出使萬里外蹈風濤
不測之險不辱君命出入曹署敷歷臺省所經畫皆天下大計
分符兩郡宣布恩信以勞來安集嗷嗷瀕海之民公之遇合不
可爲不盛公之施設不可爲不多獨念公年雖老意氣彌壯飲噉
踰常人旦夕治文書不中程度不休勤苦砥礪未得竟其用癸亥
舟師將出海七郡治艦於甯波公一身董其役十二月猶冒風出
視船工竟以此得疾今餘孽蕩平海波不揚公任其勞宜與享其
成而公死矣此則可扼腕爲公惜者也公生平雅不近名凡事皆

直行己意無纖毫彫飾與人交洞見底裏意所不可雖親故未嘗
曲徇人亦久而信之公弟五人皆奉公教以公爲師公生於明萬
厯戊午十一月初七日辰時距公卒得年六十有七娶匡氏封
淑人子三長錦貢監候選知縣娶高氏繼娶袁氏次銓次鎮俱幼
未聘女一許字同州丙辰進士張治未嫁殤孫三長沂聘法氏次
浚聘張氏次泖幼未聘孫女一幼未字謹狀

右行狀陳錫嘏撰

徐惺

皇帝卽位之九年庚戌 特命山東布政徐惺分守武漢黃三郡
始公以進士典中書爲 世祖章皇帝侍從多所獻替擢都諫條
上天下大計剴切明直參知山左號清剛第一有司望風慴懼而
公威而不猛周索民隱如恐不及歲辛亥春輦車按楚駐於蘄夏
大旱赤地千里扶病籲禱遠近流冗洶洶忡忡於時倉粟虛耗一
切荒政久廢不講心熱形賴思所以拯之者百計廉舨飭石悉席
衣禡易米太夫人宋夫人李盡出簪珥佐之募義者繼踵乃爲粥
於路在郭者三遠鄉各占聚落檄所部如之自冬徂春活饑民不
可算數庚癸息呼於營壘老弱免死於溝壑抄盜不作境內晏然

公之德可謂厚矣冬大雨雪單騎入山衣不暇燎日不再食所至
饑民擁馬足炊煙粥香隨馬而起除夕尚在窮山夜漏三鼓駟歸
望闕行禮畢復馳赴元夜太夫人遣吏寄語曰勉之母以省我
歸也公有弟悰有子名貽皆申太夫人語如前其家學如此十八
日乙丑雷電雨雪平地深二尺公在石人山有老人三五貿貿然
來公曰嗟父老苦寒可就粥曰否欲粟乎曰否民年八九十矣經
兵凶可屈指未見官府入山振饑欲瞻公何等面貌耳民又聞公
在山東立老老幼幼二社每出羣兒數十百跳趨前後此送彼迎
數十百里不絕其老登百歲者至十數或扶杖詣馬頭擊拳笑曰
敬貽使君出握中果蒺藜核皆熟公忻然受之蓋天性誠愛視民

如父兄於子弟如骨於肉宜其煦妪親附有如此者公之活民也
無汲黯之矯制有孔光之稱旨人臣不當如是乎方公入賀萬
壽儀民禁阻不可得炷黠爲香擁蔽道路郡人貌像拜祝於山東
共刻石以頌而景星爲之記復俾歌吟傳於無窮

奕奕楚甸湯湯江漢洪跨磅礴維南屏翰羣路墜旻兵輪甫息發
輶抗敵喁喁戢戢煤毀饑穰干支相循雨穀於野甸已火行旱之
庶盡公來自東雲之容容露我菅蓬藿拳未紫斲枕露谷公之來
思煙生鼻足出溝登衽被骨以肉兒不肖唬野無行哭鞠我烝黎
思若舍館 帝力廣大公功懋茲楚甸奕奕江漢湯湯德音不忘
保艾永臧

右振濟記顧景屋撰按徐公江南人順治六年進士

五

國朝書獻類徵初編卷二百七目錄

監司三

汪繼昌

狄敬

潘瀛選

姜圖南

戴聖聰

簡上

韓庭芑

邵燈

顧大申

洪琮

尹惟日

唐賡堯

黎士宏

沈喬生

陸求可

張為仁

胡在恪

李可汧

劉昌臣

補錄

黎士宏

國朝名臣言行錄卷一百一十一

國朝有獻類徵初編卷二百七

通奉大夫前署江西巡撫江西布政使司布政使湘陰李桓輯

監司三

汪繼昌

公姓汪氏諱繼昌字徵五號悔岸徵之欽縣人也先世在漢爲魯國人仕於吳遂爲吳人其世次不可攷至趙宋時有祕書丞諱叔敖子孫始遷欽之叢睦里爲欽人曾祖德潤公諱珣仕前明爲藩府郎官祖起莘公諱可覺舉於鄉有時譽起莘公生封參議然明公諱汝謙公之顯考也封公始遷家於杭有子二長玉立邑文學公其仲也封公以文章氣節重當世四方名公卿賢豪長者無不

願交封公飲食居處之座恆滿無不愜其願見懷公卿咸欲登封
公啟事封公堅臥力辭得免公少年時侍封公卽徧識海內諸前
輩英豪挹其言論風采海內無有不知汪仲子者爲兩浙文壇少
年冠順治戊子舉經魁己丑成進士主司咸以得公名家才望爲
盛事僉謂公宜居文學侍從地公以例當得郡司理勿妄冀澹然
辭之當是時自江楚南及兩粵新入版圖梗化者猶時告警廟堂
銓選官其地者需才急凡有才能名俱以不次擢公越次得瓊州
守旋超授廣西左江道布政司參議丁酉升湖廣湖北江防兵備
道按察司副使一年罷歸公之在左江也李定國蹂躪徧粵以西
公赴任未幾大帥檄公赴援蒼梧公至南甯倉卒無舟渡公盡棄

資裝江中以單舸奮身進未至蒼梧陷時賊騎徧野人無固志公
調兵食起瘡痍補卒乘爲恢勦計時經略輔臣洪公知公忠勤招
致幕下參機密公早夜勞瘁寢食俱廢言於經略曰弭亂之道外
攘必本內安內不安則奸民從中煽惑良民外賊鉤連釀禍無已
難奏底定功明公須嚴飭所在有司務招流亡鎮反側劑文武軍
民要在各足其食如是則眾心固金湯不在封疆在衽席矣安內
之策周斯外攘之功舉經略公是公言公居幕府二年兩粵之民
大集公之畫居多也公之在楚江防也當川湖黔粵衝師行往來
如織地盤錯叢奸民漸漬於南蠻稱最劇公寬以柔之嚴以威之
事董大綱餘悉付羣有司不問卽大府飛檄如雨公惟量事緩急

不稍有遷就屈撓適征滇師過將軍藉送迎微嫌中公以簿書期會之過劾罷歸公慨然就道略不置辨人咸歎息公少年起家科第歷任三瓊州未抵治卽擢去止兩爲憲司皆驅馳戎馬金革間日與武夫悍將爲伍籌芻牧糗糧軍實櫛沐寒暑風雨中古之勞臣忘其家與身者公無愧矣公持己廉慎而賦性剛直受知大帥而亦爲不知己者所憎卒以是廢可不爲當世惜此人乎公旣歸田被服儒素與朋舊飲酒賦詩不事聲伎耳目之好所居有隙圃栽花種竹絕口不談時務常誦老子之言得時則駕不得時則違累而行其素志也憂人急於三黨酌本末輕重之宜以爲敦睦利眾之事不惜克己爲之故身沒而人思之不置封公沒所遺田廬

及前代千年鼎彝書畫物悉讓其兄曰我既食祿於朝義當如是公登第後服官不及十年歸田優游二十餘年勞於出而逸於處公居杭入籍嘉興故又爲嘉興人叔仲方公無後以公嗣封公之卒也公適被楚江命經略公以疆場急勉公墨綬從事此眞勞臣賦不遑將之章者也公生明萬曆丁巳卒康熙癸亥年六十有七配吳氏 贈恭人繼配吳氏 封恭人子一文孫貢監生女一適潘孫五錫甲國學生兆甲先甲俱庠生次桂甲偉甲以某年月日葬錢塘長壽鄉白巖山之新阡銘曰

維汪肇業有吳始揚繩繩祕書儀型弗忘顯於南服世以克光遙遙宿源天路雲翔孝廉振振文學濟美於赫大夫睚眦特起嶺嶠

諷思江漢樂只文韜武略家乘 國史惜天不誘惟泉在山曰霖
曰柝海內永歎千秋松檟奕世作焉

右墓誌銘葉燮撰

公諱繼昌字徵五號梅岸先世自唐越國公至宋祕書丞叔敖支
庶繁始析遷欲冒祖德潤明周王審理祖起莘萬厯丙子舉人父
然明先生諱汝謙以詩文名天下好施樂善折節賢豪屢辟不出
耽西湖山永遂卜居慕陸苒里陶水仙之風爲方舟湖中植花石
築欄酒鏡茶壺書畫笙鼎名不繫園三竺譚經西冶延妓四方名
士集無虛日縱心條暢數十年舉子女六梅岸其季也然明弟仲
方無子起莘命以爲後垂髫補嘉興弟子員食粟饋順治戊子領

鄉薦己丑成進士方是時西粵新入版圖 上重守牧之選以公
爲瓊州守旋授廣西左江參議伏莽鯁塞二年而後達是時左江
烽火千里撫卹反側招徠賙贍軍民大悅李定國全軍壓境定藩
檄授蒼梧先此左江所隸州縣官未赴任者俱聚南甯倉卒無船
徬徨相向公自沈其裝招輕舟共濟時鎮兵跋扈餉匱定藩急命
輓輸於東粵餉至而梧州失公收兵救梧而桂林已破會禁軍至
隨恢復諸城甲午洪經略聞其忠勤檄致幕下董軍儲乙未春數
夢父病涕泣五請得給假歸然明果時時病猶得半載承歡沒而
舍斂無憾悉以田園舟楫尊彝書畫讓之諸兄獨處一廬請終三
年之制經略謂禮宜降服不許因墨衰從戎丁酉春補湖廣按察

司副使備兵下江駐蘄州江防之有憲使自明嘉靖始當文安賊
蹂躪之後荆王請得憲臣督兵護藩邸故其職掌漢黃二郡芻轄
直隸之安慶河南之汝甯江西之九江地開方萬里城則三十有
八守令衛所帶甲附章之士仰令麾下公至以民間戶婚田土悉
歸有司唯簡練防禦察奸固圉爲己任遠境利害必詳求之制祿
外一錢不入城中士子寥寥具酒食延課文清學田出俸鈔以獎
誘之舊檣導從問民疾苦登覽名勝引觴賦詩不能委蛇上官或
諷之弗改也是歲冬盡征滇大兵過蘄黃挽纜除道徵民夫千例
戶出一人蘄城纜數百家少驚則鳥獸散公哀愍徬徨減其數而
犬猶夜吠不止將軍場帆直上竟不持一摯野艇迎於九江纛艦

乘風江海歎薄艇。權稍遲乃以徵夫不足迎送不恭傳言責讓遂
絀彈章或勸委過有司猶可回幹公曰有司奚罪彼屬意於我耳
越月被逮郡老幼奔號曰仁公以吾曹累何處叫闡公曰父老無
愛 天子聖神吾當與父老再見於此眾持筐酒送二百里外閭
閻嘆息之聲兩月不絕 上果寬宥削官放歸父老子弟復迎二
百里外既解官浮家漢上絕口不談時務布袍盛槩往來山水酷
嗜書集古金石文日做數紙長於尺牘並工詩不以示人居漢濱
二十二年而門無雜客數還武林省墓念黃鵠晴川輒復來楚癸
亥十月小疾長君文孫朝夕侍卒之夕命童子扶掖登樓笑顧長
君吾生平惛然諾而快施與以故略無玩好聲妓身沒之後惟此

國朝名臣傳卷之二十一
五
廳前樓下補花木數株表老夫未展之興其通邁如此年六十七
顧生曰余嘗在金壇張先生公亮爲子言西湖汪然明隱德君子
徵五僦才也他日宜與友後余在武林得交然明先生及公持節
來楚述張先生言顧郎才子他日當與爲友以故相得甚歡竹徑
草廬每一過訪坐必終日或過籬外輒止導訶曰毋驚幽人之夢
也癸亥十月聞公訃設位哭而悠父老聞之皆哭蓋公之立德在
消民夫公之忝位卽繇於立德嗟乎有是夫陽城元結不底於勸
蘇公刺暴視人罔極公固默然公子爲公狀亦避不書是固然矣
烏可泯焉康熙乙亥九月七日景星追述爲之傳

右家傳顧景星撰

狄敬

嗚呼是爲溧陽狄陶鄰先生之墓先生既卒之四年其孤億銜遺命走金陵謁予且拜且泣曰孤不天先君子以庚申閏八月棄世先君子臨終時屬不孝孤曰孝昌熊公雅善我我卽死誌我墓者必得公言爲足徵汝小子其謹識之毋忘此治命也今孤將以是年十一月葬先君子於荆溪銅官山南嶽之麓惟先生哀而賜之銘先君子死且不朽予自廢放來筆硯荒蕪已久矣第念予楚人也異時聞先生衡楚狀甚悉近寓居金陵又頗側聞先生生平是烏可以不文辭按狀先生姓狄名敬字文止別號陶鄰上世出自梁公世系無所考元至正閒有英者任江浙行省副使因卜居於

國朝通志卷之二十一
溧之胥溪遂爲溧陽人四傳至理遷於邑北郭之塘下里又八傳
至用賓太學生潛德不仕是爲先生之考生四子先生其季也先
生生而端重寡言笑舉止如成人稍長勵志於學以古人自許動
必循禮見者以公輔期之年二十補博士弟子有聲士林下帷攻
苦親友罕得覲其面學成執經者踵至先生皆勉以實行曰學貴
自信信之篤然後行之果游移動蕩坐所見不真爾人以爲知言
順治乙酉登賢書己丑成進士授工部都水司主事先生曰旣受
國恩卽隨在可圖報稱不然生平所學之謂何庚寅冬被命
視河夏陽時兵燹之後河務廢弛先生露處河干躬自相度殫心
濬築備極勞瘁與工役同寢食者二年而河工告成仍做潘氏河

防一覽編輯源流形勢及疏鑿利病諸事宜曰治河紀略付諸劄
劄以傳永久差竣回部升本部屯田司員外郎甲午以文望簡授
湖廣提學道先生聞命喜曰此吾事也遂單騎到任恣飭學校
力剔宿弊每臨所部則先擇期詣學宮集諸生講臥碑不如式者
輒撻之諸生至前皆屏息駭汗不敢仰視先生曰士習頹靡久矣
目今敷教在嚴惟嚴而後可以言寬也試之日緋衣坐堂上焚香
告天取諸生試卷當堂面閱閱畢卽發一切竿牘不得行而積弊
以清所獎拔士皆窮巷老儒足跡從未入城市者人以謂楚中學
使自葛屺瞻王澄川高彙旃三公而後則首推先生羣號先生爲
鐵面學使云任滿宜膺上考而當路有抑之者僅得平轉先生歸

里需次離任之日惟襍被一橐冊卷數篋而已觀者皆爲太息庚子春補陝西潼關道潼關舊巖險重地先生至則加意整飭綢繆周至不以未雨疎其防築關城修衛學清軍伍廣屯種在任七年多所興革而丰骨稜稜大都如衡楚時丁未歲忽起尊鱣之想謂家人曰吾自通籍來溷跡風塵不覺面孔日換今且老矣何用徒自苦爲吾將返吾廬焉時先生年五十有三爾遂力求致仕以去先生歸家杜門掃跡絕口不談世務闢築圃於北郭構屋一楹顏曰五餘軒置經史圖籍其中日手一編兀兀如諸生時先生於書無所不讀尤邃尙書謂蔡氏傳註雖有功於經而意義多晦爲之引伸發明以罄其底蘊曰尙書衍義學者多宗之庚申以病卒享

年六十有六所著有陶鄰集史漢合箋得閒鈔荷鋤倦錄及尙書衍義等書行世娶蔣氏 誥封恭人側室曹氏子一卽億也娶知縣陳德慶女英年有志克世其業女二並適名族孫一幼先生資稟沈毅面目嚴冷生平無嬉戲之語惰慢之容又少嬰羸疾癯然骨立若不勝衣居常炳香兀坐色如槁灰望之疑爲泥塑人妻孥非呼召不敢至前僮僕侍立如木偶門以內略不聞喧笑聲雅不喜見客卽見寒溫外不多一語苟非其人相對默默而已蓋其性行姱峻有如此嗚呼使先生獲顯用於時一秉風紀之任其丰采建豎未必不與前代軒惟衡耿禹範輩相上下而顧僅止於是識者有以致惜於厥施之未竟也先生之衡楚也時予以明經應楚

闕試榜放予倖得雋故事見舉主後卽謁學使予因得從諸友後
拜先生於公署先生目予曰君墨言簡而理盡似歸胡集中短篇
也楚文至君一變矣予唯唯受教而出時丁酉之九月也自是宦
遊南北聲息不通者十餘年癸丑予畱滯京邸則先生家居且七
年矣一日緘手書一函并所著尙書衍義寄予拳拳以經學不明
爲憂而屬予任之意沖然其善下也丙辰予被放客居金陵先生
聞予以遊僧被誣事仰天歎曰豈有佞佛韓退之哉因徒步訪予
於石城精舍執手相慰曰公今之子輿氏也海內士大夫孰不知
之又奚以辨爲言已太息流涕而去予窮老於世落落無所向方
欲詣先生所叩所未聞相與訂東林白鹿之約而先生遽沒矣嗚

呼豈不重可哀也哉是當銘銘曰

其貌則瘠其道則腴以經爲畝以腹爲廚治稱廉正功翼典謨有
書盈室有子坐隅幽人之吉君子之儒銅官片石千載弗渝

右墓誌銘熊賜履撰

											五 十 五 十 一 ノ 二 一
											ナ

潘瀛選

公諱瀛選字仙客梅庵其號也宜興之和橋人代業儒素封父如愚公有別墅南澗與顯宦者鄰計侵業如愚公拒之峻顯宦誣以事致諸獄折券獻之然後釋當是時梅庵公尙髫髻憫父冤弃伺顯宦出舟抵和橋進謁想以大義顯宦直斥之弗爲禮公登岸踉蹌歸大慟和橋巨鎮也民居數十戶遠近聞之無不歎潘如愚公有子云公豐頤偉貌體充碩善飲喜談論雜以詼諧凡古今上下幽奇隱僻之事恆人耳目未見聞公觸緒引伸鑿鑿言之不一爽自爲諸生而氣宇英特與儔人迥異爲文敏贍數千言立就性尤慷慨好施子嘗大言曰使子得君行志則爲所當爲視其職至夫

行利濟之事以愛人育物人苟有心皆可爲之豈待仕哉若置身
通顯踞得爲之勢與時與地不此之務而戕民以自逞彼獨何心
吁可歎也嗣是起家中翰兩司文衡擢兵曹司督捕掌武選郎出
守河閒左遷甬東郡貳陟長蘆都轉運鹽司使數歷中外垂二十
年所在皆著異績而愛人育物行利濟者不勝計當其守河閒值
世祖章皇帝升遐營軍以缺餉故揭竿夜起礮聲四集勢披猖
莫遏撫軍某夙稱巨才事倉猝無以應公曰驕軍之勢遂河嬰
無民 朝廷之法行河閒無軍士兩敗也乘其未遂而救之安軍
士卽以安吾民疾呼酒至列數大斗於前一飲盡單騎徑出諭以
逆順禍福隨大開府治坐堂皇引諸軍逡巡擁擠不敢入公命能

言者數人進與之期數萬金兵餉以一身任之河閒軍民悉安堵
天津距河閒三百里公繼爲鹽官與鹽使周公歷長善課商之暇
行部海隅不廢樽酒一日公大醉悲惋唏噓睨周公曰視此白骨
盈盈徧郊原皆是者君得無意乎聞之居人自故明迄今積累使
然吾輩官斯土凡斯土所有事皆吾輩事也起死人肉白骨者伊
何人不謀所以掩護之虛此行矣周公頷之因相與集枯骸設醮
事鑿坑塹運灰石而鬻之大家以成公之力也公自順治己丑
成進士而卒於官在康熙戊申三月無日不仕亦無日不飲飲則
輒多豪舉亦無擇美好醇醪至當官職業外爲利濟事亦猶縱飲
劇談時意興蓬勃灑灑洋洋無顧瞻卻慮忘其體之疲力之瘁也

河間津門槩舉之以表見一班云先是如愚公遭顯宦後念公之
生無昆弟尤絕愛之不欲其勤苦公年雖未壯益勤奮自勵讀書
不閒寒暑嘗篝鐙徹夜分如愚公與陳太夫人必整襟坐傍舍互
相更代無寐恆清夜訓公曰讀書作好人無若吾宜所稱顯宦者
儔也公揮涕拜而謝曰謹受教由是佩以終身吁公其善成先志
者矣

澹木道人曰梅庵公用世才也而孝於親厚於朋友其性生有之
公少予二歲總角時識公心竊稱異及壯同入仕途俱京職寓舍
鄰近暇則相過縱談或命酒或論文賦詩無不同其不同公久者
惟公頽 詔典試兩往粵西時耳任河閒甬東又北而天津地雖

遠政聲盈耳矣時子亦淹蹇往來南北每遇公然公未嘗以盛衰
之故先後視子頓殊也觀其心有可以助子而不至終窮者皆欲
勉其力而爲之惜乎其死也嗟嗟公雖死而公之長存於世不與
身俱逝者固無涯也

右傳周啟嵩撰

STATE OF NEW YORK
IN SENATE
January 11, 1911

T. 1

姜圖南

姜圖南字匯思號真源浙江錢唐人順治六年進士官睢陳道有

關隴諸集

巡關隴廉得吳三桂跋扈狀露章奏之

杭郡詩輯

右詩人徵略張維屏錄

臣等才庸庸劣
不勝任事
伏乞
聖鑒
訓示
謹奏

三

戴聖聰

士大夫官於四方多以才發舒來江南輒不得志以去爲邦人之
愛惜者比比也而至今猶稱我戴公不置云公初筮仕通判太平
府府多盜練義勇授方略悉平之遷知陝之乾州時滇蜀未附軍
興旁午公預儲俸無一闕者而民不困將軍某頓兵城外暴甚則
闔門不聽入一軍大譟州人反矣嗾將軍屠城公挺身出數之曰
王師所至當使義聲先路而暴犯平民從此而南誰不悉死拒我
且不聽入城者某也殺某一人足矣將軍者悔悟手馬鞭授公吾
士卒過闔閭一步卽手此扶之州境帖然人以公方之段太尉云
尋平州西五峯山羣盜遷同知濟南升濟東興屯道斂事句稽草

田勸耕假種流庸安集丁外艱歸終喪補昌密兵備道昌密項背
畿輔多王公湯沐邑莊頭挾強佩勢羣不逞夤緣聯紐爲民患公
乃通其豪呬嘔慰勞旣習乃爲言奸人擾民狀且累君盍聽我少
檢押各唯唯受教轉相告毋犯戴公約束遷登萊道參議海禁嚴
少犯輒死而內臣駐登州防護興告訐民家大率破公力與內臣
枝柱卒奏記巡撫而撤之河頻歲不治會公以次遷淮徐道副使
首請除徐州荒田賦八千餘頃踰年河大決宿遷先是岸高城踰
丈俯視城窪然瀦也至是水更溢岸復築隄防之甫卽工風雨大
作浪軒簸如雷隄中水鈴鈴出民爭趨城門已闔呼號徹天丁夫
恂駭將盡走公方坐交牀指麾左右牽衣請避公曰無萬數人倚

此隄生死隄不就者吾與波上下耳手持薪槌塞之眾感奮爭負土不日隄成人以公比之王尊嗚呼忘身之難也不惟愛身而已或且以爲囊橐焉河之患臣之利也比歲河數潰 天子臨朝歎息無公忠任事之臣不治則壞治亦壞旁皇南顧未紓宵旰之憂使得如公者落落數輩以從事爲魚之民其有幸乎公尋以歸仁隄故去官初主歸仁者同知劉某工費十七萬多爲上官貴人壽而以其餘自娛公揭其狀於河臣某者三不聽及河臣罷事露勘官問公三揭及河臣受賕事公謝無有坐是鑄級去人咸稱公長者靳文襄公來受事強畱公公跪而辭老母春秋高其養闕然常恐差跌爲老人憂恨今承微罪去私願遂矣幸公裁哀語次淚泫

泆下文襄乃已尋以前勞復原級歸養母金太恭人及免喪遂不復出者凡十二年而終公諱聖聰字無聰以貢生歷官封至中憲大夫先世爲山陽龍氏明初有後於外家爲登州之戴遂氏焉爲世襲千戶尋遷益州衛高祖諱學曾祖諱禹祖諱朝用皆千戶父諱復魁都司僉書以公貴贈如公官公事兩大人盡愛致敬畜其弟更衣并食久不忍析箸也完親黨之不能昏喪者與人交不爲深中切劘不少假而人咸安之長於吏才尤善決獄於濟南廉豪家奴之劫人者於登萊坐婦人之同寄殺其夫而堅不承者於徐州有左道籍眾將倡亂按殺之而焚其籍不問其敏斷多此類自喪贈公葬於歷城因家焉歸田後往來濟上甯連山澤枕

籍圖史旁及釋典諧物外之趣年八十卒於康熙三十七年七月
配王氏 封恭人甯遠衛經歷可登女子四璠丙辰進士兵科給
事中琳乙卯舉人費縣教諭琪珅諸生女二適諸生蔣嶽舉人朱
紋璠在諫垣有聲奔喪來謁銘以葬余旣稔公之服官適奉會議
河工之 旨益歎斯人之難得而惜不獲盡其才乃略其事如右
而系以銘銘曰

金隄萬丈兮使君支大農巨億兮使君不知當其時或愚其爲試
更索兮舍若人而誰已不可追嗚呼自燕秦齊魯風馬牛之地兮
以莫不思匪南人之言私

右墓誌銘韓英撰

簡上

蜀中簡公謙居天姿絕人凡有記覽過目不忘康熙辛亥視學江南江南財賄所都前學使者無不藉營金窟公至力反其弊勢挾利誘屹不爲動每發榜後進諸生而面誨之某某解題中窳某某用古入化並不攤卷於案皆能背誦其文余亦在列所目覩也試蘇州題中有上字一生因公名上遂寫上爲尙公呼是生問故生曰憲名未敢正書耳公怒曰汝將以此求媚耶士人行己貴乎立品卽小可以見大卽窮可以徵達推此意也他日傲倖立朝則婢膝奴顏汝必安爲之矣跪生於庭立令改正又數年公補粵西左江道北地崔維雅者傾險人也向與公同官屢有干請公薄其爲

人不甚應之是時升任粵藩護理院事遂以故巡撫郝公與公有
交借事誣奏繫公於獄公無以自明吞金而歿其明日之午維雅
方啟門視事忽狂呼曰簡公來矣蒼黃亟趨下階伏地叩顙不已
復起立投帽脫衣反手面縛左右扶入內室乃絕維雅疏下部議
白公無罪而公已歿天下莫不冤之

右人史吳翔鳳撰

按簡公字謙居號石湖四川巴縣人順治辛卯舉人由戶部員外郎游遷廣西

左江道

韓庭芑

公韓氏諱庭芑字燕翼其先棗強人始祖瑜徙濟南之青城瑜生相舉人知鄆陵縣相生齊舉人知鎮安縣 贈福建道監察御史四子長一左官訓導是爲公高祖祖父泉縣諸生是爲公曾祖祖父元功縣諸生是爲公祖父考諱太素三子公其季也早爲諸生有名順治丙戌再行鄉試舉解額第四壬辰舉禮部改內翰林弘文院庶吉士授工科給事中疏劾工部侍郎傅某罷之會 世祖章皇帝以卿寺翰林臺省官出爲監司公在選中轉分巡河西道僉事備兵甯夏邊郡人不知學公謀於巡撫黃中丞疏請闈中別立字號定取一二人以勸學者得 旨允行是科丁酉得雋者二

人遂著爲例甯夏兵素驕公繩以法爲之厲禁自是亡敢軌法者
居四年遷分守下湖南道參議駐寶慶總兵官王平者同城居公
與交相得懽甚兵用戢而民不擾楚俗尙巫巫以禍福挾人民甘
受其鞭笞不爲怪久益狂悖乃至以刃斷人臂公捕置諸法民初
駭之旣乃悅服境內有濂溪先生祠亂後廢圯出俸錢修葺之遷
分巡瓊州道副使兼理學政瓊鎮總兵官高進庫素跋扈視督撫
大吏蔑如也公獨枝拄之不少屈兵虐民者逮治之與將卒約勿
擾市肆凡鬻物一錢之直必準市價商賈負擔咸安焉靖南王駐
廣州旗人暴橫有司莫敢問一日有三人跨馬佩刀登公之堂自
稱藩人睥睨自如公縛之而以狀申三院靖南爲謝過乃已自是

藩人亡敢橫海南者遷分守金衢道參政遇 今上登極覃恩晉階中奉大夫 贈父如其官母 封太淑人會禁旅入閩芻茭靡屢所需咄嗟立辦師行而民忘其勞居無何以裁缺歸甲辰丁母憂庚戌起補江西督糧道參政江西漕事當積弊之後積逋三十餘萬前官降謫死亡者至十五人人爲公難之公毅然曰夸娥移山精衛填海江漕卽難視山海有閒矣吾樂爲其易誰爲其難者於是鉤稽積案如理亂絲如察三隧得其糾紛膏肓所以然者乃昌言於巡撫董中丞曰伏見江西督糧一道覆轍相望無一能善全其後詎皆不肖而自取罪戾乎究其本源厥有數端曰寶荒之屯田未清也逃亡之漕課未豁也缺額之運船僉造無從也山邑

之酒米轉運維艱也以及運弁久挂之漕欠州縣借兌之南糧官役侵蝕那移之款項未清而追補迄無歸著也前後凡數萬言不啻痛哭流涕閱三載完解積逋銀六萬兩有奇米三萬五千石有奇又請蠲甯州新喻新淦廬陵諸州縣南昌九江二衛荒絕不能賠補者運弁旗丁及州縣官吏那移折耗漂沒浥爛積年無徵者本折又幾二十萬於是案牘一洗囹圄空虛軍民感公德相率建祠於滕王閣之右癸丑以前湖南開荒奏報失實部議降級公怡然解組歸得般水西別業侯仙園長松蔭庭飛流激澗日嘯詠其閒無復用世意矣次于逢麻令武康迎養廡舍銅官風渚閒幅巾筇杖時以山水自娛逾十載壬戌始起補天津海防道副使癸亥

遂移疾歸里又六年卒公恂恂恭謹與人遊處如飲醇醪一當盤錯則光芒迸出惜其浮湛監司二十餘年雖所至有以自見而猶未竟其用也公事親孝事兄恭通籍後盡推田宅於二兄宗族子弟才而嚮學者必資給推輓之淄川邱璠官揚州同知逋官錢罪且及孥公解金贈之無吝色其於鄉黨皆此類也逢床令武康自矢飲前溪一杯水又年少有幹局積猾巨盜爲之屏息公入其疆艤舟村塢屏去騶從遇父老婦穉訪令治行旣得實乃大喜抵縣署謂曰吾誠不意孺子爲吏能至於是蓋公之教於家者又如此生以萬厯四十七年六月十四日卒以康熙二十八年七月二十一日年七十一配郭氏累封淑人子二人逢庶選貢生朝城縣

教諭先卒逢麻貢監生廣西新甯州知州女三人張安吉于身繡
李祚之其婿也孫四人逢庶子一中吉早卒逢麻子三牧吉澤吉
津吉津吉立爲逢庶後孫女三人銘曰

公直門下始爲諫官詎厭承明出佐外藩士歌鹿鳴邊人口祝手
編虎髯驕王惛伏盤根錯節力媿夸娥章貢湯湯流此恩波獨樂
園中八節灘畔良苗懷新冷風送善白山之陰錦水之陽宜爾子
孫山高水長

右墓誌銘王士禎撰

邵燈

康熙十年七月甲子河南管河道按察使司僉事邵君卒於位其孤某以君之喪反厝於其縣之某鄉越七年走京師乞銘於君之同年生沈荃君蘇州常熟人順治九年進士宋康節先生之二十一世孫曾大父問津府君諱某大父虞恩府君諱某皆隱居不仕封承德郎刑部主事歷贈奉政大夫刑部員外郎加一級河南管河道按察使司僉事雪樵先生其考也其官自中書舍人奉使浙江還再奉使淮南在道量移刑部廣西司主事尋以雪樵公年老子告歸服除補官山西司主事轉山西司員外陝西司郎中君之奉使淮揚嘗盡解囊中裝以活餓者數十人於途在刑部

直提典獄囚時暑雨爲除去其居處之漏溼者無使蒸薄爲疫癘
獄吏亦感畏君之慈明無敢故絕囚衣食者囚瘦斃百不得一焉
庚戌分校禮闈得士爲最盛出按察河南管理河道在任歲餘勤
其官以沒君之始至循河隄視要害議濬塞覈經費絕破冒條上
漕河二中丞可之皆曰此非講之有素不能然也汴宋閒舊於河
傍開引河名曰導引黃流蓋預爲之所以受缺河使不橫溢亦雖
勞而不可已者也而吏緣爲奸程法不中度所上公狀率不以實
公往來河上計所當開者不過數處餘皆停止所省公私費以巨
萬計卒無水患諸渡口船戶依倚貴勢勒索行旅公下令聽約束
皆竦息聽命故時徵役夫庀柳材有司於中乾沒君視事數月刻

除陋規無一存者經營灑澹諸所修治卓有成勞其見於言則河防要略尤可考焉其所措施者大要如余之所述已余之所不盡述者則一切皆以要略從事也君生平以孝友著於家以愛人長者稱於鄉里事有不便於民者不憚爲當事反覆開陳期必行其言而後已與人交尤有恩義邑孝廉繆君錢君先後物故京邸微公恤其喪紀箴不克歸葬自少畱心理學經濟所著書有先儒粹記中州景行集息耕志及讀書澄懷集三十卷公所居官必盡厥施而於治河尤勤君本名煥字時若雪樵先生嘗夢二神相與語曰堯夫之後廿一日燈者實爲水官覺而視族人名無有火旁者乃以登易輿而字之曰無盡云歲在庚辰君下第南歸渡河中流

僕者於舟中小遺卽眩仆作神語譴訶既而曰若主人翁後當有事此賁之余通籍後嘗臥疾甚劇君與余共寓居爲護治醫餌頃刻不舍去余病閒語君惜不其遊瀛洲道山而君願在西清君曰否否余官當以治河終他日神告之矣公竟卒於河道之公署君生某年某月享年若干歲夫人某氏子一人太學生某也讀書能世其家亦善言星數其先世見於故大宗伯芝麓龔公誌銘今少司寇念東高公所作墓表及中允君霖趙公所作墓表爲詳銘曰士蓄其學世則我須君曰汝往惟其所如有數存其閒而知之者誰與吁嗟邵君其真堯夫之苗裔也夫

右墓誌銘金居敬代沈荃撰

顧大申

顧大申字震雉江南華亭人順治九年壬辰進士官工部侍郎著
有鶴巢詩存雲閒自陳卧子後詩格漸衰鶴巢古今體氣足神完
可以接武

右 國朝詩別裁集小傳沈德潛撰

按大清一統志顧大申順治進士授工

部主事分司夏鎮河道節省公費以築鎮城人服其廉幹又設兩湖書院以造士擢洮岷道僉事卒於官

大申畱心經濟所著河渠論十二則圖經二十八篇後濬劉河吳
淞江皆用其議又嘗輯毛詩楚騷及文選詩並唐人詩著詩原五
集

右江蘇詩徵張維屏錄

洪琮

始余奇洪生瓊友之文瓊友舉進士爲中書舍人相聚於京師因
交其從兄谷一君知其人賢者也居數年君由禮部督學秦中而
瓊友官吏部以卒余閉門謝交游雖以君之賢益於今絕不通問
者十年餘矣今年冬君之孤以君卒之月日及許給事承宣所爲
狀以來請銘曰君治命也予不得辭君歆人諱琮字谷一又字瑞
玉上世有顯仕唐則黜陟使曰某宋則少師曰某明則尙書諡恭
靖曰某恭靖有從子諱某以孝聞君之高大父也曾大父太學生
諱某大父 贈承德郎諱某父 贈朝議大夫諱某以學行祀於
鄉君弱冠以尙書領鄉薦國初爲崇明教諭舉順治九年進士除

陝西平涼府推官承重丁祖母徐太安人憂服闋補廣東韶州府推官歷遷行人司行人刑部主事員外郎禮部郎中提督陝西學道終養母許太恭人以康熙二十三年十二月某日卒於家年六十有五初君之生十有一年能一日爲經義七篇驚其長老由是江之南北號曰神童顧朝議公弗深喜曰古之學者道積而有言今子學未成而言之多若是吾懼子之外飾也盍道務是求於是君自爲童子已志於正學矣故其自在事教士治民罔弗本於其學東粵新附建兩藩王邑令府掾皆所易置憑依城社張距磨牙眈眈伺人君至則曰此濂溪先生提刑舊地也甫下車大書洗冤澤物四字榜之中堂爲政精密嚴恕一以周子爲師法成令修好

黠消沮強梗從化上下安悅折獄迎刃耒然而解訟者皆願之君
所旁郡縣有冤獄皆就君治部使者行郡縣必與君俱招徠流亡
闢土田通貿遷民稍稍出水火而登衽席矣當是時兵猶未戢徵
調頻繁諸郡縣苦供億弗繼則吏執其咎曲江始與保昌三縣令
至相繼自裁君條上幫貼夫船長行之議謂夫船供應稟給額規
而外若馬匹折乾勒索則宜革存畱傳銀則宜請動支解運腳費
則宜請例給鄰縣則宜議協濟大吏臆其議雄韶諸郡吏民有更
生之樂勒石頌君功德焉郴桂之界烏春山有妖民郭天鵬者爲
亂時議以兵誅之君曰無庸兵密召鄉勇計縛天鵬鬼子尙爲亡
命逋逃藪君選數騎乘夜抵其砦絕水道諭之順逆禍福卽日弭

散虔賊王秀等已就降至翁源復叛渡江大掠約賊黨內應君用
閒誘使殺賊自效而督徭官與戰禽秀誅賊十人曲江徭劫
殺人君單騎往鞠得其擅殺者七人抵法餘不問全活數千人於
是督撫御史臺使者交章薦君於朝君在刑部取歷代疏議釋
義箋注諸書考證析疑使法必當情吏不得緣爲奸律官私掘藏
物聽收用官私字誤官司廣西容縣民坐掘藏物誤罹法者眾君
取舊律文爲證事得白更著爲令君之莅事治民其大者如此初
君之教授崇明也敦尙實行風勵學者毋苟趨利祿而文學之士
彬彬興起及在秦中慨然念曰國家所命督者學也匪獨文也必
學正而文興於是所以造士之法悉準於古重建關中書院祀其

鄉大儒橫渠張子延李君中孚講學其中揭其條目爲學之序修身接物之要實與白鹿之旨相發明蓋關中理學之傳自明季馮少墟益推闡而光大之君則爲之刊其論著布之學宮曰爾多士歸而求之有餘師也君之教士者如此以君之言其見於世者未能盡究其用而跡其所以張設措施之意悉不失其爲學之指君於聖人之道可謂勤矣元配王氏 贈恭人繼室方氏 封恭人以某年月日葬於某里某原以元配王恭人耐恭人婉嫗有內德前君二十九年卒子男五人景行東流縣學教諭覺行歲貢生周行候選州同知雲行太學生時行幼女八人皆適世家有名行孫男十一人述庠生逢遇遴選連迴迭通俱幼琅友名玕爲人

謹飭有文善書法于之知君以琅友琅友之歿余不及銘而銘君
可慨也銘曰

去聖經遠注箋紛如孰集其成孰究其初相厥宅里大賢所居高
原鬱鬱碑石峨峨近壠墓者紫陽之巖阿

右墓誌銘陳廷敬撰

尹惟日

尹惟日字冬如湖南茶陵州人祖一第精星家輿地之學明末隱居教二子士翰士朝皆有名惟日士翰子也年十一應童子試爲推官蔡道憲知府堵允錫提學高愈所賞由拔貢領鄉薦適世亂慷慨自負崎嶇戎馬間不廢吟詠甫弱冠成順治壬辰進士知和平縣上書當事爲民請命招徠撫恤不遺餘力九連崗寇猖獗四省會剿不能平惟日大小經數十戰後單騎深入撫其餘黨皆降之請設官駐守岑岡以安反側遷嶺北兵備道舉南贛及連韶各路軍政悉以委之年未三十以勞疾卒官祔祀王守仁祠著有日行吟及和言其從孫應壽刊行改題曰和平政績

國朝文獻通考卷一百一十一

二十一

右傳李元度撰

唐廣堯

公諱廣堯字載歌別號寓庵浙江會稽人自宋參知公介以名臣
顯代有聞人元時有義士諱珪收六陵遺骨葬蘭亭山者公十八
世祖也義士十餘傳至處士公諱圭入郡志義行傳是爲公祖
贈中憲大夫提督山東學政按察司副使孝廉公諱允思入郡志
儒林傳是爲公考公年二十六舉於鄉三十成進士除工部都水
司主事差南旺三年移本司郎中明年典試山西又明年持贈公
喪服除補光祿大官署正秩滿遷甯國同知兼權蕪工關攝郡判
閩九年而知山西大同府六年升提督山東學政按察司副使三
年候補參政道閩明年丁魯太夫人艱又四年在家卒公之成進

士也於先君子爲同門友先君子嘗曰文章非以逐風會塞請讓
春容恬淡中庸乃貴公庶幾近焉公嘗見器於華亭陳臥于而文
範不同同歸於善蓋折衷深矣公爲提學時過鄒平謁伏生墓慨
然歎息後從 天子祀孔子廟庭徘徊久之歸歎累月日教諸生
以砥行厲節爲文務崇尚經史先是公典試山西嘗言文章足規
福養如陳廷敬李質素皆當代碩輔名流至今不徒善公之文章
而又歎公知人善教也公爲政所在持大體尙撫字前後凡三大
稔而無道殣其在甯占五勸以示曰勸官勸士勸農勸商勸工禁
長生大乘無極七七如如教有關正道清園扉捕盜飭勿使蔓延
權關力除折水扣牙等弊監漕兌剔尖斛之害在甯六年民稱安

堵無何遊三逆之變徹甯道芾當是時王師一軍戰積谿一軍戰
野之東亭橋皆大帥公承檄至軍前總糧儲一切支放皆有法軍
賴以振全徹克復既復調會城督沙曉船塢匠役三千坐風雪中
飯勵不倦既而閩楚仍用兵有御馬五千匹自殺虎口經大同官
屬餒遞彼此牽戾臘曰瘠飽曰飢以代爲幸及公公曰吾盡其在
我已耳躬視草場牧馬審莖秣一誠相感迄無譁者公以一書生
自甲寅至戊午五年中當繁劇之地芻蕘精糗水船陸馬調度往
來者無絲毫髮誤此豈庸妄兒好爲大言者可髮髯乎自道喪而
世降居官者平時不能盡心力或務崖異矯激爲名高否則翕忽
機械以候上意旨而取舍略無足觀一當有事則退縮不敢任或

彼此互委至進不忘君退不忘親者更寥寥也公在官似無赫赫名而其才其德皆人不能及而性又至孝當在南旺時甲午孝廉公尙計偕從老僕坐屨綱中歷祿赴試風霜衰鬢追隨未得每悵然歌詩丁酉典試後思效楊嗣復迎於陵於潼關率生徒捧觴上壽而以他事快快不得遂已而贈公卒太夫人在堂則自甯馳越爲太夫人壽迨視學還家而太夫人年八十七矣兩目盲聞公歸爲扶杖婆娑公見而泣吞其聲自此候寢門者近一年太夫人大漸歎曰是兒年六十餘乃獨戀我如五六歲者我何忍舍之蓋太夫人四子而公其長者也公坦白無城府接人謙讓既貴後與人款款道故未嘗諱貧賤親戚故舊以孤嫠待給者皆贖田舍養

人咸能道之其卒也以康熙庚午九月八日距生明天啟癸亥又
十月三日享年六十有八配錢封恭人子四長咨伯西安府撫
民同知次咨元仙居縣儒學教諭候補國子監學正次咨垂候補
別駕次咨黃太學生女四長適郡學生羅紹龍次適陽山縣知縣
王永傑次適郡庠生朱競次適邑庠生魯基德孫男八人女四人
以某年月日葬於某地謁銘銘曰

是爲唐公之宅厥銘維實振焱揚波鏤金刻石子孫繩繩策名天
室

右墓誌銘章大來撰

按唐公順治九年進士

Vertical text on the right margin, likely a page or chapter number, possibly reading "卷之三十一" (Volume 31).

Small vertical mark or character on the right margin.

黎士宏

黎士宏字媿曾長汀人負岸異姿自爲孤童卽能讀等身書嗜聲詩又不好繁豔諧俗語少遊甯化李元仲之門稱入室弟子應試三山見曾弗人作蘭與蘭語詩爲贊弗人大擊節且語人曰黎生漢魏之苗裔也時新建徐世溥有文名與虞山宗伯書謂今海內人士惟長汀黎媿曾及漢陽李文孫兩人已耳而周櫟園方伯謂黎自可單行若比並漢陽恐疑噲伍其爲名公大人所傾倒若此順治甲午捷京聞屢試禮部不第需次授廣信司理旋以裁缺補永新令舉能其職歷官至甘山道移節甯夏適邊將倡亂河西一帶無固壘人心風鶴言日數起顧獨以鎮靜處之督餉籌邊治

軍書每至達旦八年塞上勞苦功高迨干羽舞階膚功克奏諸公
多以節鉞相推而屢疏陳情卒遂初服以去一畝之宮彈琴賦詩
蕭然有以自樂幾忘當日之赤羽白旗而以身爲長城之寄也者
昔臧文仲有言賢者急病而讓夷若此者可不謂加於人一等歟
著作甚富選家謂其古文清新俊逸未嘗步武前人而動與古會
詩格隨年而變大抵刊落陳言清真樸老與周櫟園汪舟次諸公
後先競爽異於以盤峴爲工者寅湖青草之奇靈洞翠華之秀吾
於託素一集蓋悠然而觀其深矣

右小傳鄭方坤撰

沈喬生

康熙十九年庚申保定郡伯沈公遷肅州兵憲去己歷四年郡百姓思之鑿石孔道署曰去思碑志不忘也鄉耆老請文於余余惟歌功頌德乃通顯者之責以非任辭羣曰否此吾儕私心非如近時鋪張揚厲勉循世法聊借通且顯者以張大之也且沈公素重君文又聞君峻骨傲氣詞無溢美用劍之石以存真爾余辱公知最久又感眾意之誠因不敢以不文辭按古者有功德於世則託之貞珉以紀之有製自上者若韋臯李晟之紀功碑是也有製自下者若許圍師李栖筠劉晏高獻之載德碑是也無所謂去思者有之自近代始今郡邑郊關之外森森林立者皆是也或本無惠

政去之日私購之以要譽或一二相善者卽於未去之日用以代
贖焉是以吏不如古而刻石倍之乃未幾而委蔓草作朽石又所
在都有揆之在位而民嫉去位而民快者一聞耳孰有如吾公去
日久而思以長有如是哉噫可感也當公之守保定也才以御繁
而不露廉以律己而不刻明以御事而不擾威以攝強暴而不苛
不以苞苴干上官而上官倚之不以深文督屬吏而屬吏奉之亦
不過行己之志恬澹耿介奉職守法與民相安而已相安則相忘
忘則置之而無所繫也何至今日思之而不忘有如是哉噫可感
也因悟風化之盛德教之深莫過於始與之相忘而後至於不能
忘蓋善政善教洽於民者既深則民亦安之若無事迨時移事易

漸不能無事焉始知前人利賴甚溥而不能一日去諸懷也思之
思之無可如何乃羣起而謀所以永之於是礪石弗諼垂於世
竊比於甘棠焉其我公今日之謂與如公者可以風矣公諱喬生
號國望順治甲午貢士初授內閣中書從大將軍招撫湖廣有功
改浙江處州府同知推守保定六年遷肅州兵備副使既爲碑并
系之銘銘曰

所居無赫赫名而去後乃見思廉吏不可爲也而可爲郎山易水
永此碑

右去思 陳僖撰

國朝詩林卷之二十一

三十一

陸求可

公姓陸氏淮安山陽人諱求可字咸一別字密庵又字月湄曾祖
考某祖考某考某妣某氏順治五年以禮記舉江南鄉試後七年
登史大成榜 賜進士出身明年除知裕州三載報最入爲刑部
員外郎歷郎中以按察司僉事提督福建學政任滿稱職應遷布
政司參議需次還年六十有三康熙十八年七月以疾卒兩遇
覃恩初授奉直大夫再授奉政大夫配某氏某官某子某官某孫
某官某曾孫 封宜人後公十六年卒又四年與公合葬於某原
公於事親主愛敬其身謂身誠而事親之道可盡身也者父母之
身子孫所從出也能愛敬其身而後能勤學能勤學而後所交皆

敬身之士矣於擇交謂朋友之義貴恕以處之不當自居於薄夫
牆薄則壞網薄則裂器薄則毀酒薄則酸未有薄而可久者於居
官謂君子所養要令暴慢之氣不設於身體必操切擊斷之意少
而平易中和之政多理爲事之本事爲理之用臨事不爲私意所
動所藉平日有居敬窮理之學然矣於學術以主敬爲先務而本
乎治心言必述六經多師以爲師而所宗者朱子餘錄其長去其
蔽上自象山下至陽明諸弟子未嘗槩事排擊持論甚平要其大
旨在兼善天下故施之於政而政舉觀之於人而人化成自裕州
以後恤郵丁減鹽引闢污萊清冤獄正文體絕請託端士習修祀
典力行教化孜孜不少倦蓋儒者講學之效見諸行事者公有焉

公著密庵詩集十卷文彙一十六卷詞選六卷語錄四卷子三人志謹歲貢生候選國子監學正志寬太學生志默亦歲貢生女二人孫男六人女七人公之葬也未刻銘於幽宅志謹請於彝尊遂爲文誌公墓錢之丙舍之壁銘曰

舜跖之分差以毫釐有恆斯善惟聖是希苟或舍旃取徑則歧平旦之氣反覆桎之陷於禽獸其幾孔危公列以圖善利從違性根於心四端匪昧若火始然若泉始霑由茲生色睟面盎背苟或不然形體交頽曷不由聖混濁是汰公列以圖所養者大世之學者執一不通仲宋抑漢伐異黨同公求理窟六經是宗濬源濂洛達之湖江人善我取人惡罔攻一話一言振惑發蒙豈惟空言施諸

實用有鑑畢照有慮必中簡彼征徭道其疾痛嚴乃不苛寬以毋
縱君子所莅式歌且誦洎乎歸田著錄彌眾既稱循吏亦曰真儒
實也久充名亦不虛有子有孫克守其初并此吉壤樹以杉榆既
安既固慶則有餘我銘公藏勿罔勿諛

右墓誌銘朱彝尊撰

公諱求可字咸一別號密庵姓陸氏宋丞相忠貞之裔世居鹽瀆
明初有以賢能推擇築大河衛城遷於淮遂爲山陽人祖敘寰父
三錫公爲諸生已有當世才具爲上官畫養馬之策民以不病登
順治乙未進士第授裕州知州入爲刑部員外升福建提學僉事
轉布政司參議未上而卒公爲人豈弟雅以濟物爲務當其在裕

徇地之師相望絳標寸紙一日數至徵村切里俄頃十催公應以
整暇民不告勞赭陽一驛舊設馬六十後減至三十一站銀五千
九百餘減至二千三百餘事增於前十倍而費減十之八難爲意
計公貸軍府子錢市馬六十劣充急發舊三萬戶戶三男子則十
萬丁也故派鹽二千九百引其後丁止一千九百鹽引尙存一千
六百是一丁食一引矣公請於饑使者減至一千引民力稍甦舊
額墾田一萬九千三百餘頃進墾八百餘頃而已又以塞河之役
逃荒三百餘頃其徵賦皆取盈於五百餘頃之內逃亡日甚公設
法誘墾汙萊之田二而當一崩瘠之田三而當一自此民勸於農
鋒鏑之餘絃誦久息公新其學校躬帥藝文化屠羊馭馬以爲秀

士邑無文獻以禮樂爲殘賊比文章於鄭衛公考其山川人物撮
殘糾謬秉筆文閨裕始有志凡公之所以籌裕者如庭內灑掃無
不周款其在司寇冤訟洗遂瘕弊昭蘇每退食遲遲母夫人詰之
公曰今慮囚者多以刻深免咎故煩文滯劾證速遐廣苟循成案
幾人當斬幾人當絞吾所以不敢也當其衡士翦拉榛楛斟酌爾
雅瓢笠之門俱起講堂而南宮之夜光多經公所採拾其入輿人
之誦者鄉賢之紀鮑不給祝則優劣枯骨香鐙爲之肅然有司賤
士纖介之惡便遭裁辱則請之督撫未離士籍不得妄施荆革其
所至及物如此臨官之外破產而字死友之孤開門而延故人之
殯如田孝廉姜符玉翁陵周文學枚數之而不勝蓋天性然也從

來嘗吏治者不過曰傳舍其官夫傳舍者朝至暮去總使餉馬於
軒宿隼於堂其破碎猶可支久顧今之所謂傳舍者非昔之所謂
傳舍也視傳舍爲己物宋桷構榑根闌扃楔必欲發之而去以大
宮之椽歸爲盧門之椽甯復有傳舍乎南陽久已無裕因公重立
亦如叔孫媾所館雖一日必葺其牆屋去之如始至者也傳舍亦
何幸哉生於萬厯丁巳五月初四日卒於康熙己未七月初三日
娶某氏 誥封宜人子三志謹國子監學正志寬太學生志默歲
貢生女二周恪李師邕其壻也孫男七觀兆騏兆霖兆穉嵩年鶴
年逢年孫女七志謹千里求銘銘曰

史傳循吏貴乎甯一瘡痍未起賊梳兵櫛逃屋荒田租吏駱驛吁

嗟密庵仁心爲質巖疆風雨立彼家室人總刑名破冢而出出考
藝文廟堂琴瑟華表石言表裏史帙

右墓碑黃宗羲撰

張爲仁

廣東按察司僉事提督學政海豐張君與子舉禮部稱同門友又同爲京朝官交最暱康熙壬子予奉諱里居君出官粵東亂定聞君無恙致仕歸歸甫一載而訃至嗚呼君歷漲海萬里蛟鱷瘴癘崎嶇不測之險而得不死歸臥田廬而以未疾遽不起其命也夫君諱爲仁字致堂別字滄粟其先自昌黎遷海豐曾祖著祖金始大其家號義井張氏父應科始教子孫服儒衣冠 皇贈朝議大夫廣東按察司僉事母孫氏繼母朱氏俱 贈恭人朝議公六子君最少少讀書不鑪不扇順治丙戌有芝生於所居之處是秋再行鄉試君適內艱服闋遂膺薦君顧愀然曰祿不逮養終身之戚

也屢困公車益發憤著書隅說闡明考亭之旨濟北學者師之乙未釋褐己亥除內黃縣知縣甫下車見諸務窳惰慨然曰天下事無今日不爲而來日徐圖之理於是相其緩急而次第布之初謁夫子廟見學宮就圯鼎新之進諸生以時講藝其閒以演武場偃處學宮相度改作自時厥後得雋者彬彬多文學焉又勸義學聚民閒子弟莠秀者教之嘗出行阡陌謂弟子數十人迎道左辟應對皆有規矩君顧而樂之縣俗尙氣好鬪民間或詬誶輒自殺諍訟無已君反覆諭以律例俗大變縣有大姓馬氏同室相傾軋君爲立族長設約束諭以水木之誼久之遂爲義門其治先教化如此嘗步禱神祠而立霽足歉歲捐俸輸穀設粥廠十二以食

餓人縣食鹽額四百二十引累年額銷不足雖使者議按丁加引君爭之日內黃昔罹兵燹民多流冗有數家包一里之丁者有一人包闔戶之丁者額鹽且壅矧加之厲乎縣有太僕寺牧馬草場三百餘頃畝徵銀一釐六毫有奇民苦之君分俸代輸後議畝加練餉一分浮正供且什倍乃請如故縣有衛所軍地奉檄歸縣未有成例軍民更相齟齬君酌爲成規立符契過割軍民皆德之縣例有通州料豆協運船胥吏埠頭率畝法賄賣其富者君爲立法各河口輪次公運或不足則官給其直吏無所售其奸縣故有驛置自河決後使節稀少減舊額之半後舊路復通額卒未復君爲力請驛困以甦縣城表廣四里餘邏卒無幾君選牌甲壯丁千人

復其徭役更番戍城如踐更然縣外城久圯而居民鱗次君請於
上官以農隙修築不日而成之立鄉長團練土著遇盜警互爲聲
援又爲尺籍伍符令游手無所容河北回龍鎮四縣分轄久爲盜
叢君移文鄰縣約期會集比戶登名於版製令箭四押以四縣符
篆而分掌之有事得徑治無相瞻顧而均其力役自是無竊發者
盜王三者劇拳勇久不能制君計禽之寘諸法境內肅然君在內
黃也慮不能周知民隱擇鄉三老愿謹者月以望前一日赴聽事
條上利弊某宜興某宜革使人人得盡其意參伍行之故所措施
率宜於民略其大者如上十數事其細微顧不能盡書也居三載
舉卓異第一 賜朝衣一襲壬寅擢中書科中書舍人丁未遷刑

部江西司主事歷江南司員外郎郎中以才能推擇修大清律改訂吏部條例有重囚八十餘人已擬辟詳引律例爭之得改正發遣其平反多此類焉京朝官十三年凡甄別者三京察者二皆書上考甲寅擢廣東按察司僉事提督學政東粵號才藪君與諸生約頒示六條大指以器識爲主而文藝次之凡故例與學政全書相踈盭者一切更張之務寬大不爲苛細平生好獎士類經其指授率舉制科登館閣知名當時內黃則李滋黃本訥兩浙則沈三曾許汝龍仇兆鼇粵西則黃裳吉曹雲鷺粵東則鄭際泰而吳三畏以武進士廷試及第一此其尤著者丁巳以病乞休歸里立族社每月朔具牲醴墓祭合族之長老子弟生平遇父母諱日修

祀事輒流涕極哀諸兄龐眉皓首事之恭謹俸祿必與共之視兄子如子親睦族姓無甚富甚貧者學不泛涉務由洛閩微言以上求聖賢之意其教子姪曰吾生平得力數言而已生於憂患死於安樂此心纔放禍卽伏焉愛人者人恆愛之敬人者人恆敬之持身涉世之道盡於此一夕得風疾七日卒君一爲順天武鄉試同考官一爲廣西鄉試主考官再奉 詔使蜀使江南一榷關杭州四遇 覃恩初授階文林郎再授奉直大夫晉朝議大夫再 賜表裏生以故明萬厯甲寅四月十四日卒以康熙十八年五月初二日得年六十有六配畢氏 封恭人子二人玠理女二人適楊法李爾夔孫六人賡泰颺泰方泰始泰旭泰丕泰予惟西漢之盛

所以上繼三代之者循良多而吏舉其職也然班史所書蕭曹開國
惟以寬厚清靜爲天下師而文翁董仲舒兒寬之屬或云經術潤
飾吏事或云仁愛好教化如是而已跡君之治內黃可以無愧所
謂爲民去害興利若嗜慾者非耶爲法吏則惡深文爲人師則以
教育爲先合前後觀之可以爲循吏矣於是玠理將以某年某月
某日葬於某阡而子爲表其墓

右墓表王士禎撰

胡在恪

辛巳之春喬奉 天子特恩守藩於浙歲將杪江陵胡夫子念蒿先生不遠數千里來遊迎入官舍公餘輒侍左右先生握手道故語娓娓不休蓋余未弱冠時歲辛丑 功令初減童子額先大夫憂余入彀之難也命以兼經應試時先生視學江南一見擊賞拔冠郡弟子員余之受知於先生自此始迄今忽忽四十餘年矣幸得復侍先生方謂可以長奉教誨而先生憐余貧輒辭去余出俸爲先生買舟先生笑而受之且曰他日尚可相見也遂送先生於江上別焉越一年奉 命由浙移撫南楚癸未夏抵潭州潭距荆僅數百里卽遣屬吏問起居而先生之訃至回憶錢塘江上送別

時竟成永訣既哭而遙奠之先生之子開禧等余之世昆弟也復以狀寓書來乞銘嗚呼余小子何敢銘先生哉顧念受知先生有年先生嘉言懿行得之見聞者已久今又官於其近地凡鄉先生之積學有德行者皆宜闡揚其微以傳而況四十年前受知之先生也故不敢以不敏辭謹按狀先生諱在恪念蒿其號上世實姓楊氏系出龜山先生後元末避兵楚之宜城復遷於荆門州之楊樹巷遂家焉世以讀書力田爲事明經公啟榮其始祖也曾祖文贅於江陵胡氏早世遺孤一人依舅氏以生遂從其姓卽先生之祖邦甯公也生封君克敬號孟常是爲先生父侗儻超邁不循瑣瑣章句業年十八九始發憤受書專志於學性强記書無所不討

人服其博覽淹貫由是弟子日益眾當時號爲醇儒生丈夫子四
長卽先生也先生生而穎悟三歲就學讀三字經隨授隨記一日
而畢六歲屬文日成數千言七歲應童子試十二歲遊於庠斐然
前列人無不厭服者蓋年雖弱而知名已久也順治戊子領鄉解
乙未成進士授秋官郎戊戌例遣各省學使者部銓有人矣上其
名世祖持不下更集諸臣親試之先生真選首特授江南學
使秩滿越數年遷江西驛鹽參議旋以太宜人曹春秋高乞養歸
先生自少至老其仕宦政績出處梗槩狀言之詳矣以余小子所
見所聞知先生之爲人蓋天性孝友好學不倦者也當明季時闖
獻殘荊州先生奉封君太宜人避兵牛角嶺莊是時人民流離兵

疫相繼封君病不起先生哀毀不欲生其後歲時伏臘哀如初喪終其身莫不然里中有社樹封君所常憩也先生過其處輒撫樹長號涕泗橫溢隴上耕者皆爲掩泣其參議江西也聞太宜人病曰某止有一老母未盡烏鳥之私曩以軍事旁午不敢歸今事平願乞終養日夜泣語上官得如請既歸日與季弟承膝下歡太宜人性慈好施先生孫志以應無不曲中所欲太宜人病且殆慰之曰吾年八十九兒亦六十七矣勿以過感成疾傷我心先生則搢踊號泣勺水不入口者四日哀毀如喪封君時既葬廬墓三年先生之弟叔仲皆早亡與季弟最友愛每他適自遠歸必交問其飲食之多寡視其貌之肥瘠促膝絮絮語更出其遊歷所作詩賦相

示迭詠更唱直有不知其舞蹈者太宜人沒後友愛益甚居同室
食同席日出而聚日入而散遇有嘉旨季不至未嘗下箸也易簣
時猶諄諄以葬牛角山嶺墓側長侍先人爲囑嗚呼非天性純摯
篤於孝友者而能如是乎先生之視學江南也閱文必躬親之每
校士竟日坐堂上口不停哦手不停披卷佳者卽面取夜則秉燭
搜奇漏盡始罷性敏善記一覽輒不忘榜發必召諸生至前誦其
文示以棄取之故且曰某某當售然頗遲某某當速售若操券無
不驗某受知於先生亦其一也其所取士有一案皆售無遺者後
居家喜爲人評閱文字決其售與否絕異世俗取舍亦不論其文
之工拙然其言亦若操券無不驗子孫輩請其故則曰吾以神遇

而不以迹求固難以言傳也先生於文章一道真有獨得者耶蓋先生年未齠稱神童常聚同塾少年爲考校狀已爲學政而甲乙之以爲嬉戲其幼而立志如此若素所先定者爲學使時嘗語諸生曰吾年十二作秀才至二十七發解元已是老秀才矣先生天資雖高而刻苦力學甚於魯鈍者之所爲初館於李氏晝則教授生徒夜則披讀經史倦欲睡則以筆管橫膝下跪而讀達旦不寐率以爲常李之長君受業者與先生同咸進士其弟今老矣聞先生歿猶悲痛不自勝也居官讀書一如諸生時同僚嘲之曰秀才債未滿耶先生亦唯唯家居未嘗釋卷卽舟車逆旅中間有咿唔聲者不問可知爲先生也每讀一書輒手錄其要而丹黃之與人

道古今事歷歷具本末以故蒐輯逸事者多就正焉省郡縣志皆
敦聘纂修又喜吟詠凡感慨懷思憂愁無聊之意一寓於詩年八
十餘猶作細楷字憶余庚戌倖第自北歸道遇先生於舟中津津
論文深夜無倦色及在武林官舍把酒翦燭仍津津如前去之後
復作詩數章并手劄駢體語命舟子持歸贈余至今手澤猶存也
先生取材極富好爲莊麗之句舉筆立就病彌留子孫泣問所苦
曰吾無苦止夢寐中索詩文者甚多殊覺苦耳嗚呼非所謂孳孳
好學至老不倦者耶先生服官行政原本經術初在秋官曹小大
之獄悉自平反不以委吏胥有不當抱文書詣堂上力爭得而後
已一日夜半譟傳赦至先生方入直眾爭向求獄門鑰不予中有

貴人怒且罵先生曰爾能殺我耶卒不予詣大司寇曰願列書所
赦按名出之不然昏夜門啟奸人乘之而逸誰任其咎司寇曰君
真有遠識者江西有官船若干艘驛傳所隸也故事其船奉差出
後期不返則計日扣其水手工食歸於官先生曰役不奉法宜懲
之奈何扣其餼於是懲其尤玩者而悉發其餼焉比逆藩叛民役
逃匿且盡 天子赫然命將出征師欲渡江需船數百羽檄飛至
先生出城招舟闕無人也至江上但有空舟數艇飄泊沙葦中忽
遙見乞匄狀傴僂至招問之其人跪而告曰小人非乞匄也乃官
船水手也感公厚恩不忍去相聚於僻藪候傳呼乃至耳願往召
之有頃羅拜環泣願效命由是人舟立辦師以克濟其攝臬篆也

有大獄二十餘人當辟獄成久矣先生閱其辭疑不實再四推鞫盡得其情止戮其渠魁數人餘盡釋吏白以翻讞必干駁譴先生曰不過罷官耳民冤不雪何以官爲且吾方懼求其生而不得旣得矣忍聽之乎卒出之周書曰學古入官莅事以制政乃不迷詩曰豈弟君子民之攸歸凡此者皆先生之至性足以感人而又博學深明理義故能臨事肆應充如也尤喜獎勵後進聞有佳文必謀致之得則疾讀讀則擊節不已稱眾中必嘖嘖口誦以相嘆賞寒士挾詩文相質者必爲之剖析微奧指示準繩生平不知蓄財或規之則曰人性不可強我之不能蓄猶人不能散也各行其是而已病革戒子孫勿用僧道其誠於樂道達於義利死生又如此

非好學者其孰能之先生以康熙四十二年五月四日卒於家享年八十有二昔龜山致仕歸優游林泉著書講學年八十三而終先生真其苗裔耶何出處年壽之相若也楚俗五日尙競渡先生歿鄉人哀之爲相戒罷其戲焉配劉宜人先卒子男六人長年穎次年穀皆舉孝廉次年禮國學生皆先卒次開禧次麟徵次年秬皆食餼於庠有聲女二孫男十曾孫男五其娶聘嫁皆名族具載狀中將以某年月日葬先生於某兆先生之別余於錢塘江也曰子他日或開府吾楚老夫扁舟入署一覽中丞景況劇談十日便了素心終不以吾貧累子而今已矣咫尺江波煙雲若接而先生之音容邈不可見矣因揮涕而銘曰

荊州之野蒼蒼莽莽山澗水深土厚而廣維楚有材瑰偉倬儻龜
山之裔萃其精爽幼而岐嶷耄而睟盜孝友天鍾學贍厥養施於
服官內潤外朗既壽且臧孤情獨上哲人遽萎吾將安仰魄歸其
藏光燄萬丈

右墓誌銘趙申喬撰

匡
卷一百一

四

李可汧

公諱可汧字賓侯又字元仗別號處厚世爲崑山望族高祖諱某
贈某官曾祖諱騰芳明萬厯庚辰進士彙官都察院右副都御史
巡撫山東贈工部左侍郎祖諱胤昌萬厯辛丑進士翰林院編修
父諱孟函崇禎己卯副榜貢生候選知縣 贈刑部山東清吏司
郎中娶太常卿太倉王世懋孫女是生公公年二十五中崇禎己
卯應天鄉試至 本朝乙未成進士原名開鄴丁外艱服闋請更
今名授行人司行人以 今上御極頒 詔湖廣充順天府武闈
同考遷刑部浙江司主事彙轉本部山東司員外郎郎中擢湖廣
按察使司僉事提督學政考最候補布政使司參議需次在家以

國朝書大英文

康熙十四年二月十六日卒年六十公始入刑部時政尙明察奸人乘此紛然投匭告訐山東寇難初平舊家富族被搆者銀鐙載道公力持大體平情讞鞫獄多平反而痛繩誣告者以罪自此奸徒屏息一日有告人作詩觸時諱者他司官將白堂官移訊公偶見之曰此非某詩乃唐人薛逢作題曰開元後樂大槩言天寶亂後事有何觸忌明日攜唐詩鼓吹同他司官言於堂官由是告者得罪先是部放囚糧多雜以泥沙至不可食公力爲尙書言得改給良米囚無餒死者楚俗文章舊以才氣雄天下自經流寇屠毒戶口凋耗頽宮士子茶然氣衰公至視學一振起之以六經史漢之文士習驟趨於古又以其閒諭郡縣學校之毀者復之圯者葺之

書院之廢爲公館者還其田而新之禁有司不得粹辱諸生雖武夫哮卒皆俯首聽命故至今楚人士言作人之盛者必稱公三年事竣遭太夫人憂歸服除築室城東無意復出數遊郡之西山及雲間九峯流連忘歸嘗思脫棄人間指軒冕爲桎梏飄然有出塵之想居五年無疾而卒李氏自中丞公篤信道家說祀唐呂純陽祖師其家頗著靈異公里居益好長生術而家世仕宦饒貲產樂施予其天性也凡神言有所營造或當賑濟貧乏立指困斥產不惜距所居里許築精舍奉祖師紺宇絢爛有沈生者侍乩傳神仙語甯波陳某善士有急難當助之五百金公卽如數予金沈生使授之俄而陳某以書來謝公大喜及沈死家人發其篋得其所自

南齊書卷之二十一 卷二十一
爲陳某書草其他所欺給事盡敗露公略不爲意而求神仙益虔
以迄於死此雖通人之一蔽其任真樂易無機械於中尤可想見
也公內行修整祿逮親之養而惟恐稍失其意事兄恭謹於財無
所私宗族戚黨及所知有急解囊弗靳庚戌歲大饑捐千石米設
粥食餒者鄉人賴以全活無算故沒而人哀思之至今生平好讀
書工古文辭精草隸吐納風流又善鑒別古帖名畫兼曉音律能
自度曲蕭齋清雅非所親暱者不能至也年六十自營生壙殆了
然於生死之際者顧夫人少公二歲先公二十五年卒夫人性溫
恭明敏當乙酉崑邑之變能先事脫家於難沒既久王太夫人每
言及必涕泣公亦終身不再娶用 覃恩贈宜人子遙章等啟殯

與公合葬於小瀟之張薄涇實康熙十五年某月日也子四遙功
庠生先公卒遙章廩例太學生遙威太學生遙毅舉人女適太學
生王鑾孫七長邦靖庠生繼遙功爲余女婿不幸早卒次邦直庠
生娶金氏余妻之弟子余妻所撫也次某某公素寡交獨於余兄
弟厚善又忝姻婭過公精舍每涕泣不能己以遙章之請爲序而
銘焉銘曰

仕爲刑曹民不冤三湘七澤迴狂瀾不究其施川巖觀非有尼之
胡止此小瀟之阡躬經理談笑去來中有以或云神仙非可期烹
鍊服食徒爾爲吾書牽連視退之

右墓誌銘徐乾學撰

劉昌臣

劉昌臣字又昌湖南武陵人順治乙未進士授刑部主事真定有孕婦冤禁雪釋之擢按察僉事提學山東每試必引諸生立案側揭諸經義疏及爲文法度口講指畫不少倦士風爲變秩滿里居七載起浙江糧儲參議甯波守備安時泰督運中道運丁猝發難自相殺當事欲以倡亂聞昌臣力爭惟誅首禍保全甚眾署布政使適浙西衛發閒軍需旁午昌臣循環飛輓事以辦集嚴州土寇竊發甯駐紮勸撫並用賊遂平以勞瘁卒於官著有思補堂集

右傳李元度撰

皇朝詩林英雅齋
卷一百一

五

國朝耆獻類徵初編卷二百八目錄

監司四

袁州佐

張登舉

王如辰

葉方恆

曾王孫

畢忠吉

于玘世

崔華

江皋

邵延齡

劉彪

周澹園

張兆熊

李棟
王疑

李棠馥
郭亮

胡允
黃中通

陳士本
董應魁

張維養
傅懋祥

陳光祖

劉深

鍾性樸

袁時中

張顧行

丁蕙

國朝耆獻類徵初編卷二百八目錄

國朝... 卷二十一

張道祥

林麟焜

邵嗣堯

許孫荃

魏荔彤

補錄

吳白肅

邵延齡

許孫荃

龔其裕

子燦

國朝耆獻類徵初編卷二百八

通奉大夫前著江西巡撫江西布政使司布政使湘陰李桓輯
監司四

袁州佐

自國家以才能課吏治於是內外大小吏皆務矜才鬻能爲踴躍
於功名之道而老成明練守正不阿鑿然欲以經術飾吏事者其
功名顧反居後此有志經世之士所不禁搯擊嘆息者也曩日諸
曹郎爭用奔走結納以游踞津要之路少參袁公蓼庵時爲工部
郎中獨有清直聲大司空掌雷傅公深器重之未幾以例出爲陝
西甘山道僉事公既出而資望在公後者輒相繼登臺省班行中

咸爲公惜而公處之恬如也及今踰十年矣一轉官復得邊地乃未及一載遽以疾卒不獲大竟其用豈不痛哉初公以乙未成進士筮仕陝之乾州乾當兵燹之餘民俗滋敝公至壹意拊循不數年流移皆復業丁酉分校拔知名士六人庚子擢工部屯田司員外明年晉虞衡司郎中公討論掌故諳習部務胥吏斂手不敢牟毫末之利當是時滇閩間饋餉旁午會 山陵大工經費益不繼詔直省正賦外每畝暫增課一分用佐急需公職司焚帛曰民困極矣寸縑尺縷皆閭閻膏血也力清乾沒省金錢鉅萬他裁抑類是旣至甘甘爲河西重鎮戍防之地西海諸部覬覦大草灘比歲闌入牧馬者不絕復遣使請割灘地蓄志叵測康熙九年 朝

命兵部侍郎科公再往偕提督張公勇度地畫界張公持議堅爭者不能奪大草灘卒不得與而左右贊畫之者公之力也公與張公交權無閒時參預密謀自畫界以後西海部人不敢復窺張掖邊境肅然甘距西甯鎮千有餘里往歲協餉西甯負載轉輸蹶踵交頓甘人苦之公力請得罷主客兵待哺數千人公悉心持籌軍得宿飽庚戌 詔簡監司具才望者入爲卿貳直省合格者纔十人公名列牘中未及用辛亥升口北道參議古北地礪田蕪民貧而賦重前人忱於考成謾稱歲輸如額而逋課累積幾以千計其粟儲於倉者歷歲侵漁耗蝕不可算數非按籍覈實無以釐宿蠹願欲求垢索癥則失察之罪先坐大吏大吏聞公言皆陽蹙而陰

阻之公擘畫盤錯憊心罷精申旦不寐居數月食日益損會闕工
口外爲炎熇所中疾大作旋具牒乞休比得 俞旨而公已不起
公未嘗自瑀琢爲才能而其始終勤事如此嗚呼如公者眞可謂
國之勞臣者歟公諱州佐字左之號秋水蓼庵其別號也袁系出
漢司徒安代有聞人宋南渡後占籍會稽數傳爲柱南公負異才
杖策游燕爲某大將軍揖客生二子長諱紹元爲迪功佐郎累
贈奉政大夫是爲公父贈大夫偕弟紹寵攜貲客游濟上遂家焉
生五子公其季也公生九歲而孤母周太宜人復早逝公刻自鏤
礪專精制舉業舉前明崇禎己卯鄉試爲孝廉多奇節甲申避亂
會稽 世祖章皇帝旣平中原復攜家還濟王辰就高苑縣教諭

鄰邑士爭從之游乙未禮闈家大人與分校實得公卷秉燭擊節
謂他日當以經術名世今言驗矣余與公稱世講嘗北面事公公
亦以幼弟畜余每相對語輒娓娓竟日在甘州入 覲者再爲余
言邊境要害戰備守禦狀原委顛然謂邊地狹農稀宜用開中法
分河東鹽引三之一輸粟河西以資軍食又宜簡鍊鄉勇拔置卒
伍可不待召募而坐收精銳千餘人公之言未及效而公不可復
作矣胷中儲倚經術矻矻白首不獨當世無深知公者而天亦若
戾之可悲也已所著有孝經注解植香齋詩集奉天志餘四雋等
書行世生故明萬厯丙午三月十五日卒 大清康熙壬子十一
月十四日年六十有七配童氏 誥封宜人子三顯祚庠生顯祐

顯祺俱幼撫養子顯經公族甥也憫其孤字之女二一適魯一適胡先公卒孫三麟獬豸女孫一顯祚既扶公喪歸以公同年孝廉鄭君與僑所爲狀謁銘於余余辱知公者不敢辭因撰次公行事而爲之銘曰

世風訛滄波頽茅靡礪礪郎潛履道如砥陰孳陽煦邊陲肅清巖關插天公功與京量才百斛甫試八九櫝書充宇藏仁齋後仕逾一紀斂無遺貲我哀我友銘無愧辭

右墓誌銘張玉書撰

張登舉

順治十一年甲午 世祖章皇帝申闕門之典入旗士子同應制
科額取六十人時張公俊升秀升兄弟同中式明年乙未又同成
進士己未秀升歷升至浙江杭嚴道副使適俊升任浙臬長例應
引嫌迴避詣選人改補遂病卒於京師再一年俊升亦卒於任迫
王申秀升之子標來汀授予狀請爲之銘予與俊升兄弟爲同年
生兩公顧我厚在長安數過公家從公兄弟飲酒論事皆欲有所
表見於天下曾不幾時遂哭公又哭公兄而今且忍更爲公銘也
公張姓諱登舉字秀升世籍襄平父諱應春公母某氏以公兄弟
貴得 封贈如制應春四子長俊升而公爲次性敦篤孝弟聰穎

異常人一出而聯捷成名年僅十七公雖少貴絕無綺靡浮囂之習折節讀書求爲有用之學考古今成敗得失細及十五國山川阨塞兵農戶口錢穀大計無不探源鏡尾初選得湖廣鄖陽府推官入旗初仕率起家州縣無授推官者授推官自公始公厲清節復存心平恕爰書成手中量情比法聲名大起時巨寇李來亨據茅麓山王師進剿急糧粟如星火當事遴公總理督運公設爲遞運之法按里安塘民不勞而事辦寇平上功幕府敘功第一升黃州府同知接續丁內外艱服闋補荊州府同知荆固瀕江歲苦水患公首先捐助築長隄一百一十幾丈經年食宿隄上百姓感公勞苦相率赴工隄成遂爲荆人萬世利公又兼理荆江鈔關一

意便民恤商及報滿缺額至二千餘兩法當罷官公處之宴如一日制府蔡公見公問所以公以實對蔡公再三歎息曰奈何爲銖銖公件使 國家坐失一廉吏乎語公且退明日捐俸入二千金爲公補償公以是獲免降調人情固走利如鷲久豔權稅爲美官況關功名進退卽培克恣睢何所顧惜更世無楊伯起交游結納類視筐篋爲疎密遇小緩急則漠視猶路人孰肯捐重貲爲部吏救敗扶危若父兄如親子弟觀公與蔡公所爲眞希世闊絕天下聞而兩賢之繼升守江南徽州府適兵燹後民俗告訐四出公一御以廉靜又滿漢大兵駐郡調和安輯兵民貼然用荊州時卓異敘升杭嚴道引嫌去任遂病沒公年少中甲科三佐楚鄉一任郡

守名譽赫然循歷俸次可內陟卿寺外爲督撫大吏方量移監司
東於例不得一展其用且遂死僅及強仕之年知公者有餘悲也
公生崇德戊寅三月二十六日卒康熙戊午七月十三日得年四
十有一以某年月日葬於某之原配鄒氏 封恭人子五國棟原
任諸暨縣知縣次國柄太學生次標見任都察院筆帖式次國櫟
次國楨早卒女三長適見任蘇州府知府盧騰龍次適見任興安
州知州王希舜次適王國華孫男一某柄出孫女一棟出銘曰
貴也蚤不竟其施命則焉如賦以才不賦以年其制也天人道
踐天適天償其終將福而後也孔淑且長

右墓誌銘黎士宏撰

王如辰

我族子翰林院編修懿狀其父北埜君之行事遣使走謁京邸曰
嗚呼吾父之歿也生不能奉湯藥死不能視含殮鮮民之生計惟
一死但以祖父年踰大耋代親之職痛切於心又吾父墓隧之石
未有表見恐死者抱恨魂魄謹撰次行事獻於左右惟長者寵之
一言吾讀之而泣然也蓋我瑯琊氏發源東晉子孫散居齊魯然
吾與北埜君少同籍長同官稱最相善比余官威茂君視學廣西
皆在西南邊徼之地余蒙 聖恩踰九列而君以太翁年高侍養
林下自此不復朝夕然君之子編修君復侍余長安余見之輒喜
不異昔者共君郎署時也余年差長而今顧先哭君其忍不銘君

之墓謹按狀君諱如辰字北楚姓王氏本琅琊今徙膠州祖某父
柱皆以君貴 封中大夫提督廣西學政按察司僉事祖妣某妣
某皆 封淑人君兄弟三人而君於次爲長甲午舉於鄉乙未成
進士除交城知縣以卓異行取授行人遷戶部福建司主事監督
通州中南倉遷河南司員外郎兼攝江南司事晉廣西司郎中出
爲按察司僉事提督廣西學政加秩三品旣任滿督撫交薦方駸
駸嚮用而以親老故不出今亦竟不果出已中朝士大夫交於君
者莫不咨嗟惋悼以爲未竟其用然考君生平歷官已多可紀者
惟其如是是之士大夫深惜之也初交城大盜王國憲王國度自
明季嘯聚山中險阻負隅勦撫不下官斯土者多以此削籍君捧

檄未上先微服入賊巢偵探虛實遇賊將得其要領宣布威德賊
傾心歸命誓散其黨以報比視事親率兵入山賊黨果解去渠魁
就馘七日而宿寇平奸民投牒部中請開宣城四鄉銀礦歲增餉
巨萬部中議從其言君獨力爭之謂曩游宣城見四境皆水山地
無幾云有礦者妄也若果行此必壞田廬侵墳墓絕地脈擾害滋
大此必奸民挾私怨仇欲借事起釁奈何輒徇其私部中皆聽君
議事得中止宣城士大夫聞而感涕江甯鼓鑄久停各商所領銅
價已輸銅者應領腳費於官而官廩不給未輸銅者應還其價於
官而商逋不償如是者積有年歲君宿署中半月旬稽考較具得
其情狀請以商逋銷抵腳費應給者不更給應徵者不復徵官與

商交獲利焉廣西當兵燹之後士氣頹靡僧綱道紀俱得大書文告曉諭諸生流品幾於倒置君至悉釐正之設立書院遂州縣子弟之才者讀書其中日給膏火凡七十餘人所選取皆單門後進士以此翕然自力於學再試登賢書者十九按部賓州粵東裁汰冗兵取道城下鼓譟欲爲變君登陴慰諭人給口糧遣之眾歡然解去凡此皆君居官時治行可紀者而其止采礦一事尤奇偉卓犖破姦宄之計弭禍亂之源上不使 國家有興利之事而下貽地方萬姓無事之福此明萬厯中年朝士所力爭而不能得者君以片言潛消而默奪之使其大用爲 朝廷主持大議其老謀遠慮當復何如也君本以太翁故畱里門侍養不出而太翁顧反哭

君君自以身爲人子不得盡力所事故教其子以爲臣而編修君
顧代君以奉事乃祖於草土之中斯真可哀也已君生於前丙寅
四月二十日歿於今康熙三十一年正月初九日年六十有七娶
楊氏繼高氏皆淑人子三人長卽戊辰進士翰林院編修懿也次
懋次恕皆業儒孫男二人功清功濯皆幼以月日葬某所銘曰
嗚呼君有賢子將代爲臣以忠所事將代爲子以旣厥緒君且逍
遙乎九京而又奚恨於斯世

右墓誌銘陶元澐代某撰

國朝老成類稿卷之八

葉方恆

葉方恆字嶠初號學亭江南崑山縣人父重華於前明崇禎之末任濟甯兵河道副使禦賊有功濟人德之方恆以順治十五年進士由萊蕪縣知縣升兗州府同知再遷至濟甯河道循父遺教於河防利害運道通塞籌畫盡善悉見施行其論蓄洩要害謂微湖之西南切近黃河每慮有漫瀉之患苟不堅禦濁流一入不特滕嶧爲巨浸而運道必至梗阻張清恪公伯行因有微山湖南宜築攔黃壩上接太行隄之說迨乾隆二十年孫家集漫口渾水直趨東南幾成平陸乃始堆砌亂石接築七十里攔截河流一如方恆所料又言滕嶧魚濟瀨運水田宜倣東南治田法開支河築圩岸

時其籽耘以種秧苗備其桔槔以資車戽則水荒棄地不難變爲沃壤又以嘗令萊邑熟悉地利山東運河仰藉諸泉而在萊蕪者其流獨長志載鑛山產鐵陰涼山產銅金爲水母母氣盛是以泉源得長開鑛之說惟萊蕪不可行空傷山脈泉枯礙運其害匪細凡所論說皆非一世之利也後卒於官所著有山東全河備考四卷濟甯州志稱其在濟四年口不言功百姓多陰受其惠云

右傳陸燿撰

會王孫

公諱王孫字道扶姓會氏系本出於孫世居嘉興縣之永豐都祖
温州府學訓導諱謀樞字穉弢娶於朱生子一諱耒字子莘卽公
本生父也繼室王氏生子一叔夜子莘公生數月而母朱歿稍長
罹後母之虐幾不自全出贅於會乃獲免遂依外父君山公以居
生三子公其長也君山公老而無嗣偕其夫人撫女之子如己子
恩勤備至子莘公懷抱怨慕鬱鬱早世易簣時感婦翁恩無以報
呼公囑曰余不幸生遭家難賴會氏存活今得有爾兄弟皆爾外
祖父母血脈之所延也外祖無子爾其永爲會氏後他日敬告爾
祖謂爾父垂死之言時公甫九歲涕泣受命遂奉外祖君山公爲

考外祖母王氏爲妣而以曾爲姓其歿也爲服三年喪後用公貴
君山公累 贈奉政大夫戶部山西司員外郎王太君累 贈宜
人公雖出爲會後而不忍薄於所親本生祖父母之葬獨力經營
義不旁委而以本生父祔焉奉本生母會太君克盡子職仕則迎
養官舍病且亟公長跽以請曰脫不幸將如何會太君正色張目
視曰汝父臨終命汝者何吾父吾母竭心力撫汝者何而乃尙爲
此言公拊膺號慟曰如是則長負所生矣太君曰夫何負汝爲吾
父吾母後是吾父吾母無子而有子不愈於爲吾子乎且使吾得
告無罪於地下幸矣夫何負語訖而暝公乃改降服而心喪終三
年其後爲請於 朝奉 旨旌表節孝公之內行純備根於天性

縉也公以順治甲午舉於鄉戊戌成進士初授漢中府司理改補江西都昌令報最擢戶部廣東司主事尋分司通州監督中南倉報滿還原任時 孝莊文皇后梓宮葬遵化職押夫役事竣 賜內紵表裏二未幾司權龍江關升本部山西司員外郎加一級晉刑部郎中出爲四川按察使司僉事加一級提督學政任滿家居候補踰二年而卒其初任漢中也首革盤茶陋規歲數千金免小商違限之罰嚴治中茶之奸而茶政以飭司理之職特重刑名公宅心寬恕惟以平反爲主如王進友之以馬賊擬梟也公謂搶奪與強劫迥異遂減梟斬爲髡鉗王之元一家被殺其姪仁舉起運興運赴官鳴冤反受羅織擬磔仁舉而斬起運興運獄已具矣初

國朝志林卷之二
無證據公謂若是則死者之冤未雪復令生者含冤請寬仁舉等
重刑懸應得之罪以待真犯庶生者之冤雪然後可以雪死者之
冤謂李國讓等傷供不符擬絞非法謂王大昌因姦致死之事可
疑者三謀殺造意之罪可疑者五不應遂致大辟及他所縱舍難
以縲舉漢屬賦多不均而河尤甚公爲酌定丁隨糧行之法積困
頓甦會勦西山之役公餽餉有方民力不瘳而軍食克濟連雲棧
道險歲久且壞當事委公督理凡修險塌險石路若干丈合工六
萬九千八百計口授庸不三月而告竣公之實心任事務爲久遠
之計大率類此在漢中六年賢聲懋著會中丞與制府相齟齬公
欲調劑之不得因而被劾無幾微不平之意欣然奉會太君以歸

其再任都昌也縣治倚山瀕湖地瘠而俗獷素號難治再經寇亂
城市爲墟公廣爲招徠流亡漸歸則分建營房以居防兵民得安
業境故多盜柳國和者盜之魁也從逆稽誅竊踞山砦時時出劫
旁近州縣浮梁獲其黨移文窮捕國和坐山巔援弓下擬大言以
詬捕官擲一函俾歸報用僞提督印封之公覽而笑曰是何能爲
然急之且生變則佯置不問而陰爲部署寬脇從而購首惡其黨
稍稍散去國和勢孤計蹙乃自投繫獄仍規就解時中途逸去公
坐堂皇集其族數十人呼國和使前擲捕官歸報之函詰之曰此
非若所爲耶僞提督印何來效死沙場何語是不特爲盜且叛矣
顧其族眾曰我今日爲爾釋赤族禍立杖殺之湖有三山四山屹

立波濤中爲盜出沒蔽他盜志在取財湖中盜則必殺人謂不殺人則有失主賊易敗而李再豪者所殺尤多公謂得以計掩之一訊卽服並誅殘黨數輩而湖境肅清邑西南與新建接壤都之民資湖洲之草以糞田疇洲在新歲有課而都民之樵采者往往千百其羣越境爭取雖有按鎌交米之舊斷勢不能遵新民居近省會便於訟其豪又實利訟訟乃可以徵費於業洲之戶新民旣失洲利復滋訟費甚病之而都民之解省對簿者動輒填屍狂狴構訟且二百年痍死亦數十百人矣而爭者訖不已公籌度再三曰得之矣欲息爭計惟以銀易米官爲徵解耳於是移會新建令酌定草價歲額百五十金都民於小滿前輸本縣官爲移解新建轉

給業湖之民草則聽都民採毋禁例既定兩邑數百年之爭以息
甲子裁兵爲亂連陷安義建昌鄰封震動時方有秋闈分校之聘
公力辭而專事保障方訓練鄉勇以備不虞會賊禽乃罷歷九年
督撫交章薦舉特升戶部主事去之日父老匍匐攀留或拏舟追
送百里外既去復爲構講堂祀名宦羣情之愛戴若此其司權龍
江也兼理西新關稅務關有照票新使受事前任之印票卽不行
商旅常竭一日之力奔走出入稍不及則退而復納又商之自外
至者稅旣上或不以時售恆居貨城外以待價欲貿遷他所例更
納出江稅公至胥爲覽免其他利無不行弊無不革江督傅清端
公深嘆異之曰吾閩人多矣未見有刻意惠人如君者及代者至

傳復告曰但事事以會君爲法無誠政矣清端生平崖岸自高少可多否於公獨推重焉其視四川學政也當兵燹後士多窮乏公如意存恤鼓勵而振起之於郡邑吏詳請褫革者尤所詳慎先是蜀士斥復之柄操自有司不待學校除名旨扑與齊民等公知其弊先戒諸生毋抗令而特飭守令之違例辱士者必詳參論如法有司之遇士有禮自此始蜀多崇山峻嶺按部所歷崎嶇枋莽與豺虎競涂士之應試者裹糧徒步遠者千餘里近亦數十百里或縛竹爲簾筏上下崕岬石齒間倉卒失足呼吸莫拯公惻然憫之於原定六棚之外從來呈報所未到者不憚親臨俾士子免跋涉之苦又修舉廢墜嚴鄉賢名宦之祀務覈其真旌苦節以勵風化

尊者碩以示儀刑人始知有讀書爲善之樂數科以來鄉舉及登第者率公前列士與所拔童子爲多三載考績學使者例自署牘上督撫覈題公自署曰平常中丞進公語曰君治行而平常誰則公明尤著者將以稱職報公謝曰荷上臺厚意顧某老矣方欲引年且實有歉於中者自叨科第受國恩四十年思起西南文教比鄰魯而今不能其敢濫膺獎薦乃如所署上部覆以原銜候補蓋公生平莅官飭政之大略如此國家官制外吏任專而權不分故居其職者猶得自行其志至京朝官則自大學士九卿而下每一職必二人其理部郎於其閒抱案牘署紙尾旅進旅退雖有奇才偉略無所設施故公之政事文學亦著於外而略於內云居

恆研究務爲明體達用之學所著詩古文辭及制舉業發抒性靈不屑掇拾身後語嘗言文無定體惟變化斯無窮運用之妙存乎心耳性嚴毅不苟徇流俗而遇事有幾先之哲妖人朱方旦以左道惑眾舉國若狂大吏迎至江右稱受業弟子望塵而拜屬員奔赴恐後獨拒不往且下教曰苟入吾境必逐之未幾而敗吳三桂初叛人情洶洶公獨曰自古奸雄僭逆平時必邀結人心而三桂所至殘暴余昔治漢南適其移滇南時漢中民怨之入骨髓他可知矣狂悖反覆祇自速禍耳果如所料歷官七政一以義命自安恥事躁競與人交事賢而友仁不以顯晦存亡易節於關中則親三李於江右則敬禮湯惕庵語主者聘主白鹿講席於蜀則式高

士呂潛李開先並懋德之廬拔射洪楊忠節之孫於飢寒而貢諸國學遂州唐敬一前任西安丞與公厚後唐被誣公致書所知白其枉既歿而恤其家及行部至州則酸其墓躋而祀諸鄉焉他如營同學沈墨庵之葬拯故人周雷之急歸故高令凌天保之喪俱施德於不報尤人所難一生專事酬恩未嘗稽怨嘗曰古人理諭情道之論意非不佳然猶多存此四字於胸中將理非可喻情非可道者遂當與之校乎撫本宗兩弟魯會情義交摯本生祖司訓公歿析遺產公方爲貧諸生悉推以與之教養婚嫁下逮其子女念本宗繼起乏人爲姪匡世援例入成均更其名必大以寓屬望之意公既後曾氏應得恤典不逮所生每念子莘公孝行當表願

事已易代難於陳請令都昌時遇 覃恩乞以身及妻應得封典
移贈本生父母以兩姓無貤贈之例格不行迨康熙三十八年有
總兵王化行者疏請復殷姓且言受王氏恩乞無奪其所贈官而
移本身及妻誥命貤贈父母奉 旨允行公時候補家居聞之躍
然喜曰吾今得例矣雖復姓與出繼微有不同但 聖天子以孝
治天下儻得遂烏烏之私死且瞑目矣將以是秋赴 闕陳情而
一病遽不起公生平未展之私抱痛於九原者此而已或問曰矧
圃之射與爲人後者不入此何義歟余謂聖人之意蓋惡夫與者
耳解之者曰與猶寄也後人者一人而已既有爲者而往寄之是
貪財也公之爲後於曾夫豈貪其財歟豈既有一人而往寄之者

歟蓋墳無後外父母之理而以其子承之則固其所自出也。以所自出者而爲所出者之後，詎曰不可既已爲之後矣。爲之執三年喪而於本生則降服矣。馳贈之典自當權其所重，記有之變於禮者之禮也。其公之謂歟。抑余又嘗讀元黃文獻公潛所作外舅王公葬記，曾祖妣宗氏忠簡公澤四世諸孫女累贈，令人考諱沂文。林公不祿，公本宗氏子，令人之從孫也。遵母命，俾爲文林，後其後葬文林，而旁置冢，舍命之日，繼庵示子孫，使勿替其承。云此事與曾彷彿相似。文獻公有元一代名儒也，於王不諱其所自出，因竊取此義以表公之志，雖不必合於古書法，覽者庶無誚焉。公所著有清風堂詩文集六卷，書牘六卷，漢中錄三卷，都昌錄五卷，四川

錄二卷雜記一卷傳於世生於明天啟甲子二月二十五日卒於
康熙三十八年己卯七月二十六日享年七十有六屢遇 覃恩
授奉政大夫配沈氏累 贈宜人先十年卒子一安世歲貢生浦
江學訓導側室魏氏出孫男八曾孫男三先是公擇地於秀水縣
西崑字圩以己卯正月合葬贈公及王太宜人而以原配沈宜人
祔其穆曰吾沒後亦合葬於此庶幾魂魄長依先人窀穸甫畢而
公以微疾終形家言兆非吉安世乃更卜地於是冬十二月八日
壬申奉公柩葬於嘉興縣里仁九都之辰字圩遷沈宜人祔焉而
以前二日庚午並遷贈公王太宜人柩葬於新阡之東兩塋相望
承公志也安世狀公言行治蹟乞銘於余余不敢辭而論次如右

公之事迹見於狀者尙多可稱著其積躬及物之大者銘曰
始從治命兮卒妥先靈魂魄往來兮順事沒甯爲後於人兮無忘
所生以爲不信兮視其姓名

右墓誌銘查慎行撰

國朝通志卷之二十一

畢忠吉

公畢氏諱忠吉字致中晚號鐵嵐青州益都人世居金嶺鎮會祖考兌祖考懷德考受基世有壹行考 贈奉政大夫工部屯田司郎中贈公有丈夫子六公長也少好讀六經旁及唐宋大家之文作爲制義飄發泉流一洗場屋熟爛舊習順治丁酉年二十二舉鄉試第三明年成進士除江南常州府推官時漕事久壞將卒驕悍漁食單赤莫敢何問公監兌錫山其桀驚如故公以柱後惠文治之不少貸運軍大諫盡甲人情洵洵公不爲動執法益堅竟取渠率寘重典變遂定公聲績蔚起極爲上官所倚重撫軍韓公嘗云吾以東南半壁專屬畢君亡何註誤鵠級歸里公以父母年高

侍養不出及遇大故易戚中禮兄弟析箸產取其薄孝弟之行鄉閭稱焉再謁選爲蠡縣令首革邑中鋪墊錢三千緡奉檄查覈欺隱田地比縣有額外察出者皆藉以增秩公則令其自首遇有糧無地者抵之以蘇民困未嘗自以爲功也考功課最擢刑部湖廣司主事公明習法律聽斷平允爲同舍郎所矜式轉貴州司員外郎辛酉分校順天鄉闈得人最盛來年狀頭蔡君升元卽公所取士也晉工部屯田司郎中秩滿升僉事提學貴州丁卯鄉試與選皆其前拔者竣事遷雲南參議分守永昌撫卹調劑兵民晏然上官知其才糧儲驛鹽兩道缺皆以公攝之勞瘁成疾遂卒於官公性度明敏勇於擔荷其居官也案牘山積手批口決老吏皆爲吐

舌余頃游京師見事幾之會聚訟盈庭公一言便了眾所避謝莫
或敢承者公直以身任之至慷慨用財揮斥數百金如脫敝屣也
王重慶銘公謂輕財好施而非邀名介節清操而非矯激世以爲
篤論公沒時年止五十有八男子二人曰濬候選知縣有父風曰
靈諸生孫男海楨貢士海樽監生

論曰少參公豈不誠循吏哉昔孟堅傳循吏謂其所去見思死見
奉祀夫思與祀雖虛名然非實有及民之政亦不能彊邀於身後
聞公卒之日百姓相與賦斂致奠醮喪北歸無不巷哭以過車且
爭上其事臺使者祀諸學宮公之所得於滇民者如此里中父老
子弟復於其所居之旁建特祠以祀每值公生辰四方之人和會

成市持魚菽拜祠下者袂相屬也則公之鄉行抑又可知矣一循
吏顧足盡公平哉

右傳張貞撰

于覺世

公子氏諱覺世字子先別字赤山其先文登人有仲德者徙新城是爲新城始祖三傳至璧中順天壬午鄉試歷官福建道監察御史巡按河南湖廣以廉直聞官至苑馬寺卿曾孫承慶知武安縣公會祖也太學以讚公祖也 贈朝議大夫振翼是爲公父朝議大夫五子長維世博物負奇氣一時名士交推讓之公稍後出與齊名中順治三年丙戌鄉試乙未舉禮部尋丁外艱己亥 賜進士出身授歸德府推官未幾奉裁改知巢縣縣古居巢帶山瀕湖號難治公爲政寬簡閒以嚴劑之獄訟衰止俗好巫尙鬼壬子冬縣人數夜驚晨起則院中多得瓦石民間競爲祈禳公曰此好人

所爲何城狐社鬼敢爾乃下令嚴緝三日而獲其作奸者某置
諸法人心乃安庚戌江北饑居巢尤甚公捐俸錢購米以食飢者
存活數萬人明年蝗公齋戒祭禱遂不入境巢人頌之癸丑滇寇
發難親王帥大兵入楚休士馬於廬州糗糧芻茭屢咄嗟取辦
太守走匿他所曰是非巢令不可檄公至悉以委之公立啟於王
戢禁旅勿譁出則頤指口畫日中皆集無後時者按籍而給之王
大喜禁旅皆悅旣蕝事太守謝曰微公才略不及此有巨寇宋標
者抵巇起安廬間眾數千人攻剽郡邑將據焦湖爲窟穴揚帆自
大江東下公偵知之設伏於南門浮橋而身率甲士邀擊之甫接
戰伏發殲其眾魁就禽上功幕府餘黨皆鳥獸散安廬之盜遂絕

根株公之力也內遷刑部主事歷員外郎遷禮部郎中辛酉奉
命典試兩浙得人爲盛明年壬戌蔡君升元狀元及第卽公門下
士也尋出視學廣東東粵當兵燹之後廟學多圯敗公首請於督
撫疏請修葺得旨允行其教士先德行後文藝士翕然化之瓊
州遠在海南前學使多憚風濤不至公叱馭而往舟至中洋颶風
作舟中人皆恐俄有小鳥狀如鸚鵡來集檣上舟人懼譟徑渡得
無恙論文之暇廉問忠孝節義關教化者悉旌之三年報最擢布
政使司參議需次歸以繼母王太恭人春秋高絕意仕進晨夕定
省寢門如孺子然鄉黨稱孝焉辛未太恭人八袞率家人上壽觴
甫行而疾作生葛屨己未八月初四日卒康熙三十年辛未二月

二十九日得年七十有三所爲詩有居巢使越嶺南諸集藏於家
元配李氏繼許氏又繼王氏皆前卒治行先後相望而王相公最
久子女皆其出子男子二人允勛歲貢生允昱兵部職方司督捕
主事子女子一人適子姪啟浣前卒孫男二人履乾履坤曾孫男
一人崇勳系之銘曰

文足華國武能戡亂逸氣卓犖丰容魁岸夏屋之封彤水之畔生
氣如存千秋遐算

右墓誌銘王士禎撰

崔華

崔華直隸平山人順治十六年進士康熙六年除浙江開化縣知縣政務寬平力除蠹弊始莅任卽捐建義學課文校藝士爭嚮學邑舊有里總名目橫派滋擾悉除之又以虛糧爲累陳於上官請豁未竟其事而閩寇亂作防弁吳正通賊陷城露刃相逼華齋印從間道出檄召十六都義勇鄭大來夏祚等涕泣開諭立聚萬人躬冒矢石閱五日城得恢復未幾再陷遭掠尤慘民無叛志洎亂平流亡初集積逋尤多華繪圖上總督李之芳乞爲請命 恩詔盡蠲十三年至十六年額賦又贖民之流徙者俾得完聚旣而疫癘盛行廣施藥餌全活無算十九年論功擢江蘇揚州府知府值

湖河並漲州縣被災者眾華加意撫恤之二十三年 上命九卿
舉清廉各官華與范承勳張鵬翮陸隴其同在舉中遂擢兩淮鹽
運使寬於督課商得休息而賦悉辦先是湖南長沙諸府因用兵
蠲引三十九萬一千有奇有請補行蠲引者計課可四十餘萬兩
華力言不便以兩淮浮課甚重又帶加斤商力疲乏若再補行蠲
引必致額售者滯銷誤課事得寢三十一年遷甘肅甘涼道未行
而卒淮商祠祀之

右 國史館本傳

歲甲子 上諭滿漢大臣會舉天下廉能官員以備擢用 廷薦
者七人推揚州太守崔公爲天下清官第一兩江總督缺公以郡

守得列會推從來未有之希覲也余時撫浙聞而訝之曰此必素履潔清操持嚴毅者也又必雄才肆應利犀斷物者也然廉者必刻律已繩人或過爲矯激者也才者必矜揮霍震動殆鉤耀一時者也否則始終易渝豐嗇異致者也常變殊施衰壯歧效者也公大不然越一載兩淮鹽法道缺人上念此歲課攸關非其人則善剝諸賈飛府庫財安得狷介如崔某者乎咨嗟久之卽以公充蓋欲畱公大用也公受命值三逆叛亂軍興旁午不得已加斤加課輸梳木賑淮揚饑咸取給於商商困甚行鹽引窩求售不得有棄本業而他徙者公一意撫之以權宜變通令先行鹽後納課俾得息肩行之數年商本稍裕有起色矣又察鹽運之壅病在私販

公嚴禁得疏通他如培課源足國賦除加耗蘇商困漕河築隄賑
寵恤丁兩淮戴若慈母此皆分內事夫鹽利藪也乃纖塵不染如
入郇公之庖五味全刪親太倉之粟枵腹而處此人所難越一載
丙寅余調撫江蘇公來謁始識公而德盛而禮恭謙退不伐古貌
樸衷訥訥然如不能出諸口望之甚平易余敬禮之且驚曰先生
何以赫赫然聲稱震天下哉公歎仄遜謝乃知公固有道君子也
當其守維揚也一惟潔已奉公革陋例公賑穀嚴地稅建義學掩
遺骼安插災黎賑濟饑民平訟獄之冤鋤強暴之首諸政詳於行
狀不可縷述若夫取與必嚴一介茹藥飲冰正己率屬其大節彰
著清聲上達豈一旦之故哉再稽行述公釋褐後授浙江開化令

開俗健訟公宣講 上諭十六條委曲開導人悔悟以訟爲戒邑
大旱螟螽傷禾稼民饑公設法存活無算歲甲寅耿逆叛勢甚猖
獗邑南墾戶多閩人皆豎黑旗以應賊踞龍山源中城守千總吳
正復萌異志賊魁馬朋等果驟至吳正應之遂入開化公先移保
十六都集部民勇敢鄭大來等招義勇團練擊賊於石門大破之
賊遁入城輯兵爲固守計賊再寇再擊之死相枕藉自是賊心膽
盡落無何鄰邑常山陷公念孤城無觜角乃退保遂安帥兵士由
遂安恢復生擒渠魁謝某父子斬之八月 王師分道並進直趨
閩省公督眾搜勦烏飛獸散爲集逃亡撫瘡痍請蠲請賑休養生
聚次第舉行贖回難婦千餘口民感泣爭肖像祀公丁巳年總督

李公紀敘軍功首推公 上覽奏嘉悅 特賜優敘擢補揚州知府云公諱華字連生號西嶽直隸真定府平山縣人系出山西之馬邑九世祖諱峻遷平山下居城南王子村力耕課讀以忠厚傳家五世祖諱崇元博學有文名明萬厯己卯登賢書屢上春官不第遂閉戶著書高祖諱國治以明經任山東臨邑少尹多惠政曾王父昆弟四人長諱懋學文譽甲於藝林八試棘闈未售以明經終生王父一人卽 誥贈中大夫慎吾公也孝友忠誠根於至性公兄弟五人公居五幼穎異甫五歲慎吾公以梨餅授之必整衣冠拜而後受慎吾公心器之常摩其頂曰異日大吾家者必此兒也戊寅之亂變出倉卒父見背時公方七齡登第後每念及此輒

泣數行下以老親不及見爲隱痛幼既孤賴
誥贈淑人母謝茹
苦撫訓成立執業於伯父凌岳公公朗悟伯又善誘掖啟迪之已
丑補弟子員丁酉領鄉薦己亥成進士公仁孝性成痛父亂中藁
葬第後庀美材整殮具重葬成禮而後封植事母定省承歡能以
色養居憂哀毀骨立於昆弟相友愛事伯如父禮文宗八大家喜
藏書謂弟子曰吾拙宦幾三十年無以遺汝輩能讀父書足矣雖
在官手不釋卷公暇卽肆力於詩歌古文辭所著有公餘詩略及
四書課兒講義諸書尤慷慨樂施鄉里歲歉食草根木皮公盡出
囷穀分給之守揚日建育嬰堂按日資以粟給活嬰兒甚多於金
山險渡設救生船歲終給繫囚錢交友以信馭下以寬歷兵戈履

盤錯心血爲枯積勞成瘁癸酉三月報升陝西涼莊道參政一疾
遂不起商民罷市焚香慟哭者三日非甚盛德何以感人至此公
生於明崇禎五年九月二十日卒於康熙三十二年六月十四日
享年六十有二初令開化 敕封文林郎再任揚州知府 誥封
中憲大夫三任兩淮鹽法道 誥授中大夫涼莊未任元配武氏
所生官封姓氏詳於行略俱不贅繼配郭氏又繼配今賈氏俱
贈封淑人側室常氏公子三人長岱齊甲子拔貢候選主事郭氏
出娶葛氏繼娶徐氏繼娶胡氏次繼齊庶母常氏出娶馬氏次葛
齊庶母常氏出幼未聘女九人所適載行略孫男一人允臨幼未
聘孫女一人幼未字俱岱齊出公莊敬弘毅不欺暗室於不潔一

無所屑益以寬利爲運使諸商以羨餘若干金請致公拒弗納一
商私販檄鞫懼罪暮夜以金獻公叱之予謂公清於開化擾攘之
餘易清於名郡紛華之地難又清於繁劇要衝之區易清於財利
山積之日難昔貢禹有言居官而致富者爲雄傑處家而得利者
爲豪雋夫漢之俗尙近古然已如此又何責於後世之靡靡者乎
蓋公儉樸而寡欲糲飯敝衣處之淡如卽在仕籍亦然易簣之日
無長物圖書數篋而已公資於身者薄故繫於物者輕斯能入泉
流而不畱甘淡泊而不厭如是而世能撻之者寡矣故能不苛不
矜貞於始於終於常於變於嗇於褻於壯而一之豈恆情所
易企哉公之令嗣卜葬公於某地葬以卒之某年月日來請銘於

余余曰廉官可銘也因敘論而銘之銘曰

古道淪亡潔者寡得車彌多舐彌下如蠅集垢撲不捨廣陵煙花
都且治鹽筴泉流涌如瀉甘山司珍盡苞苴泊然不繫惟公者眾
注以金獨以瓦百年考德在茲也

右墓誌銘趙士麟撰

江皋

公諱皋字在湄號磊齋世居桐城之龍眠山下曾祖畏齋公諱某以理學起家祖楚望公諱某前壬午孝廉令峨眉有善政峨眉公生四子長卽贈副憲巨庵公公之父也母曰方恭人生子三公最長誕時有夢鶴之祥性敏慧弱冠舉於鄉未幾成進士觀政西臺假還侍養數歲巨庵公卒居喪盡禮服闋除瑞昌令瑞昌隸九江負山帶湖民疲茶多盜逋賦日積公至日前令坐繫凡三輩其一竟以累死妻子不能歸公慨然白府身任所逋悉罷遣前令歸其妻孥故事歲一按鄉堡校戶籍所至會斂爲令與馬費用行可獲多金公一切斥除之縣郭並河孺岸崩壅故道公捐俸倡首集貲

築隄爲完久計民號之曰江公隄是時閩楚告警瑞昌與楚鄰奸民乘閒行剽劫吏議發兵勦公曰此輩迫飢寒爲盜撫之甚易迫卽走楚壤藉寇耳因飭鄉堡長宣諭利害督丁壯材勇者巡察時刺取其渠魁擊殺之盜遂息居七年以察廉著會考績當內擢監司以九江孔道軍旅羽檄交馳水陸多盜非得才吏不可遂舉公仍貳九江郡公多設哨船日夜巡江上往來供億儲備有方未幾遷鞏昌守時大軍入蜀道鞏昌守典辦軍需日馳州縣督募會歲除矣檄到徵騾馬千匹遞輸芟芻器具稱是取具頃刻監司僚屬皆束手公立策便宜供無缺長吏服其能時軍興旁午民疲困卒益驕悍或竊出漁奪無敢訶者公行部出郊見數騎馳突過車斥

止驗問得實立縛送大帥斬以徇繇是兵衛肅然莫敢犯越四歲
移刺柳州柳僻南服半雜瑤獞俗獷悍時新收粵西兵畱鎮柳州
軍中多掠奪婦女哭泣思歸公白大府檄營帥籍所掠赴郡訊之
願歸者量遠近給資遣還凡數百人明年柳帥卒餉不繼士擐甲
譁軍門公遽出與期市月給士卒信公稍解去卽馳書告臺省趣
發餉少緩且不測中丞郝公然其計餉應期至軍乃戢大僚以是
益重公粵西山峻削柳尤窳險萬石離立斤斧所不及頗多巨木
時 上方修太和殿使者採木且及柳柳人大恐言長老聞往代
採木南荒震天岷地緣岡巒出入谿谷萬人譁譁頭顱僵仆橫藉
不可數是將奈何公曰毋然奉 上指臣子孰敢匿諱亡何使者

至公卽呼柳民間所產巨木地令前導公時借使者往視木行數里至絕巘下山石嶙峋木森森挺出拗輿下臨巖谷嵌崎崩劣馬不能前公解鞍踞地稍憩徒步邀使者登使者有難色公曰上命也木苟可出守臣當先以身殉遂短衣持筇扶兩小吏先登使者強隨之半巖路絕無置足所公仰視木顧使者曰何如使者咋舌大呼亟返曰是不可取公曰木具在是賴使者爲上言不可取狀使者遂還奏免柳民謹呼戴上恩德明年上命舉郡守有文行者使視學廷臣以公對遂特簡督學四川至峨眉謁楚望公名宦祠詢訪遺老故吏猶有存者因欷歔泣下蜀人嗟歎以爲榮試四郡太夫人訃至解官奔喪初公令瑞昌迎太夫人之官

後歷數郡險遠不及迎養以爲恨既除喪補陝西平慶道副使職
轉運歷秦隴賀蘭建策上大府弗能用所至爲民理冤滯鋤豪橫
秦人戴之秩滿遷福建興泉道參政駐節泉州泉地濱海大帥駐
師郊外悍卒素擾民間公至悉斂戢未幾坐前任事註吏議左遷
遂解官自茲仕至是歷七州郡皆劇地公性廉明故所在有聲績
刺柳時州民王纘緒者故宦家子少孤經喪亂產業爲四奴占據
纘緒素屏弗能理寄食僧舍公讀法僧舍詰得之奴緣入院司爲
胥吏其一役府中公悉逮捕諸奴懼納二千金乞免公佯受金貯
之庫卽訊伏罪乃出金授纘緒命四奴從歸盡還其產柳人歌頌
之先是令瑞昌亦嘗卻富人金自鞏昌移柳州時至不能具車馬

甯夏帥聞其賢貲送之乃得行解組後蕭然無擔石儲性好山水
喜爲文章居官稍暇未嘗不出游林居益窮諸名勝休卽讀書爲
詩歌古文詞乞言者踵至應之無倦色辛卯春 上垂念老臣
敕部列奏公與焉乃詣 闕謝 上命予復舊職蓋異數云仲弟
廣譽進士令臨邑季弟畢登鄉薦皆早卒遺孤撫卹備至公享年
八十有一卒康熙乙未所著文三十卷詩四十一卷藏於家公爲
人孝友恬淡起家制科然通達時務習吏事不爲儒縛始終潔白
一節賢達皆歎仰之辛丑夏遇公子園於楚中出誌銘視余爲譏
述本末著之爲其家傳公七子園字幼會次居五廉謹而文韓子
所謂文與行不失其世守者

右傳藍千秋撰
按江公順治十八年進士

邵延齡

故奉政大夫提學江西按察司僉事邵公諱延齡字靜山別號耐軒宋大儒康節先生後也世籍姚江六世祖某自姚江徙平湖故公爲平湖人曾祖某祖某考 贈奉政大夫某世有隱德皆不仕公以順治庚子舉於鄉辛丑成進士久之除內閣中書舍人康熙甲寅吳逆反滇黔隴蜀騷動朝議遣西安將軍統大軍入蜀董格貝子繼之公以中書自請從征歷蠶叢烏道戈頭矢簇閒瀕死者屢矣屬有天幸得不死董格貝子聞公知兵請參其軍事公縣決勝負往往奇中偶一不用公策軍困於蟠龍山絕糧月餘將士飢疲無人色公意氣自如采野蒿以食苦不得鹽作澹蒿詩紀其事

有餉羊肉者笑曰人肉也死生有命吾不忍噉此會援至得出靖
 逆侯張勇填鞏昌召飲帳中詢平蜀方略公左手引卮右手以箸
 畫地談戰守機宜水陸險要阨塞如指掌侯詫曰經生中有此真
 邊才也將薦補隴右道或尼之不果公伉爽直中無崖涸而外近
 於巖視朋友有急傾身赴之不擇利害為趨避與人語衝臆而吐
 然意所不可輒面批折人或雜以詼調俳諧為刺譏雖權要人不
 避也人以此諒公然亦以此嫉公從軍三年還仍故官稍遷戶部
 山東司主事監寶泉局外艱歸服除補戶部雲南司主事遷河南
 司員外郎又遷刑部福建司郎中讞請多所平反與司寇爭獄事
 至項頰發赤不為詘榜其署曰常思于定國門何以高當知張釋

之法如是足蔚州魏公象樞爲司寇最器重公出爲江西按察司
僉事提督學政按部所至有公明聲吉贛俗以佃爲僕子孫無得
與童子試公爲按版籍勒石永禁破數百年陋俗比自拔出就試
者眾諸生爭尸祝之滿三載最當詣闕道浙江過家省墳墓未幾
遭疾卒於里第康熙辛未閏七月某日也距其生明崇禎乙亥年
五十七先是公以中書從征也同官錢芳標當行已銜命矣而錢
有老母在京邸不忍旦夕離又懦不任騎日夜憂恐不知所爲公
遇之朝門語及流涕公曰吾代君行可乎錢遽下拜謝明日遂言
於 朝毅然請行吳越官京師者高其義釀金爲贖錢亦贖公直
可數百金公笑曰王事也奚以贖爲力卻之絲毫無所受嗟乎今

士大夫號砥行立名節者視其跬步閒遇小利則疾趨小害則卻足甚者擠人於危以自安者比比也視公行事可易能乎哉公是舉較柳子厚以柳易播殆爲過之使昌黎握管予不知其繁歛感慨於斯人者又當何如惜子文不逮昌黎也茲事行狀不載予聞之朱檢討彝尊云錢亦知名士華亭人字葆飭與檢討雅故故檢討之言信公讀書喜博涉強記凡星緯方輿兵法樂律句股切韻諸書皆手纂鈔盈巾笥詩文不名專家輿至揮灑千百言立就彙亦隨手散去或爲之惜曰吾詎以此爭文士名耶僅存詩三卷文二卷今鏤版以傳配王氏 封宜人子男三濂太學生鬻貢生候補教職翼太學生有雋才後公兩月死女一適孝廉陸煥元孫男

四某年月日濂嵩葬公於吳縣華山之祖塋既窆來請文其墓道之碑往予與公同宦江右稱知公乃掇其大者書之而系以銘銘曰

世患偪仄相刃相靡投隙抵巇公剴崖谷而以天游忘其栝機世尚委蛇睨顏眴色側肩語耳公獨任臆諛調矇諧不擇怒喜利則赴之害則避之世乃謂黠公坦而趨劍閣砥如孰云块坻位不竟用壽不配德乃止於斯茂苑之西華山之麓有豐者碑以詔來世以永厥慶視茲刻辭

右墓碑邵長蘅代某撰

傳印書局影印本
卷之二十一

三

劉彪

劉彪字玉庵建水人天性孝友丁亥流寇破臨安其弟被掠彪以身易弟歸養母流離黔蜀者數年及王師平蜀彪率眾投誠以功授分巡遵義道修學禮士安民靖寇康熙戊申會裁缺家居樂善好施吳逆叛欲餌以官堅卻之

右滇繫師範撰

按劉公順治十八年任遵義道

國朝通志卷之八十一
三

周澹園

余友周澹園穎悟夙成讀中祕書風雅擅長有聲宇內而自視欲然惟以理學爲歸宿居恆究心濂洛關閩之旨潛體密玩不釋手嘗不遠數百里訪余於頻山土室余時閉關養痾槩不見客辭謝再三執禮彌恭乃啟鑰延入藹如之言粹盎之容一見不覺形親神就懽若平生其所商證言言根極理要自是鍼投芥合聞問時通立身行己大體卓然推以及人惟恐人昧所向使交趾守南康督蜀學所至以理學爲倡惓惓提撕獎勸引人入勝聞者翕然孚化咸稱空谷足音曠世僅見其貽余書有云弟萬里交南兩年星渚凡一言一動莫不奉先生之槃範以爲周旋今量叨蜀衡崇教

化正風俗尤其專責雖事務紛紜而一念兢兢自省少一分戕賊
卽存一分生氣僅試五府一州而人情士氣大有觀感差堪自慰
由是觀之則澹園之注措於是乎加人一等矣昔李文達公謂宦
途惟辭敬軒以理學爲務今余於澹園亦云關中學脈自呂馮而
後久已絕響得澹園注意余方藉爲歲寒盟而一旦溘然吾道益
孤之嘆曷維其已厥嗣舉葬請余文其壙中之石余素以此爲戒
而道誼同心之雅又不容已乃遙題其墓碑而揭其可挹之大者
於碑陰庶觀者知所嚮往

右書墓碑後李容撰

張兆熊

李愔 黃中通 董應魁

胡允

陳士本

王燦

郭亮

張兆熊漢中人順治中任上湖南道副使綏輯流逋奏免荒田賦

民以安集九年再罹兵燹兆熊撫恤備至捐貲振饑病者濟以醫

藥全活甚眾順治間湖湘監司及以郡守著聲績而遷監司者又

有李愔華亭進士任上江防兵備僉事駐岳州時大兵自滇黔凱

還過境愔供億宿辦市肆不驚歲旱步禱遂致疾卒卒之日猶以

首叩枕語不及家事翌日大雨歲獲有秋民以爲愔之賜哀悼之

李棠馥高平進士提學湖南凡所拔士皆中雋棘聞人服其識後

官湖廣參議亦多惠政胡允句容進士任上湖南道副使除奸剔

蠹羣以斂跡卒於官至無以殮陳士本武進人任分巡湖北道築

隄丈田皆躬行阡陌弗辭勞瘁卒於官至不能歸櫬王燧廣安人
任岳常道副使駐澧州西山賊肆虐燧守城捍禦城賴以完給民
牛種墾荒田政暇集諸生講學以振興風教郭亮江南進士任上
荆南道副使儉素若寒士有以詩文投謁者手爲評隲稱道不輟
解組日行李蕭然黃中通晉江進士知永州府亂離之後招集散
亡通工易事蠲資營民廬舍尤銳意學校升上湖南道董應魁廣
甯人知寶慶府時郡初附應魁綏戢兵民人爭嚮化半載擢武昌
道張維養濟南人知寶慶府折獄平恕吏民有過必反復曲喻使
之自新修學校建府治皆不勞民力後擢陝西甘肅兵備副使改
貴州按察副使傅鸞祥南陽人知寶慶府歲旱振濟多所全活粵

鹽價昂爲民病鸞祥條易淮引民甚便之與守道朱廷棗運餉西山甚著勞績修復學校改孫可望故館爲義學出私俸增諸生膏火賞後擢天津道祀名宦祠

右傳李元度撰

陳光祖

國家用一人則思盡其才以收任事之效乃嚮用方始而中道屈折會不克展其措施之什一此有志用世者所以感憤扼擊歎息者也陳君諱光祖字順侯爲刑部郎時與余交每與言洞肌擘理指畫事之原委甚悉及余長西曹君已遷戶部有述君平反姚李爭產之獄者李利姚之產強聘其女比姚訟之急則獻其產於權要以求勝君獨持不可卒正李罪余嘆君之才可以寄大任迨出而分巡甯紹甫及六月竟遘疾不起是則可悲也矣按狀陳先世居上虞明正統中始遷會稽君祖諱應瑞由丹徒丞入仕某王府某官遂占籍大興考諱宏儒順治甲午領武鄉薦游粵西以材爲

制府所知召署督標參將兼攝富川縣事比疏請實授未拜命而卒以君貴 贈奉直大夫刑部江西司員外郎方奉直之入粵也君甫冠奉直爲君娶於王而後行君挈幼弟及女弟依王氏以居兩姓並釜而炊十餘年無閒言亦近世所罕見君念奉直負奇氣無所成就刻志讀書思以科名顯癸卯舉順天鄉試連上公車不第將省覲入富川而奉直訃至急迎喪歸京師服闋謁選康熙十七年授內閣中書又二年遷刑部廣西司主事明年晉江西司員外參定律例又明年遷戶部陝西司郎中同修會典會廣西布政使奏大吏侵冒軍餉十餘萬 詔遣曹郎廉慎有幹略者按其事君往鞠驗得實籍其數以 聞聲譽籍甚道拜浙江按察使僉事

分巡甯紹道既至剔蠹鋤強具有次第而海關初設所以參酌課額爲商民利者尤溥時舟山已隸版籍顧灌莽未剌幾成廢土君觸駭浪相視島壘形勝曰此江浙之屏障而閩粵之聲援也非築陣樹壘不足以壯戍守上議諸大吏聞者躉之後越數年 詔繕城堞駐重鎮且建邑置吏以撫綏新附人咸服君之先見云君莅事僅半歲而所建樹卓犖如此甚矣君之勇於任事而克勤於其官也康熙二十四年正月二十一日以積勞卒於官舍年僅四十有五配王氏累 封恭人以二十九年五月二十日卒年四十有六恭人有淑德方君在京師賓客雜選恭人治中饋惟謹君歿有棄置如路人者恭人日夜勸幼子成立每言及輒爲垂涕君初欲

歸越未果恭人獨奉君喪並君祖考喪皆反葬會稽城東賀家池
新阡以成君志今子範卜以康熙三十年十一月日奉恭人喪附
葬亦成恭人之志也子二人長佶庠生早喪娶羅氏順慶知府京
之女次卽範候選府同知娶陶氏戊辰進士元淳之女女三一適
候選知縣王英謀一字太學生胡衣德一未字孫一文謨幼範出
範將自京師東歸乞銘於余銘曰

少而履約長而守雌厲志入仕擇義而爲目營四海不受繼羈才
未究試忽壅厥施所至樹績歿有遺思魂兮歸來墨食在茲

右墓誌銘張玉書撰

劉深

公劉氏諱深字源長別字慙蓼世爲淄川人曾祖爵祖冠父鼎鉉
公幼從父學無他師年十六出應童子試督學鄞人錢君清溪試
以經義三篇頃刻立成文采斐然大奇之補縣學生宣城施愚山
侍讀以僉事來督山東學六郡英尤之士甄拔無遺賞公文以爲
蕭疎簡遠拔冠其軍順治庚子省試主者將以公首解旣而以新
城李嗣眞作元同經房移置第六李君公受業弟子也榜發傳爲
盛事康熙甲辰嚴我斯榜 賜同進士出身癸丑銓授香河知縣
香河密邇京師地久爲八旗屯牧其民皆宗室個人公嚴立科條
不畏強禦旗人凜然亡軌法者縣西四十里爲河道通津會滇閩

作逆 朝命禁旅往討浮戈船南下公慮民失農時且不任挽送之苦多方籌畫募市井丁壯代之事賊而民不知役治香河三年惠政不可殫紀民尸祝之比於畏壘擢行人司行人康熙庚午典廣東試得梅遇夫等四十三人拔潘君履生於廢黜之中士論服之辛未考選臺諫 特簡湖廣道監察御史公之官行人也與陽羨任葵尊宏嘉居同邸舍出入共一肩與不謁權要不通賓客茗椀熏鑪討論經史相對晏坐終日而已至是兩人同授御史任君章數十上而公言不妄發務鎮靜持大體尤不樂搏擊爲名高時司農籌餉頗開事例賈人子入貲或加至一二品每朝期章服爛然尊卑亡等公上定品級以崇國體疏下部議言雖不行識者疑

之甲戌外補福建布政使司參議督糧儲閩海疆也將軍已下提
鎮碁布滿漢兵戍守者八萬有奇胥待哺焉公殫心經理給無後
時嚴絕扣剋積弊軍皆宿飽馬騰於櫪林某者有坐地一區爲豪
民兼併前讞者多入其賄不與值最後赴愬於公公親履畝得斷
碣田閒披辭繹之果林氏祖墓也遂以地歸林而置豪於法凡其
虛公明斷皆此類未幾引年乞休歸林居數載不飾輿馬不入州
府長吏罕覩其面可以厲士風敦薄俗禮所謂歿而可祭於社者
公其人與生天啟丙寅閏六月初三日卒康熙四十二年癸未十
二月二十九日享年七十有八階朝議大夫歷官湖廣道監察御
史福建布政使司參議元配翟氏封孺人性嚴毅有烈丈夫風

公宦游四方孺人獨操家槩未嘗之官督治田園勸課紡績歷年
賦稅不待追呼而畢率取給於家而不仰給於官故有以成公之
廉正教子讀書取友皆爲名士師巫尼媪罔敢履闕生天啟甲子
十二月二十五日卒康熙四十六年丁亥七月初九日享年八十
有四子男子三人肇徐縣學增廣生肇昌縣學廩膳生壬午副榜
肇祉早殤女子四人傅思明韓貞吉王朝相高之隲其壻也孫男
二人紹祖繩祖孫女四人以丁亥冬十一月十七日葬縣城東北
之田家莊肇昌從子游來請銘銘曰

鄉之善士國之寶臣仁而不驚爲時鳳麟六廉四知砥操霜筠三
德六行燕詒子孫峨峨德配敬姜比倫眉壽偕老蘭玉詵詵鬢山

嶙峋孝水清淪封如馬鬣松作龍鱗不燹不崩裕爾後昆

右墓誌銘王士禎撰

臣等謹將各省禾黍

／ 卷二十一ノ

五

鍾性樸

先侍御戊子舉於鄉出鍾子文先生門下嘗稱先生之賢教履兄弟誌之不敢忘其後四十餘年始奉教於嗣君聖輿聖輿綽有父風敦廉節多才能文章以先生合葬誌銘委履履思先侍御之教誨又感聖輿不徇名位而屬之鄙樸無文之小子遂受命不辭乃櫜括其狀誌其大者先生諱性樸子文其字元配黨蒸人繼趙蒸人長子輒壬子拔貢泗水教諭次輒乙丑拔貢廣西某縣知縣卽聖輿也俱趙蒸人出女二孫男二聘娶詳狀中先世江右吉水人明正統時始祖泉以武功世襲錦衣衛百戶遂隸大興籍父國相贈朝議大夫先生由進士任濟南推官與巡按御史力爭可否必

平允乃已被 召官禮部祠祭司主事歷贊諸大禮典試河南督學山左所得士如湯潛庵王阮亭田漪亭皆民譽也先生居官廉介督學時閱文不假幕客備兵曹濮閒討平榆園大寇數千人歷官至江右兵備副使甫三月海寇悉平嗚呼士以盤錯別利器虞謂之在朝歌龔遂之於渤海豈嘗侈言經濟哉平日志有所不爲而一旦臨事毅然不知有身乃能建非常以成大功何者誠積於中而不可掩也先生於學無所不窺制義宗王唐詩歌本李杜所著太平經國書及大觀等集行世世以爲名士風流而不知其戎略若此歷官數十年家無尺土猶以一園被謗不能免茲多口夫勵志絕人則負俗之累益深然而千秋萬世後富貴有權力者行

就湮沒而若人矚然表出獨與日月爭光亦安能復從而遏抑之
悲夫悲夫有志者可以興矣先生生於年月日卒於康熙甲辰十
一月二十九日山左祀名宦將卜吉暨兩恭人合葬秣陵山新阡
以歷官山左山人思之因畱葬焉黨恭人生卒別誌趙恭人生
於天啟癸亥卒於康熙辛巳性不佞佛尤善教子命聖與師事漁
洋山蘊兩先生狀謂以母兼父道信夫側室賈以苦節終恭人悼
之若同父先生之葬也李少保補庵既爲之表履又何加焉姑舉
其大略若此銘曰

我生之初趨庭有聞先生之德允武允文孝於親刲股而辭旌敬
其官潔己而忘身見阿堵物則蹴之於困窮人則畜之不責其報

善則欲之不愧於心行則篤之惟兩蒸人克相夫子象服是宜淑慎爾止百歲之歲牛眠龍起同穴孔安以利其孫子

右墓誌銘呂履恆撰

鍾子文先生戊子典試中州某受知遇進謁百泉公署先生誨諭諄諄後得頻侍於左右教愛之甚篤於門下士受恩爲最深竊窺先生學術之淵博詞章之雄麗政事之敏練卓然足以追配古人自司李入爲秩宗郎視學山左備兵曹濮往來松潘潯陽之間所至皆有殊績可紀傳中詳載其言之矣歷下文人近代推華泉于麟華泉位躋通顯雍容廟堂所不具論于麟視學關中嘗登華嶽絕巔其所爲記詩奧淹雄渾其光熊熊與嶽相稱先生視學山左

亦登岱宗絕巔雞鳴觀海日上迷萊閣看蜃樓所爲詩空靈浩渺
如雲霞出沒不可端倪于鱗傲岸一世鮮當意者坐小樓望華不
注鮑山曰他無所溷吾目也先生乘興踞華不注揮毫頃刻得詩
累幅其胸懷亦正相等然則桷園與白雪樓固可千載相望也馳
驅於蠶叢玉壘白帝錦江彭蠡廬阜極天下瑰瑋奇麗之觀宦跡
較于鱗爲獨遠而時運風會則有迥不相同者于鱗平生有弇州
諸子聲應氣求針芥相符足以自快而先生峻標孤詣求所謂弇
州無之後之君子遊濟南者必將徘徊泉石低回欵欵賦詩憑弇
況及門之士慨絳帳之銷塵望墓木之已拱其涕泗滂沱更何如
也斌久臥林泉與耕釣爲伍師恩莫報負疚良深應 詔入都與

次君相晤邸舍握手道故不覺淚下霑襟某自史館外轉移病歸
田年甫三十今且五十餘矣半生沈淪名心都盡待放南歸擬終
老邱壑殊負夫子平昔期許然古人所以報師恩者固自有在儻
天假以年或於道稍有所窺因得修明先儒遺書亦不至虛度此
生今之所謂道德者功名而已耳今之所謂功名者富貴而已耳
先生固未嘗以富貴望我也某方寄寓僧舍候 命遽爲此言蓋
自知才分於長林豐草爲宜非爵祿之器也先生有靈其許我乎
書傳後付次君藏之

右書傳後湯斌撰

袁時中

公諱時中姓袁氏字向若號來庵其先汝南人自宋咸平進士祺徙明州會祖民範祖學詩父贈公元鼎母曹宜人公幼而父母俱亡撫於王母趙孺人已而趙亡依其叔父寄食市廛公勵志於學善爲場屋荒速之文而貧苦異甚五喪淺土瞿瞿永歎陳侍御變五見而憫之相助經營公著報恩編以識康熙丁未登進士第授中書舍人纂修世祖章皇帝實錄分校壬子北闈吳三桂反副親王南伐加禮部儀制司主事屯兵楚中澤國暑溼士卒多疫死公通曉醫術爲之處方製藥雖廝養卒亦躬親診視軍中無不感涕以故疫不爲害是時賊在湖南官兵相拒於洞庭湖口調發

江南舟子舵工數萬集於軍前久之不用亦多物故公惻然啟奏
遣還鄉土皆鳧藻踊躍而去曰微使君吾儕非岳陽之黃塵則昭
潭之魚餌耳一日赴王急召山程積雪劣容馬足公投空數十仞
峭壁之下垂梯而出之則已折齧死矣軍中號慟以奇方藥之復
甦公隨征七年始得班師累遷本部員外郎中纂修會典出爲貴
州提學僉事癸亥冬公至貴州距闌期數月黔士兵火穿竄瘡痍
未起公謂宜稍示休息俾溫腳本若歲試科試兼行則士不勝其
擾議改歲爲科 上從之公旣契闌行閒死而復生不敢告勞仍
鞅掌於爨煙蠱火之間解土方終病遂不起詩云豈不懷歸畏此
簡書豈若王陽王尊之以意爲進退乎灌夫馳入吳軍身中大創

十餘適有萬金良藥故得不死史記之以爲天幸公之墮巖也有
蒙古醫人振動其肢體以燒酒灌之自口以外悉糊其竅使壯夫
接氣久之氣從傷處出脅之內陷者還故所而後纏之以藥始不
死蓋公以感動軍心得此非天幸也公起自赤貧時懷濟物之願
見人之飢寒卽思己之飢寒救之唯恐不力故於三黨恩意無不
周至古之自困而亨者懲創先憂則榛筮義路如杜棕劉崇龜之
絕分遺是也發舒得志則睚眦故人如段文昌之檳榔元載之曝
衣是也孰有如公之一視窮達乎生於崇禎庚午十月二日卒於
康熙甲子十月二十七日配徐氏 敕封宜人副室漆氏子五百
雲太學生重雲庠生朔雲仲雲太學生午雲女二將葬百雲介友

陳同亮請銘銘曰

洞庭之水東兮其底無窮
青公之武功貴陽之山偪兮其高不測
敷公之文德

右墓誌銘黃宗義撰

張顧行

韓城張大夫有子廷樞成進士不佞爲總裁考試官於鎖闈中賞識其文字榜放來謁詢知其家世爲詳大夫旣自登通顯而廷樞官翰林垂十年至侍讀兩逢 覃恩貤封其父母又加榮焉及大夫卒諷日將與大夫元配薛宜人合葬以墓表請爰爲表其大者大夫諱顧行字篤一號蓮峰順治辛卯鄉舉康熙丁未成進士乙卯謁選初得江南英山令已而改補建平辛酉課最擢刑部江南司主事越四年升本部河南司員外郎尋升禮部精膳司郎中丁卯升貴州督學道僉事課最奉 旨進一級以參議道用壬申補江南江安督糧道居亡何請老踰數月卒其治建平也葺廟學廣

厲諸生人才奮興爲諸邑冠丁巳充江南鄉試同考官得人爲盛其官刑部也讞決明允大司寇平反疑獄必專屬之其督學貴州也教多士以經史性命之學文以漢唐宋諸大家爲法黔人由是始興於學平溪清浪二衛初隸貴州後更隸湖廣鄉試道遠士不赴大夫奏記巡撫疏設貴筑縣學二衛生徒隸焉大定路險遠先是學使者行部安順檄赴安順試大夫則按臨考校大定人便之凡黔郡縣學廩額之隘者優等之少者苗生試目之有限者悉爲增拓嗚呼黔西荒僻幾不可爲矣而大夫尙爲之藉令大夫得有爲於江南勲業且不可量而竟以江安老豈非命也哉乃其輕財好施與則尤有人所難者嘗公車旅次遇蜀人下第落魄輒解囊

中裝贈之以歸邑人許生客死河南子孫繼沒則捐金歸其櫬且
葬之黔試歸道荆襄遇流冗載路垂橐振濟至資用乏絕入潼關
值米價踊貴鄉里飢人踵門相屬則糴粟外郡計口以授存活且
千人大夫之賢如此固天性然哉抑亦辭宜人內助之力爲多云
宜人之考曰承度者邑高才生也教宜人通孝經論語大義十五
歲于歸逮事舅姑舅姑沒襄事盡禮宗黨稱之遇娣姒以和待嫻
戚以敬馭妾媵戚獲井井有條理大夫雅好賓客至酒漿脯醢咄
嗟立辦其課子嚴而有方嘗憐愛廷樞早慧欲令游名山大川以
拓其懷抱曰古人文筆往往得山水之助也宜人卒廷樞有參山
之游蓋宜人之教思與大夫俱遠矣子男三人廷極國子監教習

先卒廷樞康熙壬戌進士翰林院侍讀日講官起居注廷柱直隸
保安州知州女三人孫男三孫女四大夫生前天啟丙寅十二月
十五日卒康熙癸酉八月二十六日享年六十有八宜人崇禎
己巳十二月初一日卒康熙壬申五月十九日享年六十有四以
甲戌二月二十八日合葬祖塋地名坡頭村大宗伯桐城張公旣
爲幽宮之銘矣然非表思無以詔來世余不佞故大書以揭諸其
墓之原

右墓表金德嘉代某撰

丁慈

嗚呼歲戊寅季冬之某月始得重瞻謁我澹園丁夫子於燕邸距
庚戌受知二十有九載矣夢雷不幸遭謠詠遠謫閩都辱身牛馬
弟夢鵬復受我夫子知列弟子員顧又碌碌無似至戊寅十月雷
蒙 聖天子鑒其冤 恩召入都置 禁近侍 皇三子誠郡王
讀書未幾聞吾夫子寢疾逾月遂捐館泰山梁木之痛莫能自勝
緬維我夫子生平以人事君大節近世所稀不可以無傳吾賤不
足以傳夫子竊考古名公鉅卿其門生故吏或爲之述其行以求
表章於當世爰以行述爲傳考其家乘兼採鉅公誌銘序次其大
者俾後之史氏有所據焉按夫子先世湖南醴陵唐宏道中始祖

某令豐城遂家焉世有顯者父某隱居不仕天性孝友讓產恤孤
有曲直待決焉舉丈夫子四夫子其次也幼警敏日記數千言讀
書至丙夜不休太淑人慮其過苦止之乃藏燈默誦九歲太淑人
先逝值鼎革江右荒亂播遷靡甯偕諸昆弟奉太夫子採薪供爨
甘苦無曠丙申補弟子員屢試疊高等四入棘闈丙午舉於鄉丁
未成進士選讀中祕書不事干謁至於國家典故政治因革皆置
心講覈居恆謂士君子立朝大則行道濟時次則唯是矢公矢慎
以人事君於讀書初心庶幾無負己酉授雲南司主事漕務繁劇
綜覈精悉大司農倚重焉庚戌分校禮闈得士二十有一人選庶
常者五今司寇總督兩江張鵬翮詹事府少詹朱阜侍讀學士德

格勅秦中學憲俞陳琛而夢雷之不肖與焉其他入爲部曹出歷
方面縣令所至皆卓有聲稱人才爲最盛辛亥督諭左倉出納惟
慎以外艱旋里廬於墓所服闋補戶部福建司員外督漕通州悉
革陋規弁丁勒石頌德晉工部虞衡郎中內務府一切供應咄嗟
立辦壬戌督理內河不憚勞瘁未幾擢福建學使者慨然曰今而
後庶爲 聖天子簡真才以成吾志乎且入閩吾高祖宦遊地當
年以廉約自奉故有豆腐御史之目今甯可墜前人家聲自是按
部所至絕苞苴杜請謁所簡拔八郡一州五十七縣悉皆孤寒知
名士先是閩經寇亂寶輿典停者再學使者又貪黷相望而閩士
習敦樸恥改業至白首抱殘經不得一青衿士氣沮喪至是每榜

出鼓舞懽呼有至感泣者吾夫子又加意訓導頒立條約釐正六書每試日自作程式以示諸生卽拜跪揖讓之儀莫不從容立之規則修諸郡邑 文廟暨先賢祠重建福州名宦祠及三山書院道山朱文公祠延平修正學祠士心競奮甲子鄉試新進獲雋者二十七人餘皆歲科前列而侯官一邑新進十五人其一早殤十四人先後皆雋得人之盛前此未有也乙丑復 命琴書襍被外無長物諸生徒聚擁馬前不得前諸郡邑建祠立碑會城紳衿祠之於道山景堂又刻木像祠之奎光閣甚且配祠之於關壯繆廟比戶頌謳稱 國朝四十年來文宗第一殆無愧云丁卯分藩山左汰胥吏絕餽遺修葺城垣官舍新學宮勅書院講書皆不取之

民間又延師傅命諸生講課清復學田三十畝有奇以贍貧士掖
邑科名不振至庚午獲雋者三人時值登萊二郡游饑徵借近州
縣倉穀設廠煮粥以待閒親詣嘗其可否遠地不赴廠者給以銀
錢全活數萬計招徠流民使各復業二郡以甯萊地距海民皆業
鹽輸課官民便之有奸商連土豪爲壟斷鹽價頓增乃詣省力言
利弊於當事除奸商復舊制比自省歸合郡焚香頂祝相望於道
有墨吏自知無狀以賄求容力拒之卒於計典罷去土豪某結守
令爪牙爲奸萊民怨入骨髓廉得其狀置之重典在任七年以丁
繼母艱去任民皆號泣罷市居家修家廟宗譜恤族姻鄰里之貧
者爲之葬埋婚娶藥病人救溺女瘞枯骨贖俘掠鴛衢路修橋梁

生平既不事封殖又性好施予以故橐無餘資薄田僅供饋粥或
諷以宜爲子孫計者荅曰子孫賢無事此否則當令自食其力耳
丙子服闋入都已卯夏卒於京邸年六十有三所著有理學源流
問心堂劄記豐城文獻五花閣詩集校士存彙衡文七則八閩學
政登萊政略數十本夫子生平襟懷灑落口不言貧而施予不倦
平居無疾言遽色在官未嘗妄撻一人僕隸不輕訾詈而鋤奸剔
弊則毅然不可奪恂恂不務虛名而獎拔人倫所造就者皆卓有
樹立其卒於京邸也值閩中選拔公車入都者多門下士皆哭失
聲去蓋夫子當官政績多可紀約其大者如此當世或知余非阿
所好云

論曰 國家自 世祖章皇帝赫然置不肖主司於法而二十餘
年中科舉之弊一清我 皇上禮遇臣下欲以德化其貪而近世
士大夫多貧困不克自樹立遂至甘負 聖慈冒法禁不顧然卒
以敗免者亦僅矣嗚呼我夫子庶無愧以人事君者哉

右傳陳夢雷撰

張道祥

今使人盡丈夫孝而女子貞焉則天下無餘治矣雖然孝與貞不易爲而可爲也而成其孝與貞者可爲而不易爲也子之於親本於一體之愛由乎孺慕之性甯有生事死葬忱於閒關跋履而罔顧卽夫婦旣嘗伉儷必守一以偕老雖險勿恤此固夫人所以自盡也吾直以爲易焉可也乃其所難則尤在成之者哉且夫成之者又有難易之辨矣御舟於安流之中一人失足羣叫呼爭救及風駛濤怒雖父母不能以拯其子凡人有癘疥之疾庸醫自鳴其伎至居乎膏之下肱之上秦越人將過而不問焉何則其望之者固難而應之者誠不易也乃吾讀吳孝子之紀張公也作而歎曰

嗟乎張公固爲其難者哉孝子名珽字晉侯陽羨人隨父宦於滇
父卒官舍遂不得歸貞婦楊氏滇籍也晉侯卽彼昏焉其隨任泊
旅櫬凡二十年先人遺棄蕭然當是時滇南之望陽羨猶陽羨之
望滇南也傷心乎萬里一棺也哉歲辛丑同邑竹逸徐君授永昌
司李其同年雲開忍齋張君授雲南司李二君者以必得孝子而
歸其櫬爲慰且謀之公公欣然曰此吾意中事籌之久矣遂各解
囊以贈維時孝子止知有親而氏亦不敢以婦人稽大事也於是
輿櫬東旋悲哉其不能連袂下矣嗟乎此數君者其皆能行古人
之事也哉夫同舟共濟非一手足之力合眾品以成藥必君臣佐
使相劑以爲功而此數君者或篤於桑梓之誼或推乎鄰郡之好

斯已僥矣至如張公渺然居大江以北去吾邑絕遠與晉侯未嘗
謀面而其切於仁人孝子之慕不啻被髮纓冠而往救之者何其
厚也吾故謂張公爲其難者也晉侯旣歸思挈其妻若子還故里
姻婭幾十輩莫能以銖兩尺帛賙其乏長望天南引涕而已越九
載至戊申秋公以秩滿歸徐徧覓貞婦令從公之夫人而附棹焉
於是晉侯之夫婦復合吾乃益歎公之不可及已疑公者謂始猶
激於一時慷慨俠烈之氣動於其人骨肉生死天涯哀慕之情又
迫於一二同志者眾爲君子之助而今有一於是耶孝子旣歸而
徐張兩君又以奏銷墨誤遣里第公獨以一人之心與力周旋惻
怛於萬里之外何公之念之如是其無已耶則信乎公之難也公

諱道祥字履吉徐州人爲洱海憲副今候補夫以公之篤於至行
如此使其所莅盡丈夫孝而女子貞焉嗚呼其亦足以廣教美俗
而俾天下無餘治矣

右義全孝節記任繩隗撰

林麟焟

林麟焟字石來興化莆田人康熙九年進士授中書舍人二十三年奉命與檢討汪楫冊封琉球使還除戶部主事晉員外郎遷禮部郎中三十三年擢貴州提學僉事以薦授參議未補歸初耿藩有異志麟焟方在籍逆憂之間道潛入京師及南昌而變作人稱其哲著玉巖詩集竹香詞列朝外紀麟焟受詩法於王士禎故士禎爲序其詩同縣林堯光字覲伯順治間拔貢生官行人司行人有涑亭詩略弟堯英字蜚伯順治十八年進士知饒陽縣歷戶部主事舉博學鴻儒遷員外郎轉刑部郎中出爲河南提學僉事卒官有澹亭詩略士禎選燕臺十子詩堯英與焉

皇朝詩林卷之二百八

右傳陳壽祺撰

邵嗣堯

邵嗣堯山西猗氏人康熙九年進士選山東臨淄縣知縣有惠政
著勸民績言以憂去十九年服闋補直隸柏鄉縣興水利減火耗
禁差擾民甚安之有言開滏陽河通舟者巡撫于成龍使之相度
力持不可言此河旱潦不常未可以通舟楫卽或能通恐舟楫之
利歸商賈挑濟之害歸窮民矣事遂寢會盜殺人於縣界立捕實
法或毀於上官竟以酷刑奪職候訊時 上命刑部尙書魏象樞
巡視該輔民爲申訴事得白罷歸以成龍薦復補清苑縣嗣堯益
砥礪廉明聲藉甚咸以包孝肅比之二十九年戶部尙書王鵬薦
嗣堯清廉慈惠行取授江南道監察御史值歲歉疏請平糶倉穀

又請罪止流徒者準贖均議行三十年出爲直隸守道正己率屬
州縣肅然奉法三十三年江南學政缺出 諭曰學政關係人才
甚屬緊要朕覩原任御史陸隴其直隸守道邵嗣堯操守學問俱
優若以補授必能秉公校士革除積弊時隴其已卒遂 命嗣堯
以參議督江南學政卽莅事虛衷衡校杜絕苞苴其論文宗尙簡質
著四書講義傳示學者甫按三郡以積勞遘疾卒同官斂貲致贖
乃得歸葬士民思之爲立祠肖像以祀焉

右 國史館本傳

許孫荃

孫荃由戶部郎中督陝西學政勤於課士遇古聖賢名蹟力爲修復表章敬待名儒李容輩爲刻其所著書行世

右 大清一統志張維屏錄

許孫荃字四山江南合肥人康熙庚戌進士官翰林院侍講陝西學使詩激昂悲壯多燕秦之聲

右 國朝詩別裁集小傳沈德潛撰

STANDARD

1111

魏莠形

柏鄉魏先生諱莠形字念庭貞庵先生之子也官至江蘇常鎮道
著大易通解四卷其論畫卦與河圖洛書祇是其理相通不必穿
鑿附會又以乾一兌二離三震四巽五坎六艮七坤八非生卦之
次序其爻則兼變爻言之謂占法二爻變者以上爻爲主五爻變
者占不變爻四爻變者占二不變爻仍以下爻爲主餘占本爻與
象辭至論上經首乾坤中閒變之以泰否下經首咸恆中閒變之
以損益尤得二篇之樞紐皆頗有所見惟不信先儒扶陽抑陰之
說反覆辨論大意謂陰陽之中皆有過不及皆有中正和平德皆
有美凶品皆有邪正非陽定爲君子陰定爲小人陰陽中皆有君

子小人陽之美德剛健其凶德則暴戾陰之美德柔順其凶德則
奸佞陰陽之君子俱當扶小人俱當抑陰陽二者一理一氣調劑
剛柔損益過不及務期如天地運化均平之時此四聖人前民之
用贊化之心而易所以作也云云其說甚辨然觀於乾坤姤復之
初爻聖人情見乎辭矣蓋陽而不知其過則不能自勝而爭勝於
陰爭勝於陰則惡亢龍之謂也陰而不失其中則不敢自成而取
成於陽取成於陽則美黃裳之謂也陰陽雖二實一氣之流行也
調劑之中扶抑寓焉烏得謂無扶抑哉

右學案唐鑑輯

國朝書獻類徵初編卷二百八補錄

監司四

吳自肅

王疇五思訓少參吳公傳公長身偉幹步健聲宏讀書過目不忘
精韜略技藝上馬殺賊賊當之無不披靡當時以文吏而著武功
者公爲多屐齒徧天下至輒交其名士所著萬行草誌邊徼之治
亂始終人情風物久爲田蒙齋諸公所賞晚年復手訂全集曰我
堂存槩嗚呼公負經世略積有功勞而所歷多憂患垂老不獲竟
其用可謂數奇嘗讀吳天章讀晉史循良傳奉懷吳觀察之作曰
有晉良吏中隱之吾所愛劉訥庵懷人絕句曰黃昏哀角滿鈴岡

多少降旗下夕陽祇有錦江康樂令春風吹淚兩三行此可以見
公之生平矣公名自肅海豐人康熙初官雲南提學道其大理懷
古云西南奇勝滿梁州滄洱雄封控上游張盛傳經開禮樂段蒙
關地自春秋獻花逸事高三塔寫韻才名壓十樓祇有窮兵天寶
恨萬人家畔草含愁

右溟繫雜載師範撰

國朝書獻類徵初編卷二百八補錄

監司四

邵延齡

庚午中冬余自豫章東歸兄握手語絮絮不忍別曰明年使事竣
還里當訪子青門草堂余曰諾今年六月間兄歸平湖遣奴子持
一札訂草堂期報曰中秋後過毗陵也八月行盡余方訝其不至
復附書往會有傳兄溘游道山者余愕未敢信十月朔再遣奴子
走平湖不數日持行狀歸嗚呼兄眞死矣越明日爲十月八日弔
服爲位而哭兄於室禮也余時病喘兩月餘氣忡懅僅續如綫按
狀兄沒以閏七月十九日蓋余附書旣未達而訃又不時至距兄

死蓋七十有九日而今始得哭兄嗚呼悲夫兄起家順治辛丑進士官內閣中書歷戶刑二部郎中以按察司僉事提學江西滿考歸里以疾卒初官中書時會滇變起 朝議用兵隴蜀中書當選一人隨征同列皆有難色兄毅然請行從安西將軍入蜀董格貝子以兄知兵令參其軍事爲畫利害懸決勝敗輒中嘗一不用兄策軍困於蟠龍山絕糧月餘將士飢疲無人色兄意氣自如如有餉羊肉者笑曰此人肉也死生有命吾不忍啖此卻之會援至得出請逆侯張勇鎮鞏昌召飲帳中詢平蜀方略兄左手引卮右手以箸畫地談戰守機宜及蜀中水陸險要隄塞娓娓竦聽侯喜曰經生中有此真邊才也將薦補隴右道缺或尼之不果嗚呼 國家

眞黔用兵以來智者效謀勇者效力自卒伍之賤以至市井屠販
椎埋剽竄亡命之徒往往奮身弄刀稍或樹頽頽傲倖取功名富
貴過其望者不可勝數兄以一書生據馬鞞跋履三千餘里崎嶇
蠶叢鳥道瘴癘虎豹虺蛇鋒鋦矢鏃死生呼吸之間歷三年之久
大帥知其才矣然不獲以功名顯乃僅循資平進浮沈郎署十餘
年迨駸駸嚮用而兄死矣嗚呼豈非命哉豈非命哉憶己未余客
京師始識兄相見詢譜系世次同祖康節公又同派姚江爲兄弟
行則大喜兄時官曹郎獨季子侍京邸呼之出拜余亦入拜邱嫂
於房自是別未幾輒相見乙丑南歸別最久戊辰余自嶺表還會
兄履江右任遂畱署中前後閱兩期故余知兄尤深也兄伉爽和

易不治畦畛與人語衝臆而吐然遇意所不可輒面指斥人或雜以詼調爲諧語刺譏雖權要人不避也人以此諒兄然亦往往以此嫉兄故宦終不顯在江右名能知人得士諸生俎豆兄於李空同夢陽家文莊寶侯廣成峒曾蔡忠襄懋德間四公皆前明視江右學者也論者不以爲過讀書務博涉強記詩文濡筆伸紙數百言立就然不欲爭文士名持論少許可詩推新城王士禎文推甯都魏禧同郡則推朱檢討彝尊而尤喜余文每得一篇輒咨賞彌日或訾余文太澹笑曰澹處正不易及君非知文者嗚呼兄之知我乃勝我自知兄今已死矣嗚呼悲夫兄諱延齡字靜山別號耐軒卒年五十有七又聞季子翼以哀毀致疾後兩月亦卒翼字汝

爲力學攻文章曩侍兄京邸者也嗚呼天道慘酷胡至斯極耶將
買舟力疾往會兄喪思所以寫余哀者乃爲楚音以當哭其辭曰
隴阪碣礪水鳴咽些蜀山欽崑巖巖晝不見日些猿狖吟嘯虎豹
慄些封豕長蛇薦吞食些君胡來思激忠肝些書生投筆逐戎旃
些人肉爲醢骨爲薪些入虎穴幸而得全些嗟哉數奇獨苦辛些
偃仰郎署逾十年些九江五老迎使車些清秋日晶縣玉壺些歸
來兮卽君之新居些華軒突宇網戶朱些砥室髹几陳詩書些胡
爲乎舍此而逝曾不畱些去歲別君在南浦些朔風飛霰雜以
雨些余祛君摻離思苦些今歲扁舟登君堂些像設塵筵素幃張
些呼君不應涕泗滂些總帷絳纒兮鐙青熒嗚呼哀哉兮何以爲

國朝書牘類考卷之四十四

情

右哀辭邵長蘅撰

國朝耆獻類徵初編卷二百八補錄

監司四

許孫荃

古之君子窮而在下君大夫必有以養之如孟子所稱魯穆公之於子思亟問亟餽鼎肉而猶弗悅其卒也夫庖廩鄙瑣駱驛道途卽不以君命將其事固難繼且賢者非力耕不食而常苦無耕之田不養以田而區區問諸臺人假令甘俎日來是口腹畜之也於王公之尊養疏矣至餽之粟直氓周之耳焉有君子而可以氓待乎古者天子有所不臣諸侯有所不友若其養之缺畝雖堯之於舜無以異也周衰諸侯養士始謂之客而子夏子方段干木之居

魏猶誼兼師友焉嗟乎士苟才望軼羣非致之位則無失其養其
責在君大夫而況吾道雖孤斯文未喪丁絕續之會繫開來之身
如伯兄二曲先生其人貞隱山莊屢卻徵聘廉之爵祿不屈望之
賓客不前餽之兼金奉之臺廩復固辭而家素貧餽粥恆虞弗給
忍飢而不出戶質之先生永日獻歌淵淵聲出金石觀之當代
聖主嘗虛前席以聽諸公數式廬而勸之駕矣而困瘁至此將奈
何於是督學泚水許使君慨然起曰先生處蓬華之中躬耕而食
顧所少者田耳然貽先生以田弗受也遂割俸百二十千徵學博
易負郭田如顏子之數延吾從子里選慎言暨弟慎行授之耕申
使君之命曰勿以告先生其二子不敢不告也先生愀然寓書因

篤曰任之爽予心拒之則拂使君之義因篤對曰拒之非人情也
又使君下學博爲之而納其券邑中匪私也公也亦安得辭蓋自
是薄采菽麻免於凍餒使君聞之而喜可知也夫使君有養之之
實而先生不必居其名於義也安於迹也泯視魯穆之僕僕走使
形人鉗鑿之恥不啻倍蓰過之三代以還使君殆真能養賢者矧
上寤寐旁求恆怒焉若不及尤以先生爲人倫弁冕嘗 特詔起
之田閒屢頒溫綸趣之而終不奪其高尚之志先生雖恬於義命
三旬九食固計日而餐也所以庇其屢空而謀其饗飧者是誠在
大夫否則豆簞時虛不憂貽 君父乎而未揆諸道強之食猶強
之仕也賢者豈顧從之哉今使君授田在我並有不居之名於人

自無可卻之理體 君恩而全士節豈曰小補聞之天下後世足以風矣舊歲先生門人甯子維垣過予竊謂宜有文以傳後非敢自謂也故久而闕如既而思使君非以求名先生謙於自誦予目擊其事復引嫌而莫之言斯舉將湮沒弗宣也不揣愚賤聊紀大略俾世之讀吾文者知養賢以田庶幾可久者其業必如使君之慮周處當乃盡善焉蓋斯舉在使君爲盛德在當世爲空谷之音所宜樂道而廣播之且先生天下士也爲兄弟言私也而爲天下言則公也君子不以私廢公予亦安得辭哉比聞整屋程明府方纂邑志或有徵於吾言儻無足徵存吾集中而已許使君名孫荃字生洲江南合肥人康熙九年進士繇庶常歷部曹擢今任其事

在康熙二十三年某月也

右養賢田記李因篤撰

同治十三年八月

三

國朝耆獻類徵初編卷二百八補錄

監司四

龔其裕 子燦

龔其裕福建閩縣人由諸生投效江西軍營積功以通判用康熙六年補瑞州府通判十三年耿精忠反陷袁州吉安等郡其裕率鄉兵爲大軍導復上高新昌擢吉安府知府時揚威大將軍和碩簡親王喇布駐軍螺子山其裕野處供餉無缺乏民間子女陷賊及軍前俘獲者其裕爲請命全活甚多戰場遺骸捐資瘞之十五年緣事鐫級調用捐復原官十八年補河南懷慶府知府郡有順利渠引濟水入城通舟便民久淤廢其裕下車詢之父老力主清

藩復其舊山陝不靖軍馬多牧於懷民驚擾欲避其裕走告軍中
請身任供億勿擾民軍校有攘民難者重懲之兵民遂安二十一
年升兩淮鹽運使革除積蠹釐政肅然二十二年以註誤褫職二
十四年欽差大臣湯斌白其誣河道總督于成龍檄調赴河工其
裕以疾辭三十七年卒於家入祀瑞州吉安懷慶府名宦祠子爍
少從父其裕之任瑞州隨軍效力報捐知縣康熙十八年補浙江
餘杭縣知縣力除宿弊葺城垣修文廟勸義學除雜徭開渠築隄
尤長讞鞠民有殺僕而瘞之者截足棄道旁以虎傷報睨疑之巡
視所居側寺園中隙土有新迹掘之餘屍在焉研訊得實由是政
稱最舉卓異二十七年升直隸趙州知州趙有支河久塞開濬之

灌田數百頃民獲其利會有 山陵之役擇能者隨扈嶮奉檄往
召對稱 旨三十年授江南松江府知府松爲財賦區地廣事繁
嶮治之有條理崇明海漲爲災嶮渡海賑之三十二年以保舉廉
吏送部引 見尋署江蘇糧儲道三十六年調直隸保定府三十
七年丁父憂 特旨奪情兩次隨扈雄縣霸州等處 賜克食三
十九年擢陝西甘山道地近邊而俗陋嶮設書院教之人始知書
四十年臨鞏荒疫饑民流入河西嶮捐俸賑之丁母憂嶮恐復奪
情亟奔喪歸旋有 旨慰甯上官代請始獲終制四十五年服闋
入都迎 駕於密雲 上嘉獎之四十六年授江西饒九南道增
修書院設育嬰堂撤五聖邪祠復范仲淹祠百廢具舉萬年縣匪

徒煽亂且數百人嶮單騎往諭刑其魁亂以息累署按察使五十七年以疾歸五十八年卒入祀饒州府名宦祠

右 國史館本傳

國朝耆獻類徵初編卷二百九目錄

監司五

佟國聘

蔣興芑

蔣伊

曾孫果

周昌

趙作舟

靳讓

章履成

蔡祖模

王之綺
李承芳

成泰慎

王全臣

茹儀鳳

王澄慧

朱起

楊三炯

賈樸

朱琰

王奕鴻

芮復傳

黃叔璥

陳履中

補錄

蘇霖泓

董新策

國朝耆獻類徵初編卷二百九

通奉大夫前署江西巡撫江西布政使司布政使湘陰李桓輯

監司五

佟國聘

公佟姓諱國聘字君莘三韓人也世居遼左奕葉相承車騎連陰
鐘鼎成列當代稱名閥者首佟氏蓋西周之尹吉東漢之楊袁矣
何祖登榮祿大夫祖朝鳳通議大夫父耄年丁亥貢生先祿寺卿
王祥佩刀世爲卿族鮑永驄馬家傳司隸以此連類殆又過之公
生於崇德七年閏十一月二十日丑時儀表外明風神內照人莫
不羨洛下衣冠華陰子弟它日蔚爲國器雍雍乎清廟之朱絃明

堂之蒼壁也以恩蔭授吏部筆帖式轉樞曹公畱連墳素悃惻文
辭就經鬻舍不取博士之名習武兵欄仍負詩書之氣值更定品
級考俸滿外用辛亥冬除礪山令王武子之初仕正及華年荀中
郎之冊勳才踰弱冠而公精於吏職畱心民瘼爬梳利弊劄發彈
丸逋賦一清枹鼓無警礪當黃河之衝公憂之鳴琴餘閒於禹貢
水經注溝洫河渠諸書披覽雕接準今酌古日討論淮黃全勢而
槩括其大槩嘗以語人曰河之患非一日矣得其人則理非其人
則廢考之曩代莫不如斯是以江淮而南陳瑄績著濟兗以北宋
禮功高旁及劉大夏徐有貞潘季馴輩非河漕之淵鏡乎昔王甯
朔不欲使鄧禹笑人余何辭焉前河院王公聞而賢之嗚呼公治

行本之詩書爲有用之學按其生平大約膺民社之日少親河務之日多課最入於歲成論功書之年表蓋自碭令始云公之爲碭令也二年擢歸仁隄同知三年調宿桃又諸路監理未一年遷黔平遠守題畱原任十餘年塞楊家莊蕭家渡二決口建朱家堂溫家廟二石壩濬白洋引河九道築黃河南岸遙縷月隄九千九百餘丈北隄一萬五千餘丈浚中河一萬五千丈有奇所至左提右挈櫛風沐雨石輦土塘鑄金榘木財不多費役不後時前河院文襄靳公倚辦如左右手刻章凡十七上肩鉅幾三十年兩罹光祿公陳太夫人大故一則在任守制一則倚廬而居哀痛滅性三日不食公之孝也未幾題授分巡濟甯道按察使司副使舳艫千帆

淮沂其乂旌旗十道奄有龜蒙公之此授僉曰得人任城為運漕
 孔道公迺恤淺夫之苦免張秋之租減臨清之稅除鴛木之費善
 政班班復以監督高堰工程移駐袁浦又嘗語人曰天下大要害
 二曰河曰漕國家歲轉漕數百萬銜尾魚麗而上率從漕河入漕
 通則河治又高寶諸地不傷昏墊而後河漕之功以成今日之急
 務黃之可以褻焚而下榷也淮之可以渠分而股引也高堰之似
 浮山上格可以并榦立而兩鵠鳴也為百姓請命余敢息諸公志
 氣縱橫風情倜儻處天下事精敏有大略出舍河孺躬臍胼胝泥
 塗畚鍤歷有歲年功莫偉焉而公勞且病矣卒於康熙三十八年
 五月初五日巳時享年五十有八沒之日淮土停春魯人罷市巫

祁井塌花覆庚楚之祠南池月明碑墮羊公之淚今以辛巳年十
二月初九日歸葬於密雲塔子莊之阡嗚呼祭子產之墓慈母有
懷過楊震之廬大鳥斯下子女婚嫁載行述中銘曰

秋菊黃兮霜楓丹吁嗟千年兮鶴來還神漢郤吐兮白檀之山喬
松偃蓋兮丸丸而盤盤藏茲石兮百禩其不刊

右墓誌銘田雯撰

蔣興芑

公姓蔣氏諱興芑字岐巖號南麓京口人也其先出周公子蔣侯伯齡之後子孫以國爲姓歷漢以來代有賢哲至明萬厯中公之曾祖廷壯有志四方遊歷江左自浦陽遷京口遂家焉廷壯生雲臺累官都督同知入 皇朝雲臺以歸命功 恩授世襲拜他喇布勒哈番隸籍鑲紅旗漢軍都統生二子長康侯世襲職管鑲紅旗防禦卽公之父也公生而岐嶷幼卓犖有大志好讀書過目輒不忘壬子舉京兆鄉試考授中書改滿缺以員外郎任刑部江南司獄獄有能聲時推其明允平恕爲十四司最奉 詔恤刑檢驗南國申臺省大辟凡五十餘案公爲平反四十有九老吏爭咋舌

相向詫昔所未有視榷揚州精心計錙銖躬自較理不假手胥吏
商民樂之遷兵部車駕司郎中尋擢江西驛鹽道僉事按剔叢弊
民困爲甦嘗兩攝臬篆有殊政善決疑獄動中機宜人莫能測客
有久寓旅舍暮與其鄰鬪詰朝遽殞於鄰人之門官坐鄰人死獄
且成公察其枉逮囚至一孱弱男子向畏榜掠自誣服公陽爲不
理仍置獄中未幾覆按立破之械則罪人已得乃客淫其逆旅主
人妻夫恨甚欲殺之惡其醜聲且懼禍乘鄰人之隙殺客以洩憤
一鞠卽服羣稱其神明鳴爾丹叛 上親征公請於 朝願從征
自效 上許之輓軍楫出口外四千餘里疾馳先期至軍前 天
顏大喜垂問良久公從容奏對俱稱 旨量移湖廣下荆南道參

議始卒值歲凶公立法振救嚴保甲戢姦宄民得安業襄陽民晨
起亡其妻蹤跡至江潯得妻縞履度已死越數年有言其妻被竊
且尙在民歷訴守令以爲妄撻之公廉得其事語其夫曰若有密
友常往來汝家否夫思之良久曰某人乃子衿日聚博來家獨妻
亡時前數日以事往秦中亡後月餘始歸今某故在也公祕之若
不聞後值里社縱令陳百戲爲樂遠近嬾稚畢集其妻在焉邏者
立擒之遂寘某於法旋與當事不合乞養親去復起河工效力
上南巡公迎道左 天語垂問惓惓不忘人謂且棟用公方苦瘞
證遽引疾歸卒於家母劉太夫人在堂尙強健公性最孝卒之日
氣息纔屬忽瞠目大呼曰放不下老母言訖而逝年六十有五子

四尚恣湖廣黃州府同知尚志候補知縣尚德太學生尚懋業儒
滄洲陳鵬年曰蔣公南麓之分司吾楚也於予爲舊部公所至有
惠政至今漢南人猶思之予嘗調用河工適與公相值公餘之暇
往來過從接其言論丰采慨然思古名臣之風何以加哉賢者遺
愛在人卽所憩所芟多不忍忘況重之於交遊曩昔之好乎公已
往矣襄陽固公持節地也後之人覽其山川卽公之風流亦可想
見云

右傳陳鵬年撰

蔣伊 曾孫果

癸丑春闈予承乏典試事得士百有五十人而所爲風裁姱峻者
維常熟蔣君莘田君由臺班遷外秩歷任中州學使不幸以勞瘁
卒於官卒之日遺命孤陳錫必句予言志墓是則君之拳拳於予
直至瞑目時猶然也而予亦惡忍辭之按狀君姓蔣諱伊字澗公
別號莘田系出東漢九侯之裔晉咸康中有秀亢者以平吳功封
常熟侯則始祖也自秀亢後代有聞人傳至南陔公諱棻以丁丑
甲科任南海建安令有惠政晉儀部主事是爲君考生三子君其
季也君生而聳秀骨相異於凡兒年十四補博士弟子遂有聲諸
生閒顧乃困於場屋則益下帷攻苦大肆力於羣書而其學以就

丙午魁鄉薦癸丑成進士比榜放卽上所著玉衡臣鑒二錄有
旨畱覽時君已頎然負公輔之望矣是年四月選授庶常館試之
文爭相傳誦乙卯秋散館 特授臺員蓋重之也八月補侍御史
巡視中城君感激知遇多所陳奏如清六部之積習減白糧之值
嚴誣逆之條與夫勤撫恤務開墾振荒濟饑等疏皆切中機務至
於彈劾大吏略無回撓一時有真御史之目焉丙辰移病歸里已
未補廣西道御史時吳逆鴟張征調四出哀鴻徧野君乃草四疏
繪十三圖親詣 御前上之其圖曰難民曰寒窗讀書曰廢書曰
水災曰觀榜曰衝驛曰旱災曰鸞兒曰寒冬狴犴曰暑月罔圓曰
暴關曰春畊夏耘曰催科圖各爲幅曲寫民間疾苦甚悉 上覽

之動容八月復應 詔上三疏庚申秋又上大選正途一疏自是
直聲震海內而忌之者亦起矣辛酉春得 旨外轉壬戌奉 命
參藩粵東粵東當兵燹之餘供億煩苦胥蠹倚爲奸弊民不聊生
君至則禁陋規革耗羨撥支給除差徭蠲滌煩苛與民更始粵人
便之尋以才望署藩篆宿寶畢清而不名一錢又爲之建義學設
書院集諸生課肄其中嶺南之文教一振無何有視學中州之
命君毅然曰此吾事矣於是星馳抵任燧飭各屬修葺黉宮及先
賢祠墓頒條教崇經傳倡明絕學以端士習而正文風諸所獎拔
生童悉皆寒儻一切竿牘絕響河朔伊洛之間彬彬郁郁寶君之
功也丁卯春巡校至大梁忽舊痾舉發遂以不起聞者悼之君生

於崇禎辛未二月初二日卒於康熙丁卯二月初一日享年五十
有七有文集若干卷行世娶毛氏孫氏子二一陳錫乙丑進士一
廷錫太學生女四並適望族孫三幼君少負大志動以古名臣自
期當其翱翔臺諫天下想望其丰采不幸中道沮抑一麾萬里遭
迴蠻煙瀨霧間雖量移內地庶幾以文章圖報稱而中多牴牾常
鬱鬱不甚得意卒之官不過監司壽不滿花甲一旦溘然歸於泉
壤豈不重可悲哉君生平見義勇爲如恐不及瑰琦卓犖之行不
可枚舉而於師友一倫尤特爲加意以力矯世俗澆薄者之爲卽
子丙辰被放憂患嬰纏君聞之未嘗不太息飲泣語所知曰非敢
阿好爲斯道惜耳夫以予之不肖而君顧猶惓惓不釋如此則生

平之篤於行義爲何如也嗚乎今已矣九京不可作矣子乃揮淚而爲之銘曰

嗚爾之操凜於介石嶷然之槩瀕於易簣皎皎者污棱棱者圻柎鑿齟齬咄哉誰惜汲黯坎圻賈生擯斥千古同悲請觀去迹子亦罹憂奄奄落魄嘆息斯人銘茲幽窆

右墓誌銘熊賜履撰

公諱伊字渭公世居蘇州常熟縣父諱棻崇禎中進士除南海知縣憂歸再補建安縣以廉幹擢禮部主事未赴官明亡老於家公爲諸生卽負經世志康熙五年舉鄉薦十二年成進士甫釋褐卽具疏上所著玉衡臣鑒二錄玉衡者言君道臣鑒者言臣道上自

唐虞下至元明采其事要備法戒昭勸懲爲卷凡二十四有旨
留覽選庶吉士十四年散館授監察御史巡視中城時南方用兵
城邑殘破民多流亡公上疏言新復諸州縣當 敕巡撫身歷軍
前嚴禁搶掠量緩徵輸責成有司招徠開墾課其戶田以爲殿最
如此則遺民安堵寇盜可銷又以奸民挾仇動借叛逆妄害良善
請嚴反坐之律其有司受贓枉法者加等治罪又以江浙白糧向
準順治十一年價米一石折銀一兩五錢至是米價減至五六錢
請準時值量爲高下又以蘇州駐防滿兵糜餉擾民請移駐它要
地下所司議奏多見施行十五年移疾歸十八年補廣西道御史
時連年用兵征調四出又方開捐納例選涂頗壅公乃繪十二圖

上之曰難民曰刑獄曰讀書曰春耕夏耘曰催科曰鬻兒曰水災
曰旱災曰觀榜曰廢書曰暴關曰疲驛復爲疏論難民言臣於十
五年請假旋里見江西浙江難民百十爲羣哀號乞錢求贖妻女
又於江甯省城遇淮安僧宋緣率難民二百餘募錢求贖妻女臣
因加察訪其被掠已贖者有江西萬年縣徐善妻張氏等一千餘
口其被掠求贖者有浙江永嘉縣何君信妻周氏等二百口其難
民具呈藩臬者有江西江廷杖浙江劉佛顯等其募錢爲難民求
贖者有僧宋緣武舉人王都等此等被掠之人並按之深山邨落
初非得自賊營其爲誣陷何疑臣請自後新復地方責成督撫嚴
禁搶掠其有將吏掠賣男婦所過地方 敕督撫一面截留一面

參究庶水火餘生來蘇有望其論刑獄言外省有司以酷濟貪民
開小舉動輒收禁株蔓牽連逮及婦女請令督撫司道府廳州縣
立石中庭鐫刻 上諭除真正人命彊盜重情外不許濫行監禁
擅用夾棍及株連婦女違者按律治舉庶足以儆貪殘惠熒獨其
論銓法云捐納知縣原出一時權宜其人未必無賢能而不可不
選擇請未選者責成吏部行簡選法身言書判實加考驗優者按
次除授劣者給以知縣空銜俾爲佐貳其選者責成督撫一年之
中試其才守行保舉法否者席之並請將見開捐納知縣一項亟
行停止 聖祖覽圖及疏爲動容嗟歎又疏劾江西董衛國縱兵
焚掠及擅役民夫狀 詔衛國軍前帶臯圖功十八年因地震疏

論六部積習遇有銷算案件要求貨賂意爲高下堂司書吏連爲一手望嚴加飭禁又言災眚疊見 乘輿不宜輕出宜日 御便殿咨諏治道飭官常求民瘼以幸天下時江南江西游饑上救荒策大略言振濟之法莫善於分莫不善於聚縣各爲振勿聚於府鄉各爲振勿聚於城人各爲振勿委於吏如臣在康熙十年振荒於鄉分設三廠所活者眾所耗者少城中官設二廠所活者少所耗者多此其明驗也又其目在獎廉吏緩催科通商賈興工作養孤老埋骼鬻爲五疏上之十九年因正涂壅滯請疏通選法下部議行二十一年出爲廣東糧儲參議時當兵火後供億餒苦公至革耗羨禁饋獻除差徭日買乾魚自給誓不取民間一物集諸生肄

業書院及諸義塾月有會旬有課一年人知向學無敢有私謁者
會 詔求學行兼長者充督學任九卿舉公以應遷河南按察副
使提督學政既至頒示條教崇實學正文體其孝子貞婦旌之營
求請託者舉之二十六年試開封得疾卒年五十七居家孝友篤
於親故兼好西方之教誠子孫讀儒書暇誦金剛華嚴法華諸經
修大悲懺法行功過格朔望放諸魚鳥家人不得特殺有故許用
五淨肉著爲家訓令子孫世守之其卒也說偈而逝有莘田文集
行世子二人陳錫官至雲貴總督廷錫官至文華殿大學士

右事狀彭紹升撰

按此篇十二圖前篇十三圖後篇銘辭又十二圖且圖說微有不符並存待考

蔣果

公諱果字華林一亭其號世居吳之常熟曾祖伊康熙間官監察御史出爲河南提學奏減蘇松浮糧世稱莘田先生者也祖廷錫文華殿大學士諡文肅父洲以廢累官山東巡撫公生長世閱折節力學如寒素不屑屑於章句手鈔前代名臣奏議思一見諸設施爲國子生連試不第以貲爲縣令授河南襄城調汝陽又調洛陽調祥符遷許州牧擢守懷慶調開封明年擢開歸陳許道以緝匪不獲吏議落職相國阿公方行視河惜公才奏畱效力遂以勞遵疾會方有旨起用比入都而疾不起矣其在襄城也值金川用兵襄城地當孔道公預購民間牛車多儲芻茭牢廩兵至咄嗟辦一不累民洛陽縣界北邙山東漢諸陵及唐宋名臣墓在焉雨

久傾圯民因緣發冢骨暴原野公至悉爲掩埋捕奸民李林等寘之法及任郡監司大府倚公如左右手遇疑獄開令鞫讞公敏決詳慎多所全活柘城王立山挾左道聚眾令以謀叛聞公輕騎赴之謂民毋恐直入賊巢縛其魁以歸令猶株連無辜公言於大府悉得釋公前後在豫二十七年於河務尤諳練官許州時以事至省值紅沙鬧暴漲公聞立出三千緡募役堵築或以越俎爲言公喟然曰國事民命甯有畛域耶河勢南趨改南岸爲北岸公於大柳砦開濬引河別築南隄先是公嘗請修黑瑤壩中丞何公以時過秋汛欲緩之公言今深冬水落大濶直偪埽根一經春漲恐溢溢不可治力爭得請明年水陡長他埽隨鑿隨墊獨增修工巋然

何乃歎服至是以開濬委公公估計調發費省而功倍於是開
封之 命此公居官行事之大略也至性醇篤事後母如母門以
內融融怡怡從父第弟以下有不給者析產贍之置敦睦田如干
畝分潤宗族多寡以服爲差年五十有七子四光祖戊申科舉人
光弼丙午科舉人光顏太學生先公卒光庭孫二懷坦懷城諸孤
將奉公匱窳於縣治西六里支家浜某字新圩以狀來請銘爲序
其世次官閥治行之實而系之以銘銘曰

侍御清節在洛川繪十二圖如監門惠澤綰綽衍曾孫聿繩祖武
官河南河湯湯兮激潺湲魚弗鬱兮柏冬辰公一呼兮徒雲屯洪
濤碎碣萬杵震奪赤子命馮夷宮蛟龍俛首不敢吞金隄鞏固狂

瀾安萬戶口祝公之功性資清強復寬仁藹然孝弟敦彝倫盤錯
未展中道迤光厥遺緒望後翳摛詞刻石垂千春思公清芬視此
珉

右墓誌銘孫原湘撰

周昌

余聞之大父柳溪公曰荆門周先生適翁嶽奇人士也生明季崇禎辛未長汝曾大父息廬公一日呼以一日長云先生名昌字培公一字適聲崇禎十六年癸未李賊破郢中屠僇士大夫諸生多絕粒死賊將進薄荆門先生年十三歲父死未葬太母呼而屬之曰汝父先死善矣吾義不苟活城必陷若輩鼠賊焉能成事汝當匿山中讀經世有用書後有 真人御宇汝得列官於 朝卽汝父汝母不死矣先生號泣受命當縋而出匿遠安縣青溪鬼谷洞越旬餘日城陷家人勸太夫人出亡辭曰吾若去柩誰與守家人強之行未就賊遽及門鬪死者數人餘各逸去賊以刃脅太夫人

遂觸棺而死賊義之去翌日賊捨荆門攻江陵家人歸乃合葬太
先生太夫人先生聞訃廬墓三年畢仍去青溪洞讀書舉業外旁
及河洛王奇太乙皇極河漕邊隘武備技藝並及神沙聖火毒霧
地雷地礮飛天網攪地龍連弩注隊矢鐵浮屠諸制精衍爛肆靡
不坐言起行迨 大清受命統一海宇順治中先生爲名諸生困
棘闈二十年不荒儒業務成先志康熙十二年癸丑吳逆首叛耿
尚二逆繼之海中餘孽亦隨寇邊先生奮袂起曰是昌效命 國
家之日矣葛巾野服謁撫遠大將軍圖公於潼關公與之語大悅
自謂如桓征南之遇王景略也遂爲上賓揖而不拜屢獻奇策卻
飯臣王輔臣軍數四會輔臣心腹用事總兵黃九疇江夏人原任

平涼知縣康熙初年進士監利人龔榮遇爲僞布政二人屢勸輔
臣反正輔臣心動未決偵先生之居帥府也以蠟丸示賊情二人
固同里素識先生遂請於圖公單騎往說公不忍曰君柰何輕入
虎穴就危地萬一不測謀將疇依先生曰昌度之稔矣東南蜂蠶
孔熾視秦隴向背爲重輕此天下之首項也昌觀輔臣受 國厚
恩以莫洛經理不善激於其下而受僞旨焉非本志也不聞其先
僂逆使乎又內實慙惡不然其冒平涼坐大但侵散邑不進薄三
輔耶事成則漢中二逆將入吾掌中閩誠易與也蜀可不勞而定
卽楚賊亦望風瓦解矣夫養士原儲緩急之用 朝廷失一諸生
若九牛亡一毛無損於國濟則 天子之福也師老財匱奚爲乎

時建威將軍吳公曰先生之言是也於是大將軍出空頭敕權署
先生參議道泣而送之先生卽躍馬弗顧直抵賊壘並從者雙騎
騰蹕離地矢銃雨發無一及賊眾異之入壘門僞黨露刃相偏先
生叱曰我來救爾曹性命敢以逆行加 天使乎九疇目戒左右
徐導入輔臣方假寐夢天樞星遣白鶴銜敕降於庭化爲道士喜
而寤語妻妻曰妾常勸君弗背 國恩會中軍報使者招諭矣輔
臣心異之整衣出見則卽夢中道士也因悟天樞上將爲撫遠大
將軍折辨良久輔臣不能難徐曰公誠知我心乎如不相疑明日
再議先生曰大丈夫一言決耳何須再旣承命明日卽不敢不來
揖而歸以語大將軍建威將軍等翌日晨往榮遇先伺於軍門左

右益詢曰會須殺此說客免致蠱惑軍心願以榮遇輔行尋斂
戢見輔臣反覆數千言乃曰聽公處分矣龔黃二子遂先眾歃血
已行成內報輔臣妻縊妻固數諫以死堅投誠之心也越三日往
弔復說曰僞將王屏翰吳之茂十萬眾遷延沔襄間但趣將軍進
兵不自出益門口截我師後者觀釁也將軍誠心爲國今日之
事戒無泄仍相持如故許以進兵速之來一戰可殲輔臣深贊曰
公瑾妙計遂折矢招速出師會戰平涼兵趣寶雞口俟其全師十
萬眾出不疑也我大軍分兩路自鳳翔東河橋與虢仙鎮迎擊之
戰酣平涼兵忽斷賊後三面急擊賊眾潰亂斬首二萬二將率殘
軍連夜遁入川北不敢復出大軍遂乘勝克復漢中於是我奮威

王將軍殷馬將軍等進薄七盤關下朝天嶺踰二年蜀平而宗
室惠獻貝子德公武定文襄李公歲丙辰亦破仙霞關降耿精忠
楚賊遂孤釜魂待斃先生之言如蔡蕃已大將軍獻捷以 聞赦
王輔臣仍爲將軍子畱京師先不加戮且晉秩示慈惠也九疇授
都督同知榮遇遂實授布政嘉其贊成反正功先生則超授布政
使參政 諭祭父母二壇建坊旌節乃益感激 殊恩請從安親
王征南蔡大將軍於楚黔軍著有撫平從征平蜀滇紀略時汝曾
大父亦應召蔡公幕遂定交先生相謂曰海夷麥力幹懷阿爾賴
乘中國有事強借甘涼二州界上大黃山大草灘黃城兒此西河
要地何可輕棄彼老賊負三大罪於天下孰能與之他日隱患其

金山之夷乎既僭稱汗於西徼又誘我番夷納其添巴實徧處此賊平後非大張薄伐盡滅其類以甯吾蒙番恐西陲未能息肩也已而滇平竇授先生登萊道尋攝藩事與總兵某交訐陰事皆罷黜年已篤老不忘疆圉之恤有上雲楚二制府范公右衛將軍綽公陝督鄂公及佛公等書大旨以噶爾丹一日不滅西陲卽一日不甯聞諸大父如此噫嘻先生乃不及見 二聖之奮伐采入今我 皇上之埽穴犁庭也歲庚辰侍家君子於蘭泉書院從觀察歐陽蘭畦先生見秦邊紀略九卷不著名中皆集中上書之言以是知其爲先生未成之書也蘭畦先生以家君子悉先生行事且在秦更事日久特屬輯補改衛以後建置並增嘉峪關外新闢西

域六卷新舊凡卷十五行謀剗厠用廣先生未竟之蘊余小子敢
述承諸大父者綴言於末以傳先生且嘉先生之籌邊苦心得蘭
畦先生而不朽也

右傳孫立本撰

趙作舟

余與浮山先生既同姓復同舉康熙己未南宮同出錢塘徐少司寇之門尋同入翰林後先生改官余同在朝省及先生觀察湖南余卽以其年放還田里先生自湖南歸猶迂道過余山居今先生沒而銘其墓宜非余莫可者悲夫按先生諱作舟字乘如又字浮山初爲濱州趙氏遠祖以軍功世襲登州府大嵩衛鎮撫使遂爲衛人祖諱廷策起家明經仕爲紹興府判父諱景星學行尤著亦以明經爲平陽府判以先生貴 誥贈奉政大夫母榮氏 贈太宜人先生幼有絕人資讀書數行俱下制義闕肆有古風軌始出應童子試輒見賞於守令號神童學使者越次使補博士弟子食

餼由是名大諫年三十二鄉舉第一人其文盛傳於時至徹世
祖之聽明年乙未引見新進士無先生名聞而惜之其後屢因
公車壬寅丁未閒連遭憂且罹凶禍兄弟凋喪先生怫鬱挫辱殆
無生理而氣不少衰日肆力於經史文益雄丙辰就東平學正上
官重其名薦於朝值己未復應禮部舉乃與余爲同門生廷
對賜同進士出身榜下人聚觀之若三代禮器也改庶吉士年五
十有七矣先生性質直又以耆宿晚達不隨時俛仰臺閣諸公貌
相引重實無爲之地者竟改主事丙寅補戶部四川司轉江南司
員外郎丁卯秋校士貴州黔遠且陋主司類應故事先生於道絕
私請至則搜羅盡名俊黔士蒸蒸然先是學使者錄士歲不過六

七百人及庚午秋乃千二百餘人咸謂先生所興起云戊辰遷刑部廣東司郎中決獄平御河有浮屍毆擊傷以十數田氏子也翁云昨與楊某飲某所楊之鄰曰聞醉言不聞毆也而楊木彊不能自明竟論死將具奏先生持之復鞫其鄰以醉後何所往乃拘所詣坊卒而詢之果以夜賭忿爭擊殺之也遂釋楊都下頌其神明踰年擢分巡辰沅靖道湖廣按察司僉事先生聽斷如流案無留牘嚴飭屬吏不輕用刑而禁治豪猾不少貸境內肅然尤達於大體土官某以劫殺被訐先生按之第加薄懲人疑其輕先生曰賦苗之道示儆可矣若繩之太急將有他虞未幾黎平苗殺人當事以輕用兵得禍始服先生之識撫軍王姓者亟稱先生清而內厭

其拙會大計陰註老疾壬申報罷時年七十強力如少壯所學十
未施一有識爲扼擊先生怡然行襪被卷軸之外無長物辰守上
官君分俸以助舟車費僅乃抵家余曾見其行裝蕭然如公車時
也蓋先生生平名浮於命位不稱才方其登賢書聞 九重眾謂
取高第貴官如拾芥顧困躓久之既入館閣時方大集文儒固宜
彙史筆贊休明又失足卽署洵而敷歷中外著聲績疑先生晚成
當以政事顯旋罷歸矣嗟夫先生有孝友大節居喪盡禮弟作雨
死於棲霞之亂賊平後先生訟之官輾轉五 亟戮其讐乃已撫
孤姪女如己出兄妾韓養之終其節與人交不少欺言議風節必
引之古人其學湛深經術爲文詞黝然以光不屑屑東漢以下詩

摹少陵於時好無所苟合著述甚富藏於家教其子緒有聞於世
晚得二孫樹滋樹聲先生手授之書今皆英英見頭角惜先生不
俟其成立也先生生於癸亥卒於乙亥得年七十有三元配于氏
甯海州名族 誥贈宜人少先生二歲前先生八年卒先生自爲
之狀稱其孝謹勤儉婦德靡不備而器識尤有過人者先生隕於
場屋二十餘年宜人綜理內外不使稍分其慮且安義命善慰勉
卒成其志同里李侍郎贊元先生總角交爲御史視鹺淮揚以書
招先生先生內知往必厚獲姑語宜人宜人止焉此殆賢人君子
有不及者今以戊寅歲十二月二日合葬於先塋之次初先生過
山居要余訪之海上會家多故不卽往越兩歲而先生卒緒以書

來告哀且請銘余方廬居驚惻不自勝以廢業故姑徐之又越歲
得樹滋書卽緒又亡矣悲夫先生長余三十有九年以弟見畜奇
愛余詩文謬比終賈余兄事先生中年坎壈亦略相似今先生往
矣誰相知者因重悲夫昔之愛余文者乃適以誌先生也銘曰
淵然其文藹矣其形旣洽於黔亦孚於荆將謂遇兮晚華驟零謂
不遇兮要服知名絜彼於此何毀何成嗚呼休哉今之典型梁木
壞矣叔季焉程後昆保之幽光燦燦

右墓誌銘趙執信撰

靳讓

公諱讓字伯遜一字益庵尉氏人曾祖於莊邑廩生祖滋旭鄉飲
大賓父標彩邑庠生以公令浙之宣平 封文林郎宣平縣知縣
母高氏 封孺人伯曾祖於中明刑工二部尚書營別墅於密之
具茨山麓避寇氛攜家以居而公生焉幼聰慧誦讀倍常兒爲文
自出機軸年十五入邑庠己酉舉鄉試丙辰會試中式己未成進
士歸益肆力於學丁卯謁選授宣平令值旱蝗爲災鄰邑相視因
循公獨請蠲賦甚力受知於巡撫張公鵬翮獎爲賢令己巳封公
卒於里匍匐奔喪資斧弗給貸於友始得歸乙亥補汾西知縣罷
里差減耗羨訟至立判人無冤者歲旱民饑擅自停徵發所貯倉

穀以賑而民鮮流亡 聖駕北巡晉屬例有供張公計費酌取皆
存籍記無橫索中飽之弊次年再供軍需公念民力已竭卽出正
賦以辦時諸邑騷然汾民獨無事其事亦尋已巡撫倭公特加獎
勵連委攝隰州甯鄉篆且列薦章張公鵬翮復首贊公賢乃有侍
御之擢或以重賄求代言某事公曰吾豈因言以博利者哉自繕
三疏入告一言察吏安民實行教養二言禮部解冊解卷之費宜
革三言沿邊同知宜簡用後二疏下部議行而首疏所指陳過於
切直 皇上疑其大言無實欲試之繁劇以觀其效左遷公通州
知州公布衣麻馬戴星以赴其禁私錢則究鋪家以絕其流斷私
鑄以塞其源其審禁河捕魚則別真贗分旗民誣者獲免犯者薄

懲旗莊中諸作奸者槩繩以法不少貸有謀開麥豆總店以專利者侍衛達於宸聰諭部行察公具牘申覆言無其例事遂寢有謀開薑總店者託權貴人以屬公曰吾不能媚權貴人貽害地方也拒之派養駝馬供應殊苦而監收之員遇地方官無大小皆陵虐無禮公正色臨之乃不敢慢其他善政可以尋常意計指數者傳之通人不能縷述也會九卿保舉堪任學政者公初不與皇上憶公名特命提督廣西學政同保舉諸人試以詩文蒙天語褒嘉賜御書一幅敕部改銜以僉事道赴任粵西文教素飢餓不振公至加意鼓勵諸生各有刮磨自奮之意試未竟復奉命移浙江提學浙文較粵西稱盛而弊較粵實多公深爲防

國朝名媛 卷一百一十一 三
維搜剔殆盡其教誨則先德行後文藝其校文則先義理後辭華
浙固才藪亦皆翕然悅服稟教恐後焉 聖駕南巡公迎 駕至
蘇 錫子便蕃復蒙一賜御書萱庭春永四字以爲母壽真異數
也公以母老乞終養歸里日太夫人寢疾謹侍飲膳藥餌日夜不
離側踰年太夫人告終公執喪以禮不延僧道不拘陰陽不計七
開弔不作樂娛賓葬日不請路奠題主不點硃而惟哀痛涕泣以
營窀穸既以毀致疾至服闋竟卒實康熙四十九年九月十三日
也距生於崇禎十六年八月十六日享年六十有八元配傅孺人
同邑庠生洪之女繼配盧孺人扶溝庠生世印女子四基址塏塏
皆廩生女一孫男三基卜於康熙五十年三月初八日葬公於迴

龍岡先人之兆問誌銘於子子與公雅相知謹撮其大端誌之且爲之銘銘曰

司空避地別墅是營具茨攬秀公也挺生年當舞象發跡尉贊文陣奪標藝苑揚旌釋褐出牧兩奏循聲晉秩臺端朝陽鳳鳴三疏聯入具見生平天威震動重以責成履險若夷坦受靡驚力任繁劇法嚴令行豪強屏息姦宄匿形旗民安堵畿輔肅清 帝念弗釋憶其姓名 特命與試授之文衡由粵移浙惟公惟明 翠華臨幸 賜予充盈 宸翰疊頒母子均榮循禮終養居憂矢誠哀毀之餘沈痾斯嬰巖廊虛左梁木頓傾永謝華屋妥茲佳城我作斯銘後世是徵

國朝文獻通考卷二百一十二

右墓誌銘冉覲祖撰

三

章履成

越州山水清勝古號爲競秀爭流而磊犖瑰琦之士鍾毓滋衍蓋
繇朱育會稽記虞預會稽典錄謝承會稽先賢傳暨賀氏先賢傳
像讚鍾離岫會稽後賢傳其著錄滋詳而趙揚皇甫氏之吳越春
秋削繁傳記暨吳越國寶大以後諸編不與焉 國家淳化覃敷
英彥奮起東南之美固匪直竹箭而會稽道墟章氏才儁滋繁若
予所聞江西提刑按察使司分巡贛南道副使人也章公此其爲
磊犖瑰琦之士而雅宜詳書於朱虞謝賀鍾離氏之編者乎公名
履成字慧臣人也其號姓苑系太公之裔封於漳遂氏焉五代閩
時太傅公仔鈞刺建州二將後期當斬夫人練氏請釋之公卒二

將從南唐軍破建甯斬殲城時夫人畱城中遺之旗植門以免夫
 人返其旗曰將軍知報德當宥此一城民不爾吾不忍獨生二將
 從之迄今號全城太傅子十有五人多秩宰執侍從而家浦城者
 尤顯九傳而至學士公綜甲科第一仕至戶部員外郎陝西都轉
 運使龍圖閣學士始徙越之山陰蘭亭街又七傳至添十九公彥
 武復徙會稽王港來孫損庵公元至正閒避吳國江南行省徵洎
 明太祖繇甯越過其地歎曰此有道之墟也迄今聚族贏萬邑里
 胥號道墟章氏公五世祖美中嘉靖辛丑進士工部都水司郎中
 榷蕪湖關稅先期額贏輒罷榷者而四月曾祖光祖知江甯縣有
 惠政祖明達竣銓注同知州事顯考程以厚德聞邑里 贈中憲

大夫雲南元江知府復 贈奉直大夫戶部陝西清吏司郎中妣
某氏 封太恭人公少有巨人志中憲公暨太恭人深器之性忼
慨名動公卿閒其仕也蓋繇康熙庚申後銓注知四川雅州榮經
縣外艱闕復知河南開封府太康縣尋擢知山東濟南府泰安州
覃恩封奉直大夫晉級一擢知江南徽州府內艱闕復知雲南
大理府調元江晉 封中憲大夫復晉級一擢直隸通永道副使
尋改大名道晉不逮茲職戊戌改江西贛南道蓋勳秩籍於吏部
南曹者且寢四十年而遽以雪冤獄罷公之始茲榮經也當吳逆
初熸莖胥荆榛公昕夕撫凋瘵不少輟而滇黔遺孽尙厯伏 朝
命勇略將軍趙公良棟奮威將軍王公進寶分道進討奮威將軍

繇建昌入北距雅州百里有奇勇略將軍繇威甯入取道雅州時將軍久駐陝之徽縣期它部兵會發亟檄雅州備軍食而經歲不至州牧狃於前牒不少待積一日倏引滿漢兵六萬至督糧使暨州牧胥駭避中丞杭公亦恩遽甚廉公才亟檄攝州篆許以從宜將軍雅與中丞隙又詗知蜀廩匱斯用乏軍興坐之乃大張戈纛甲士羅庭馳箭檄公詣帳詰其實公對曰謹如檄將軍怒曰若見吾敕書乎文官三品以下得軍法從事若不畏死耶勒促草軍食狀公立書呈之將軍視左右而嘻內斬威懾公會斬犯令兩卒輒昇公持出和門以徇公如令入覆色不少變將軍復顧左右咋舌曰文吏中迺得此人內奇之而稔知雅州廩尤匱遽令牙將持糧

牒萬紙至期一晝夜集州署嫺黨胥環泣公麾去亟帥州錄事夜
貸於鄉度訖不克卒給而川南道侍奮威將軍糧差可淹一二日
迺疾馳百里外義乞之掎鎖廓門畢運載諸筏順流下至期而集
州民驩呼將軍大喜曰君信克佐吾辦賊師遂發命隨營南行
百里坐帳下而勞之食泊歸則奮威將軍糧亦胥集杭公暨承宣
劉公頓首謝特疏舉任建昌道雖格於部議而公繇此才謂懋著
寔達中朝矣太和殿肇工購材於蜀公以幹材遴偕朝使往度密
箐巉壁不少憚懾顧金匱業難符格而驅萬牛且莫克達泣請於
中丞中丞奏免獲 允時議令四川度地徵賦公從容言蜀民新
脫兵燹瘡痍未起宜少紓其力今若急朘之以賦恐所傷滋多議

獲寢蓋公莅蜀凡七年其知泰安也州當南北之衝盜多以藥薰商旅顛越而取其貨公排根痛治之迺息州爲旗人逋逃藪事發多株連公許自首以寬窩主鄰右罪逃人迺絕故事州民漕運米東平水次津費溢於正賦車輓勤甚公改官運著爲令審丁痛革賣富差貧弊里書束手丁丑戊寅州薦饑公白中丞請賑不許迺倣齊黔赦法爲食於路以待飢者益發米千石以濟新泰長清萊蕪蒙陰諸鄰封就食氓全活者數十萬御史陽城張公泰交使過其地而嘉之遂以災荒入告 朝廷遣官散賑中丞大恚草疏誣劾公甫就而中丞譴罷民胥以手加額稱快事蓋公莅泰安且越十年其知徽州府也甫三月而事胥理至其知大理簡節疏目疆

以戎索歲饑米石錢四千發粟減直全活者數萬知元江地南錯
交趾多讐殺公曲論之麼些蒙蒲俗寢革除民塘兵役闢道減直
售米鹽金銀銅錫鑛攝糧儲道驛鹽道篆事胥理蓋公莅滇再任
凡十有三年而勳秩日晉尤克以靜鎮物中朝胥以制撫鈞樞斬
之洎其移贛南道也故事循明軍門控制蠻越例不親民事公歎
曰衙署分巡之謂何時民有冤獄眾環聚而譟於門公力申雪而
守吏懼臯逮已深文致之公竟罷而獄訖不克直公家狀曰甯棄
官以全民毋充位以誣民有味哉其言之也此所謂磊犖瑰琦士
而雅宜詳書於會稽典錄傳記之諸編者乎公性孝友太恭人色
少不愉輒長跪榻前達旦內外艱毀甚仲弟文鑽光祿鴻臚寺少

國朝通志卷之二十一
三
卿嘗病公泣禱漸減年以益弟叔弟文鉞埃銓注通府先卒撫弟
子如子遇族黨雅有恩意環道墟數十里邨聚胥擬唐章全益氏
此亦宜並書公配唐氏繼邵氏胥 封恭人又娶祝氏 封宜人
胥有婦德子二伯廷珪邵出知山西平陽府事仲廷璫祝出前福
建汀漳道署汀州府事胥克纘武以彌展公雅志女二茂才龔祖
嘉文學陳昉其偕也胥唐出孫七長應煌六館生次應燧應煒應
燮應煥應輝應耀胥以才著孫女四曾孫一正梧而平陽汀漳二
公暨孫娶若聘女暨孫女適若字胥冠蓋甲族也公卒於雍正甲
辰夏六月九日距生順治乙酉年八十某月日窆於某縣某之阡
子謹按章氏繇秦陳後至太傅公而望彌華顯宋三平章副樞參

政之勳階衡援暨學士公之高科望之表民之邃學雄詞侍御之峻節明中丞大理少宗伯大宗伯之勳閎清標孟山仲山大力莪山之文藝冊帙不勝書至繇建安徙越則都水公暨都諫公清德尤焯著而公用儁才偉略武之世望彌以克振昔宋沛城楊文公祖妣實出駕部章氏嘗賦疊律贈平章文簡公宰歸化曰于公陰德知終大萬石家風喜不衰又曰執手勉君勤素業歸來更直鳳凰池今平陽汀漳二公當益纘平章樞密武而文簡公繇學士陟東府侍御望埒永嘉崇安明大宗伯文懿公尤以醇儒稱此胥公文孫所憲法請以楊文公律爲石匱鑑水之寶符可也予謹誌公墓並爲之銘其詞曰

維原每每維川訃訃維賴南公允文允武言儀威鳳言馴贊虎以
藩以宣無斃無射言葳窈窕於茲吉土子孫宜之克昌克譽爰銘
庸勳式昭終古以炳苗山秀靈之府

右墓志銘儲大文撰

蔡祖楨 王之錡 李承芳

蔡祖楨字菊潭湖南攸縣人居邑之春塘茅屋方廣丈餘蔭樹爲軒楹兩劇室如壑以破笠當其潤席於牀手一編焉或持金匄免鄉役弗應親故曰樹德耳曰吾受德誰任受怨卒辭之由選貢舉康熙甲子鄉試知秀水縣清介有惠政 上南巡道秀水居民家數百戶阻水而廬礙 御舟纜路監司命毀之祖楨不可監司怒祖楨請執其咎閣板以濟民居獲全羣以木梯書蔡青天字浮江而下 特擢淮揚道旋以勞瘁卒士民醵金以賻且建祠祀之同郡王之錡字玉池湘陰人康熙乙丑舉人父文訓道拾遺金訪還之見乞人衣藍縷輒爲之補紉時稱長者之錡幼失母從父授章

句稍長兄之鈇授以時藝不肖卒學曰學所以學治天下理民物耳經生八股藝卽工何益之鈇奇其言旣以舉人謁選除金鄉縣知縣值軍需旁午車馬芻茭一徵之民之錡至立官買官解法約束胥吏不得擾民縣瀕大湖常苦淫霖泛濫爲捍隄二十里夾植楊柳旁開深渠俾旱潦以時蓄洩民便之詞訟聽民自投審大者計旬小者計日一無畱難建文廟葺學舍暇輒集邑中耆老子弟與講孝弟仁讓廉恥之道以最署上考以主事用河督陳鵬年奏請襄辦河務雍正二年 召見授工部虞衡司改刑部江南司兼攝見審司事以薦擢山西道監察御史協理河南道事旋奉 敕查直隸河南山東江南四省河道覆 命備陳各省疏淪要務

上手授招匣令極陳利弊得自具奏 賜克食烘羊並 御書福
字四年奉 命修山東馬頰河投江南常鎮道 賜朋黨論及香
珠紫貂尚方藥是時揚關瓜圃秦壩稅務紛拏商民苦之之錡盡
汰陋規勒石永禁凡舴艋小船逐微利者槩免其稅署江蘇布政
使轉江安糧儲道之錡正已率屬州縣正供外不溢升勺署安徽
按察使會大旱推鞠成案出疑罪數十人應時大雨假歸起補大
通兵備道未幾卒之錡以才能著聞閩浙總督李衛嘗面奏江南
十三道惟常鎮道臣王之錡是一好官祀鄉賢李承芳字譽軒善
化人由監生累官兩浙鹽運使有惠政祀浙江名宦鄉居好施予
津梁義渡捐修不恪

右傳李元度撰

成泰慎

成參議公諱泰慎字知臣號懷嵐明太子太保文淵閣大學士文
穆公諱基命之曾孫我朝少傅保和殿大學士諱克鞏之孫翰
林諱□□之子也公本贈□□大夫諱□□之子出爲翰林公
後年十三丁翰林公憂從學松江錢子璧文日有名及長以恩
蔭授江南通州知州凡四年多惠政有所著崇川從政錄詳其治
行內升戶部員外郎晉郎中出爲陝西西甯兵備道其地番漢雜
處凡事武弁任之公至則修明戎政號令嚴整一切茶馬驛站墩
堡諸務次第經理人始知文吏之幹局有爲踰年調浙江糧儲道
堅卻旗丁鋪設費萬金撫軍遂甯張公嘉其定力尋署按察使事

訪擒地棍張端木邢於塔置之法豪橫一時斂迹撫軍疏薦賢能
第一會聞少傅公訃公請奔喪舊例無次嗣承重者公力請具題
得如所請今定例長嗣亡次嗣得承重自公始也服闋補廣東雷
瓊道時有海洋賊黨私鑄劫奪恃奸漁資糧以導之公爲編船戶
運保甲出入以時旋有王飛熊等五十餘人燬舟投首公移送營
伍俾自效海道肅清又兼攝雷瓊兩府篆五指山生黎爲汛兵所
擾因致鼓煽然實未離窟穴偵事者遽言黎叛提督某慮罪歸元
戎乃媒孽文吏以卸其咎公坐是解官去粵之日囊橐蕭然惟圖
書數篋壓舟而已居家謹身節用而樂行善事遇親族以急難告
者不惜罄所有賙之課子弟教以義方間或曳杖出游嘯傲煙霞

人不知其曾登顯秩也先是叔仲謙官參議公同官階鄉里稱大
參小參云

論曰成氏自明永樂初居大名世有隱德閱二百四十五年相門
出相爲海內望族子姓代傳組綬不墜家風卽如參議公所至有
廣譽美聲尤卓卓在人耳目者良由門律家規稟承有素夫是以
世濟其美不損其名也夫世豈無膏粱華腴之家名節不立初不
待其凌夷衰微而慨歎乎廣陵散之絕也旣當鼎盛時視其少年
驕矜桀驁學術莫修而所謂遺烈先範已索然無有若成氏者以
云清德不衰庶幾其無忝歟

右傳汪師韓撰

按篇中撫軍遂甯張公爲文端公鵬翮
撫浙在康熙二十八年至三十三年

王全臣

公諱全臣字仲山號清渠湖廣鍾祥人也舉康熙甲戌進士任河南汲縣知縣甫再替薦授甘肅河州知州歷甯夏同知又以卓異遷雲南永北府知府是時關中大饑 聖祖以公循吏宜畱以撫綏斯民 特旨改平涼公爲政平易簡要不事苛細而一意興民興利除害故所至有聲汲縣西倚太行水潦旣降輒橫溢爲民患公開溝達衛河溝旣通又爲石梁以便行者民至今賴之知河州履畝清丈手定賦籍而里甲之害民者以除甯夏有漢唐二渠引河溉田人享其利自河勢東徙而唐渠漸以堙廢公築迎水壩導河西折入渠又於唐渠下開渠一道其末與唐渠會渠成而高印

之田咸得溉焉今所謂大清渠者是也是役也公經營相度畚鍤之事亦身親之或諷公水利非君專責何不憚煩乃爾公曰我知利我民而已他非所計也其勇於任事不恤勞怨類如此公至平涼勞來安集流亡自歸又隨奉使者徧察災賑不使吏胥有所侵冒會西塞駐師卽擢公潼商道副使使赴軍中給軍食公在塞外數年殫心區畫而大臣用事者不樂公屢齟齬之其後遂以虧餉獲罪先是領運者餽餉不繼食盡軍且譁公召集商賈開誠勸諭俾以貨物貸軍官給印券償其直而是時米一石直百金上官譁言遲誤屢陳狀皆不省而所貸以給軍食者悉指爲公虧欠其數至數十萬公自度必不免而世宗夙知公於有司文致之罪一

切置不問數遣公辦軍需理屯政旋起廢籍 特命爲安西兵備
道嗚呼 先帝之知人善任誠超越前古而公之見知於 上者
豈偶然哉公旣拜 命益感激自奮勵是時土魯番向化朝議安
置瓜州公督率官役築城堡六建公私廨舍六千六百六十區開
渠二百九十里墾地七千頃有奇他服食器用耕牧之具無不備
番眾至咸額手頌 天子仁恩而公坐浮報屯糧責解任清理舊
欠 今上皇帝嗣位凡虧空有因非入之者悉 加恩豁免公旣
邀 恩免追而才望素著 特徵公入 見 上意將復用公
乃部檄下公不及待矣公卒時年已七十有三嗚呼公起縣令歷
官至監司仕宦不可謂不達而先後顛躓論者或以未盡其用爲

惜然以區區外吏歷受三朝 聖主之知知其勞更原其無罪此
凡爲臣子者所當感發興起夙夜自竭其力以無負 國家待下
之誠者也鴻章甫通籍而公已歿未嘗接公言論丰采而公之名
聞之舊矣公孫鐸遵乞作家傳乃按狀謹書公治迹之大者俾載
於家乘異日傳循吏志溝洫者庶有所考焉

右傳廖鴻章撰

茹儀鳳

秦塞之遠出三千里爲河西極地西環羗幕東通僅一綫者惟肅州爲然關則嘉峪通西域貢道順則以賓來庭逆則以絕交關路用捍全秦而釋西顧憂者亦惟肅州爲然肅之爲肅旣孤懸天末而又繫中外之安危則爲之計者必地加關粟加多而民加眾甲河西五郡使之爲樂土以固苞桑而後可余嘗讀禹貢至聲教被流沙西戎卽敘歎唐虞治化之遠乃在弱水旣西厥土黃壤田上上之後今流沙在哈密地而合黎弱水在肅東境上然則肅當唐虞之世固已奏成平不自漢武開五郡置酒泉始矣 國家撫馭萬方而肅則自哈喇灰之禍雖休養生聚於今六十年邇來增置

大鎮而民生起色猶且遠邇甘涼兵備姑公來肅兼理屯田水利甫臨卽下教條勸課開墾夫肅當祁連弱水閒廣二百七十里袤不及百里山澤居其半地狹民希而塞雲荒草彌望蕭條者火耕水種掇甲荷戈一名而百役也豈非屯田水利之不講則民物不殷阜之過與余嘗問於肅州卒成用曰今之肅何不古若辛生曰祁連雪溶則討來河水可灌廢久跡湮今因故渠而疏鑿之自臨水至雙井東西六十里南北二十里墾地五千畝增國賦利民生闢荒蕪而田上上矣先是吾儕六十四家分地八區做八卦也八家任一區做一卦爲八又八家同井也輿論同而合力爲此此吾儕六十四家之幸尤吾肅百年之利也然非渠之先疏不至此而

畱心民事相原隰授方略非茹公其確實爲之於是命是渠曰茹
公渠志不忘也不甯惟是今紅水壩開東洞子渠二十里溉田千
畝計皆公躬督率成之以次而及將肅無不治之水則無不耕之
地必無不庶之民若夫漢之屯湟中歸美趙充國唐涼州粟麥一
縑數十斛史稱郭元振之功以視公今日又何不古若之有余曰
有是哉用是策於塞上則中外治平可立效區區秦中兵農兼事
務一而兩得者又何足云用次生言以爲之記公諱儀鳳字子庭
宛平人

右渠記梁份撰

大正十一年三月廿九日

三

王澄慧 宋起

王澄慧字勇循河南睢州人康熙癸未進士累官戶刑兩部曹知廣東肇慶府升蘇松兵備道所至俱有惠政性孝友父病告歸色養二十年三歲時嫡母生母俱逝以父妾錢氏爲慈母終身孝敬無異所生事兩兄極恭順至今州人稱道勿衰同郡宋起字喜起商邱人由明經考授中書歷官刑部員外慷慨任事以敏達聞出守威甯府諸苗梗化 朝廷議遣人宣撫起躍馬疾行抵黎界單騎深入召諸苗於庭示以威信蠻獠俯首服罪因功升山東副使累遷直隸布政司參政督修永定河有績旋致政歸卒其弟超亦官刑部郎居心仁恕執法不撓湖南黃明獄起株連無算超奉

命往鞠以平允著稱

右傳查岐昌撰

楊三炯

乾隆二年夏四月鍾君勵暇自淮南告干木之喪乃帥子姪爲位南鄉而哭浹日其子健書至曰先君子之終也遺令毋訃毋作行狀毋求誌銘且命曰吾游好皆在遠方訃則喪紀難通吾官江淮河濟皆要縮水陸五會四達之區其詛其祝眾載其言久矣族姻朋游閒救患分災養生送死事微細不足播揚且難爲受者地非所以處厚知我者惟望溪先生以死之時日告可也嗚呼惟余知君所以命其子之意而忍君志事之沈沒乎余少以窘空餬口四方常思得聖賢之徒而師友焉旣不可得然後陰求負才能有濟於實用者中歲始得長沙陳公滄洲及關中白斑玟玉又其後得

君時攻玉已死每爲滄洲道君之爲人及君爲河官而滄洲巡視
南河以書來告曰楊君信天下士也洪澤異漲水冒高堰沒隄君
使吏卒更番樅葦茅以護隄而身督教之晝夜植立水中凡四旬
有七日民以安堵聲績自是顯著遷運河同知擢濟甯道獄訟者
爭赴焉廉使所司案牘爲之稀河濟閒至今皆曰河官而兼民治
實德在人者惟閩中余公甸及楊公二人耳君少慕俠客之義嘗
冒顛危脫人於急難而不拘小節禮法之士多毀之余以戴名世
南山集牽連始識君於刑部獄中君名世友也以計偕抵京會獄
起卽止不去有司以大逆當名世極刑 聖祖仁皇帝寬法改大
辟而眾猶蕩恐刻日行刑親戚奴僕皆避匿君曰孰謂 上必使

人覘視者其然固無傷獨賃棧車與名世同載捧其首而棺斂焉
用是名動京師諸公貴人爭求識面謝弗通以余盡室入旗老母
北上復畱踰歲癸巳春特開 萬壽科諸公皆注意於君君喟然
曰此之謂依乎仁而蹈利也吾恥之遂趣裝赴南河自效不復與
有司之試君爲河道時以父入鄉賢牒上禮部通書查侍郎嗣庭
嗣庭獲罪籍其家得君書遂坐黜君旣歸匿迹郊野平生知故造
門不見朱相國領京畿營田思得能者自助余以君對君聞之以
苦言謝公今 天子嗣位搜括羣才有宿負者多見瀚滌朱公暨
余將合辭訟言於 朝而君疾已沈痼矣嗚呼才足以立事而不
輕爲然諾尙有如斯人者乎嗚呼惜哉君諱 三炯浙江諸暨縣人

少治時文疏朗無俗調中康熙乙酉科鄉試第三名卒於乾隆元年十二月二十一日年六十有七父諱式金縣學生母某氏妻方氏繼娶余氏子二人次傳先君卒以某年月日葬於某鄉某原銘曰

交不附勢仕不墮名託儒行而僞孰與爲義俠而誠寔離尤以沒世耿無昧於平生

右墓誌銘方苞撰

賈樸

故城賈參政樸以歲貢生康熙中官廣西同知攝思恩平越知府
惠問旁流幾有賈父重生之目註吏議去職兩郡士民涕泣徬徨
詣大府乞畱者萬輩丙戌五月 上以廣西巡撫彭鵬保舉得
旨召問澹甯居卽擢知蘇州府閱數月遷江常分巡道蘇州民漸
被循良惜其去任值 上南巡相約具民本保畱 聖祖俯察民
隱遂調蘇松常鎮太糧儲道布政使司參政並 特諭帶管蘇州
府事 賜御書宜民二字扁額按部民保畱地方官例所不許而
賢有司善政所逮黃童白叟臥轍攀轅亦實有出於至誠者 本
朝如陳清端張清恪諸公皆以廉惠得民蹟而後起卒立功名詎

國朝書府奏稿卷一百九

非遭際 聖明之幸歟

右紀聞陳康祺撰

朱琰

朱琰字琬次漢軍鑲紅旗人康熙戊子舉人雍正癸丑由茶陵州
牧移知沅州州爲苗疆衝劇地號難治會貴州九股生苗叛所在
煽動州密邇戒嚴 朝廷命重臣進勅調近省官軍援之率取道
於沅凡芻糧夫馬舟車輸輓皆於沅籌辦自監司以下駐沅趣督
者十數輩琰皆應期集事無少誤州之西溪涼傘花園諸處尤偏
苗地苗將肆劫琰奉檄選役四十人並晃州驛丞吳琰往禦屢有
斬獲苗乃卻時貴州鎮遠思州等郡民之被苗禍者挈婦子避地
於沅亡慮萬人琰受監司李珣指卽城外空坪縛茅爲廬凡百數
十家具皆備日給薪米以贍之病爲醫藥死爲棺瘞比事平資糧

同里乾隆元年升州為府仍擢守焉適芷江新令袁守定亦能左
右一切公署學校禮祀典禮規模宜易者皆次第改觀歲甲子以
卓薦晉貴州貴西分巡道又九年卒於威甯行署琰歷官久而宦
橐蕭然子孫遂家於沅葬城東之龍井畔

右傳璫珠撰

王奕鴻

川東道勛齋王公諱奕鴻字樹宣號勛齋大學士西田公諱揆次子祖奉常公諱時敏曾祖太史公諱衡高祖明大學士文肅公諱錫爵西田公生二子長諱奕清詹事府詹事公生家門鼎盛時性醇謹斂約望之不知爲貴介公子乙酉舉於鄉己丑成進士授部曹山主事歷轉員外郎郎中皆在戶部西田公方柄國公不妄交一客晨入西出惟循職自盡甲午典試四川出爲湖南驛鹽糧儲道政務清肅巡撫定州王公公座主也不敢恃師門故誼少自懈尤斤斤引嫌每入見公事外無一私語同僚咸服其守康熙六十年相國以摺請建儲奉 聖祖嚴旨譴責旋奉王奕清代父前往

西陲之命相國待罪不視閣事公聞震懼憂惕屢欲請假省視相國不許而止癸卯世宗登極時西陲用兵公承相國命具呈請捐五萬兩奉旨親齎軍前效力於是解任西行事竣回京復奉旨命與兄奕清阿爾泰坐臺將發復以湖南撫臣題減則一案請公對簿遂改北轅而南先後往返過都門得一省視相國以爲幸然皆一宿而別當是時相國年高善病膝下無一人公爲之心摧骨折然念國事重不遑恤也暨楚案結急赴臺站與宮詹所坐臺相去猶數百里越三年相國薨於京邸公聞訃慟絕不能言者七日然在戎行無奔喪理茹痛苟生者八載恭逢皇上續緒公兄弟皆蒙恩召還兄奕清授詹事府詹事公發往四川以

道員用於是數年來不敢冀幸生還者得重沐 君恩再馳皇路
公每語客不禁感而涕下也入川攝松茂道適小金川土司相仇
殺公奉檄往諭嚴冬岡巒雪積三四尺公以氈裹體縋而上下入
其境曉以禍福各帖伏釋怨和好邊界以甯題補川東道居官益
廉靜年六十有七引疾歸公寡嗜欲無玩好不衣華服不治美膳
不喜絲竹儉若寒士遇物抑抑如不及履亨歷險不改其度公家
自奉常公生九子大半登科第康熙雍正閒西田公爲太平宰相
十年羣從躋脚貳陟翰院臺省外秉節鉞司民牧者落落布中外
蓋其盛矣及公致政時顯位者凋謝殆盡子姓間有一二仕途登
賢書者率復屯蹇淹滯門庭蕭寂公於時俯仰盛衰之變時爲之

國朝耆履類傳卷之二十一
三
歎歎感歎然公雖室無贏糧析無懸衣安之若素杜門束修不與
戶外一事凡家居十有餘年屹然爲鄉邦之望卒年八十二無子
以宮詹次子璟爲嗣

沈子曰昔相國與先君子交若異姓昆弟余至京辱以故人子遇
特厚客其邸因獲與勛齋公數晨夕公觀察湖南延余掌書記交
益親余庚子舉於順天出編修四川謝公鳳岡之門謝爲公甲午
所取士余乃爲公門下士迨先後歸田兩人俱已白首里閭間數
干往還遂成隔世西州之慟旣不能已已況邈公平生盛衰夷險
之際可勝感歎哉

右家傳沈起元撰

芮復傳

嗚呼吾同府芮君以耆年舊德望在畿輔歷官所至愛思無忝古
循吏遭父母服終引疾里居行稱人瑞庶幾有始有卒之君子其
葬也承重孫其章屬君之從子贊善永肩乞筠爲銘其幽宮之石
而筠於君有妻黨葭葦之親君之從弟復建又與筠鄉試同舉知
君平生差詳不敢以不文固辭按狀君諱復傳字衣亭又字宗一
遠系出溧陽前馬里明永樂初遷行在之寶坻時則有巡撫甘肅
等處都察院右副都御史釗顯名宏治間釗弟鍾舉鄉飲賓六傳
至君而大君曾祖諱昌齡授奉政大夫江南廬州府江防同知祖
諱國鼎縣學生例贈中憲大夫父諱淮縣學廩膳生 封文林郎

例贈中憲大夫生子四人君次居仲康熙丁丑年十六知寶坻縣
遂安毛士儀奇其文試第一其年應學使者試使者爲安溪李文
貞公試亦第一尋舉壬午順天鄉試有名己丑春侍母疾旣瘳不
願赴禮部試母促之行成進士益讀書出遊湖北南所至觀其有
司之良否嘆曰吾心知吏意其以清白自勵矣戊戌謁選司掣籤
得錢塘知縣時例繕履歷三百字於暢春園 聖祖命南書房記
君名行之官召縣吏悉除諸無名錢曰官足給饗殮辦已吏竊笑
之縣有金二者故交通上官署爲奸利暴省中縣故莫能制君立
逮之至曰某有罪無案公柰我何君曰若罪信也若不克自贖吾
爲若贖之杖且械斃焉一府大快縣士有僕婦無故雉經於門尸

家居以爲奇貨君立至門驗無他令曰尸家速收婦尸士感激無以報則爲詩具述君德政數十章寫之通衢自杭暨京師會庚子秋浙江省試檄君分校君以民事辭上官曰君廉正吏許以迴避牌理事毋嫌是科得士烏程嚴遂成等六人者己亥杭旱君履畝勘實上其狀上官以錢塘首縣躊躇欲寢不報君固爭曰律有捏災匿災並當劾某今日請受捏災劾矣時同城仁和災報先寢民千人跣走圍署呼曰錢塘父母我仁和獨不父母我邪須臾自縣呼達院上官感動是年杭竟以災聞開永濟倉行賑君復力請於縣之上四鄉下八鄉設粥廠二十有七水陸轉米屬之廠令曰令米者應轉米役則更擇其鄉之端謹有行者廠坐四人董賑事君

間微行覘曰善則手書詩以勞勉之而撻其胥役之行擾者上官聞之喜曰帑不費而賑溥其令他縣以爲法省有駐防營卒往往出城馳躪民田君申文上總督署願以便宜治營卒縛躪者來立鞭之民相語曰卒不踴吾田畏公黑頭鞭君聽訟旣無雷獄他縣訟者咸籲上官甘就君鞠有疑獄上官亦輒以委君居五年民謠之曰蒨青天邊清廉時總兵官邊某鎮杭與君名相媿也雍正初以卓異薦未上 世宗特詔來京師 諭曰錢塘地大若在官有聲其命爾知温州府往益勵初節也君頓首謝温故例民應輸織造府柑貢歲期至則檄封園樹禁民毋走其納也擇色擇枚中斤中兩累民百端君飭所在柑取足貢數織造不得言其他民勒石

府門以頌之府境商辦官鹽不行而私鹽集君爲設三圍集竈戶
定直衛戶直益足則私鹽息官賣直益廉則鹽不督自行人以是
服君之平也天台山東南有山曰玉環廣袤八百里隔海洋數百
里而遠明方國珍所保也或曰山中有田可墾十萬畝時李敏達
公總督浙江開之以入告卽檄君往勘君乘舟抵山從鳥道登峯
頂還言玉環山雖四面中可墾田無多況海盜所出沒良民孰肯
往墾以糧齎盜脫肯往者亦盜醜也卽墾不過數萬畝計費無底
傷財增盜無益不若罷之便李公怒更檄他屬吏往授意指必墾
之大索山中田僅二萬畝不足則取山麓潮退之地充之又取近
天台縣田丈量畝有所餘並以屬之又不足更取樂清縣民田歲

輸糧者距城四十里外盡隸玉環玉環經費不敷輒支帑金則令捐浙江省官俸半及關津一切雜稅增稅其半用給經費興利之臣坐市販物而其實無所利所從來遠也時又檄弛溫之禁山令漁者往來並稅之曰塗稅旣而民之漁者不走山中度關納稅如故吏乃重徵漁者塗稅漁者來控君君具文上辨曰入山漁者有塗稅出關漁者有漁稅今關稅漁又稅塗是重稅也凡七上上官怒以爲阻撓玉環墾田有蜚語頗聞時諸城劉文正公奉使視海塘過溫謂公曰聞君與李宮保兩雄不相下不移不屈君之謂乎戊申擢分巡溫處道用儉訓俗民益翕然安之會商人辦銅積弊露君爲定期給直持以法商人寤時君方劾揭溫州府知府尹士

份不職狀士份反誣君以阻商誤銅上官固疾君因而撼之并劾君有旨解任赴江南總督趙宏恩質問於是兩府士民聞公將去則書旛於山上揭之曰昔唐太學生魯郊季儻二百餘人能詣闕留陽司業我輩今日不能止芮公之行何面目立於清世旦夕集旛下者益眾則擁君館中積石塞其門夜則爇火以守途巷君諭之僉曰吾儕安敢違公欲籲上官請於朝留公治我耳君召父老曲諭若不得爾則巷哭失聲爇香奉酒走送君自府沿江千數十里踰舟之行人人伏地不能起久之竟坐君以失察關吏舞弊革職今上御極免勿治仍留浙江辦銅數歲壬戌銅事竣例當請復官君聞父及母卒奔喪服除遂不出家居三十餘年尤篤

於兄弟之愛歲時華發皓髮酖顏歌韡韡之詩呼諸子及孫前曰
汝曹視我輩式相好矣世世勿忘也鄉里重其德望轂下後生皆
以爲洵水之陽猶有耆英也行年九十有四以乙未十月之朔行
哦曰百年寄一旦歸吾何悲百年勞一日逸樂何訖越三日卒君
生於康熙二十一年四月二日寅時卒於乾隆四十年十月三日
丑時元配王恭人同縣宏道女繼室王恭人同縣歲貢生 封奉
政大夫江南常州府江防清軍同知宋女嗣子一永觀縣學貢生
先公卒女四一適靜海丙辰 恩科舉人牛元靖一適同縣縣學
歲貢生王思鏞一適歷城楊嘉采一適同縣候選布政使司理問
王堯年孫七人其章其音其儀其恕並縣學生其桐其英其玠並

幼銘曰

溧陽而北洵陽東御史有名宏治中四百年後出我公錢塘之蹟
甘肅蹤疆禦予舛悻獨逢青天青天呼何恫嗟古循吏愛樹同歸
來鄉先生可宗篤老不遺藏幽宮松柏茂茂城隅風東海海濱表
碣豐我言不刊有德功過讀者式垂無窮

右墓碣銘朱筠撰

11月24日

11

黃叔璚

黃先生名叔璚字玉圃崑圃先生之季弟也崑圃先生德性寬大先生則嚴厲自持其學以立誠爲本要其功於篤敬晚號篤齋以自助云初康熙己丑成進士由太常博士遷戶部雲南司主事調吏部文選司遷稽勳員外再調文選以薦擢湖廣道御史巡視東城時王公貴人以追私捕相屬甚夥皆曰務親治先生正告同列曰御史非王官何瑣瑣若是下所司理之有銜邸命至公署者昂然坐滿御史上先生詰以何時奉差視事噤不能對則立使徹坐將疏劾之其人悚惕謝罪久乃釋去自是無敢以私干者時久停御史巡邊海之制 上以臺灣亂初定特遣先生往視之至則

餘孽釋脅從反側遂安雍正元年任滿特畱一年 命以所行事
告後任先生爲列海疆十要既還京怨家以蜚語中之遂落職乾
隆初起河南開歸道調驛鹽糧道豫大水先生撫災民勤恤周至
潯永城河口開儀封引河築虞城隄岸皆中窳要豫人至今頌之
在豫四年以母憂歸服除補江南常鎮揚道遇疾暫解任疾已復
原官又三年致仕家居七年卒年七十有七先生平居訥訥言不
出口遇大事侃然執持不少撓屈罷職時究心宋五子書及元明
諸儒集深造有得晚歲所養益粹嘗語人曰道學卽正學也親正
人間正言行正事斯爲實學不然空言性命何爲乎著有近思錄
集注慎終約編旣倦錄廣字義諸書藏於家尹家銓曰先公巡撫

河南時每見先生必執後進禮稱爲立不易方和而不流君子人也序其廣字義曰茲編也匪惟知之且允蹈之其行已靜以廉其待人恭以恕其立政簡以清於戲可以見先生之生平矣北學編云

右學案唐鑑輯

國朝月令考卷之二

四

陳履中

公諱履中字執夫號雁橋先世居永嘉自宋儒止齋先生遷宜興凡十五傳至少保公于廷明史所稱陳端毅者是也公之祖諱貞慧爲少保季子貞慧之子宗石爲商邱侯公方域贊堦生公兄弟公於是世爲商邱人公生而穎邁七歲入小學闕三年能作四書文及五七字詩中州諸老宿咸重之年十九中京兆鄉試明年官中書供奉玉局時公以名家才子年齒英妙又能以文辭自豪儼儼敏捷海內名流至京師者爭友公而一時宰相卿僚以下如湯西崖孫莪山何義門王箚林汪秋泉吳寶崖諸君子與公文譙往復者無虛日越八歲擢虞衡員外旋以外憂歸三年赴補原官摺

都水郎中督理街道兼督兩窰廠及寶源局既而 聖祖仁皇帝
孝慈仁皇后先後升遐公辦理 景山喪儀勞瘁克稱其職時
江南總河上剛汰河夫疏下部議公力持不可大略謂明季汰除
驛卒游民無事乃聚而爲賊國家河工之役歲養窮民無算節之
不足以資他用所省甚微所關甚大司空徐公元夢歎公有遠識
遂主其駁議事竟寢雍正乙巳擢御史署給事中時近畿水災奉
命查賑公見所賑米穀黻變不可食具其事以 聞自制府下
皆呈議得 旨加賑四十萬石向例貧生不給賑至是以公特疏
奏給得如所請士民賴以存活者不可計冬十月出爲甘肅布政
司參議分守甯夏道不三月平反冤獄數十矣有司皆服公明決

甯夏濱黃河渠堰歲資修濬士夫之家獨優免出費胥吏因緣爲
奸小民或坐受其困公毅然下均役之令政得以平歲大旱公爲
民誓於神直氣傾瀉侃侃無所顧焚之而立沛公莅政數年凡所
以甦民困裕民食剔奸除暴以安其民者無不至如杜雜糧淨收
之弊也則令分堡彙輸頒鑄銅斛而民困以甦會大吏下採買之
檄公封還之閭閻得免輓運之苦穀價旣平民食乃裕驅大磨坊
壟斷奸僧而市廛無攘利之虞懲凶回馬五馬二而良善受安全
之福設施條教可法可久細大畢舉邊人以甯旣而以辦理軍需
與同官不合被議遂奉母罷官去是日泣而送者至五百里外而
公之政教及人者可知也已公性孝友好施與家居二十餘載自

族鄰及鄉鄰凡有死喪患難之事輒周恤之不少倦其存念桑梓利害尤如痼癩在厥身郡歲有漕米之徵例納本色民苦輸運公偕士夫籲有司請改折色事奏各邑得如所請獨商邱以在運河四百里內格於議不行公平生嗜學於前賢遺集輒購求補輯俾無散亡藏書數萬卷披誦刻苦若寒峻其評論古人文集最富所著有四書直解孟子論文河套志宋州人物志寓園纂集雁橋詩鈔皆可傳其教子弟嘗曰只一敬字行之久便可進德修業只一恕字行之久便足澤物利民然則公於持身待物之道進退設施之方其見於文章發諸事業者體用本末之間不可規其所自也哉公卒之明年其子准以公狀令其從弟濂來請曰今年十一月

將葬先人於祖壠之次並啟前母胡淑人暨淮母任淑人殯台窆焉敢乞公銘嗚呼當予總督兩河時公已去甯夏予雖未及與公同事而其政令所存夏人謳思所播者予則聞之熟矣嗟乎是可誌已按狀公生於康熙某年月日卒於乾隆某年月日享年六十有八辛卯科舉人歷官凡六職弟一人履平官通政配胡氏繼配任氏妾潘氏子二人淮乾隆癸酉拔貢生候選知府任氏出洛邑庠生早卒潘出孫三人崇本嗣本懿本嗣本繼於洛銘曰

於戲定生爲復社首用晦而明蒙難以貞宜有厥後公處士孫毓商邱秀忠義之嗣得天本厚有學有文有功有名是可不朽敷歷中外 天子褒之西人頌之有譽無咎生榮死哀同穴有耦公之

治績子克以守公無忝厥先祖宗左右鑿石銘之以固以壽

右墓誌銘蔣士銓代某撰

國朝耆獻類徵初編卷二百九補錄

監司五

蘇霖泓

蘇霖泓字淇若趙州人康熙丙子舉人歷官兩淮鹽運使與海門侍御爲從昆弟丙辰海門典試貴州公以遵義守作內監試天才素警敏兼精吏治極爲鄂文端公所知兩淮提引案發公前後皆被罪惟公獨無染其清節可見一斑云

右溟繫小傳師範撰

國朝耆獻類徵初編卷二百九補錄

監司五

董新策

董新策字嘉三號樗存合江人康熙庚辰進士改翰林院庶吉士特授甘肅甯夏道著有容子山人稟顧氏息存云樗存詩有盛唐風味如五丁關臨潼早發皆其近似者彭氏樂齋云嘉三爲文飄飄有仙氣自少能詩晚年益臻老境尤工於詞擅白石之勝李氏雨村詩話云鄧遜齋先生示予樗存先生稟皆予蜀雅中所未收者其佳句如病中云夢裏天讒何處問命中月字幾時消病起云似鶴清癯惟有我除僧來往更無人舟中云往事漫論翁失馬此

國朝全蜀詩鈔小傳孫桐生撰

時誰道子非魚皆清妙獨造

右 國朝全蜀詩鈔小傳孫桐生撰

國朝耆獻類徵初編卷二百十日錄

監司六

謝濟世

陳法

蔣林

劉士銘

莊亨陽

葉士寬

馬維翰

盧見曾

董廷恩

朱士傑
張仕可

姚清燕

黃祐

朱陵

馮祖悅

劉良璧

張奎祥

張九鈞弟九鎰

顧贊侯嗣達

莊柱

王葉滋

宋壽圖

張沖之

鹿邁祖

皇朝詩林卷之二十一

補錄

李根雲

盧見曾

國朝耆獻類徵初編卷二百十

通奉大夫前署江西巡撫江西布政使司布政使湘陰李桓輯

監司六

謝濟世

從兄諱濟世字石霖一字梅莊解元贈通議公孫世父封庶吉士
贈御史屏山公諱賜紱子也生而聰敏過人讀書驚其行輩年二
十領康熙戊子鄉薦第一壬辰成進士選庶吉士授檢討丁酉順
天鄉試戊戌會試兩充同考官所得皆知名士雍正四年改御史
未浹旬露章言三事 上霽顏問云何對曰一錢法一鹽法 上
曰錢法大難朕方籌畫復三奏河南巡撫田文鏡不法狀 上不

懼曰彼號能臣朕方倚任爾毋惑浮言誣奏以奏章擲還公伏地
不肯起爭益力 上怒付法司鞫問幾罹不測賴 上聖明鑒其
慙直免死戍軍臺 今上御極首 賜環復御史任以母老乞外
補 特授湖南糧儲道善化令樊德貽收糧厲民公易服爲鄉民
往納得實揭兩臺請參格不行詣撫軍許容面陳狀詞過激許撫
恚甚列款糾參鍛鍊成獄民情鼎沸御史胡定采民謠以 聞
上命侍郎阿公里袞馳獻湖南士民數千人戴香迎馬首跪稱冤
至則盡得挾私誣罔周內狀力爲平反坐許容以下藩臬守判及
樊德貽罪而公得改授驛鹽道以老病休致家居十有二年卒
年六十八公居諫院有直聲名動海內每疏奏 上必嘉納然終

以強項不爲時容仕故不顯云公在塞外九年得究心聖經著有
匱匱十經及以學居業集史評纂言內外篇離騷解西北域記一
時紙貴洛陽遭母喪見世俗居喪尙浮誕不師古著喪禮甯儉錄
以風焉

余旣爲此傳有未悉當日情事者欲剗削大半因摘錄一二軼事
附左以見梗槩云

公在軍臺讀書不輟平郡王及公大臣博爾屯伯大臣欽拜皆遇
以殊禮欽伯則北面稱弟子夸藍大以下受業者無僕數其居室
飲食皆王公大人爲之營辦尤精易理所著易在曾進 御覽有
軍中學易圖當代名臣碩士各有題詞乙卯冬 召還入都每出

行兒童婦女填溢街巷爭欲識面士大夫造門請謁無虛日平郡王命嗣王從受業商得二獵犬進奉語次及之公曰進犬非王事若能進一二賢臣豈非千秋佳話王顧嗣王曰侍御良言眞古人箴規之義不可忽也慎郡王聞公名思一見平郡王爲諭意公曰曳裾王門恐於義未可卒不往值 朝會廷臣咸集平郡王指目曰此謝侍御也王乃前握手如平生歡比公外任二王親書詩聯以贈行云

右小傳並軼事謝庭瑜撰

謝公名濟世字石霖號梅莊廣西全州人康熙戊子領解額壬辰進士授檢討雍正四年改御史未浹旬露章面奏河南巡撫田文

鏡不法狀。世宗不憚曰：彼號能臣，朕方倚任，爾毋惑浮言，誣奏。擲還其疏，公伏地不肯起，爭益力。上震怒，先是文鏡疏劾屬吏黃振國，邵言綸、汪誠等直隸總督李公紱過河南，面斥文鏡有心蹂踐讀書人文鏡，密奏紱與振國同年將結黨爲被劾諸員報復。旣而李果面奏退復，連疏糾之。上先入文鏡言將罪李公劾疏，亦及振國言綸誠等事。上益疑爲朋黨，命九卿科道集刑部訊公辨，甚力勵尙書杜訥命刑訊問指使何人，公曰：孔孟問何故，則曰讀孔孟書，自當忠諫，見奸弗擊，非忠也。奏上議大辟，得旨免死，令往阿爾泰軍前效力。平郡王福彭公博爾屯伯欽拜皆待以殊禮，欽公築館受經，稱弟子，而振武營將軍某希要人，指遣官

搜其書得古本大學注劾公毀謗程朱廷議坐諷刺朝政復下獄將刑縛至市曹諸受學者皆哭送且設祭邸舍中已而將軍王宣旨赦之公歸舍炷香未燼酒尙温乃揖祭者曰生受可乎諸弟子執爵言曰先生真不動心哉何就縛時無懼容也在成九年

高宗登極召復原官以母老乞外補授湖南糧道衡陽令李澎善化令樊德貽巡撫許容心腹也其徵糧浮費皆倍蓰公易服爲鄉民往納得實乃訪拏李令丁役且揭參樊令皆格不行詣巡撫面陳狀辭過激巡撫恚甚反列款糾公於是湖南士民揭帖訟冤有旨交總督孫嘉淦會鞠公解任以岳常道倉德代時布政使張璨按察使王玠鍛鍊成獄謂所訪衡陽丁役一節皆子虛而長沙

守張琳原詳稍徵實與劾疏歧適玠擢川藩過岳州手致璩書於
倉公請密易原詳倉公不可慮攬眾忌遂以書呈總督總漕兩大
府督寢其事總漕移牒都察院劉文正統勳爲總憲上之御史胡
定采民謠以聞有旨命侍郎阿里衮馳讞至則士民數千焚
香跪馬首稱冤盡得朋謀傾陷誣罔周內狀獄具坐許容及藩臬
守令罪皆褫職督臣亦免官公得雪改授驛鹽道新撫蔣公溥知
公賢而心終嫌之密奏其離經叛道并上所著書上覽奏曰朕
不以語言文字罪人也未幾以老病休致家居十二年卒年六十
有八所著有歷歷十經史評西北域說纂言內外篇公直聲震天
下慎郡王聞其名思一見平郡王爲道意公曰曳裾王門非義也

值 朝會廷臣咸集平郡王目指曰此謝侍御也乃前握手如平生歡乾隆元年 詔開言路公在戍所爲欽公草疏明年春平郡王入 覲 上首贊欽疏曰欽拜有古大臣風王以寶對 上顧左右曰果不出朕所料也王嘗遣嗣王從學會得獵犬二擬進奉公曰進犬非王事孰與進賢王敬之其初至軍前也與姚中允三辰陳御史學海偕謁將軍問儀節或告曰三叩首二子悽然公怡然曰此戍卒見將軍非我見將軍也及見將軍免禮呼先生賜坐賜茶出二子怡然公夷然曰此將軍待廢官非將軍待我也曰然則子爲誰曰我自有人在

右事略李元度撰

陳法

陳先生法字定齋貴州安平人也由詞林外歷郡守官至大名道爲政以教養爲先興利除弊力挽風氣之靡公牘文告皆手治情詞懇款既久人猶感誦之陳文恭公應 詔舉賢才嘗再疏舉先生生平力崇正學著明辨錄其論象山合乎禪宗曰自古聖賢教人不過使之循子臣弟友之常謹視聽言動之則而求之遺經以致其知反之身心以踐其實去其外誘之私充其本然之善如是而已故曰夫道若大路然無他元妙之可言也自達摩入而後直指人心見性成佛自宗杲教人靜坐體究而後有改頭換面之伎倆於是好高欲速者希冀捷獲絕聖棄智定慮澄心以求之虛無

曠眇之中恍惚間偶有所見遂務爲獨得以爲道之妙不外乎此
乃舉吾儒所謂一貫所謂仁所謂天理者皆以釋氏之本來面目
當之蓋彌近理而大亂真矣昔楊慈湖有雙明閣之悟象山歎其
一日千里詹子南靜坐瞑目半月操存一日下樓忽見此心澄瑩
中立象山目逆而視之曰此理已顯且證其爲智仁勇證其爲萬
善皆是物徐仲誠處槐堂一月問之云如鏡中觀花象山謂其善
自述此皆禪家頓悟法其所謂反身者不過反觀內照其所謂萬
物皆備者不過鏡中影象而已至智仁勇三達德惟聖人能不思
不勉下此皆不能無學問思辨力行之功今乃瞑目安坐半月而
遂可以全三德備萬善雖顏閔且不能幾此非所謂直指人心見

性成佛者耶慈湖在太學循禮齋嘗夜憶先訓默自返觀覺天地萬物通爲一己王陽明在龍場晝夜默坐一夕大悟汗出踊躍若狂陳白沙靜坐久之見心體隱然呈露錢緒山靜坐僧房凝神靜慮倏見此心真體蔣道林靜坐寺中半年忽覺此心洞然宇宙渾屬一身羅念庵坐石蓮洞中有悟汗下如雨灑然自得羅近溪一日忽悟心甚痛快直趨父榻前陳之其父亦起舞凡學之墮禪宗者無不有此頓悟之機聖學不如是也其辨致良知曰昔者子思嘗言致良知矣曰其次致曲孟子嘗言致良知矣曰擴充四端朱子嘗言致良知矣曰因其所發而遂明之曰因其已知之理而益窮之皆由其偏而致其全由其發見之微致之以至於不可勝用

由其所以從生致之以至於其所終極所謂充其本然之善也而陽明之所謂致良知者則謂天性之眞明覺自然自有條理又曰吾心之良知卽所謂天理致吾心之良知之天理於事事物物則事事物物皆得其理是所謂良知者已自然純乎天理而無一毫人欲之私所謂致焉者毫不假借推致之力純任自然所謂萬法從一心流出者也夫以孔子生安之聖至七十而始從心不踰矩今欲槩之人人不學不慮任天則之自然其不至猖狂而妄行者幾希矣至所著易箋辨來易錯綜之非謂先儒雖言卦變未有易其陰陽剛柔之實顛倒其上下之位者今以乾爲坤以水爲火以上爲下混淆汨沒而易象自此亡矣又著有河間問答內心齋詩藁

諸書

右事略李元度撰

按陳公康熙癸巳進士

安平陳先生諱法字定齋潛心正學駁詆異端著明辨錄其論象山合乎禪宗有曰襲者余伯父拙夫先生少年讀書攻苦屢試皆冠其儔偶一日歎曰是豈聖人之學乎遂棄其青衿慨然有求道之志因往深山中靜坐月餘忽見此心光明洞徹與天地萬物爲一體一矜持便了不可見以爲此一段活潑潑地何以實有諸己法時不曉所謂竊怪聖門中何故有此一段奇特景象六經四子之書何故未嘗一言及之後以憂歸里於山寺中取楞嚴圓覺法華金剛等經觀之其言極相符合因疑佛說所謂形而上者與聖

人同及讀朱子文集見廖子晦亦嘗極力尋究於日用事上見所謂廣大虛靜者以爲大本又閒居默坐見所謂充周而洞達者萬物在其中各各呈露而朱子以爲用心太過思慮泯絕恍惚之間瞥見心性之影象與聖賢眞實知見端的踐履徹上徹下一以貫之之學不可同年而語又引橫渠先生所謂若謂萬象爲太虛中所見則物與虛不相資形自形性自性者以曉之乃知子晦爲靈明之空見所持與禪宗靜智妙圓光明寂照者無異而聖人之說無是也夫子晦得朱子而就正之乃恍然悟其所見之非而曰非夫子之教幾殆乃象山之於蕙湖舉四端以發明本心蕙湖當下忽覺此心澄然清明亟問曰止如斯耶象山曰更有何也於徐仲

誠令其思孟子萬物皆備於我反身而誠樂莫大焉仲誠處槐堂一月問之云如鏡中觀花象山謂其善自述因與說云此事不在他求只在自己身上仲誠因問中庸以何爲要語荅曰我與爾說內爾只管說外看其機鋒迎擊真是一棒一喝手段嗚呼孟子之言四端在察識而擴充之由火然泉達之機以至於保四海而象山借之以識取其靈覺之心孟子之所謂反身而誠者朱子謂乃窮理力行工夫成就之效貫通純熟與理爲一處則是非歲月之功所能至而直欲於一月半月之間瞑目安坐而得之此所謂直指人心見性成佛者耶是則師弟之間傳授心法無非瞿曇之故智桑門之衣鉢雖善辨者亦不能爲之解也或謂象山亦云本心

之善非有動靜語默之間又云定之於動靜非有二是亦非專求之於靜也曰禪宗亦非專求之靜故謂行住坐臥都不放空運水搬柴無非是道主人翁欲常惺惺宗杲教人靜坐體究而又作正邪論以闢靜坐之非象山之動靜皆定亦猶是也曰動亦定靜亦定非程子之說乎曰固也程子不云乎釋氏有箇覺之理可以敬以直內矣然無義以方外其直內者要之其本亦不是朱子論象山只踐履他之說又曰釋氏只恍惚之間見得此心性影子卻不曾細見得真實心性所以都不見裏面許多道理正使有存養之功亦只存養他所見的影子是其動靜之間所見不同所養亦異不然釋氏何以棄人倫而遺物理象山何以詆格致而外見聞胡

文敬又謂象山身在此能知民間事又豫知死期爲異學無疑按
程子遺書有云方外之士有先知者有諸曰有之向見嵩山董五
經能如此問何以能爾曰只是心靜靜而後能照又問聖人肯爲
否曰何必聖賢使釋氏稍近道理者便不肯爲釋子猶不肯爲況
聖人乎以釋氏所不爲者象山乃以示其神奇又得禪之淺焉者
矣故其言曰這些子看得透徹隨他千言萬語是非誠僞到前便
明合得的便是合不得便非如佛家說心印相似又曰良知原是
完完全全的是的還他是非的還他非只是依著他更無有不是
處其全集中如此者不可殫述此任心之弊也先儒亦云正心之
始當以心爲嚴師然非究竟法也蓋是心之知氣拘物蔽所發安

能盡是大學之毋自欺亦在致知已後其於善惡見之已真故戒以毋欺非謂心生萬法也或曰陽明以去人欲存天理爲致良知者非乎曰大學之序知至而後意誠知有不至有錯認人欲作天理者且欲之難去而理之難存也是以聖人先之以格物致知使其真知善之當爲惡之當去如知烏喙之不可食則必不食而又涵養之於端莊靜一之中謹之於視聽言動之則其臨事也又致其省察克治之功如是而人欲庶乎可去天理庶乎可存今陽明直以慎獨戒懼爲格物以刻刻去人欲存天理爲致良知既無格物致知之功又無莊敬涵養之素無可擬議無可持循而但欲於發念之時憑虛蹈空恃此知覺之靈以去欲而存理不惟所謂天

理者見之未必得其真卽所謂去焉存焉者亦急迫躁擾視其心如寇讎故其言曰念念去人欲存天理不管甯靜不甯靜又曰持志如心痛蓋以強制其心如克伐怨欲之不行焉者耳且佛氏於不思善不思惡時認本來面目陽明以佛氏本來面目爲良知又以隨物而格爲致知之功卽佛氏之常惺惺亦是存他本來面目又欲人將貨色名利等心一切消滅只畱心之本體便是寂然不動所謂不思惡也又謂心體上著不得一念畱滯不但私意卽好念頭亦著不得些子所謂不思善也是則隨物而格卽去人欲存天理而去人欲存天理不過存養本來面目其本體工夫只在不思善不思惡與聖人所謂去人欲存天理者燕越異向矣至禁遏

其心苦其滅於東而又生於西也又欲於靜中追究搜好貨好色
好名之根逐一克治真乃鼓怒浪於平流震驚飄於靜樹以致其
徒有剜肉作瘡引大上堂而逐之之疑而陽明反斥之爲自私自
利不知己之爲此正程子所謂急迫求之只是私己終不足以達
道其爲自私自利也大矣如是而曰致良知亦借聖言以文其奸
以塗天下後世之耳目適足以汨其良知而已若夫訓格物之謬
無善無惡之非廢學廢行之弊知行合一之妄見於整庵涇陽景
逸及近時張武承所論著詳矣學者取而究心焉然後知其爲正
學之榛蕪心法之螟賊闢之而後可以入道有不容假易焉耳先
生本其實學卓爲賢良所歷之地以教養爲實政凡與上官往復

稟詳興利除弊以及爲官民挽回風氣申明法戒皆手自親裁或
數百言或千餘言情詞懇款仁義周而沁人心脾久而猶感其孫
若時所刊猶存集論治居其七八而學之本末益可見矣

右學案唐鑑輯

蔣林

世宗皇帝御宇十有三年勵精圖治勤求民瘼尤重牧守親民之吏爲官擇人立賢無方至輟文學侍從之臣付以專城之寄者不可一二數諸臣亦並能祗順德意奉宣條教故一時多良二千石治化洽和貪墨屏迹庶幾所謂吏稱其職民安其業者以余所見全州蔣公其尤可稱述者也公諱林字元楚世爲州著姓曾祖彥賓明州學生祖景濬 贈中大夫父時昂 封中大夫曾祖妣唐氏祖妣熊氏 贈淑人前妣趙氏 封淑人母趙氏 封太淑人公少警敏年二十一領鄉薦舉康熙五十四年進士選庶吉士授翰林院檢討入直南書房十年不遷泊如也雍正初大將軍年羹

堯方貴寵呼喚能爲人禍福其幕府翰林數人皆請於朝以往
公門生汪德容與馮夔堯重公名亦欲請之德容固勸公往公遽
請歸省時人皆指爲迂未幾夔堯敗在幕下者多汙黨籍人始服
公先見頃之還朝調戶部郎怡賢親王方總戶部事一日檢籍
有三稅銀目顧問諸司皆左右視莫能對公進曰在昔淮南河漕
鹽三院廩皆故民田後田爲官廩而賦未除故以關稅之不及三
釐者半抵田賦半供吏祿有故籍在可覆視也王顧諸司曰官不
當如是耶會有齟齬公者時尙書爲蔣文肅公每對王論諸司賢
否必言郎曹中無如蔣某賢忌者迄不得行王益器公才遂以道
府薦公召見稱旨命往福建以知府用至卽爲延平府未

而月調邵武精強幹敏過於老吏以坐倉精失察吏議解官有
詔引見命往浙江仍補前官至則攝守杭州明年移嚴州既
兼攝金華杭二守事先後歷守三郡剽煩鎮靜因俗爲治事上官
不激不阿臨事有執守在杭日值織造隆昇建議塞海門尖山別
開引河以固海塘公移書極言不可有曰公能使海不潮則役可
興否則勞民傷財萬無成理又上書督撫極爭俱弗省十二年三
月二十五日漏下二鼓牒下索杭夫萬五千人合旁郡無慮數萬
人期三日集海上公力爭曰田桑方棘而迫期會萬一勿戢將若
何必不得已獨不能俟蠶功畢耶昇怒督愈急且以抗制脅公
乃以四月送役往又面詰昇以尖山必不可塞狀昇益忿因畱公

督役以困之且虞有變卽諉以罪公冒兩撫循泥深沒脛役人感
公誠咸盡力昇又虐使眾役動以捶撻立威棄鋤而諱者數矣當
是時徵公事幾殆俄役迄無成昇竟得罪去杭郡大獄屢起公所
訊鞠平反爲多有欲以周內爲功者側目視公弗顧也治嚴以清
淨爲化訟衰獄空歲饑檄屬邑開廩賑貸不俟報可修舉荒政全
活無算婺俗嚮悍無賴子縱橫里閭聞公治尙寬恣睢自如公取
尤無良者痛治之遂不敢犯 今上卽位以公治最有聞 召赴
闕入對卽日除長蘆運使洗手奉公廉隅凜凜商故有公使錢異
時院司歲各費數萬緡公以身率儉歲費不及百緡院亦憚公歲
取幾減前數之半然用是憲公亦無以中也嘗再護院事得闢征

羨餘數千吏白故事當歸私橐公命畱之庫不私一錢居四年以
父母老請歸養 上覽奏顧謂近臣曰世乃有不願久爲長蘆運
使者耶 命籍其名始俞其請明年丁父憂哀毀盡禮葬後日一
至墓所至輒哀慟奉母居鄉八載足不跡城市與兄弟友愛尤篤
待族黨皆有恩鄉人化其德有爲不善惟恐公知之性素儉旣貴
布帷布衾及歸後黃冠草履往來阡陌閒出於坦誠人不議其矯
也與人交有終始外和內介自號曰介亭此其志也公以乾隆十
二年十二月十六日卒年五十四娶周氏 封淑人子六良翊乾
隆十九年進士知萬全縣良駟乾隆十六年進士翰林院編修良
驥乾隆庚午舉人良駟良駟良駟良駟皆後公卒女六諸生

謝播曹若瀾太學生謝之伯趙汝銘曹文唐啟瑜其婿也孫六善長善承善士善交善啟小同孫女五惟公弱冠登朝回翔中外歷二十餘載甫踰強仕卽挂冠侍養難進易退卓有古人風烈用世之才又未獲盡展故其吏跡見於治郡爲多余嘗蹶仙霞嶺入閩坐篋輿中知與人嚴產也因詢以前後州郡孰賢愀然曰惟十年前蔣使君愛民如子百姓無福好官豈可常得耶余爲嗟歎久之初余以乾隆三年客京師公屬掾吏聘余入使署課其三子故良甥良驥良驥皆從余遊其明年秋余辭歸省侍三四年閒往來南北兩見公於天津酒酣耳熱公輒抵掌縱譚天下事兼論人才邪正及生平進退大槩其英風偉抱抑塞磊落至今猶想見其爲

人而公不可作矣公卒後十二年良騏亦侍母里居走書踰三千里奉狀來請銘且曰非先生無可銘吾先大夫者然則余又何忍辭銘曰

大鵬絕雲斥鷃笑之驚馬戀棧驂驅載馳猗與蔣公玉堂早登冷官寂寞冰山冑憑振職郎潛屢騰剡章出綰郡符政繼龔黃治劇撥煩見善者機眾人之母可慰渴飢繼處脂膏若將浼公歸拜高堂其樂融融人謂公才勇退曷爲詎知公心好爵莫廉粵嶺之高湘源之清起懦激頑公實豪英紗帽山陽公體是藏毅魄瞻瞻浙水桐鄉我最其迹幸無媿辭萬世有考其在于斯

右墓誌銘陳黃中撰

劉士銘

同府劉君光汾述其尊甫鼎彝先生之行而乞余爲之狀且言曰
光汾生晚先君子歷官所至之跡在人而卒未嘗一爲其子弟言
光汾蓋竊得之六親之長者不能詳其所以然也而又不敢誣之
以所不能詳子善立言者其爲光汾實以文之余不文不獲辭狀
曰先生諱士銘字鼎彝順天宛平人曾祖諱馨遠祖 誥贈中憲
大夫山西朔平府知府諱世隆父 誥封中憲大夫山西朔平府
知府 晉贈中憲大夫湖北驛傳鹽法道諱繼芳先生之父贈公
初自保定之雄遷於順天之路長新店偕妻朱宜人躬耕西山
之麓而以讀書督其諸子有子三人長若愚次以成先生其季也

早慧強記誦聞郡有藏書家輒往假手錄其本閒走書肆索觀故
書立盡其卷不錯一字而歸以校讎錄本之善否里中耆舊咸嗟
異之蓋自誓終身得暇未嘗手釋書也長新店距京師之廣甯門
三十餘里先生年十七行遊京師慨然曰盛哉乎人文乃移家入
都門到白紙坊東購屋數楹於初張之街以爲讀書之所而請業
於常州謝先生某出遭賢通長者與之遊自是學日以肆當是時
康熙五十年閒文治修明物力豐美京師始稱極盛諸名流置酒
召客排日爲文社而先生年最少與諸老宿相往復至輒傾其座
人歲丁酉先生年二十矣以國子監生應試舉於鄉卷出同考編
修閩陳公治滋房而座主則爲倉場侍郎儀封張公伯行編修滿

洲鄂爾奇公一時榜下相傳得士曰米君米君者卽先生也後始復其本姓先生旣鄉舉負盛名未嘗有喜色旣而再試禮部再不第其色如初謂所知曰吾將益讀書求所以至乎古人者伯兄聞之謂先生曰弟讀書不自苦甚善然父母老矣日夜望弟一官搏一笑弟亦讀漢毛義傳邪先生瞿然爲之改容於時歲壬寅始入貢謁選司明年癸卯始揀發山西試爲令其年知聞喜縣聞喜故劇邑會政弛吏偷逋賦累歲而催科急民益大困先生至則召縣之父老謂曰令拙於催科而民賦不輸是欲見令拙也願與父老約行滾單法何如滾單法者縣出單書賦戶名先甲次乙甲受單輸賦畢而單至乙乙受輸之如甲以次及於一縣賦戶畢然後上

單於令者也父老則頓首曰如約於是先生爲畫催租役於單首行之如法國賦歲入民無謗者又縣故有市集所在迺遠盜賊竊發爲貨遷患先生下令改市適中之所民大便利盜賊亦罷去民爲立祠祀之至今歷攝臨汾蒲州解州戊申擢太原府同知兼攝知平定州尋授朔平府知府朔平地連北邊蒙古部人與民相雜處而郡又新設民屬府而蒙古人隸都統戲下訟輒牽掣號難治先生則以禮往謁都統與之談讌極歡曰某奉命來從公偕治天子人自今誓不得畫彼此界都統卽前執其手曰惟公治之自是蒙古人或暴恣先生立柱決之久之帖然而民賴以安庚戌七月以母憂當罷有旨任守制先生力請反葬而後赴職

許之戊午十一月父沒去官兩喪並哀毀如禮辛酉服闋補湖北
安陸府知府楚俗悍詐獄成則抵罪而情或不實先生苦心讞鞫
多所平反漢江在府城西上去襄陽七百里下去沔陽七百里水
自北來徑石城西南與大江合自石城下抵蔡家橋灣由馬公洲
小河口以達於南河迴折三百餘里土人謂之紅廟隄最要害在
昔石城遠近湖港支分用洩水勢其後日以堙塞而捍水者獨恃
隄隄不固則風旦霖夕一蟻所盜千里爲壑先生躬親相視滲漉
與役夫同甘苦其課工視引錐穿土毫髮不損乃已郡人喜曰我
公不寐我民安睡矣會興縣孫文定公以總督兩湖疏請調公知
荊州公曰某得荊州人以美官賀某豈此閒有所利耶聞府四關

有東中西北徵稅處卽令曰商賈自入庭中投所稅錢於櫝役是土者不得與又聞駐防兵丁糧餉故事自府支給所在州縣歲當輸南米二十餘萬石上府卽令諸邑曰至期悉以米來不得他有所代令兵丁日月至府支餉二日支糧三日至期一如所支各罷去諸邑或請曰公若少通自便亦以便人先生曰人之不便某任其咎通則何敢乎以故先生在郡久人服其清閒攝理事同知事或有姦其姊之女而殺其夫者事已私解先生訪按確實立置之法有兵丁在校場用火槍誤殺五人律不抵罪先生驗得鉛子於屍中訊得故殺狀抵之先生於所事雖非其專任未嘗苟也已已春奉 特命赴四川辦理臺站及金川平而還庚午八月授本省

驛傳鹽法道鹽法他省價並畫一獨湖廣無定式先生始令商價
不得二且時取市中權秤親爲較其斤兩輕重毋多取民利民方
詎之明年辛未三月而先生以所轄驛站遲誤公事劾去矣初先
生之被劾也同官有軋大吏以去者繼至者疑先生主使之輒摭
細故以劾先生且欲窮治其他事以聞卒無所得旣而以先生在
荊州十年於是更使蹤跡之亦無狀所使者走謁先生曰公誠賢
者然上官使某蹤跡公無所得某無以報請公自書一二事告我
先生曰某不肖不敢不自愛惟憶爲榷使令節受商人花錠數物
此破吾檢耳卽書款付之所使以反命上官默然及按驛站所遲
誤者在江南與先生無與人曰何不白之先生曰某服官三十年

今以此釋負戴可矣復何求卽日束裝北歸過其城喜百泉之勝
爲留半年其冬 聖母萬壽先生入都在都人祝 釐之次有
旨給五品銜自是林居者且十年己卯仲子光汾官長興先生就
養於浙買舟命杖往來西湖中久之不能去平生著述輒散佚惟
西湖詩一卷獨存壬午遇 覃恩以子見官例封一代先生得
晉封中憲大夫如其原官癸未六月元配蔣宜人卒明年甲申先
生偕子光汾扶柩北還僑寓潞河之濱疾作明年乙酉正旦卒先
生生於康熙三十七年戊寅三月十三日辰時卒於乾隆三十年
乙酉正月初一日子時年六十有八先生東髮好讀書長明吏治
所在有績而友於兄弟篤信於友生其大較也先生事兩兄最謹

既仕曰某已得祿矣卽舉郭西田盡歸伯兄而與仲兄俱之官所
兄沒哭之累日不食子弟無敢勸者久始復初家故豐有餘業三
萬金在津門屬一友爲理之凡十年而先生罷歸問其業則空簿
存先生笑曰某貲盡而子適成名足矣揖而去不再問也有山西
范君與先生善輒通財先後資其金殆八千他人未嘗知先生官
楚中聞范疾卽悉索所有得八千金命奴馳數千里抵范氏范已
死獨其弟在辭不受曰兄臨訣未嘗言此且家無券也奴以先生
命固請卒致而去嗚呼先生取與之際又較然如是是可以風已
男子子六人光洊國子監生雲南東川府經歷娶胡氏光汾乾隆
壬申順天鄉試副榜舉人浙江湖州府長興縣知縣娶楊氏學海

爲先生仲兄後娶王氏光潞娶張氏並元配蔣宜人生光漢娶
婁氏側室張生光□側室沈生女子子五人長適順天府學生大
興徐密次適新安縣學生管煥章三適國子監生候選州判承年
冀方烜並蔣宜人生四五並沈生謹狀

右行狀朱筠撰

莊亨陽

余與安溪李文貞公交久故其門下士相從問學者十讖八九而獨未見莊君復齋叩之則初授山東濰縣令母就養卒於途歸而廬墓三年自是不忍一日離其父父既沒隱居教授若將終焉

今上元年楊文定公以大宗伯掌成均薦授國子助教始與余相見西林鄂公海甯陳公問士於余余首言君次某某非禮先焉不可得而見也海甯徧往拜西林使君同官達意至再三君曰吾往見是慕勢也相國何用見此等人將命者以告西林瞿然曰吾非敢安坐而相招也願吾非公事未嘗一出內城恐時人以爲疑吾平生惡市交莊君以老諸生視我則不妨顧我矣君始入見志相

得而自是未再至君自助教遷吏部主事每執橐與長官爭是非
或齟齬侃侃言無懼色君成進士出少京兆余旬御史謝濟世門
二君夙以抗違勢要著聲由是凡良士皆望君行所志而好權利
者則陰憚之六年夏或薦君學行宜居言路引見上意甚相
屬越日命赴湖廣以同知題補十月授德安府同知逾月擢知
江南徐州府徐仍歲水災君以七年四月至相川澤諮耆民具方
略請廣開上游水道以洩異漲且告石林可危未及注措而石林
決沛縣城將潰民竄逃君立起駕輕舸行告父老太守來與爾民
同難爾民何往親率眾堵築七日夜城完在徐三年兩遇大荒勤
賑事飢不暇食困不得眠九年遷按察司副使分巡淮安徐州海

州道至金陵過余北山曰吾再擢俱 聖天子特恩而徐屬水災
乃數十年所未有心殫力竭終不能救斯民之飢溺及爲監司而
淮海承屢禱凋敝多不異於徐命也夫吾聞古循吏精誠能反風
滅火每對飢羸遺民中心愧畏夢寐中時標辟呼嗟今與先生一
握爲笑以海州歲歲苦病得脫耳州有鹽河蓄水通商運故障塞
海口雖異漲非徧告大府監司不敢開洩及文書畢下而田苗沈
沒者已不可救矣陳於制府已定議遇水漲守土吏先開洩而後
報聞故數年來未有如今日之樂者冬杪得手書言巡行視災覈
賑十二月始回徐舊疾復作浹月而其孤使人告喪以遺命徵銘
矣云卒之朝猶強起視事嗚呼以君之孝而恨於母者終其身以

君之仁而民之顛連與君之牧民相終始不可謂非命之窮矣然
抱痛於母而孝乃無虧於父急民之病勤事以死而無負於君
凡君之生不忤於人死不愧於天實由於此豈非易所謂益之用
凶事者邪君學行爲賢士大夫所重後進多宗之將冠爲鄉先輩
戴麥村鑑識妻以族姑泰安趙公撫閩請主黿峰書院以持父喪
辭其家居來學者歲以百計在太學六堂之士少有所嚮者多願
爲弟子九年京察上命大僚各舉一人自代內閣學士李清植
舉君公論大服其卒也士民嗷號聞者罔不痛惜所著秋水堂集
河防算法書藏於家君諱亨陽世居漳州南靖縣之龜山辛卯舉
人戊戌進士卒以乾隆十一年正月十六日年六十有一父諱某

母某氏妻戴氏孝於舅姑與君之友於弟亨德並有聞長子修次撰孫三人以某年月日葬於某鄉某原銘曰

自大理熊君絕世歲始四新余方冀其有爲而忽焉隕墜者五人而今復銘君實德之遺視災黎之涕洟

右墓誌銘方苞撰

按莊公康熙五十七年進士

乾隆九年枚宰流陽淮海道莊公來巡相傳有理學名疑其峻而難近也心忱焉既至則循故事餽殽烝公一切勿拒曰物已烹飪而卻之是暴天物而違人情也凡賓饗與主人共之禮也止枚而觴之三爵後問流水原委簿領利病甚悉論山經地志星象樂律甚辨出所爲詩甚工越翌日諸生會於庠公上坐講中庸不皮傳濂

洛語而理境顯顯大明聞者色盡變若欲卽駕車赴聖域者然諸
生有所陳說雖俚公必靜聽無惰容翌日校壯丁丁疏於技發矢
矢旁穿且墜熱火器閉焦其手諸丁伏地請罪枚亦起立皇恐謝
平日教飭無素公弛外衣手弓而前支左屈右教如法十八人無
不當鵠者火器如之畢就坐笑謂枚曰而奚慊慊耶藝成而下文
人不習常也專心治民吾職在巡年年來爲汝教馴之耳枚聞愈
不安睨諸壯丁皆歎有泣者先是大府巡流饋牲牢不受令袒糲
蔽上食不受矜嚴若神及去庫爲之虧公來飲食笑語盡主賓歡
及去無角尖耗如春風歸畱餘温而已所從隸六人蒼頭二人僮
一人皆自飲其馬犒之跽而辭曰公視奴輩如兒子不告而受於

心不安告公公必命辭是仍虛君惠也強之皆伏地誓指其心乃聽之公諱亨陽字復齋世居漳州南靖縣之龜山康熙進士初知濰縣迎養太夫人道亡公自此不復仕 今上元年以楊文定公薦 召見授吏部主事出爲德安同知遷守徐州蘇松道汪某以危法中沛令某督撫白簡繕矣命公補牒公牒稱沛令不侮鰥寡不畏強禦汪聞梭而止果毅公訥親巡江南聲耀隆赫監司皆躄袴跪迎公獨長揖訥責問曰非敢惜此膝於公其如會典所無何訥默然尋遷淮徐海道海州有河通海以運鹽故雖暴漲非徧告諸大府不啟閘公力請得以時開勘淮海災過勞以羸疾卒年六十一卒之日淮海諸氓罷市奔走樹素幟哭而投購一日至六千

緝嗚呼至誠而不動者未之有也公殆真儒也已公少時受知於李文貞公光地成進士出謝公濟世門謝亦奇士世宗時爲御史三日露章奏河東總督田文鏡十大罪前一夕夢震雷擊於庭翌日章上果得譴滅死戍邊

右傳袁枚撰

葉士寬

葉君映庭以乾隆二十年夏六月卒於家越一年冬十一月將葬矣孤子來徵銘啟豐以重表末行服習君生平行事又嘗視學浙中獲聞君善政浙東西謳思不忘及君養痾里居而啟豐適以陳情歸里親送君之喪讀狀所述其歷官政績卓然有古循吏風是不可不銘案君姓葉氏諱士寬字映庭系出宋少保石林公五世祖諱初春明給事中贈光祿少卿高祖諱登道曾祖諱時臣皆贈文林郎祖諱子循順治四年進士歷知唐縣瀘安邵陽容縣事父諱台陽試授州同知以君貴封如其官妣王氏贈恭人君爲人覃精向學自經史百家駢偶聲律靡不研討旁及象緯輿圖句

殷六書之學皆窮其奧通達政體愛物澤民惻怛周至所至民咸懷之康熙五十九年舉順天鄉試雍正四年試取內閣中書以知縣用初仕山西定襄縣八年遷沁州知州其爲政善知民隱捐棄煩苛遇事必躬親指畫一不假吏胥手事以辦而民不擾權潞安知府除諸稅之無名者復四門集以便商人民大懷畏歷權平陽太原再權潞安治行爲山西最十二年大計以薦入朝 上賜蟒袍擢紹興知府乾隆二年移知金華由是晉階分巡諸道始終在兩浙云其治紹興也有惰民格士而殺之眾士譁將罷試君在三江聞信飛騎至數言剖解試如初浙西風潮大作海塘陷君往堵築三月而塘工完其在金華時東陽縣饑求振者呼號集城門

以萬計君曰按冊施振是振冊非振民也單騎往諭之召飢者前
立注其名於冊而撻其二人民乃定二人者一婦人先以訟至官
服華服至是易敝衣求振君識之褫其敝衣內華服如故一男子
吞甚澤飲以阜焚湯嘔出酒肉眾驚曰振者多散去居官三年多
惠政既去金華人思之爲立生祠歲遇君生日輒張燈合樂以祀
君其前在沁州也亦然有武人自沁來者過君祠適遇君生日祭
獻者至擁馬首不行時君去沁已數年矣四年授杭嘉湖道嚴保
甲守望之令盜賊屏息明年移金衢嚴道衢州地勢高西安龍游
諸縣築壩蓄水以溉田商人入山伐木私開壩行水日涸乃嚴其
禁民稱便初君莅嘉湖時桐鄉豪家許訟有以金饋者君急置之

法獄未具卽調金衢繼事者果以賊敗事連巡撫坐死總督德公
委君推鞠君言巡撫實未嘗受賊覆治之得金數千於用事者之
家巡撫獲減罪八年移甯紹台道釐關政修戰艦巡歷外洋雖險
遠必至紹興被水蕭山諸暨民多挾眾詣縣求食巡撫聞而惡之
不欲振君往視還白巡撫曰某來時蕭諸之民奄奄無氣息張口
以待哺何忍見其悉填溝壑耶言訖痛哭巡撫心動聞於 上遂
得振君嘗言待飢而振所活幾何欲爲民本計者其唯修水利乎
議復紹之鑑湖甯之廣德湖大興灌溉之利會去官乃止著浙東
水利書冀後有行之者也十二年以父喪歸服除遂不出君在浙
時每加意書院以作人爲己任至是屢集諸生校試文藝興起者

甚眾平居孝友之德著聞鄉里見於狀者詳焉茲不著君生於康熙二十八年距卒之年六十有七妻郭氏顧氏皆封恭人先卒繼室劉氏生子樹滋樹蕃皆太學生女一適趙幹麟銘曰

唯古仕學必兩優通經致用彰遠猷今人治絲多紛糾刀筆筐篋吏治羞君之設施本末周襄帷觀察勤諮諏拯民疾苦同納溝洫右兩浙騰輿謳樂公社畔民何稠年雖不逮名自修我銘其藏告之幽繩繩孫子縣千秋

右墓誌銘彭啟豐撰

馬維翰

君諱維翰字墨麟號侶僊姓馬氏海鹽之侑浦人生而器誠宏達
穎悟超常見九歲能詩文康熙庚子舉於鄉次年成進士諸公爭
邀致之不往雍正甲辰特選爲吏部稽勳司主事轉員外郎試陝
西道御史掌河南京畿道陟工科給事中監督倉場出四川清丈
田畝先川南次川東轉戶科掌印閣莅建昌道上官構之君通揭
部科解職赴部質復原官乾隆丁巳起江南常鎮道丁外艱得中
風疾庚申五月四日卒於家年四十八 憲廟注意人才命柄臣
選諸進士之賢能者君眇小丈夫不得與氣憤直前曰今日選賢
能耶賢能安從見選魁梧狀貌耶 國家事非仗此辦顧選意何

居柄臣奇之選留吏部甫視事發胥奸子杖故事馭銓曹獨飭體
貌犯重付法司輕革黜不杖也君杖之銓政肅清攝他司益整暇
所至有聲其清丈川南東也糧浮於田必請減相要害改黎州干
戶所爲清溪縣兌占桑昂邦等跳梁焚掠及烏蒙我師會勦君駐
打箭鑪供糗糧芻茭絡繹不匱雪冰山積鑿徑纜通馬苦寒裂膚
與廝養同飲食辛苦捐俸佐軍需論事悉中機宜西夷平涼山數
百里地震疾馳勘災條上之散振得實建昌人感之雨泣三渡水
摩步蠻殲厥夫方進勦君力陳營兵不輯開各廠病蠻狀遂得請
罷廠撤兵撫各番誅止其魁全活無算在蜀七年意不阿上官旣
被構赴部質時親王總部事極威重梓免冠君以兩手按所著冠

抗聲曰奉 旨不免冠譙問故則又抗聲曰 旨解職非革職也
乃趣具疏請革職會 憲廟賓天事旋白復原官君遇事勇無所
詘居恆冲和坦易雅近情事親孝迎養於蜀先意承志 贈大父
封父如其官祿分族戚視友如性命好獎士類居恆常鎮品目
江南人文文教風動所著詩古文精悍如其人入蜀後所詣益進
同時浙西以壇坫自矜許者舉莫之及已刻詩十二卷未刻詩十
卷古文十卷舊雨集二卷藏於家舊雨集者君哀其平生所交友
之作也

桑調元曰曩予讀君論勦撫事宜諸篇贊畫如神筆挺挺踵史漢
以謂經濟文章兩不可漸減頃君之子某持狀乞予傳君子遊山

久乃歸某又從所親南去無從索其家藏橐古文傳體類援述人書疏以見其平生予欲述君文而未由也姑就狀及予聞見傳之君文自爛爛如日月予獨以君之忠直才略不得竟爲可惋恨也予請急歸君書來賀予以齟齬之身乃今得免玉碎而君不久卽下世矣悲夫

右傳桑調元撰

內大臣驗看諸人皆跪公不可九門提督隆科多訶之公夷然不動隆笑曰不料眇小丈夫乃風骨如許公曰區區一跪尙未見維翰風骨也

右隨園詩話張維屏錄

盧見曾

盧見曾字抱經號雅雨山東德州人康熙六十年進士官兩淮鹽運使有出塞集

運使有吏才夙慕其鄉王阮亭尚書風流文采故前後任兩淮運使各數年又值竹西殿富接納文人惟恐不及又校刊乾鑿度高氏戰國策鄭氏尚書大傳李鼎祚周易集解封演聞見記諸書又補刊竹垞太史經義攷弁輯 國朝山左詩行世修小秦淮紅橋二十四景及金焦樓觀以奉辛未丁丑兩次 宸遊其愛古好事百餘年來所罕見

右湖海詩傳張維屏錄

董廷恩 朱士傑 姚清燾 張仕可

董廷恩漢軍鑲紅旗人康熙中任衡永郴道駐衡州茶陵賊陳丹書倡亂郡奸葉爾藏王安兒約爲內應廷恩廉得實偵賊從安仁來令悉棹船西岸賊遂結筏渡湘攻小西門廷恩擊殺安兒竿首城外縋爾藏出籍其家賊知謀洩竄甯甯縣副將陳盛于光國率兵至禽之餘黨悉解散時湖湘監司著聲績者又有朱士傑奉天人任衡永郴道值吳逆甫平士傑捕治餘黨還被擄男婦甚眾乃除浮糧豁單丁修治石鼓書院及各屬學復煙雨池舊蹟士民交頌之姚清燾烏程進士任湖廣提學僉事以廉明稱士行民風一時丕變與明高世泰先後齊名張仕可丹徒進士任衡永郴道有

清操嘗按部郡守某具酒殺逆境上峻卻之其後守以贓敗出所籍記饋遺上之巡撫趙申喬申喬檄仕可鞠其狀仍集屬吏廳言曰衡永道我之鄉人今屬之鞠某守獄得無疑我私乎因舉籍記示之獨仕可無絲毫染眾皆愧服

右傳李元度撰

黃祐

公諱祐字啟彬號甯拙又號素堂姓黃氏江西新城人先世自石
城來遷累傳至諱嘉賞者爲公會祖諱有敕者爲公祖父諱志發
太學生以公官累 封朝議大夫山西冀甯道嫡母魯氏席氏生
母鄧氏皆 封太恭人鄧太恭人生子三公其次也伯兄祿雍正
乙卯舉人官河南邕縣知縣季弟禧雍正甲辰舉人工部都水司
學習尋卒公生而穎異成童入學食餼年二十三中雍正癸卯恩
科鄉試是秋同予成進士入詞館以清書散館第一授翰林院編
修歷官福建道監察御史刑科掌印給事中前後奉 命賑荒查
倉巡城巡漕巡察直隸山西皆 寵命也又 命提督福建學政

以嫡母艱未赴服闋外轉江南驛傳鹽法道再丁生母艱補授山西雁平道調繁冀甯道在晉五年以病回籍調理乾隆二十九年甲申十二月朔三日卒距生康熙四十年辛巳享年六十有四某年月日既葬公於某鄉某原又四年其孤澄來京謁選謂予知公深具狀乞表公墓余惟世不乏奇才異能之士所乏者循分供職隨地有以自見亦不少讀書談道之儒所少者省功訟過隨事有以自檢若公者其庶幾乎公官翰林時充八旗志分修官所纂蒙古名臣傳三卷營建志駐防大臣表皆有史法庚戌癸丑兩充會試同考官所得卷如胡君襲參任君應烈皆知名士董君邦達稱君璜羅君源漢宮君煥文先後皆躋卿貳躬膺大用其官御史任

刑科也所糾劾條奏皆當 上意兩任監司凡職所當盡所得盡者無不盡初抵江南值淮徐水災制府德公尹公先後委辦賑務往返淮徐幾一載諸所措置皆相時度勢酌古宜今嘗讀其振荒錄皆良法也又將本衙門驛鹽源流沿革分類成書俾官此者便於稽查胥吏不得蒙蔽亦大公者之所爲也官冀甯時值河東道蒲解等縣饑阿撫軍知公在江南辦振有成法檄行督辦公辦理鎮靜該地如不被災者阿撫軍歎曰黃公作事真不器之君子也時金川用兵冀甯兼管驛務羽書紛馳駱驛不絕自平定至永濟驛站疲困幾不能支公爲之調度酌劑以均勞逸通省稱便巡察一官自明季滋弊至 本朝極嚴斯選是以常曠而不舉 世宗

憲皇帝九年 特命公巡察順天永平宣化三府地方當 陸辭
時 上目送之曰好少年蓋注意公深也又 命公巡察山西全
省地方初巡直隸諸所奏請皆稱 上旨後晉省之 命甫下適
先皇賓天公哀痛如喪考妣國孝服滿始請 新天子訓起行
到任半載忽以懸癰之疾奏請回京醫治或惜其未克展所爲然
觀其上晉省民俗一疏及條陳兵米一事皆經世之大者亦庶幾
不負此一巡矣公素嫌明季講學之濫不愛談理學之書然家政
可施於國事君能敬其事隨地隨事有以自盡而一言之失一怒
之過必默自創懲凡官途前輩訓勸之語以迄良朋箴切闡中規
勸之言常省念以終身是固不循講學之名而有講學之實者爲

可敬也制府德公深於理學者也。謂子曰監司黃某操守最嚴
嘗以事試之斷然不動又畱心世務曾詢江西風俗善敗得失某
用長書致荅皆中要害後由雁平調冀甯亦德公撫晉時所請蓋
引公爲同道也公初娶涂恭人繼娶梅恭人生子四長登瀛乾隆
辛酉舉人官龍南縣學教諭次澄乾隆壬申舉人甲戌進士官河
南南陽縣知縣丁公艱服滿補湖廣某縣調江夏縣三登漢邑庠
生先公卒四登源增貢生肄業國子監充修太學志分校女一適
廩貢生候選訓導鄧志熙孫男八人本誥邑廩生本讓本詳本論
榘植本諧士先士光曾孫幾人公居家孝友厚於宗族鄉黨課子
極嚴日有常課不容少怠其課諸姪亦如之以故兄子道銘弟子

道鎔並由舉人官知縣從子鐘亦由選拔官知縣皆公有以成之
道鎔幼失怙恃公愛育尤加厚焉特作清慎勤三箴每子姪之官
必書之以爲誡而生平造就後進之志至老不倦在冀甯時兼管
晉陽書院嘗親自至院殷勤獎勸有極貧者嘗解金以贈之所期
許士多取高第入詞館自晉假歸嘗任本郡本邑書院山長其肫
誠一如晉陽而教法加詳公通籍最早居官差委無虛日於詩文
一道疑若無暇治者然公卽仕爲學凡興懷所觸常見之詠歌所
關國計民生或見之章疏或見之紀錄故生平所著詩古文集約
四十卷江南救荒錄六卷畿輔振荒日記二卷蘆汀晚筆一卷河
上餘聞二卷晚香閒墨一卷其書皆藏於家子向在京與公朝夕

相過從者幾十年迨後仕各一方而書問往返歲時不絕予撫陝
時公寄予四詩予勒之碑洞以誌予愛今公下世已六七年表公
行事因不禁有才難之感而聚散升沈念之亦又泣然也

右墓表涂瑞代某撰

朱陵

朱君諱陵字紫岡十世祖由休甯月潭遷居歙之涪村祖木叔父
蔚庭俱以君貴 贈如其官君幼而隨其父服賈武進年十二受
學武進諸生願明侯明侯每令君誦所讀書而已聽之以爲俯仰
抑揚能盡合古之音節雍正甲辰登進士官翰林庶吉士踰年改
授刑部湖廣司員外郎 命往盛京整飭部務遷禮部祠祭司郎
中還京補刑部見審左司郎中考選貴州道監察御史協理山東
道事巡視北河漕務改授江西贛州知府遂分巡贛南以父喪去
任服闋參藩衡永調任辰沅永靖兼攝岳常澧道署湖南按察使
事未幾又以母喪歸里其在北河陳便宜三事而 上皆允行之

在贛州十年贛當閩粵之衝有東西兩關中丞委君兼攝君一清吏胥之弊令訖刑自注稅銀於簿法寬而課自裕贛舊有濂溪書院君爲延名師以振起人文人稱爲朱公講堂云其分巡贛南值學使按試贛州忽大風發屋覆壓應試童子四十餘人皆死其餘折傷肢體者無數人情慘痛咸歸咎於守令督修之不堅及學使命題之不吉幾成變亂君自以莅贛日久其恩信素結民心乃出示曉譬再三而民皆感泣其變乃中已君之才足濟亂多如此當是時買穀實倉儲而禁買於本地之富民鄰邑或貧瘠不供則求之遠地又多糜道里之費於是縣令以畏禁而私交乎富民富民以有挾而劫持乎長上其弊多端值中丞轉帖下各道殷鑒羅補

君以爲糴買本地富民之穀勢有不得不不然與其陽禁陰違曷若
揭白而曉諭之價不使抑平不使短斛不使浮貧富咸濟其道光
明比之上下相欺相懸億萬也大府褒嘉以爲得政體君之推誠
不以內外有閒多如此當君之署理湖臬而歸也君年已六十有
六歷任中外三十餘年而是時王太恭人旣謝世君所生四子其
三子皆先君而亡悲不自勝故服闋赴京將補官而在道復返遂
閒處田里十有五年蓋君之清操與其勤慎之節明敏之才皆足
以大有爲於天下而惜未盡其用也君以乾隆三十三年正月十
五日卒享年八十有一 誥授中憲大夫娶吳氏 誥封恭人子
四人長辰郡增生次晴次懋懋皆國學生並先君卒其季若水邑

庠生若水將以某年月日葬君於某鄉某原而請余爲銘銘曰
君之居官不爲表襮旣直以持又卑以牧惟其有利於民而有移
於俗於萬斯年君子之穀

右墓誌銘劉大樾撰

欽紀堂朱公余年友也公視余少長一歲同領丁酉鄉薦亦先後
一名旣而偕館真州晨夕過從賞析靡閒甲辰公成進士選入翰
林而余輟計偕之役浸久嗣後公敷歷中外余仍衣食奔走消息
不相聞晚歲偶來宜獲一晤於其家編修世講所旋別去忽忽到
今又八九年矣今年公游道山計聞爲位以哭竊念數十年來同
譜同學十不一二存論譏其人之功德而表章之繫後死者之責

屬編修代爲請傳其敢以耄老不文辭謹按行狀公姓朱氏諱陵
字紫岡紀堂其號別號石鼓山翁又號花藥山人官衡永游南嶽
後所自署也先世與晦庵夫子同祖十世祖杏城公始由休甯月
潭遷欽之浯村里王考元輅公考蔚庭公奕世載德幽光未耀乃
丕顯於公之身蔚庭公棄儒服賈僑寓吾常元配洪太恭人無出
繼配程太恭人暨王太恭人生四子公行第二江陰之西石橋其
始生地也八齡喪母哀毀如成人年十二從顧明侯先生游先生
每令公朗誦所讀書而已臥聽之屢起擊節曰吾觀子讀書抑揚
合調逆知子文之於短長高下皆宜也一藝出諸同學胥俯首弱
冠始歸應本邑試冠軍者再旋受知銅仁張公拔置府庠比古田

余公錄科復第一晉廩膳自是聯翩直上試草闡臚膾炙一時能
文名噪大江南北矣公之在詞垣也世宗皇帝方勵精圖治
意人才擇庶常中之幹略優長者試以刑名總彙故公未及散館
特擢刑部員外郎兼辦見審司事公定讞準情酌理允當上
心 上又以盛京部務廢弛遴漢司官十二人前往辦理公與焉
前後司寇洎京兆尹如王公朝恩黎公致遠輩皆雅相器重錄供
主棄多專屬公諸同僚執筆署名而已未幾擢禮部正郎 命以
升銜畱任閱三載乃還補刑部見審司郎中考選改貴州道監察
御史公之入臺也由靜海南湖勵公之薦勵公飲以酒語之曰君
今者出頭辦事矣宜先自立主意譬如案頭器皿方者難動圓者

易傾方者雖傾不踰時卽定圓者一傾便輾轉不知所止此持身
居官之明鑒也公謹佩之終身不敢忘俄協理山東道巡視北河
條陳漕務便宜三則皆 允行壬子部院保送道府員引 見公
在選 特授江西之贛州自壬子迄辛酉綰郡符十載久於其職
政又民安召父杜母之稱若出一口郡有濂溪書院院有池時值
子午水溢舊痕分寸許公曰此靈秀區也捐俸倡修顏以山靜泉
清四大字就其中延師設課屆期公親臨之引諸生環列案前評
定甲乙並授以爲文真訣文風益振起焉贛當閩廣孔道設東西
兩關以守兼攝公嚴禁吏役需索立法從寬商皆樂出其塗課日
裕每歲溢定額數千金歸諸公此亦公精於吏治之一端也中間

惟采辦銅斤一事楚受虧空追賂之累公百方稱貸遣親信出重洋購補及舟還閩辦員思攘而有之公訴諸閩督得直閩督亦用此知公後移節兩江爰有該府歷練老成循聲懋著之獎壬戌升授吉南贛道贛爲公舊治地父老兒童趨迎馬首公與慰勞如家人莅任後凡到郡縣盤查必執戲抽封躬親稱較曰彼皆父母官也輕重其手權歸吏胥則百姓有藐視官長之心而一切不可爲矣公雖勤於案牘輶軒所經不廢吟弄每視守令才具長短贈以詩歌勸規並至癸亥春贛郡院試日猝遇暴風文場覆壓死傷不下百數十人人情恟恟聚眾讙曉浸釀大變公業以溫言散遣復出示四出備述十年來矜全愛護之心及目前德薄召災之咎其

詞惻愴動人讀者皆爲流涕事獲寢其年六月奉中丞今相國桂
林陳公札諭商買補倉穀事公具覆疊疊千言末更極言每年買
補上下相朦之弊買穀必於本地派買必於富民資有餘濟不足
政體本極光明正大何如明目張膽而昌言之俾知買者當買州
縣不必情求賣者當賣富民無敢力抗從公交易吏胥不得因緣
作奸如是而政體立矣持論周詳極爲陳公所歎賞謂可方宣公
翰苑集云其他書稟文移有關國計民生者甚夥不具書然皆公
自屬草下筆有神未嘗向幕中人一假手也甲子丁封公艱丙寅
服闋補授衡永道甫抵任而所屬中四邑報水災卽日驅車往勘
且諭縣令曰災黎嗷嗷必待申詳得請然後放振疇能枵腹以待

彼汲長孺何人哉立提取帑銀按戶口給散民慶更生是歲雖災不害公賜也方公查振行次耒陽所乘竹輿杠忽折公念日來風燥所致是謂融風而衡陽多架竹爲屋尤可慮亟飛札回署諭居民謹備不虞傳諭未畢而煙燄燭天延燒且千戶咸歎公之愛民如子料事如神焉又嘗奉委查郴桂二州礦廠徹底澄清上憲皆咋舌曰如此則歷任官參處賠累不止一二人矣公曰知而不言罪滋大因指陳前人辦理錯誤按之於例實有不符而推勘其情尙非隱匿侵漁之比據實以聞訖奉部覆如詳免議而章程一定後此亦得所遵循矣戊辰移辰沅道值金川不靖調南省兵會剿取道湖南夫馬芻糧羽書旁午制撫知公才命總理其事區處

悉當閩境晏如庚午署臬篆於秋審多所平反報部無駁改者辛未丁繼母王太恭人艱回籍比乙亥公春秋六十有八矣自念三十年來典郡參藩受恩深重一息尙在何敢偷安仍俶裝赴補不幸長君暴亡中途示夢曰大人盍歸乎公驚悼決計還轅不復出自此優游林下者又十餘年公孝友性成當館眞州日世父漢馭公抱病江外卽僱館借歸抵蘇病劇僦寓延醫衣不解帶者累月訖不起封公更以允嗣質弱爲憂公禱於神願減己年以益兄算洪程兩太恭人祿養弗逮封公及王太恭人之變俱未獲親視飯舍公心恫焉每值歲祀輒捧奠長號見者莫不泣下朱氏族大丁繁譜牒久不輯日遠日忘將相視如途人急商諸族叔之居宜者

編修公父子自十六世以下次第編纂校刊成書至丁亥秋告竣
公喜曰吾願畢矣公爲人和平厚重望之巖然卽之藹然生平無
他嗜好惟以讀書著文爲性命所著有綠滿山房詩古文詞四卷
時文四卷歸田後猶爲子若孫改定課文一字未安沈思徹夜居
家食不重味衣履布素一如諸生時每日游息門庭喜招負販來
前話桑麻訪里中瑣屑事一日與賣漿翁坐語良久翁曰君家有
官方面者爲誰公微笑翁大驚曰君其是耶吾每見富家翁少收
百斛米卽不免樹立崖岸君乃能如是乎因歎息而去客歲公壽
登八旬親朋將製錦稱祝固謝曰某莅官數十載從不以生辰語
人人亦絕無知者贛州士民姑以四月初八佛誕日扶老攜幼膜

拜佛寺中爲使君壽今老矣敢失本來面目乎蓋其高致若此嗟乎易稱君子之道不出處兩端如公者初以文學成名繼以賢勞奏績終以耆年碩德模楷鄉邦揆諸古人出處之宜難并美具斯可稱當代之完人也己公卒於乾隆戊子距生於康熙戊辰享年八十有一歲配吳恭人有婦德先公十年卒其子女孫曾並詳家牒中不贅

右傳儲掌文撰

馮祖悅

嗚呼此故中憲大夫廣東雷州府知府前整飭洮岷兵備道甘肅
按察副使代州馮公之墓始公由戶部郎舉堪任道府引 見得
陝西甘州府知府 陛辭請訓 世宗憲皇帝大賞異之 特賜
御書及貂皮湖筆紫金錠諸物越四年以公事吏議當降調總督
劉文恪公等奏請畱公疏入 上曰馮某老成諳練係朕記名幹
員不特應畱府任卽道員亦可用之卽照所請行劉公奉 詔驚
歎曰 上眞知人 今上御極之十六年 車駕幸江南公時爲
蘇州同知執事 行在一日宮門出片紙書公與掣鹽同知李某
名傳問總督黃文襄公曰兩同知居官孰優文襄以公名對因有

雷州府之命益聖人在上酌民言而飭吏治一改唐宋明重
內輕外之陋雖萬里之遠若在堂闈治行善否無異燭照數計而
如公者亦可謂能舉其職者也公幼能文年十七遊京師貫順天
籍爲諸生已而改歸本籍中雍正元年恩科鄉試明年成進士
又二年補戶部江南司主事遷河南司員外郎奉命典陝西己
酉科鄉試得人稱盛其任甘州也西陲方用兵羽書旁午公星夜
馳之官經理糧運無乏軍器手自料檢皆中程式嘗被檄攝甘山
肅州安西三道所治道里去府回遠公來往其閒百事皆舉一時
綰四印未嘗稍形竭蹶也乾隆三年遷平慶道按察司副使次年
調洮岷道洮岷番夷雜居轄土司二十四屯田茶馬任劇事繁公

以誠信待物在官三載不名一錢及以事聖吏議得 旨送部引見將行土官屯軍追送多泣下者以父憂歸里復丁太夫人喪葬祭如禮服闋吏部引 見卽 命往河南補陳州府知府陳地窪下多水患公甫至值霪雨卽周歷屬城相視隄防至西華之青龍隄水大至隄且潰眾洶懼勸公避之公曰官去民將安恃下令敢有走避者罪之親率人夫守護城賴以完府城故有絃歌書院七邑生徒肄業其中公爲延名師課之暇日則親往校其文藝之優劣而獎厲之諸生之秀俊者咸聞風而至由是文風甲於中州以失察屬吏被劾左遷江南蘇州府督糧同知吳中估客所集督糧主徵比逋欠前政或持兩端爲利案日以積公至飭吏胥取累年

故案立爲決之無敢干以私者其治雷州也海濱蠻獠多不帥教
公能以誠信化之遂溪民韋甲爲仇家所誣以姦殺事巡道某力
主之獄已具公審得其情惻然曰典郡之謂何殺無辜以媚上司
吾不爲也卒改其讞大計舉卓異第一未及入 覲以疾卒於官
舍春秋六十有四時乾隆二十年六月十九日也啟其槨無百金
裝巡撫以下咸歎息厚賻之公仕宦三十餘年宅心忠厚未嘗有
疾言遽色嘗題座右曰居官求有功無過無過便是有功始在郎
署有能聲及出典郡以治行受知 兩朝官雖不過四品然當世
數良吏者必屈指及公昔人著官箴言私罪不可有公罪不可無
公前後屢絀吏議起而復躓然未嘗有一私過也此可以爲賢矣

其居家孝友撫孤姪若己出叔弟某嘗知金壇縣能官客死江南公哭之慟遂得左臂偏枯之疾卒以是至不起公諱祖悅字鍾冀別字敏齋先世有諱盛者自山東壽光縣遷於代隸振武衛軍籍皇朝雍正中省諸衛改隸州縣今爲代州人曾祖如京廣東左布政使祖雲驢康熙丙辰進士翰林院編修禮科給事中父歷康熙辛卯舉人刑部四川司主事公始娶繼娶皆李氏女兄弟也三娶亦李氏皆 誥封恭人四娶張氏生子三曰鄧乙酉選拔貢生曰郝廩膳生曰邵國子監生五娶戈氏 誥封恭人生女子二壻夏邑縣舉人武潢國子監生徐天駿初公在甘州恭遇 恩詔時張夫人主中饋例得封願讓封前妻曰前人皆與君共貧賤且無

子可無以下慰地下乎由是三前妻得並贈親鄰皆賢張夫人云
孤鄧等卜某年月日葬公於某鄉某原先期來請銘銘曰

稽古治行大小馮君代郡之馮豈其苗裔耶自左布政而下多以
方面績聞堂堂雷州名達 至尊當世以爲殊遇何治之循而數
之屯井棹旣安以利嗣人千秋兮萬歲知有賢二千石之墳

右墓誌銘錢大昕撰

劉良璧

張奎祥

張九鈞弟九鎔

劉良璧字省齋湖南清泉人雍正甲辰進士歷官福建連江將樂龍谿知縣俱著循績洊升臺灣道臺灣孤懸海外易藪盜自朱一貴亂後反側未靖漳泉惠潮之人寄籍分黨每械鬪聚眾輒以萬計將士不能彈治山後生番亦時出剽掠良璧狀威猛而清慎強明能以恩信馭眾在官數載令行禁止臺人畏而敬之丁艱服闋補興泉永道以老乞歸年八十餘卒同時張奎祥字星五華容人雍正己酉拔貢 朝考引 見授遷安知縣辦軍需公私無累貿易出關苦弁役勒索請給引驗放奸無所施調繁撫甯洗滌沈冤升滄州知州抵任嚴包納緝奸匪修河防民號所築曰張公隄擢

同州知府下車更始卽懸一聯以自做云爲可以對天之事存無
欲害人之心潼關屯衛分隸各州縣地遠戶繁轆轉爲奸利乃請
折色分隸本處徵收華陰方山河久淤遇漲害民田畝爲疏濬數
十里又請豁免朝邑東灘地額糧萬餘金又請移置丞佐彈壓諸
處皆中機宜因旱徒步陟華山危巔三禱皆獲甘霖調西安府釐
剔奸弊大金川軍需旁午儲備無乏署漢興道漢中地通川廣客
籍租稅土著包輸請勅立里戶自納積弊頓清旋授開歸陳許河
務兵備道黃河衝溢風雨夜中往來防禦卒保無虞修河北陽武
潰隄民利賴焉署河南按察使以方正忤時罷歸生平尤慎用刑
在深澤白廩生趙某同妾毒妻之誣在同州有蒲城王姓幼女夜

半身死白其孀母連氏謀殺之誣偃師有仇誣逆案活張天重等
數十人羅山生員閔馭民被仇誣以不軌出之於獄各立祠以祀
張九鈞字陶萬湘潭人父埴雍正癸卯拔貢選教職不就九鈞癸
丑進士累官刑部郎中遇疑獄多所平反歷任直隸天津清河浙
江溫處江南驛鹽諸道所至有聲因公被議歸乾隆二十二年
南巡九鈞獻詩 詔復原官 賞緞二匹子世澤進士沅州府教
授世淦拔貢臨武教諭弟九鎰字權萬乾隆丁巳進士選庶吉士
授編修洊歷少詹事出爲南汝光道再補川東道嘗發屬吏知府
某侵蝕夔關額稅狀大吏嘉之尋乞歸

右傳李元度撰

顧贄 侯嗣達

顧贄字敬輿江蘇無錫人祖岱杭州知府父起佐性絕俗嘗從宜興湯之錡講學贄雍正二年進士由編修改御史擢山東督糧道運丁積壅舊欠山東爲最至二萬石有奇故事交存贏米官給半價贄請倉督以贏抵欠以半當全由是銷欠幾及二萬石緣事降補重慶知府重慶屬有趙姓二悍役脅人錢致夫妻母子四人死州吏當其怨家罪磔贄廉其冤訊得實以所當罪罪二役州人稱快官終四川鹽驛副使弟維高才生以詩名同郡侯嗣達字爾端金匱人雍正八年進士授刑部主事由郎中擢御史進呈易經素卦講義蒙 召見奏各省保題人員毋得專尙才吏以清治源報

可外擢湖南衡永郴桂道撫治苗疆規畫有方移福建汀漳龍道以迴避改浙江甯紹台道卒於官

右傳秦瀛撰

莊柱

乾隆二十四年夏六月丁巳武進莊公卒於家子往哭之過時而悲及冬會葬望其廬歛歛流涕彷彿其生平昔東坡於少游之死歎世無復有如此人今莊君歿子亦云然始子與君爲同年友偕謁座主沈端恪公端恪當代名儒以正學導後進見君恨相得晚君平日以躬行實踐爲本愛人利物爲施爲庶吉士同館推博雅願獨不自喜方是時 世宗憲皇帝擢用儒術稔知君有才出君爲大興知縣先是君以雍正三年考取內閣中書引 見 命以知縣用君自謂不可以民人社稷爲學歸而讀書於天甯寺中三年至是以詞臣尹首善地人於是覩君之設施而仰 憲皇帝之

知人善任使也君爲縣一本樸誠甫下車卽約束吏胥毋擾民有所廉察單騎至左右莫能偵或訴道旁卽剖決遣之不使涉公庭每論地方利弊興革所宜洞悉周至無不見諸實事縣舊供羊草歲數十萬積數任皆以虧帑獲譴君請於戶部歸奉宸苑辦理旋奉旨給銀一萬兩貯縣以備公用人謂君遭遇獨幸不知其誠有以致之也雍正十二年九月授温州知府初莅任問民疾苦卽言於總督曰溫民土田外惟恃魚鹽自鹽法壞而民困倍輸雖不能驟議變通宜以正課外滴耗畱備荒歉玉環有魚稅有梁稅宜免徵塗稅以省重科溫與括蒼相接三百餘里中徵稅三雙谿離溫遠非名鎮市集有貨物可徵宜槩予裁革樂清自清丈後增額

十萬餘畝燒塗之田照上則科徵宜酌蠲以紓民困時雖未盡施行而免稅減糧數大事至今賴之乾隆二年秋風潮害稼君議陳四事一暫通海運一借鹽項餘銀買米以振一停買穀還倉一以鄰近倉穀通融轉輸大吏以爲迂旣知不獲已悉如君所請行濱海土田以塘隸陡門爲捍衛時大半毀壞因寓振於工全活無算於斷獄多所平反永嘉縣民傭於人代主家認辜抵死君廉其枉再三諭曉其母始泣下以情告乃坐其主而出之樂清縣役誣武生某行竊斃其命以拒捕自死報君證驗反覆遂得實其矜疑察冤多此類乾隆四年七月 上以公治最有聞授浙江海防兵備道時撫臣奏築尖塔三山海口君親詣相度謂沙勢坍塌漲不常速

則易塞緩則難成在多鑿石多集船功可立俟於五年二月興工
日夜勞來役人感其誠咸盡力洪濤際天斧鑿聲相應不三月工
竣用帑二萬餘兩魚鱗石塘尖山壩工與凡隄防之以時修理者
區畫至悉迄三載鬢髮盡白疾作請解任大吏勉留之不可君之
待下也正己以率積誠以孚其事上官也從則歸美如不及不從
則默自咎當孫文定公爲順天府尹以屬吏白事侃侃直陳相得
無閒越數載文定特舉以應 詔謂實能以愛養百姓爲念者此
可謂知君矣家居十數載敦本睦族爲鄉人矜式令子伯仲相繼
及第同時出典試同乞假歸省海內榮之君處之泊然惟勉以竭
誠報國而已君最善書詩文亦有家法彙成輒散去素以炫名爲

戒遊藝之工非所尚也予以姻戚通訊問聞一往來談論輒移日於當世吏治之得失尤惓惓致意焉卒之前一月予往視病猶握手慰勞如平生不一月而赴至矣予能無慟乎哉君諱柱字書石雍正五年進士生於康熙二十九年年七十先世自金壇遷武進曾祖諱廷臣明萬厯中進士官至湖廣左布政使祖諱鼎鉉父諱絳皆以績學敦行聞於世乾隆元年 贈如君官祖母毛氏前母陸氏母董氏竝 贈恭人妻錢氏 封恭人子二存與官禮部右侍郎培因官翰林院侍講學士後君一月卒孫四人孫女九人今以十二月初二日葬於德澤鄉林莊之新阡銘曰

惟古於仕以行其學措正施行猷爲卓犖君在玉堂羽儀鸞皇牛

刀一試聲譽騰驥考最分猷載瞻熊軾不染脂膏好是正直御
屏首列宣力有爲眾人之母慈惠之師刻章具在式茲寮案好爵
莫靡急流勇退君於友朋款款心傾士馨其德眾孚其誠曰仁曰
恭唯德宜壽何數之慳而施不究幽宮早閔馬鬣加崇鄉名德澤
廣畝慶鍾丸丸松柏堂封孔固佑啟後人來章有譽

右墓誌銘彭啟豐撰

王葉滋

當雍正之元年 憲皇帝開明史館詔舉諸生有文行者偕翰林
臣爲纂修官相國朱文端公首薦君品行端方詩文工敏引 見
稱 旨遂錄用時甫逾四十先是公撫浙延君教子且商軍國重
務公內升出振山陝咸與偕故深器君可大用及在史館舉京兆
試會今相國福公亦撫浙遷楚督 上命君往贊其幕丁未禮闈
甫畢試 召見 上親詢全楚吏治民生利弊奏對詳晰大說謂
幕府需人可速馳傳往迨榜發有名未與殿試 特恩賜二甲進
士立授常德知府常德衝繁大郡例新府至各行戶換照入四千
金君革仍前照或言盍啟臺司充公費君曰歸公必按歲徵納累

民多一正供矣勒石著爲令值水災潰防沒禾親履勘修築三月
而完固至今賴焉上游爲辰州有關稅木時建議移關常德君恐
累民請仍舊制不以綱七百里木稅爲利革役十餘人繆爲公差
駕大艫泊湖江閒誘估客博塞以漁利復使其黨繆爲巡役掩捕
之飽欲始釋君廉得其跡實之法杖殺府役之窩盜者其行法雖
豪貴犯者不貸而題旌沅江民之八世同居者以礪俗保舉優行
生員爲邑令咸得人興學校資厥膏火捐俸以免武陵之因役食
銀而株逮無罪者連攝岳辰二府岳常道篆政聲如常德居六載
擢分巡辰永靖道駐鎮筸苗疆初闢君至清林箐增汛堠規模肅
然而所轄綏甯城步大牙黔省兇苗不靖相讐殺君率數騎持酒

肉鹽煙循行苗砦苗人歡迎謂上官親我因召諸頭目集校場賞
花紅銀牌宣 上德勸以禮義同鎮臣大閱武耀軍容羣苗帖服
善按察使秋審畢實授糧儲道各屬解送漕費例二千金君悉以
歸公黔苗方蠢動大兵進勦軍需急君馳駐辰州飛芻輓粟刻期
而辦綏甯苗應黔爲逆君條狀苗疆事宜皆中大吏指悉以苗事
委君而乙卯丙辰科連提調鄉試出關卽赴綏甯節制勦苗文武
員弁王事馳驅三年中無煖席忘其勞動也俄觸嵐霧致疾尙力
疾視事山僻罕醫藥遂於乾隆元年十一月三日卒邸舍年僅五
十有五君少失怙恃以兄爲師弱冠籍諸生試高等家貧授徒教
其子弟門弟子先行誼後文藝族黨咸迂之曰焉用聖人後卒薰

其德其學有體有用措諸經濟恢恢也故倫物修於家治化施於邦歷任十年未竟其用朝野爲之惜博雅工著述古文詩賦儷體備古作者陳朝雙檜賦孔雀賦皆傳誦君諱葉滋字槐青號我亭華亭人高祖明時明萬厯進士河南按察副使祖鍾彥明天啟舉人工部員外郎死難無子弟之子玉鉉嗣痛父殉國終身不仕生五子師旦康熙進士穀城知縣師曾舉人君中子也事庶母如母撫兩弟如同母配陸恭人生五子萬齡國學生萬裕候選縣丞萬誠永椿俱國學生萬協幼君病綏甯時齡裕皆鄉試椿自幼撫於君舅氏未隨任獨誠侍適命往武岡置軍器待其歸而後瞑諸孤歸散數千里外擇地至乾隆十年三月某日葬於華亭千步溼之

原以予昔同事明史館乞文其墓石不得辭銘曰
始也謀道於經畬終也敷政於蠻區 聖君賢相爲知己而未嘗
所發據籌國訓家遺命當何如而不違訣別其諸孤禮曰以死勤
事又曰勤其官而死者與神翔於虛魄歸於墟賦命有盡積慶有
餘八尺之墓大夫其居縣千百載其在斯乎

右墓誌銘黃之雋撰

宋壽圖

公諱壽圖字南衡先世居河南洛陽始祖諱勝二當宋南渡時扈
謁至蘇州家焉隸長洲縣曾祖諱學周府學生弟忠烈公諱學朱
明崇禎中官雲南道監察御史巡按山東守城死是爲公本生曾
祖並 贈光祿大夫太子太傅文華殿大學士祖文恪公諱德宜
官文華殿大學士兼吏部尚書父諱大業官內閣學士兼禮部侍
郎公生而敏慧九歲能作學窠大書年十餘學士公卒已而母彭
太淑人亦卒服闋後外家王氏爲援河工例得通籍雍正五年選
永平府同知公才氣卓犖熟於世務每遇事當機立決無少滯甫
抵任奉檄查北五府驛站時夫馬多缺額輒臨事雇募強取民間

畜以應公至先覈夫馬實數次革濫應折給之弊民困得蘇尋調繁真定時天津初設水師營造戰艦募工於浙三月集事且令教肄津民其後歲修戰艦不煩遠募迄今使之京東大糧大望諸官田數百千頃豪猾倚勢爲奸貧民不得佃公白其弊於上官盡徹去之雍正十年攝廣平府事決獄多平反題授知保定府案牘填委應時立辦凡上官所指授心有未安必反覆力陳得請乃已十三年擢分巡清河道未兩月調通永通永木稅向無例榜至是設之視太重者減之量汰額徵充餼銀者以益課商民賴其利公嘗閱視河工以爲治水之道在於蓄洩得宜今潮白溫榆諸河之水由密雲順義徑北運河以達天津白溝兩淀之水復從千里長隄

合子牙河由天津入海聚多洩少鮮不橫潰因於筐兒港青龍灣
二處詢耆老具方略疏洩異漲加築壩工乾隆二年六月大雨河
西務北隄且潰公急出錢二千緡募民築新隄躬負土爲倡畚鍤
雲集甫成而舊隄潰微公民不得生是秋復苦澇竄抵諸邨尤甚
公覈災民以十三萬戶口報上官詰責頗切公力爭乃許公素性
慷慨遇事侃侃無回互爲同僚所忌自願就簡以避之 上知其
才特調往雲南補迤東道督濬金沙江勞績居最十一年計典卓
薦十二年金川用兵往軍前總理臺站兵罷乃旋公之在滇也撫
循邊徼以甯靜爲治尤自刻苦家無餘貲尋有疾卒於官年五十
有一後半月奉 命遷按察使公已不及聞矣悲夫公配王淑人

子三景玉河南歸德府通判英玉直隸通永道昆玉山東分發縣
丞女六人兩適武陵知縣蔣耀宗一適湖南蘇谿巡檢鄭士烈一
適秀水庠生胡兆奎一適雲南呈貢知縣唐思一適甯夏庠生趙
曰洵孫十一人鑄候選州同鎧太學生鈞候選從九品鉉太學生
鏡湖北均州知州鎔內閣侍讀錦太學生錯錕鍵銛俱幼女孫十
人今以乾隆四十七年十二月癸酉寔於吳縣和合山新阡公與
余爲中表兄弟幼相習旣通籍書問往復得悉公所施設而頗以
公未盡其才爲恨因諸孤之請爲誌而銘之銘曰

胥江之水揚漣漪章平世美鍾奇姿翱翔雲路當熙時剖決機要
斷不疑燕南趙北互地維籌畫利害如列眉方輪長轂堪遠馳天

南萬里揮旌旗垂歿 恩光沛綸絲設施未竟悲數奇魂歸仍返
五湖湄經時渴葬何遲遲和合山下歸藏宜子孫繼承福永綏謂
我悼史言無欺石有時泐銘不移

右墓誌銘彭啟豐撰

大正三十四年
三月十一日

三

張沖之

張君諱沖之字道淵一字退圃其先世由唐相曲江公弟嶺南節度使九皋至宋南軒公杖多有聞後遷宜興明洪武中又自遼東入京師遂爲宛平人高祖諱邦經用兄禮部侍郎贈尙書文愨公諱邦紀廕仕至太僕寺少卿以救楊左諸公罷職曾祖諱永貞明天啟丁卯舉人贈東克道參政祖諱宏儼順治辛卯舉人以君貴

馳贈奉政大夫父諱鈞博羅縣知縣累 贈中憲大夫妣王氏累 贈恭人君才敏立事而棘棘不苟隨雍正六年 特詔舉賢良方正君由諸生中舉者得分工部學習逾年授虞衡司主事後四年以議事被劾謫潞河 今上御極之二年蒙 恩以原官補

用十三年補刑部督捕司主事又二年遷江西司員外郎兼辦奉
天司事又四年遷戶部河南司郎中初君在工部遇事奮厲銳意
爬剔於總理果親王前持議無避忌人多憚之然君嘗言各省奏
追虧空官帑積數千萬贖宄無實爲王具奏稟請覈別豁免人不
知也及再歷郎署皆稱平恕其在刑部遇 恩詔議奉天道人悔
過分別放歸阿文勤公用君議得歸者數百戶秋讞滿洲鬪毆殺
皆情實案犯在奉 旨前者十餘人君白文勤公入奏仍緩決其
在戶部河南奏追虧空以人亡產絕爲無力產絕人存爲有力君
以有力無力惟視產之有無議駁遂爲例二十六年 特授河南
南汝光道是年秋河決楊橋 上命劉文正公姚文襄公往塞之

君以舊屬襄事時徵糶積價騰至一莖兩錢既大集河員猶以多
備請地方吏在事者附響和聲多口一詞君慨然曰計工需料若
千萬今已窳矣災民搜脂髓來供用忍復乘以爲利耶亟白二公
請及時榷塞期以某日合龍仍當餘料若干萬二公與巡撫胡恪
靖公覈議君復力持之卒絀眾議聽君減徵秫稻六千萬麻六百
萬卽以君董其事果如期合龍仍餘料若干萬君復請殫數給還
以紓民力胡恪靖公喜曰吾爲 國家得一良總河矣劉文正公
遷向南書房同直諸公亟稱之逾年胡公卒又二年竟以所屬商
城縣獄坐徇庇奪職效力軍臺逾年始克歸君之在南汝光也治
所屬羅山縣獄活誣服者四人紳士捐修城工覈減務實有司不

得緣爲蠹人至今德之君娶柴氏 封恭人先君一歲卒子三模
乾隆壬申進士今候補郎中桓四川重慶府通判先君四月卒柴
尙幼模桓皆柴恭人出女二其一早卒孫七光熙庚寅舉人光烈
拔貢生中正光然中達皆諸生光熊光煦女孫八四已適士人曾
孫一喬齡曾孫女三子初爲翰林時君方待缺居間子同年朱東
江授兩郎君舉子業嘗邀子與君賦詩爲歡及君起再躡長君由
翰林歷郎官督學廣東以事降調次君亦由川假歸而東江已棄
世惟子以衰病時相過從然亦不復論詩矣次君之卒君亦病謂
子曰我死幸爲銘未幾君卒實乾隆丁酉十月壬寅年七十有七
十二月庚申長君模以君合葬於蕭家村之新阡來告子哭而銘

焉銘曰

遄車駟驪稅於方輶既牽以馳夷行復殿馳或推之殿或摧之所
值則然誰使爲之有蔚於繼善既胎之筮宅兆吉我銘俟之

右墓誌銘寶光甫撰

國朝詩林卷之四十一

七

鹿邁祖

公諱邁祖字紹聞定興鹿氏始明監察御史久徵有直諫名久徵
生明熹宗時嘗營救左魏諸君子之難天下稱爲鹿太公者也太
公生太常少卿繼善殉節死諡忠節忠節子曰化麟舉鄉試第一
居父喪沒人謂之孝子孝子之子諱盡心公之曾祖也爲安邑令
公祖諱賓仕 本朝爲陝西道監察御史考諱聖權 封奉政大
夫公雍正八年庶吉士授編修以四川北道按察副使罷官乾
隆二十九年十二月十四日卒於家年六十夫人王氏先卒子二
琪廩膳生次預早卒以乾隆三十二年某月日葬公及夫人於江
村祖塋之側銘曰

鹿氏在明忠孝久稱有肖無替累以世嗣魏副使公彪文纘質始
作詞臣究通經術匪曰能言而允行之以學事君在心不欺命
作御史有辭審審君子所予小人所懼巡察 帝城周閱殷廣閉
杜謁言按耶伐黨給事於中掌禮吏科審較牘奏詳而不苛轉運
奉使湘湖之南羣吏放手民則弗堪覈正斗角公以躬監正稅罔
廡誅責貪恠有盜殺人吏論如法撫軍卻之謂不當執罷按察使
而令公攝將飢律令意授威愾或旁諷公公曰不可佑賊詭正甯
禍及我言忤上官解其柄持改任川北畀以疲羸親入山林掘盜
根株哀問民生慰恤瘠枯直時軍興征金川醜以馬濟軍百城交
走或應於前而乏於後歸罪邑令大吏藉口公曰憊矣非令之咎

予以身任遂遭彈奏吏籍其家做几故書怨嫉之徒媿感嗟吁
詔荷公校以重軍罰大吏憐公勸公私脫公曰 詔乎脫余則爲
苟非 君命敢奸以欺卒朝夕荷西師隨罷既有定功公亦蒙赦
公之在官疑疑剛毅公之在家愉愉孝弟歸遭父喪以毀受病秉
道終身卒斃於正有懿夫人飭身約己佐公清節誼不爲侈同穴
江村高墳每何我銘直諒以厲婢姍

右墓誌銘姚鼐撰

國朝書獻類徵初編卷一百十補錄

監司六

李根雲

李根雲字仙蟠號亦人趙州人康熙戊戌進士歷官江西驛鹽道
公任檢討及比部時屢典文衡及出守青徐二郡司榷兩淮備兵
頓饒調驛鹽道所至有聲七旬謝病後僑寓武昌內轉光祿寺卿
辭不赴詩文於脫棄後不復取視浮沈江表者幾二十年凡五監
秋闈昨舟泊南昌循卓之聲尚在人口望山相國香樹司寇交重
之

右漢繫小傳師範撰

--	--	--	--	--	--	--	--	--	--

國朝耋類徵初編卷二百十補錄

監司六

盧見會

乾隆乙亥暨丙子之仲夏兩淮都轉運使盧公修治揚州新舊城溝道既成或曰城外地勢高於城中恐不能泄爲害甚於故或曰溝牆不容水土壤輕脆善崩後必羨溢之二說者傳於民間民亦以是疑丙子夏秋大雨時至廬舍皆按堵行於塗者曠然無墊隄之憂明年丁丑時雨至復然於是議者始息而民大悅揚州故瀕海土薄水淺經塗之溝壅塞不行及水潦爲敗巷街成川居者支鼎而鬻行者繇帶而厲湊潤上澈民病溼氣壓覆於頽垣壞屋者

履矣公懲是苦奏記巡漕使者普公開浚溝道以爲一勞永逸之計普公然之慮事一委於公公思淮揚城外環堵皆運河河水貫城南北水門相望城中窪地通水水隤以絕河年久淤塞故有是患異時修治或商或吏委之商則費不貲委之吏則功不繼計功費約省莫若屬役於吏而使商督其成乃檄甘泉主簿李元植典史吳載良隨運判姚遠翹共行視又合運判張廷璇州同潘榮陞知事武士熨等助之計丈數揣高卑慮財用盡餼糧姚潘主新城張武主舊城公考量櫛指授便宜當是時兩淮商人程可正等六百四十九人咸踴躍捐貲助費因命商人高保泰等二十人金蓬源等十人分課兩城之功發溝易甃堅其防出其否以馨折行

奠水以漱齧行流水卑者增之狹者廣之淺者深之有溝而固者
仍之無溝而庫者開之經始乾隆二十年乙亥十月初七日竣於
二十一年丙子五月二十七日都計所費二萬四千五百九十兩
有奇成工之二年溝皆通利百姓安之公於是爲善後事宜六條
請於上官俾有司歲修政事歷久無患嗚呼公承普公德意而爲
此嘉惠斯民之舉其慮事周矣屬役當矣指授既極其詳工程復
卽於固而不知者猶鯁鯁焉議其後旣久而公之績始著而公之
心彌白向之議者咸翕然服以此見任事之難而功施於民之爲
不易也周禮曰民功曰庸然則普公與公之設施其庸多矣都人
士謂宜壽之樂石以告後之人俾知所遵守而爲民生之是賴公

謂分任之勞捐資之惠不可沒也并書姓名於碑陰垂之永永云

右修治揚城溝道碑記嚴長明撰

國朝耆獻類徵初編卷二百十一目錄

監司七

金溶

方浩

方桂

金允彝

徐聚倫

谷確

張惟寅

龔學海

楊輔臣

魯之裕

王鏜

張紹渠

沈榮昌

陳夢說

干從濂

梁兆榜

王啟緒

顧光旭

劉宗琪

周璣
方應元

曠楚賢

沈業富

周克開

盧謙

衛詣

翁耀 張經田

陳守誠

補錄

彭端淑

周於智

梁兆榜

陳琮

國朝耆獻類徵初編卷二百十一

通奉大夫前署江西巡撫江西布政使司布政使湘陰李桓輯
監司七

金溶

金公諱溶字廣蘊順天大興人雍正八年進士以刑部員外郎主
試貴州擢山東道監察御史性忠純梗亮嶷嶷自立乾隆元年
皇上求直言公上培養元氣疏其略曰國之所恃者民民之所恃
者養養則安不養則不安是以有天下者必以安民爲急務 本
朝太平久生齒日繁金饑木穰之災間或有之近年來陝西地震
江南水災 皇上如天之仁屢發百萬帑金賑濟恩至厚也奈鄉

曲窮氓 君門萬里夫必能盡達於 聖聰幸而達矣而蠲賑之
下逮者不無遺漏臣以爲補苴於旣災之後不若保護於未災之
前臣所願者有五事焉一日開墾之地緩其升科二日帶徵之
項宜加豁免三日關稅正額之外免報盈餘四日州縣殿最首重
民事不以辦差爲能五日 巡狩之地崇尚樸素不以紛華取媚
我 聖祖仁皇帝澤被八荒民到於今謳歌思慕所以然者在散
積聚以充編戶輕珍玩而重人才 世宗憲皇帝遺詔云凡各
衙門條例有本嚴而朕改寬者此從前部臣定議未協朕登極後
斟酌改定以垂永久嗣後應照改例而行若例本寬而朕改嚴者
此乃一時整飭人心權宜之計俟諸弊革除後當仍照舊例而行

大哉 王言其爲 國家培養元氣至深且厚伏願 皇上敬法
祖宗事事以厚生爲急時時以國本爲念則社稷之福蒼生之幸
也當是時 上命翰詹科道各進經史摺子公又以損上益下之
說進謂頭會箕斂以裕囊橐者匹夫之富也輕徭薄稅使四海咸
甯者天子之富也易卦損下益上上益矣而反名損損上益下上
損矣而反名益蓋謂百姓足君孰與不足百姓不足君孰與足此
聖人制卦之本意可深長思也乾隆九年湖廣總督孫嘉淦因扶
同撫臣許容事部議革職奉 旨罰修順義城公上疏云賞罰者
人主御世之大權向例臣工有罪於應得處分外有罰鍰一項因
其素非廉吏褫職不足蔽辜是以罰令出貸效力使天下曉然知

所得者究不能爲子孫身家計故也今孫嘉淦歷任以來其能否優絀臣未敢深論至其操守不苟久在 聖明洞鑒之中亦中外所共信也今罰令出賞效力似與用罰之本意有所未協於國體不無少損恐天下督撫聞之謂以孫某之操守尙不免於議罰將來一不得當而罰卽相隨勢必墮其廉隅預爲日後受罰地步是罰項行而貪風從此起不可不慎也雍正七年孫嘉淦爲直隸副主考臣爲所取之士不敢避師生之嫌而隱默不言奏上部議革職未半年 上特旨起用爲福建漳州府知府漳俗強悍胥吏干餘交結大府家奴勢力出長官上有吳成者設局誘羣少年淫博聞擊卽竄公半夜開門出召徼巡三四輩突入其家擒治之合城

歡呼鄉有華對村離縣二百里民納租赴愬皆不便康熙開太守
某請設縣丞駐其地督撫批准至公到已四十餘年尙未具奏詢
其故以設官則胥吏無權故爲所格也公再具詳又爲藩司所駁
文書不下府而直行縣公大怒嚴訊縣胥得其交通狀乃詳請治
罪而設官對村至今父老歎曰微金公來我輩將奔馳道路死矣
乾隆十三年春閩省旱斗米千錢大府檄公平糶公計府縣所貯
穀止十六萬石而新穀登場尙早慮其不繼乃先勸富家出糶給
印紙令商人赴糶於豐收處又請寬臺灣米入內地之禁一面開
倉出糶而羣穀畢集民情帖然其他修文廟樂器增書院膏火皆
次第舉行前明燕王之變有漳州陳教授某率諸生六人殉節明

倫堂舊祠蕪敗公葺治歲祭以黃石齋先生配享焉十四年遷臺
灣道二十一年補陝西鹽驛道署布按兩司事二十九年調浙江
糧道與巡撫陳學鵬牴牾奏其迂緩不任事以原品休致在家十
年而卒年七十三子四人

右傳袁枚撰

方浩

方君諱浩字孟亭桐城人也其尊甫樺坡先生家世行誼既有銘君生而沈毅不與童兒共嬉遊及長讀書爲文章駿發有氣中雍正八年進士初知太原祁縣調陽曲遷保德州又知隰平定二州遷知蒲州府移守潞安擢江西廣饒九南道按察副使旋調吉南贛道因公有誥循例復職方需次吏部而以乾隆十九年七月十八日疾卒京師邸舍年五十有二君之莅官臨民嚴而不苛和而不可犯既去而民多思之不置其在隰也隰民以茹素爲羣羣數百號爲大乘教君悉召至庭而啖以酒肉人莫知其原其後逮捕大乘黨人連數郡而隰民獨免金川用兵平陽富民願輸餉而旁

郡效之者甚夥君獨以潞安地瘠民貧不爲報會 天子巡狩中
嶽取道澤潞而民田之近接道旁者吏輒令薶去青苗以俟君獨
以 鑿輿未出而廢民耕作非爲上愛民之道令耕如平時民得
以收穫而事亦辦治蓋君之仁愛自其天性不待疆而能也其在
平定州值天旱奸民扇眾譴呶求糶穀君不爲動升堂坐取獄中
他囚惕以威其被驅脅者多逃散君乃徐召奸民慰諭遣去而明
日陰捕渠魁一人論如法其餘眾悉置不問在廣饒兼攝九江府
事歲旱而米商未至洪州乏食大府檄屬郡悉運倉糧往濟君以
郡民咸待食而移粟他往恐生事請獨輸九江倉而屬縣停運比
違大府意未幾安仁以阻運罹重罪罪及守令大府乃以此重君

旋有吉南頓之調南頓自前世多不軌之民依山澤爲患害而上游奸民據險爲亂君聞卽馳詣捕緝比大府至而謀主已就擒訊實置之法蓋君之明敏有所發而輒中機宜類如此君所至以振興學校爲務初在祁卽改西洋禮拜寺爲昭餘書院在潞安捐俸爲倡以葺新郡學其在江西復聘名儒爲白鹿院長尤篤於親親嘗推先君子之愛以事諸父諸姑及從兄弟又推太夫人之愛以事諸舅從母及外兄弟其族屬姻戚故舊之貧不能娶久喪不能葬及羈窮以死而不能歸者君皆爲之區畫必得當而後已噫可謂能人之所難者也君娶吳氏子二人相梁相正女二人長適姚芬乾隆庚午科舉人今知陝西靖遠縣次幼將以某年月日葬君

於某鄉某里某原其兄漢來請銘銘曰

允矣君聲殷雷碾羣駑聚處靚肅爽兩驂縱轡馳康莊睨者伯樂
御王良彼駑瞠目遙相望羌獨絕塵氣揚揚忽蹶不復中道僵時
值晦塞久愈光有如不信視銘章

右墓誌銘劉大櫨撰

方桂

府君諱桂字友蘭號雲軒姓方氏湖南巴陵人父顯廣西巡撫裕
釗嘗爲之家傳既詳其繫世矣府君以雍正壬子舉於鄉從巡撫
公平貴州苗議敘隨帶軍功加二級巡撫公卒既除喪引見以
知縣發廣東權會同縣補英德兼權曲江調潮陽以大計卓異引
見賜朝衣一襲擢雲南昆陽州權安甯晉甯兼攝易門縣事復
任昆陽乾隆二十年詔疆臣舉可任知府者雲南大吏交章薦
府君擢臨安府知府權澂江調東川遭繼母憂去官服除授甘肅
鞏昌府知府調蘭州遷浙江甯紹台道入覲賜朋黨論拓本
一貂皮二紫金錠一香珠一三十三年以估船事獲罪戍伊犁三

國朝詩林卷之四十一 監司七

十七年 召還五十一年卒於家後以子貴 贈中議大夫府君
爲吏熟知民之利病而精察吏事其仁民如其骨肉然聞有利於
民竭力就之如不及民所不便必釐剔而更張之長養其羸弱而
鉏其暴強者奸吏蠹役豪黨根株痛斷小民咸得其處故所在以
治安甯惡民楊珍暴橫閭里虎狼行前數州牧莫敢誰何者府君
捕至痛懲之安甯人人額手誦府君其後府君再至有遮道先迎
者問之楊珍也則已改棄宿惡稱善士焉於是知府君之治革暴
頑矣府君始官廣東洊歷雲南甘肅先後治縣四州三典郡五所
至有聲績循良聞於天下其遷甯紹台道入 覲至京師也宰相
陳文恭公迎而亟問之曰君在甘所施設何而舒司寇稱之亟也

先是甘肅平涼慶陽鞏昌三郡大饑 詔例賑外展賑二月撥西
安藩庫銀六十萬濟之府君以蘭州知府奉檄往故事首郡不外
從役總督文襄公舒赫德以謂賑饑至重也非方某故莫能任此
者至平涼數日西安餉未至民待食急會部撥城工銀三十萬過
平涼府君則以便宜輒截留主者難之府君曰今日之事猶救焚
拯溺也苟獲罪某專執其咎饑眾卒賴以全文襄公聞則大以爲
善具以其事對文恭公歎息久之曰司寇之言爲不誣矣其在官
尤長識獄潮陽俗故健訟始至宿獄山積府君日晨出坐堂皇決
獄日晡乃飯飯已復出四鼓猶未寢不數月宿獄二千有五十一
刮剗絕世所未嘗聞也英德民有爲何人所殺者賊不得而有遺

刀其旁府君悉集鐵工示之刀問得造者主名捕鞠壹服船人以
舟中買客入城遂不返不知所如往告請捕治往檢買客物皆自
若眾謂船人無與也久之得一尸帽峯山下腐不可辨識腰乃有
繫鑰以試買客篋鎖牝牡適相合知爲買客尸矣終不知賊誰何
府君諦視良久曰買客船人殺之也帽峯山居縣城北若尸從城
中來當北首今尸南首是自舟中來晰矣以訊船人立吐實它發
奸摠伏如神多此類然當時士大夫尤重府君能急惠利達權衡
遇事能擔荷有古名臣風烈請折獄其餘事云子應清山西雁平
兵備道有治績應任應和皆貢生應綬縣學廩膳生應綸浙江鹽
運使後嗣多以科第仕宦顯者

論曰所謂估船事者故事定海營防海戰艦三歲一修六歲再修
尤歲則更造其故船移致甯波船廠取其值輸之官命曰折變一
船例爲值六十四金有奇時有趕艚船二水艚船一盡九歲尙頗
完議復展三歲及三歲當折變矣會奉檄裁汰戰艦裁汰例諸未
及年限船以時值定估無成數府君謂三船雖已及年限而適會
裁汰令下宜用依時值估例增倍之爲百二十四金有奇事上大
府慮不實命提標中軍李國樑往會估復增倍爲百八十五金有
奇大府以爲可許之奏銷入部議駁以聞 上詔浙江巡撫更遴
員覆估巡撫某以某遊擊往遊擊候邪人也利其事頗動作以怵
府君或謂府君宜少通意府君曰是事吾自問故無他若以賄行

是無罪而有罪也不爲動遊擊恨焉歸搆之巡撫估值驟增三百二十三金有奇逮府君對簿府君至曰會估爲李國樑若某有利於此國樑必與焉否則豈甘爲某隱代人受過者直問此事一白矣巡撫爲弗聞已乃一掃滅去會估事而以短估劾奏府君由是獲罪戍伊犁府君故尤以廉節著稱前後所莅雖脂膏沃區鄰日奸貪窟穴一不以自私英德人至以方包孝肅謂英德令唯方公不役我取一英石也其清節如此然卒被誣汗言嬰嚴譴至於困頓以終烏乎大臣不爲國愛惜人才聽用讒慝僉人而以自快其私君子之務實心實事不苟阿以徇人者安所逃其禍哉悲夫

右家傳張裕釗撰

金允彝

乾隆丁巳予寓薦主金少司寇家見其從子序倫知原守濟南被
劾歸旗貌軒偉其日與余朝夕狎宴飲諧謔相得也已而起廢外
用遂則去戊戌冬其子岳爲蜀中司馬寄信屬余銘墓余弱冠卽
受司寇恩今老矣雖其家之一雙息一童孫有所誣諉誼不敢辭
而況君與余素有撫塵之好者哉謹按君諱允彝字序倫一字懿
亭饒白旗人工部侍郎永錫公之孫宣化府厚庵公之子行六年
未三十循例得南豐縣丞遷兗州府金鄉縣知縣辦災課最調宰
蓬萊引 見時奏對詳明 世宗大悅賜餼賜豐貂擢濟南府知
府君旣世家又驟受 天子恩以才自負與按察使唐公綏祖不

相中而唐又總督田文鏡所擢用也據摺劾奏卽令唐鞠訊之考
掠至再君無款詞當是時司寇公巡撫廣西密奏此案有冤世
宗命吏部尙書劉於義刑部侍郎牧爾登會同山東巡撫岳濬覆
訊所劾果虛僅以失察書吏罷官 皇上登極召見授鎮江府同
知遷廣東南雄府知府調潮州再調廣州擢雷瓊道未半年喉痛
卒年五十八嗚呼當田文鏡柄用時一時文武大臣望風噫媚無
敢撻其鋒司寇公爲君叔父尤當避嫌而乃毅然飛章入告世
宗不加之罪竟別簡大臣爲之按覆以示大公以昭聖人之無我
有是哉君臣之際至於如此事隔數十年草茅聞者猶爲流涕而
在君當年之身受者更何如也君娶夫人楊氏生子四女二長子

岳初任廣西羅城令以于清端公會宰是邑故考其遺事刊板流傳嗚呼公之子慕善如是亦君之庭訓使然耶葬某銘曰
寶劍起矣直木擠矣危而後光能有幾矣嗚呼金君樹欒於境其忘 天子之德之仁

右墓誌銘袁枚撰

158-616

徐聚倫

徐聚倫仁和進士雍正中任衡永郴道廉勤慈惠衡人病疫聚倫家至撫摩病者立愈後不及徧至用關防帖病者門疫遂止

右傳李元度撰

谷確

谷確字隲侯豐潤人祖秉謙由舉人歷清平中牟令多異政父鵬以武科官徽州參將累著戎績公早慧未冠通經史能決疑難事尋以明經貢太學出任浙江海防同知先是海塘有數十里屢築而潰咸謂有巨龍出沒齧隄爲民害公設祭投檄卽夕於大風雨中銜尾去觀者神之繼攝德清令浙撫李衛深器之適以父喪去職邑人作清溪錄紀其政會西師大舉軍務需才李公特疏薦公幹練可用 世廟召見授保安同知公叩請終制 上曰君親一也汝其往公感泣卽日去旣抵任躬督糧馬赴軍營往來程期無誤課功擢口北道久之爲蜚語所中經都御史陳世倌等勘問無

他覆奏 今上素知公名 命改官雲南分駐開化郡顧水土險
惡番苗雜處頑獷難治公因革利導孩養馴習漸成上理安南犯
邊 朝命大學士慶復致討委公督餉安南怖求納款當遣官受
降或慮夷情險譎相顧錯愕不能決公毅然曰夷既讐伏片言止
戈可已食祿捐軀人臣分內事奚懦耶遂請行從一騎緩轡至安
南營中數其罪責以大義揚 天子仁威宣 朝廷政令示以順
逆禍福反覆開導夷垂泣羅拜誓不再悖因率其魁來乞罷兵於
是我師解嚴而邊陲以甯既而擢公普洱知府府鄰緬夷先是土
司刀某以悖逆伏誅 朝命別支承襲其孽子刀温刀先給總兵
崔善元爲奴崔嬖溺之既而二孽乞歸掃墓因竄於老撾糾合舊

黨萬人作亂崔致討不利落職適公莅任憲檄領兵往剿公不爲動陰召擺酋曹當齊刀輔國輩使禽溫先以自效越日果縛二俘至餘賊駭顧曰是單騎入安南營者耶各烏獸散公以功歸善元乃復官滇人稱公長者辛未春公奉委巡邊染瘴卒於道死王事也

太史氏曰韓愈文章起八代之衰養氣仗節故能徙觸於海折王庭湊於軍靖亂以誠辟邪以正奚憚焉谷公驅寇息戰二事頗爲彷彿孰謂古今人不相及哉豐潤去昌黎何其近也

右傳蔣士銓撰

--	--	--	--	--	--	--	--	--	--

張惟寅

乾隆初年予貳地官卿地官會計十五布政司金穀出納事至劇而江南司爲尤甚予嘗密察諸曹長其翹然自見以口給博能聲者不乏人而獨於江南司得一人焉曰張君子畏其人貌靜而智深不肖急自表襮眾方喋喋則恂然退處及輟轉糾纏羣隊殆不能悉詢之君不數言立解予心異之察其退而治事無如君之勤且密者予於是深契其爲人既而移掌銓政遷侍御史出爲監司歷滇浙閩十餘年治行屢課最予方冀其大展厥緒以報稱天予而竟以積瘁遘疾卒於官嗟乎人才之難自古歎之才而不必遇遇不必盡當其才既遇而當其才其所成就亦既卓卓可見矣

忽焉中道淪喪不得竟厥施其爲斯人悲猶後也 國家失一明
強幹練維持綱紀之才其可痛惜爲何如哉君歿之明年嗣子某
以子相知之深不遠數百里持狀來乞銘予不忍辭按狀君諱惟
寅字子畏別號惺夫直隸南皮人遠祖諱璿明成化庚子舉人歷
仕兩淮鹽運副使越三世諱謚嘉靖丁未進士歷仕陝西按察副
使並祀鄉賢謚兼祀忠義祠張之大於南皮自二公始君祖諱份
庠生父諱蓀增廣生並以君貴 贈資政大夫福建汀漳龍道君
爲贈公次子生而穎秀稍長森然見頭角君曾祖某公愛之一日
讀唐伯虎集君歲於側目之曰兒才殆似伯虎然德器當過之故
字之曰虎子而以惟寅錫名五歲母潘夫人卒撫於伯母成童從

堂兄參政兼山學日徒步往返十餘里年十八補博士弟子登雍正己酉賢書乾隆丙辰成進士用戶部江南司額外主事江南賦役甲天下其支銷畱解自如櫛稍不檢影射掩覆動以千萬計吏積猾官客而吏主易以售欺君綜覈精微吏懾不敢爲毫毛蔽既卽眞益自淬厲通部有疑難不決事委之君咄嗟謀於是能聲爲戶曹冠遷吏部員外晉考功郎擢掌文選選曹吏尤奸詭弄法取賕如反覆手畏君嚴明爲頓戢考選監察御史補掌貴州道劾奏閩督誘弁受賕而坐之罪失爲政大體 上是之爲通行飭戒請裁冗員得 俞旨允行當是時君丰采奕奕 上意甚嚮君適命廷臣舉堪勝三品京堂者子舉君應 詔 上欲練以吏事

遂簡授雲南迤東道至改補驛鹽滇鹽無成法君一一均調之使井官煎戶運夫鋪商無偏累滇人稱便歲節縮歸公銀七千兩以前官累左遷知府於時東川官設牛馬車站通百色銅柱鹽返謂大可省費既奏行而路險阻車多摧折牛馬死役用民牛馬又死銅鹽耗失費益甚君奉勘得實以事不可已請變通行之夷路用官車險雇夫役雇資出鑑息無溢費也而民可不擾上官從之事獲濟器鶴慶永北補臨安調省首郡兼楚雄數值地震災躬勘鶴慶劍川浪穹麗江易門諸處賑活災氓數萬口遷督糧道道司銅廠廠政弊多端詭寄侵蝕積甚前官虧帑十餘萬兩束手待罪君爲鈞校釐剔出銀數萬遂償半其半補以廠餘息帑足前官得

脫然去調浙江鹽道未數月又調福建汀漳龍道閩俗獷悍漳尤甚君痛以法創之擒巨猾散夥黨健訟鬪狠之風爲之稍息上杭有假緘白尸誣某謀殺某者令刑求成獄君察其冤立訊得情實釋某坐誣者罪閩人稱爲神鷹計薦入 覲 上獎慰甚至方嚮用回任數月以治獄卒於省年五十有四君事親孝友于兄弟任恤親戚里黨其歷仕惠澤在民義聞在僚吏故其卒也中外上下咸惜之元配 贈夫人徐氏東光人與君同貧苦能以勤力佐君成名從君仕卒於京師繼配 封夫人劉氏滄州人養舅姑孝事夫敬訓諸子義以勸君致疾卒卒後君八月君生於康熙四十六年六月十七日戌時卒於乾隆二十六年十二月二日戌時子三

長啟運徐出先君卒次應運次洪運劉出君之卒於閩也諸子咸
畱侍祖母無在閩者閩藩司德公福爲經紀其喪二十七年三月
喪達於里以某年月日與繼配劉葬於某原合諸元配銘曰

謂君才之未試兮既淬錡而發礪謂君才之無負兮仍韜耀以含
精內臺諫而外監司兮氣鬱律而崢嶸歷滇越以迄入閩兮紛惠
愛之流聲胡不秉旄建節兮參卿月而倚台星韞經緯以潛光兮
還川嶽之英靈緊子惜才爲 國兮哀君志之弗甯玉樹痛其先
萎兮軫高堂之獨煢惟二配之宛從兮聊相慰於九京瞻檜柏與
松楸兮護鬱鬱之佳城納貞珉於泉壤兮萬古寶夫榮名

右墓誌銘戈濤代某撰

龔學海

龔學海天門進士乾隆二十三年任岳常澧道公清率屬常微服
行鄉曲咨訪民間疾苦一時利興弊除宵小斂跡

右傳李元度撰

按龔公乾隆二年進士

臣等謹將奏稿
卷之三十一

楊輔臣

楊輔臣字右扶河南商邱人少爲名諸生連試於鄉不得志值西邊有事輔臣應募辦駝馬議敘知縣又輸運西北以知府召用由靖州歷知長沙永順諸府每遇案牘山積羽書雲馳輒從容應上官服其才久任楚疆悉知風土前後剿捕逆苗身經九戰著有勞績其在永順也城步縣有猺賊攻掠官軍莫敢攖其鋒輔臣曰吾軍賊所畏也吾軍退諸路軍必敗矣下令敢有言退者斬遂親冒矢石督士卒奮勇爭先連戰大破之論功第一遷辰永兵備道復招諭城綏九崗攻克三砦縛逆苗二百餘人西南諸夷由是帖服後以終養告歸輔臣性和平然清介不避貴要以故弗爲臺司

所喜既里居重孝友慷慨好義遇朋友急難必傾貲以助杜門安貧讀書課子鄉里咸器重焉孫愈椿廕入監

右傳查岐昌撰

按楊公乾隆二年任辰永兵備道

魯之裕

己未冬余謁孫文定公於保定制府坐甫定闢啟清河道魯之裕
白事余避東廂窺偉丈夫年七十許高睚大穎白鬢彪彪然口析
水利數萬言心異之不能忘後二十年魯公卒已久予奠於白下
沈氏縱論至於魯坐客葛聞橋先生曰魯字亮儕奇男子也田文
鏡督河南嚴提鎮司道以下受署惟謹無游目視者魯效力麾下
一日命摘中牟李令印卽攝中牟魯爲微行大布之衣草冠騎驢
入境父老數百扶而道苦之再拜問訊曰聞有魯公來代吾令客
在開封知否魯謾曰若問云何曰吾令賢不忍其去故也又數里
見儒衣冠者簇簇然謀曰好官去可惜伺魯公來盡訴之或搖手

日咄田督有令雖十魯公奚能爲且魯方取其官而代之甯肯捨
己從人耶魯心敬之而無言至縣見李貌温温奇雅揖魯入曰印
待公久矣魯拱手曰觀公狀貌被服非豪縱者且賢稱譟於士民
甫下車而庫虧何耶李曰某滇南萬里外人也別母遊京師十年
得中牟借俸迎母母至被劫命也言未畢泣魯曰吾啜甚具湯浴
我徑詣別室且浴且思意不能無動良久擊盆水誓曰依凡而行
者非夫也具衣冠辭李李大驚曰公何之曰之省與之印不受強
之曰毋累公魯擲印鏗然厲聲曰君非知魯亮儕者竟怒馬馳去
合邑士民焚香送之至省先謁兩司告之故皆曰汝病喪心耶以
若所爲他督撫猶不可況田公耶明早詣轅則兩司先在名紙未

投合轅傳呼魯令入田公南向坐面鐵色盛氣迎之旁列司道下
文武十餘人睨魯曰汝不理縣事而來何也曰有所啟曰印何在
曰在中牟曰交何人曰李令田公乾笑左右顧曰天下摘印者甯
有是耶皆曰無之兩司起立謝曰某等教敕亡素致有狂悖之員
請公並劾魯付某等嚴訊朋黨情弊以懲餘官魯免冠前叩首大
言曰固也待裕言之裕一寒士以求官故來河南得官中牟喜甚
恨不連夜排衙視事不意入境時李令之民心如是士心如是見
其人知虧帑故又如是若明公已知其然而令裕往裕沽名譽空
手歸裕之罪也若明公未知其然而令裕往裕歸陳明請公意旨
庶不負大君子愛才之心與 聖上孝治天下之意公若以爲無

可哀憐則裕再往取印未遲不然公轄外官數十皆求印不得者也裕何人敢逆公意耶田公默然兩司目之退魯不謝走出至屋霽外田公變色下階呼曰來魯入跪又招曰前取所戴珊瑚冠覆魯頭歎曰奇男子此冠宜汝戴也微汝吾幾誤劾賢員但疏去矣奈何魯曰幾日曰三日快馬不能追也魯曰公有恩裕能追之裕少時能日行三百里公果欲追疏請賜契箭一枝以爲信公許之遂行五日而疏還中牟令竟無恙以此魯名聞天下先是亮儕父某爲廣東提督與三藩要盟亮儕年七歲爲質子於吳吳王坐朝亮儕黃袂衫戴貂蟬侍側年少豪甚讀書畢日與吳王帳下健兒學贏越句卒擲塗賭跳之法故武藝尤絕人云

右書事袁枚撰

魯亮備之裕雍正閒作令河南與田總督文鏡不洽每被劾一次
世宗召見必升一官員奇遇也乾隆初官至直隸清河道

右記余金撰

國朝文獻通考卷之六十一

三

王鎰

史稱弦高犒師卜式助邊宣曲任氏獨能折節勤儉力田而貴善於是素封之家著義聲於簡策者慶且流諸奕世我國家奄有函夏富盛軼乎前古間有戎事威讐遠域師行糗充市廛爾謐聞井恬嬉無取於民而淳樸之家世以資財輸助雖未補芻茭屣屨之用而慕義急公之誠屢邀 朝廷嘉許者惟澤州王氏王氏系出太原居澤州之大箕里今屬鳳臺縣自近松公起家傳臨字公生鏡山公皆稱長者鏡山公生二子起巖公諱廷掄松坪公諱廷揚廷掄由戶曹歷官汀州守山東鹽道兩祀名宦康熙間撻伐準夷廷揚以輸餉議敘數遷至工部侍郎鏡山公年七十 聖祖特

賜古稀人瑞堂額寵之歿祀鄉賢起巖公二子長雪峰公諱鈞歷
官戶部侍郎次春融公諱鏜任延榆綏道卒官自春融公筮仕後
其家漸落既歿後尙欠帑金二十二萬餘兩公子穉不能理乞罄
產變抵晉撫入告 上惻然降溫諭謂不忍厥子無以資生飭長
蘆鹽政別委富商代理分年納帑歲給千金贖其孥 仁恩矜恤
迴逾常典 詔下之日天下皆爲感泣公歿十有三載將卜葬其
孤德法捧狀乞志公墓合銘法按狀公爲起巖公側室瑯琊王恭
人子公生時父年已五十有二未辟而孤賴兄雪峰公以育以教
友愛非常雪峰通籍日公方髫年獨綜家政尙稽約束內外數百
人帖然整肅器量宏遠已如此年十六娶牛蒸人公能文工詩丙

午己酉兩應鄉試皆不遇居恆借資從飲酒賦詩園林中飭躬無
適行鄉里待以舉火者什伯家賙恤危難扶植倫紀用財如泥沙
雪峰官浙江鹽道公往省之及貳冬官公再往省蓋敬愛發於至
性輒千里命駕云母得瘡疾公晨夕侍先意承志於頤指氣使皆
無所拂左右歎異以爲難乾隆辛酉雪峰卒京師公奔赴持其喪
歸明年公年三十有四奉 旨入都奏對稱 旨授戶部浙江司
員外擢陝西司郎中竄采困苦之士締交者皆無失所西番互市
之役有司經畫未善廷議舉公代任公屬其客往辦而遙授條理
區處之略以貨交易歷三載邊人甯帖第有司舊買夷貨未能猝
歸歸帑由是望吏議 上察而宥之加罰二倍而已丁卯 王師

討金川閣臣復舉公督餉入蜀而母訃適至公墨綬銜命便道歸里一慟而去馳驟風雪攻馬閒詣軍門請出宰財助餉於度支絲毫無取量道途險易設法飛輓剋期集事凱旋後加太僕寺少卿銜許終制服除補刑部直隸司郎中諭免未完帑金三十萬公聞命哭拜不能起公在曹司判事明決秩滿以繁缺道記名升用雪峰葬後三子皆歿形家以爲病公愀然欲歸或引注選期近沮之公曰吾兄體魄不安雖九遷不願也遂書牒請假然兄弟喪葬例無去官者上憫其情辭悽惻特許之皆異數也旣歸改葬雪峰於豐安阡舉焚黃禮畢仍馳赴京補廣東司郎中時年蓋五十矣戊寅八月出任延綏道會沿邊州縣歲屢旱公力賑之其不成

災者出俸錢市米煮粥分廠撫恤千里之人無流散者西師旣興
奉文採辦駝隻上郡烏延素非所產前官皆飭屬吏代辦公謂邊
吏力詘不可再擾乃捐捧遣簿尉分路遠購送軍營至馬政邊儲
羽書如蝟公心畫手揮寢食俱廢制府以公才可大用令攝榆葭
道盛暑往來塞上安設臺站供億彈壓弗累弗擾制府特疏請裁
榆葭道併歸延綏副使兼轄而駐節榆林朝議報 可卽以公任
之榆林帶河襟隴南枕京兆北控沙漠保障全秦地當衝險公率
數騎褰帷按部問疾苦除豪猾枹鼓不驚苞苴盡絕邊人迎之如
親父母然公形日瘁而病且深矣雄石峽爲一郡奇境公勸農至
其地忽忽不樂溘逝之日晨起判牘如常卓午尙詣射圃發數矢

釋弓而笑俄頃痰涌遂暴卒時辛巳三月二十有七日距公生康熙戊子正月二十有六日享年五十有四原配牛氏先公十七年卒繼配溫氏先公七年卒子二公爲人寬厚有容不事谿刻居官竭力公家首戒操切持躬謙謹然意致豪舉樽罍絲竹輒以自隨有王謝風流雅尙云以某年月日葬某阡銘曰

孰漸而廓兮植德而拓也孰積而落兮赴功而涸也投艱而持弱兮公際其末也轉粟劍門兮從軍於邛笮也露冕關隴兮宣威於沙漠也秦人祀公榆林兮吹幽而舞籥也晉人載公於乘兮匪鄰曹邠蜀卓也太行環斯幽宅兮公其返於至樂也公之後必潛而躍兮秋木之莊如昨也

右算誌銘勝士銓撰

國朝書目考卷之七

七

圖書集成
卷一百一十一

三

158-646

張紹渠

公諱紹渠字皇士號素材姓張氏系出某籍至某公始遷鉛山世居九都曾祖文輝祖美先祖妣徐考公輔妣余生三子伯紹載季紹衡公其仲也三齡而孤母年二十有八事孀姑撫弱息極孝養艱苦公稟奇慧讀書爲文異行輩辛酉年二十五冠縣試補生員卽登賢書乙丑成進士改庶常散館授編修充武英殿纂修日講起居注官庚午辛未充鄉會試同考官改山東道御史出知順德府遷守保定升天津道牽率去官再起發山東以知府同知補用勤事而卒公豁達忼爽智識過人平生博愛厚施凡與識面者必使各得其所居官務活人不必爲功才氣力量包舉籠罩無有弗

勝之事然不及大用中壽以沒朝野歎息如出一口而遺愛所屆
民心弗諉者則雖死而若生守順德時有王方平布邪術恣淫七
縣事敗牽連數千人成叛獄公勘其罪止於漁色力請省釋無辜
僅殲厥魁而解邢臺災民以激生變且駢斬公爲分勘得實梟示
一人餘不問衙臺張林王成積惡害民公杖之幾死民大悅守保
定時禽制府臺吏大猾鄭燦文籍其家充城旦吏局肅清官民安
枕直隸奏銷積累無算將起大獄公按部句稽使數百萬無著之
帑各歸款項制軍歎服倚重僚屬以甦先是南和奸民關三殺人
漏網公守順德訪實使縣反正至是解審臬司如舊讞公復爲申
白關竟伏法高陽甲乙兩族羣鬪於野明日甲死於家誣爲乙殺

乙復不能自明乃買兇賂宰求脫宰不爲動而治乙益急公巡察天津夢乙祖訐其隱訪之始知爲甲族自殺獄成而乙祀公於廟其折獄之神類如此他如屬吏中交惡者則劑之使和危累者則調之使安友朋患難死亡罷黜者拯之賻之振之無或失雖官廚不給行篋屢空泊如也公較射 上前三發皆中罷官二載迎鑾魯甸 上遙望呼名卽命往山左待用卒後二日 上除公知涿州苟永其年且大用矣嗚呼惜哉公在山左以辨回 鑾諸務積勞成疾誤服涼藥彌留時神明不亂但云神促赴任其理或有然歟公生康熙丁酉某月日卒於乾隆丁丑某月日年四十一配余子四人書舟惠盛公事母及祖母至孝待兄弟無畦畛某年月

日將葬公於某阡公弟原任新繁令紹衡屬予誌公始末予仲子
知節壻公季女又同邑先後同居翰林意相得莫可辭於是拜手
而銘曰

公居安泉發有源萬萌一本淵其淵沛然潤物中渴焉泉復入地
嗚呼天萬命可贖公竟捐邑無人兮繼公賢嗚呼天也公長眠

右墓誌銘蔣士銓撰

沈榮昌

嘉慶二十三年秋余應郡伯某公之招始晉謁憩寅賓館舍見東壁有大字一幅蛛網蠹蝕若蟲書然初覺模糊不可讀諦觀之知爲六十年前郡伯沈公所書格言自箴以箴同僚者也余錄其文以歸有父執蔣翁者年八旬餘曾日覩公爲政之大略因爲余言公守此郡以清慎爲體勤爲用其美政不可殫述而禱雨禦水患二事尤爲吾懷民所繫思初懷郡旱人多菜色公爲民禱雨自責自罪如韓昌黎祭太湖以刺史失職不仁可坐以罪百姓無辜爲辭翌日遂大雨及乾隆二十六年秋七月沁河盛漲異於他時公恐爲民害方緣隄行令民補築未幾大雨沛然河決天師廟隄水

由北門入城內地高者深數尺低者委簷流公猶在城外越宿乘
船引繩以入廢寢忘食爲民捍禦復盡心祈禱精誠感格神亦效
靈俄有大樹浮至枝葉扶疏塞城闔因下土石流乃止公遂設法
泄水就下發廩給食權度救民無不備至蓋災變非常而民賴以
全余謂公之禱雨也禦水患也心乎民而才能應變也是非取辦
於倉卒間也觀公之格言而知其講求有素矣其首曰勤能補拙
儉以成廉是旣勤於政而又能自斂也次曰勿輕喜勿輕怒是恐
慢易致誤心小而內自省也又次曰勿因精神倦時遇事輒疏勿
以興致高時遇事輒振是能以理宰心不因一時感觸心爲氣使
也又次曰政之繁也分緩急以理之民之頑也平心氣以治之是

學問深醇事有序而氣有養也終日因物付物克慎克勤其惟君子乎是物來順應功底於成也推是心也以往遇事兢兢罔敢有失夫爲政而能無所失雖以之治天下可也而公行之於一郡則民物之被澤且有不自知者如所傳禱雨禦水患事特其著焉者耳吾民之思公也有以哉公名榮昌浙江歸安人乾隆乙丑進士後官至江西督糧道

右記齊秉直撰

陳夢說

公陳姓諱夢說字象臣又字曉巖絳縣之陳邨人先世自洪洞來
遷祖諱元善增生馳 贈奉直大夫刑部安徽司主事加一級祖
妣李馳 贈宜人父諱瑞 誥贈中憲大夫禮部精膳司郎中加
二級母孫 誥贈恭人奉直公中憲公皆授經於垣曲之劉張邨
遂家焉生君於劉張邨其夕母夢明月墮窗前光照一室故名君
曰夢月其後據名不 日月之傳易今名蚤穎嗜學十歲還家於
絳十五同縣李恭人來歸中憲公率君躬耕田閒且耕且讀書食
則觀書於側母誦之曰久不將斜汝目耶夜望見室中燈火苦禁
之君竊以布帷掩其光遂通諸經年十八喪祖妣李盡哀歲乙卯

年二十二入學爲諸生丙辰舉於鄉庚申父母相繼卒君哭之毀
戊辰中會試式出華陽顧庶子汝修房與珪同年同門其撥入本
經房師則長洲沈編修慰祖也 殿試 賜同進士出身以主事
用試刑部河南司君性介不妄與人交暱初或疑其隘久而彌摯
尤勤於守官在部時讞決必比律協情不阿上官意嘗與諸城劉
文正公諍五日而卒不易所擬文正公心憐之歲癸酉補安徽司
兼提牢事早晚親行獄役不能爲奸而囚無苦虐少司寇無錫秦
公察而嘉之歲甲戌擢浙江司員外郎乙亥李恭人卒丙子京察
一等十月升禮部精膳司郎中明年四月護送暹羅國使臣抵粵
有人粵紀事戊寅兼儀制司繼娶朱恭人記名御史辛巳以繁缺

道府記名六月 簡授甯紹台道未抵任巡撫莊公檄閱紹興宋家樓海塘君議當修復從之癸未台屬甯海上下梅邨有拒捕案提督將以兵往海旁邨民皆驚竄君謝之輕騎行縣令已縲繫竄者數十人下之獄君曰此非犯者我來捕梅姓數人而已駐停旁盡獲之釋其少子一人台人謠其事曰存孤記遂改停旁爲海防同知治所勸修鄞之錢湖插乙酉 上南巡 召見曰夢說爲刑曹素知其能 賜綺貂是年八月天台水勘賑之明年以所屬諸暨令不職望吏議送部引 見仍以道員用撫臣奏請督修浙城工丁亥 特旨授浙江督糧道卻餽金漕政肅然戊子有譌言窮髮事蕭山捕得僧了凡等四人誣服君平反之明年或言事起於

浙以犯解京訊無他而抵捕者罪君以輕比議降一級修餘杭南湖隄填其潭署嘉興府嘉興訟繁君釐之無留牘壬辰署嚴衢處湖各府事甲午復元官君在浙十二年有歸田志遂自號西庵劇夫請假歸明年卜居山泉之旁號枕泉居士戴笠芒履與鄉里道舊故優游林居者十年甲辰示疾考終生於康熙五十三年甲午七月十二日子時卒於乾隆四十九年甲辰十一月晦日午時年七十有一元配李恭人勤儉仁恕中外稱賢子四鍾雲國子監生鍾霞貢生皆恭人出先卒鍾雨側室唐出鍾霞側室戴出女子三孫二鍾霞生毓甯爲鍾雲後鍾雨生毓揚爲鍾霞後曾孫一道瞻君仕優好學所著各彙藏於家葬於某原其孤寄書於珪日先公

同年之在朝者惟公巋然獨存敢乞銘銘曰

君面冷而中慤交久孚而愴怕周紀於浙聲濯濯十年枕流絳居
樂我文非樊璞可琢

右墓誌銘朱珪撰

干從濂

江右名書院鹿洞鵝湖尙己首善之區則有豫章書院 國朝諸
巡撫相繼培植士類於斯星子干公諱從濂爲諸生時求友講學
往來鹿洞豫章間尤得力於巡撫陳公榕門之教抑其曾大父存
庵先生經術蘊釀所畱遺者遠存庵公諱特以恩貢 敕封文林
郎祖廬陽公諱建邦康熙十八年庚辰進士舞陽知縣兩世俱崇
祀鄉賢父恕齋公諱運昌雍正元年癸卯鄉榜兩世俱以公貴
贈奉政大夫母宋氏 封太宜人子四公其長也余交公在壬戌
同學豫章時久之漸密各質證所學然否無少假丁卯公年方壯
而意氣甚盛余握手笑此舉當魁我西江公荅曰君亦無多讓已

而果同舉先後成進士公初令尤溪銳於求治治行冠閩中商賈籍籍爭傳其捕虎事及連調大邑擢海疆錯節盤根旋至而立有效若革延平府屬船埠之差徭弛晉江難民偷渡之禁例辨臺灣熟番劃界防守之不可行各指陳利弊灑灑數千言上之督撫胥稱善倚爲指臂公勤吏事歷繁劇每五官並用至四十餘日不假寐凡所部興學立教除奸獎善變通常平社倉之法借糶兼行以便災黎皆其端緒可見之大者以賢能邀 聖天子之知遇知鞏昌府不逾歲晉甯夏道上司交相引重所屬有甯夏甯朔平羅中衛靈州五州邑農田開渠引河水資灌溉歲久淤塞公建議歲修月以爲期官督疏濬公親宿河干周行巡歷經畫工竣稱便歲獲

有秋他所興革類如此聲望益隆遽以內艱歸未竟所設施方公
令闔時予郵書上述孔門諸賢治蹟下及宋儒躬行之政非迂疏
寡效及余令東湖公過涇陽聞余在官一二事亦馳函相慶幸謂
坐而言者起而行固當如是蓋余兩人出處本末跡不同而心則
一而公尤有猷有爲有守用克宏此遠謨惜乎其僅以監司終也
公字靜專別號希周生於康熙五十七年戊戌閏八月初九日終
於乾隆四十年乙未十月二十七日年五十有八配金恭人子二
長朝幹郡廩生金出次朝樞邑廩生側室林出女二某年月日葬
某山之原銘曰

心如水面如鐵氣誼如雲肝腸如雪政寬政猛矩可繫秦關閩海

留餘烈湖白嶽青祥光不滅於此藏其穴

右墓誌銘林有席撰按于公乾隆戊辰進士

梁兆榜

伯父與廷栢同出三世祖玉川公而伯父實寄籍鶴山先是順德城東街有同宗某夢人送科第門額入其家題兆榜名醒異之會鶴山開籍卽以名其子將應夢也無何某死子落拓以戶籍轉假於先伯祖舉人登故伯父試名亦用此遂入學事詳羅石湖先生五山志林乾隆丁卯舉於鄉辛未成進士改庶吉士散館出爲鹽山令鹽山大姓橫甚通吏胥侵漁稅戶故逋賦有積至十餘年者伯父抵任卽密捕易庫銀吏置於法吏黨欺官新每伺隙爲奸伯父輒隨事發之民賦令自投納吏不得逞田有蝗害稼伯父適病守至以僕往迓守故悉伯父治行令歸傳語善調攝毋強出而自

行田閱督捕伯父臥牀席屢問蝗盡未則據枕作起勢曰吾必親往家人止之不聽也不得已以帶約伯父輿中行見飛蝗蔽天禾稼已因逐蝗壞撫式大慟曰蝗不盡則無稼捕蝗盡亦無稼吾不德天降罰宜及吾身胡毒吾百姓如是泣不止觀者數千人官泣亦泣地有劉猛將軍祠據崇臺上促輿登入祠長揖曰神職治蝗享禋祀今蝗食稼盡令竊爲神羞請與神約限三日驅蝗去不然令無狀黜宜矣然神亦不得享祀越日蝗漸少又越日報淨盡歡聲雷動伯父病亦瘥秋大熟居鹽山五年屢懲豪猾悉遠竄讞死罪囚必引問曰怨否曰無乃給之棺新守初至以墨聞憾伯父不爲遷就其私將假他事中傷之上官聞反詰責守守慚當公謙語

侵伯父伯父怒曰士未可辱也守陽謝而伺伯父愈密持之亦愈急會伯父以薦入爲禮部主客司主事事乃寢而守亦卒以墨敗也官禮曹遇事能持大體宗伯每倚重之鹽山父老相率數百里走都門獻豚麪果酒之屬歲必數至如家人都人疑問之則質告曰吾使君能責神驅蝗活吾邑民吾使君故多病吾儕更番來相候今幸無恙吾儕且歸矣於是都中聞傳伯父治鹽山事尋以京察一等擢長寶道值大兵征緬道過湖南伯父應辦有法閭里安堵茶陵牧戴君保豫新築茶陵城有詣巡撫告城工不實者檄伯父勘伯父稔悉戴治狀知事必虛未往也告者乘以叩聞有旨差少司寇至會巡撫履勘時戴已調靖州歿矣茶陵人數千焚

香誦佛迎欽差跪訴故州主賢奈何一妄男子污我清白刺史會
勘工果實告者論如律而伯父終以未親勘得罪效力軍臺在臺
將軍遇之善爲主筆札旣而竟卒始行挈二僕往其一不耐寒先
伯父死至是臺中不得材所遺僕以氈裹屍輿入都始得棺殮歸
其喪伯父字尺波又字鶴圃子壽昌嘉慶丁卯科舉人

右書事梁廷枏撰

王啟緒

君諱啟緒德圃其字也一字紹衣先世雲南人前明中葉有登甯公者官於福山因家焉詩禮相傳蔚爲望族曾祖諱陴 贈通議大夫太常寺卿祖諱游太常寺卿考諱儉兵部侍郎廣東巡撫妣李太夫人君少開敏讀書數行下乾隆十二年舉順天鄉試十六年成進士選庶吉士散館授職編修君自爲諸生時講求有用之學工詩古文辭洎入翰林益充演所學於音韻有神解旁通繪事弟詒堂與君同舉於鄉旋以中書官京師相繼入詞館以文章學問相砥礪館中有撰進文字惟君所擬神采鮮朗每出一篇余及同館諸君未嘗不交稱善也二十一年典試貴州人服其精鑒次

年改掌雲南道監察御史屢陳時政請嚴銓選澄流品議論明劄
鑿然切時用並報 可巡視中城署兵科給事中復巡視天津漕
務所至稱厥職當是時侍郎公方開府湖北而故事封疆大吏子
弟官臺中者皆引避君遂改補戶部浙江司郎中侍郎公移撫廣
東乞假省覲旋居父憂服闋補原官三十七年出知河南府先是
侍郎公以翰林改守河間君隨侍得聞政譜故官京師好談濟世
之務省覲廣東畱侍者歲餘益知民間利病至是典大郡處之裕
如調開封府知府聽斷如流四十三年 特旨擢開歸管河兵備
道黃河自儀封漫口連年衝決 上勤宵旰 命重臣莅視相度
君以才見擢明練勤懇莅事者倚君爲重所治黑塌口爲會城保

障嘗告險君自備封馳至而湍流衝刷隄之不穿者僅丈餘矣君躬履危地率先弁兵相機防護一晝夜隄得無恙城中居民賴以安君測量全河形勢議增建順黃壩復於潘家廠開引河使漫口合龍大學士阿公卽以君司其事親操畚鍤爲諸屬倡先工竣議敘四十五年方築隄於芝麻莊聞配張恭人疾革歸視一慟卽日趨河壩家人以子義長羸疾告君不顧惟遣人寬譬母夫人母夫人亦寄諭曰汝亟視工毋以我爲念七月芝麻莊竣工而河復自張家油坊奪漚而出君誓以身殉復事版築歲杪河復流增築防風壩還繕舊隄而君病已不支矣子義長亦殤次年請解任調理七月望卒於官舍時尙未離河南也君天性孝友交友以篤誠文

彩輝映於政治尤爲諳悉居常言天下事當不辭艱苦以要於成其胸中所蘊蓄者將次第展施而盡瘁於治河以歿豈不悲哉然君自隄工始築任事忘家奔走不息盡心於疏導防濬以奠民居庶合於禮經所謂以死勤事者矣生於雍正十年正月三日卒年五十有三配張恭人歲貢生健女有婦德事姑以孝聞君勤瘁不恤家而家事咸理恭人之力也 封宜人 晉封恭人生於雍正七年十一月二十日卒於乾隆四十五年六月初八日年五十有二子義長既殤君弟詒堂中允以次子齡長爲君後復以長子慶斌之子玉曾爲義長後將以四十八年十月二十二日合葬於祖塋之次詒堂命慶長持行狀乞余爲銘余與君兄弟同以乾隆丁

卯舉鄉試又先後入翰林交最契詩壇酒社無數日不相往還十
餘年來舊交零落其存者亦散在四方僅若晨星追念生平不勝
離索之感今君又奄化老友益稀每與詒堂相語輒惻惻憶君如
悲骨肉詒堂以誌墓相屬余焉得辭乃揮涕而爲銘曰

君少於我而我誌君存歿之感悲何可云然猶是友朋之誼悵悵
於離羣若夫抱經世之略而不克大樹其勳則實爲 國家惜斯
人

右墓誌銘紀昀撰

劉宗珙 周璣 曠楚賢 方應元

劉宗珙字戴侯湖南衡陽人乾隆辛未進士選庶吉士改工部主事再遷刑部郎中在部十年以明法聞記名御史未入臺出知太平府治尙文雅民安其政移柳州桂林皆有清直聲卓薦除陝西驛鹽道署按察使坐事免用 南巡恩復官自陳衰老不赴補卒年八十餘少後有周璣字玉圃桂陽人乾隆己卯舉人初知尉氏縣檄督河工懋著勳績調杞縣以多獲巨盜遷同知攝鄧州事時湖北教匪蜂起偃州境土匪將應之璣募鄉兵捕斬嚴禦外侮境賴以安遷南陽知府又以寶豐郟縣寇擾馳詣葉縣捍禦借葉令廖寅生擒賊首劉之協殲之遷江西督糧道在任五年治行尤著

嘉慶己卯年九十一重宴鹿鳴著有采菽堂舊聞四卷卒祀鄧州
名宦並祀鄉賢曠楚賢字振南衡山人乾隆辛丑進士選庶吉士
授檢討改刑部直隸司主事升河南司員外郎貴州司郎中總辦
九載秋審兼主五司彙案定讞之獄手錄成二十四卷嘉慶初爲
直隸通永道甫下車倡修學宮半載告成值 山陵大差總理大
杠鄉夫萬餘人咸就約束當清理所屬積案開誠告諭兩造感泣
求解歲旱步禱雨立應丁母憂歸修墓祠置祭田以俸餘分給兄
弟捐義倉置田以贍族人服闋北上過通州父老臥轍畱之有泣
下者調清河道董修千里長隄 車駕巡閱大加 褒美三日五
召見積勞成疾卒於官方應元字首善巴陵人援例投建昌同

知果擢惠潮嘉道左遷潮州知府政尙嚴明澄河漁者半盜捕得
置之法民獲安堵

右傳李元度撰

皇清同治元年
二月二十二日

二

顧光旭

嘉慶二年閏六月二十六日署四川按察司使顧君卒於家時長子永之在河南會以川楚寇警軍務方亟久之乃得奔喪於是先使其弟湛之來告曰吾兄將歸葬府君於瀆門山之龜頭渚敢以墓志爲請嗚呼余自乾隆二十三年與君定交京師中間離合一迄於今蓋四十餘年知君生平莫有如余詳者志何忍辭按行述君名光旭字華陽一字晴沙其先本於吳丞相雍至通判潤之始遷無錫及明廣東按察使可久洞陽公始大曾祖敦進士祖愷父建元三代皆以君貴 贈封如其官君少穎悟喜獨居靜坐時有所得乾隆十六年年二十一爲邑諸生明年二月壬申 恩科

鄉試中式八月會試成進士以戶部額外主事用三年實授山東
司司主鹽筴兩淮解引課銀庫輒謂不足庫平每百兩挂欠短平
銀十五兩歷十一年欠益多君謂天下所頒之平皆由戶部較準
而發若兩淮任意短少何以歷任皆然若由銀庫指爲挂欠卽屬
多索白諸堂官眾不能決獨富文忠公韙之遂銷其欠尋擢員外
郎二十四年保御史授浙江道監察御史是年直隸山東大水明
年正月君上奏曰上年兩省被災荷 恩截漕發帑已賑加賑如
天之仁無微弗至近見流民扶老挈幼什百入京春來尤甚故五
城米廠飯廠人數倍增詢之是近京數百里內被災之民相率逃
荒先之毀屋伐樹繼以賣男鬻女饑羸老弱踣頓不可勝計耳目

所及如此其外可知伏思救荒無奇策惟督撫及有司親民之官
實心實力方克有濟乃各州縣未嘗不設廠未嘗不施賑而或委
任於佐貳假手於吏胥所設廠或遠離村鎮窮民奔走待食或得
或不得凍餒顛斃皆所不免 國家良法美意一入俗吏之手民
需實惠者十不及五卽有一二賢能有司撫循周至而他境流民
聞風畢集日聚日多轉難措手此督撫不能真實愛民下亦以應
付塞責一切皆屬具文臣請 敕下督撫分飭有司隨地撫綏毋
致流移失所去年被淹之地積水未消設法疏導並可以工代賑
然後借給牛具籽種以資耕作儻仍因循侵蝕有流民有曠地卽
重治督撫州縣之罪至京城外來饑民已獲赴廠領賑但一年之

計全在東作其無力自回者給貨遣送其本籍全無倚賴不能回籍卽歸大興宛平作何安輯不致栖流無著并請 敕順天府尹會同五城御史查明人數請 旨遵行抑臣更有請者外省遇有水旱司道府親臨查勘州縣先以伺候供應爲能所委佐貳亦以公館酒席更滋擾累請嗣後大員親臨災地州縣毋許供應亦不得帶同佐貳多攜人役致累災區儻有憊者嚴參重處似於荒政亦有裨益奏入 上善之二月 命赴京畿查勘君至文安大城疏積水撫饑民入樂亭境民數萬擁縣門欲斃知縣及悍役王姓者時已昏黑公令老者數人前宣示 上恩特遣御史四路勘災以活爾等性命言至痛切眾哭君亦哭乃令姑退以俟軫卹而乘

夜炳燭起草馳章入告乞加賑次至寶坻灤州盧龍皆如之四月
勘畢復命召見嘉許良久旋命赴通州坐糧廳任三十二年
擢工科給事中三十三年二月授甯夏府知府明年調平涼三十
五年甘肅大旱君請開賑而布政使謂有名無實不許君獨清查
災戶先發銀米適布政使以憂去署任爲今直隸總督胡君季堂
君抵省胡君迎謂曰輪蹄烏道羊腸路溝壑鳩形鵠面人賢二千
石涕泣多矣蓋君口占詩句爲人傳誦而布政使聞之也按察使
畢君沅見君青嵐山詩產破妻孥賤腸枯草木甘歎曰一字一淚
十字千古矣是時隴坂災黎鬻妻子裝木籠於驢背每籠兩人君
命城門記其數五閱月共出六萬七千餘人則他郡可見也皋蘭

各縣聞平涼設粥廠相率就食日以萬計自上年五月雨至三十
六年三月始雨總督明山巡邊至隆德告君路有饑死者君率縣
令請罪總督曰百姓道斃於太守何與君曰知府任地方責烏得
辭罪且總督見者一知府見者十知縣見者百鄉長保正見者以
千數矣曩知府於路見羣鴉飛鳴樹枝牽挂縷絡則人腐敗之腸
也跡而求之澗谷中骸骨堆積縣延不絕是皆地方之責烏得無
罪總督悚然蹙然問如何而可君曰平涼隆德固原靜甯各有二
粥廠饑民日增每廠多至四五萬人天漸熱疫將起知府已造人
民住址大小口細冊此時不令歸農秋成何望願給兩月口糧爲
歸農資俾得及時布種總督首肯乃具薄笨車數百兩陸續送歸

其地時已升涼莊兵備道而總督以罪免文公綬代之未至先用
六百里書約籌災務既見文公曰河東一路請君任之君曰河東
道里遼闊倉庫空虛官吏非本屬恐呼應不靈未敢任也公曰一
切錢糧惟君支取自府以下惟君調遣某帥以聽誰敢犯子君爲
治素有聲旣奉檄罔不響應遂分八路比戶清查用連三票填注
極貧次貧大小口數一付領賑者持票領賑一貼災戶門首一存
本官數對未領之案晝夜抽查發奸擿伏官吏惕息暨於訖事無
敢絲毫中飽蓋數十年所未有者及秋大熟甘肅民遂以生全時
大兵方討金川土司三十七年文公調任四川總督將偕君行先
奏請加按察使銜君聞不可曰是奏毋乃要君 國家有事臣子

宜效力何以加銜爲總督歎息乃削其橐七月抵成都時前總督方以誤餉罷君力謀餽運三路軍營賴以無乏十二月署按察使先是四川有失業無賴之民好拳勇嗜飲搏掠惡少年爲從四出劫殺眾莫能制名爲咽魯子至是益甚君督役搜捕獲之則責以大杖荷以重校反覆喻之以理咸股慄誓改悔乃令率其侶爲運丁無不踴躍爭先者軍米因以益裕君常謂天下無饑民無游民則揭竿篝火之盜斷無從生識者以爲名言時雲南布政使李君湖來蜀協辦軍需稱之曰江以南有數人物也四十年以秋審失出五案革職畱川總理糧餉四十一年正月兩金川平大軍奏凱總督令馳駐西路臥龍關料理回兵兵十餘萬抵關震君威名無

有叫呶需索者時二月風雪如嚴冬君積勞冒寒忽四體麻木醫
治月餘弗效遂告病奉 旨准其回籍乃以七月放舟過嘉陵江
宿坡仙樓士大夫爲君立生祠於樓上君有詩云密雲不雨下西
川身上東吳萬里船多謝漢嘉諸父老不能載酒侍坡仙蓋其標
韻如此既歸年方四十六封君及太夫人同年六十八而諸子皆
得孫君夫婦牽子孫希講鞠膺上大父母壽進膳承歡晨夕弗懈
與與緝緝如也四十二年冬丁外艱又十六年而太夫人歿喪祭
盡哀及葬號泣奔走且廬於墓不以五十不致毀稍自寬假又建
洞陽公祠並於祠旁起屋祀始祖及始遷祖與後之以文章名位
著者示敬宗收族之誼又取洞陽公廢園所存丈人峯輦寘於祠

作拜石山房謂先澤所存弗敢遺也又好葺前賢遺蹟在四川重建漢文翁講堂石室草堂爲杜少陵故址錦江書院在其右君改爲少陵書院并奉其像居家修邵文莊公祠築君子堂又求其墓而識之以歲時祭埽焉生平讓夷急病見義必爲五十年無錫旱君徒跣詣惠山真武廟禱雨其冬捐己山租并捐書院束脩助煮賑又經理崇安寺粥廠躬親巡視明年又捐束脩以助展賑書院諸生貧者月給銀米爲助能會每冬月製寒衣以施爲禦寒會其焦勞經畫與甘肅辦災不殊無錫自楊文靖公得理學之宗顧端文公依白鹿洞規修建東林書院高忠憲公攀龍偕吏部華允誠等爲之左右天下歸依嚮往如五緯麗天芒寒色正明季節義之

士咸出其中而年遠教衰君以清裁令望爲世所推請主書院前
後幾十餘年日與生徒講論道義以踐顧高之緒院中依庸堂下
產靈芝五色嘉善曹徵君庭棟繪爲圖以紀瑞君爲人祥和醇厚
澹於榮利其色莊其言厲雖以吏治見稱而志在扶植忠義主持
風雅金川木果木之變文臣殉難者二十六人 卹典下君度地
於成都建慰忠祠作主以祀屬余撰碑記而自書之以鐫於石治
事暇偕今左都御史學政吳君省欽前湖北巡撫兵備道查君禮
及潼川知府沈君清任邛州知州楊君潮觀曹君焜輒從容譙集
賦詩飲酒以爲樂著有響泉□□等集其若干卷又以無錫東南
文鼓而賢人淑士湮沒未盡彰網羅詩什人各系以傳成梁溪詩

鈔四十八卷書法出入蘭亭聖教尤爲人所寶貴君卒年六十有七配華氏 封恭人子三長卽永之乾隆四十二年舉人今官河南陽武縣知縣次卽湛之監生次葆之貢生女三長適同縣監生王相英次適平湖舉人張誠次適太倉舉人畢憲曾孫八籌策庠生筠節箴篴簡籤尙幼曾孫一人以其年某月某日葬於譚頭渚蓋君自築之生壙也君歸里後十餘年余亦蒙 恩致仕其閒屢過惠山相見君所以敦勉期望者益重蓋始以文字交而終以道義也昔蘇文忠公撰富鄭公神道碑曾文定撰趙清獻越州救菑記庸以示天下傳後世其敘荒政率辭繁而不殺今余亦猶是志也故詳載其大而餘從略焉并繫以銘曰

執徐之秋君來東振手相視和而充面眸背益道積躬謂宜上壽
期頤同何哉惡耗遽告終生平之志孝與忠一夫不獲心憂忡直
臣循吏兼儒宗溢爲著作光熊熊端文忠憲其遺蹤一堂五世福
亦崇允矣端坐還璇穹黿頭吉兆君親封山環水複神靈鍾斑然
狸首綏幽宮我斲斯銘颺仁風示萬子孫無終窮

右墓誌銘王昶撰

沈業富

運使沈公諱業富字既堂元由吳興徙高郵明遷貴州普安官河南按察副使奕琛者復歸高郵曾祖弼官廣東高州府知府遷儀真祖文蔚遷江甯父之亮徙揚州府城公猶以高郵通籍祖父皆贈如公官公幼穎異好學雷學使鉉始拔之年二十二舉於鄉次年成進士改庶吉士習國書有謂公早達爲倖者里巷擊柝者曰吾每當子夜風雪時過沈氏書樓未嘗不聞讀書聲何倖也越二年散館授編修撰制誥文辦院事庚辰充江西副考官壬午充山西副考官乙酉分校順天鄉試皆以先正法衡文得士爲盛尤屏絕聲氣關節不通館譽重之前後充國史館續文獻通考

館纂修官乙酉冬補安徽太平府知府掌院劉文正公曰纂書之
勤無如君者欲畱公京秩未果公久於太平府任者十六年於災
眚尤盡職己丑大水城野成巨浸公隨布政使坐浴盆經行邨落
公曰太平昔年賑多者三四萬口今非五十萬口不可賑乃大行
當塗縣大官圩決公夜半至見遠邨肆奪火光銃聲不絕公自爲
密札十下各官圩勸富家糶濟曰本邨人面相識鄰邨卽路人矣
今當各保各邨毋轉掠轉掠是圩皆路人也互相殺能保富乎今
密札不顯諭者別有以靖之也有告某富家不糶者笞械之曰汝
奉何明文令富家出粟耶民始定糶濟大行總督聞之下其法於
他郡辛卯秋泗州水撫部裴公知公賢檄治其賑公釐戶口之弊

民受其惠乙未旱禱雨無應爲文哭祀社稷木主卒得雨庚寅大疫設藥局瘞局絕葷祈禳民乃甯前後課各邑種柳數百萬株官路綠陰相接成幄督埋暴露十餘萬棺有一邨同時舉數百棺前明之棺尙在者民始而譁及見其親之骨感泣曰非府君教督不至此戊子割辦妖妄案起羽檄紛馳搜捕徧各郡獨太平不獲一人有誣者立出之上司責公公曰本無奸曷捕焉蕪湖有兄弟訟者公察其詞出一手杖主訟者兄弟悔悟友善如初當塗有師弟互以陰事訐者公取火盆置案前卷盈尺遽火之曰爾等詞必有稟可上控曰郡守焚案不汝靳也師弟皆泣訟乃息貴池有以墓地訟於部者塵案山積公夜視舊牘得成化二十一年閏四月官

契公謂愚民安知閏檢明史七卿表得是年閏四月文遂據以定其讞公治郡資最深每考績輒有尼之者或勸赴省公曰求之得可恥也不得更可恥也逮辛丑始授河東鹽運使 純皇帝所特簡也河東鹽池受淡水歉產商運蒙古鹽多勞費及鹽盛產而弊益多商益乏公曰鹽池自古爲利不當革若聽民自販必致蒙古鹽內侵商人之力不在寡在不均其弊有三奸商棄瘠據肥一也費浮地遠夥攫其利二也僉代之期貧富倒置三也乃立均引順路之法總三省引地以三等均之復以道路相近者順配爲五十六路路各一籤令各商鬪分籤掣之於是賂絕而弊不行洎乾隆六十年後廢商運蒙古鹽內侵嘉慶十一年復舊制皆如公所預

燭者公所莅皆興學愛士修書院習樂舞運司署西隙地做鄉場
號舍立四十舍月課諸生才人黃景仁歿於山西公署公經紀其
喪厚其賻送其柩歸常州海內高其義事母以孝聞在晉甫一年
以母老宜奉歸請終養撫部不許固請乃許之俄而湖北陸撫部
有凡官親老者勒令終養之議撫部曰非一月前入奏今無以對
子矣公曰但得終養卽勒歸無憾也母卒喪以禮服闋以溼疾恬
然不復出居鄉十餘年多善舉里黨皆曰沈公乃正人所著有味
鏡齋詩集若干卷文集若干卷公生於雍正十年五月二十二日
卒於嘉慶十二年八月十五日公子在廷以十三年某月干支葬
公於某山之原配鄭淑人附焉子一在廷癸卯舉人內閣中書女

一適工部郎中裴正文孫二勤增太學生員次勤埴元昔以長女
荃字之余女殤勤埴亦未冠卒公與先大夫友善且為姻家故公
子屬元為銘銘曰

公文在經公學在性忠厚其心砥礪其行拙於成宦勤於從政飽
民之飢療民之病以史斷獄以道出令苦鹽既調澹泊無競以孝
辭職壹志温清既享其壽乃歸其命藏此佳城積善餘慶鄉里私
諡會許曰正

右墓誌銘阮元撰

按沈公乾隆甲戌進士

周克開

公諱克開姓周氏字乾三號梅圃湖南長沙人乾隆四十九年七月二十日以疾終於浙江杭嘉湖兵備道任年六十有一士民悲悼相與言曰天胡不俾終惠我民邪大吏以聞上深惜之公子內閣中書舍人有聲聞喪星奔將奉公柩歸鄉以葬旬余爲銘余嘗見公於江甯又客太原爲公舊治故老猶能述公治行公子以余嘗典學於其鄉師事余是不可辭按狀公以鄉貢士中乾隆十九年會試明通榜引見發甘肅以知縣用蓋勅舉也值甘肅軍興卽協辦軍務署張掖古浪實授隴西調甯朔凡歷四縣擢知固原州以憂去復補雲南姚州知州特擢貴州都勻府知府調

貴陽緣事罷復用爲山西蒲州府知府調太原擢授江西吉南甯甯道署布政司使事坐失出逆書案吏議效力軍臺 聖恩許贖罪卽 命往江南以同知用署知江甯府事 特除江西九江府知府調南昌未幾卽擢浙江糧儲道調補今職此公敷歷之本末也性勁直不以依阿骫骳取容所至爲民興利必計長久治獄必當其罪於威勢無所瞻畏雖以此取怨怒勿恤也大吏久而知之屢以最聞 聖上深悉公任事有風力故再折再起不久淹也甯朔舊有漢唐二渠與大清渠而三百姓資以灌溉唐鐸堡之地有暗洞焉以洩濱湖宿水修治不善漢渠之水不行泛溢爲害議者苟趣目前欲加填塞甯夏利而甯朔不利公堅主修復時春月資

水甚急民以不及待相阻撓公期以五日可就及期夏民羣持耒
耒來擬不就卽填塞耳至則工已垂竣反相助爲盡力蓋公蚤籌
度某所有石可用某項有錢可借故能成之之速如是縣民閭姓
爲旗人所讎叢毆致斃旗員以獲偷拷問爲辭公驗狀非偷且身
有傷須考實將軍聞之大怒詰以不當株連公據律令爲對竟致
兇渠於法一破姑息之習人皆以爲快在太原修復屬縣之風俗
口隄堰以除水患往時每爲奸民占荒者浮議沮其事及聞公往
勘復蟻聚蜂擁洶馬前公陽言吾不審當若何試推曉事者導
吾往得三人械之以行曰若率多人將復抗我耳有繫吾馬者必
置若法眾紛然各散去於是沿隄行視隄互十數里其尾爲水所

決瀾漫平田中無所歸復循而下則汾流帶之中隔民田公以開
田償直詢諸民曰以漑田易永利某等願不受直隄卒以成民
因爲祠以祝公公於臨財廉亦不以賂要結上官近年甘肅浙江
官吏皆以贓敗而公絕無連染當時謂公迂者舉皆喪身亡家公
獨安於其官獲保令名以終嗚呼仕者不可知所自立歟公督修
海塘當潮汐之衝每苦蟄陷晝夜不離工所積勞冒暑以至於大
故豈不哀哉舉此數端亦可以見公之崖略矣祖諱炳父諱宣智
舉人澈浦縣學教諭以公貴 贈皆中憲大夫祖妣某氏妣侯氏
皆恭人公初入仕授文林郎妻張氏 封孺人後所得階封皆以
貶贈子三長卽有聲徵仕郎以中書充歷代職官表纂修官次

有度早沒次有蕃孫二鳴鸞鳴鷲女四人壻皆士族三已嫁一許
字未行卜以某月日葬於縣之某原是宜銘詞曰
惟禮有云勤事而死則事之公之盡職自初仕國功民功燿前軌
尸而祝者徧畏墨行書其實上太史報功有典俾筵几神則如水
魄在是以此爲清白吏歸全之所詎不美乎

右墓誌銘盧文弢撰

君諱克開字乾三先世自豐城徙長沙明末張獻忠破長沙裔降
諸生周繼聖至斷擊不屈者君五世祖也其四世孫宣智中乾隆
甲子科舉人爲溆浦教諭以君貴 贈中憲大夫君爲 贈中憲
之長子少有盛才後父一科而爲舉人乾隆十九年以明通榜引

見發甘肅以知縣用授隴西知縣調甯朔甯夏之田並河爲渠
歲得河新水則腴得湖山宿水則饑且瘠故渠有引河之闢又有
洩宿水入河石竇民謂之暗洞君在甯朔值唐鐸渠暗洞崩塞渠
水不行上官從他吏建議填暗洞而竭唐渠入漢渠以便甯夏之
引河君念暗洞廢則甯朔水無所洩夏秋水盛民且溺力請修復
之夏民以爲農事近新水將至不可待君約以五日爲之乃取故
渠廢闢之石晝夜督工五日而暗洞復立又嘗爲甯夏治唐延漢
來及大清三渠皆前吏治之無功者君受檄相度或濬或徙至今
民賴其利君再以卓異薦擢知固原州父喪去官服終爲姚州知
州擢都勻府知府調貴陽府在都勻時嘗從巡撫與總督吳達善

侍郎錢維城治貴州苗民爲逆獲其首從鞠之君謂錢侍郎用法
有不當者固爭不爲下在貴陽亦以強直忤巡撫宮兆麟二公始
皆憾而卒以重君旋以公果解職引 見復授蒲州府知府調太
原府大清積案修復風峪口隄堰障山潦而導入汾始君在甯夏
治渠作閘民謂之周公閘至太原民亦德之於隄上作周公祠云
擢吉南贛甯道署布政使事以王錫侯書案被罪然 高宗素知
君賢吏也乃發江南以同知用值 駕南巡君以署江甯府見
上命知九江府擢浙江糧儲道又調杭嘉湖海防道值改建海岸
石塘君益其工總督欲徙柴塘近數百丈以避潮君曰海不與河
同徙而讓之潮益侵無益也力爭得止君督視勞甚致疾然猶不

懈在任年餘以乾隆四十九年七月二十日卒年六十一君生平
 所莅官皆有績善治獄多所平反禮儒生以私錢興書院而性尤
 廉其授糧道盡革舊徵之濫而身與上官約不取一錢之賄上官
 故移之海防也沒後家無餘貲娶張恭人先卒生子有聲乾隆六
 十年進士貴州大定府知府次有度早殤女三側室童氏生子有
 蕃國學生女一有蕃年未三十而卒君與張恭人合葬本邑河西
 鄉蘊玉山嘉慶十年有聲將復治其墓桐城姚鼐銘之銘曰
 矯立其義惟堅以毅惡恤予忌奮襄民事辨害興利河壩海澨方
 略載備眾曰君恃生爲良吏沒而民祀貽床厥裔銘告千禩

右墓誌銘姚鼐撰

君姓周氏諱克開字乾三一字退谷先世自豐城徙居長沙遂爲
長沙人考宣智官澈浦教諭君少聰穎年十三補縣學生爲文章
有老成風格中乾隆丁卯舉人甲戌明通榜 特旨發往甘肅以
知縣用攝張掖古浪事補隴西攝西甯朔擢固原知州以父憂
去服除補雲南姚州遷貴州都勻知府失察江西客民劉秀星欠
官錢罷職事白發山西以知府用補蒲州擢江西吉南贛甯巡道
署布政使事以新昌舉人王錫侯書案被逮當軍臺效力有 旨
平日居官尙好准贖罪發江南以同知委用攝江南知府旋眞授
江西九江擢浙江糧儲道調杭嘉湖道卒於官時乾隆四十九年
七月也春秋六十有一君之攝古浪也方下車未受代值侍郎吳

蓬善公至前令不時給馬侍郎誤責君至欲律以軍法君神色自若後察其故乃深器之古州苗香要叛上命刑部侍郎錢公維城等平之君當鞠其獄錢公意向嚴議不合反復庭辨議雖未行錢公亦因是重君其不爲威惕有如此在甯朔兩遇計典皆上考會巡撫保舉堪升知府君名未列或有爲君謀者曰以黃金二鎰畀予太守可得也君笑謝之未幾巡撫去後巡撫來稔君名取前所列者盡易之遂爲舉首固原夙稱肥饒至者率侈靡相矜尙君一鎮以廉靜民誦其清浙江之漕爲天下弊蔽民間每倍蓰以納羣情恂恂往往致變上官利其入置弗問吏益肆君誓於神不名一錢請大吏剗革諸陋規殆盡大吏心弗善卒莫能奪也其不爲

利動有如此甯夏濱大河舊有漢唐二渠引水溉田 國朝又疏
大清渠爲全郡利宣洩失當輒橫決君在甯朔久悉力治之渠遂
無患所建橋闡邑人皆以周公名焉太原縣風峪口隄向禦山水
衝激歲久而廢水漲則悉注於田奸民多占荒自利君勸下流得
汾河知水無所歸隄雖復不可久引而注於汾則其上又民田難
徑達乃與民議曰吾將以若田濬河令縣民倍償若價可乎民皆
踊躍七日而工竣浙之海塘弊與漕等君按籍稽工料吏毋敢欺
時石塘工猶未竣夏秋間猝遇風潮舊柴塘多損齏總督某欲徙
之於數百丈外君固爭相持者二十餘日巡撫以兩議詢在工諸
人無敢決君奮然曰數百丈地縱橫計之幾十數里居民廬墓參

錯其間毋論格於事勢且柴塘距海遠近已繪圖進 御一旦

翠華臨視按圖詢之何辭以對必欲移建請入告或以公牒飭某則可總督始語塞其督石塘工晨起卽露坐工次夜分乃就館舍雖寒暑疾病不稍輟其勤心民瘼有如此永甯梁甲婦毒其夫死將成讞按察下君復訊則甲與鄰張乙有隙乙之兄爲州胥與乙毒狗藥置甲飯中陷甲甲死胥誘婦使自誣婦竟自伏至是始雪大庾陳氏婦與姑前夫之子同居前夫子謀陷婦逐其夫爲吞產計乘翁死以毒誣之君覺其冤視所餘藥則雄黃也又取相驗白金簪拭之垢隨手去因窮治得實其詳慎折獄有如此甯朔歲祲羣不逞者晝掠人物市中大駭肆盡閉將軍且令副都統帥兵來

城下君急擒不逞者榜之衢止兵毋入城曰勾耳不足煩兵願速歸告將軍也靈州災將議賑上官遣試用令覈戶口州民譁曰吾儕朝夕轉溝壑尙何待令來當沈諸河令歸白知府知府使君代往至則召其民曰上官聞前令言欲盡付汝曹法吾來爲汝曹救死意若何皆應曰烏敢請惟命訖事無譁者其倉卒定變有如此君敷歷三十年所至多惠政暇則興舉廢墜以斯文爲己任故去之日士民皆見思及再蹶再起自以爲身受 重恩益矢報稱卒以過勞致疾可謂克勤厥職者矣故事 國史非大臣及言官不得立傳然如君者於古循吏甯有媿哉子中書舍人有聲與懷玉爲同官手狀以示謹條繫其事俾列家乘庶後之傳循吏者有所

考云

論曰處脂膏之地則易至傾跌況攫鋒於方銳之日乎浙中十餘年來屢有大獄官府更易如傳舍君位爲監司與節使地相偏獨皦然不與其難世皆以是爲君奇吾以爲非奇也惟不思倖免於前則其所以能免於後者固早決之矣

右別傳趙懷玉撰

梅圃君長沙人周氏諱克開字乾三梅圃其自號也以舉人發甘肅授隴西知縣調甯朔其爲人明曉事理敢任煩劇耐勤苦甯朔屬甯夏府並河有三渠曰漢來唐延大清皆引河水入渠以灌民田唐延渠行地多沙易漫君治渠使狹而深又頗改其水道渠行

得安而渠有暗洞以洩淫水於河故旱澇皆賴焉唐延渠暗洞壞甯夏縣吏欲填暗洞而引唐渠水盡入漢渠以利甯夏民而甯朔病矣君力督工修復舊制兩縣皆利大清渠者康熙年始設長三十餘里久而首尾石門皆壞民失其利君修復之皆用日少而成功遠君在甯夏多善政而治水績最巨民以所建曰周公闡周公橋云累擢至江西吉南道以過降官復再擢爲浙江糧儲道當是時王亶望爲浙江巡撫吏以收糧毒民以媚上官者習爲恆矣君素聞疾之至浙身自誓不取纖毫潤請於巡撫約與之同心撫臣姑應曰善而厭君甚無術以去之也反奏譽君才優糧儲常事易治而其時海塘方急請移使治海塘於是調杭嘉湖海防道君改

建海岸石塘塘大治被勞疾卒於任而王直望在官卒以貪敗世
言苟受君言豈徒國利亦其家之安也君卒後家貧甚天下稱清
吏者曰周梅圃云

姚簡曰梅圃乾隆閒循吏也夫爲循吏傳史臣之職其法當嚴不
居史職爲相知之家作家傳容有泛濫辭焉余嘉梅圃之治爲之
傳取事簡以爲後有良史取吾文以登之列傳當無愧云

右家傳姚簡撰

盧謙

公諱謙字搗之先世涑水人明初遷德州七世祖諱宗哲嘉靖乙未進士官至光祿寺卿以忤嚴嵩罷歸自是衣冠相承蔚爲望族祖諱道悅康熙庚戌進士官偃師縣知縣考諱見曾康熙辛丑進士官至兩淮運使世所稱雅雨先生者也雅雨先生負詩壇重望所與游皆海內勝流公承藉家學又多見老師宿儒聆其議論故學問文章具有根柢早年卽掉鞅詞場與一時作者相馳驟然入棘闈三薦不售年四十尙困一衿知科名之有命數也乃於乾隆乙亥援例官刑部陝西司郎中丙子以省覲歸戊寅再補湖廣司郎中甲申升湖北分守武漢黃德道戊子坐累謫軍臺辛卯

特旨賜環壬辰署直隸祁州癸巳授廣平府同知癸卯引疾
歸歸而頤養三年以卒年七十有三公天性孝友雅兩先生有庶
弟少公一歲公事之盡禮問視饋遺終公之身無虛日異母弟三
人公視之無間其一早卒以己子爲之後其二久客四方家皆待
公以舉火公贍給庶母撫育其妻子雖窘不自給之時甯自節衣
食不使匱乏閱數十年如一日晚歲更割產分贍之故論內行者
皆推公公之官刑部也持法平允稍有不安於心者一毫不曲徇
尤務清積案戒淹繫省波累食其福者甚眾迨官湖北聞所治漢
陽黃州方水災卽兼程以往先理賑務而後上官民得以免轉徙
又以楚俗好訟由官不爲速理乃令諸縣各簿錄案牘而親覈之

訟爲之滅江船多盜公緝獲巨贖二十餘案盜亦漸弭丁亥所至
四府被災者三公親檢戶籍先以應賑者凡若干人人應得錢穀
若干刊示張通衢而後散給吏遂不能絲毫侵沿江隄堰皆諸民
自修故恆遵水患公建議民不能修者請帑官修捍禦始堅數事
皆鑿然可爲法後官廣平雖閒曹不能自表見而濬築諸河工料
必覈實於山東巡撫建議以民夫挽漕事奉檄會勘侃侃不阿竟
罷其役尤卓然見風力故論宦績者亦推公然余生平所心折於
公者則不盡於是夫富貴者驕奢之媒也困窮者怨尤之府也庸
庸者流心爲境役無論矣一二豪傑之士意氣縱橫籠罩一世當
其席豐履厚多不免聲色貨利之是營卽或矯矯自好而趨附者

競起蠱惑之爲所移者不少矣。迨夫盛極而衰，遭逢蹇躓，下者抑鬱，佗僚如不欲生上者，託佛老以自釋，或曠達以自放，求能坦然順受者，百不一二也。況乎以少壯之年處富貴，尤易於流蕩，以遲暮之年處困窮，尤易於頹唐者乎？方雅雨先生之三爲運使也，公年方少，意所欲致，可以無所不得，顧乃刻意學問，結交老成，以克自樹立，筮仕以後，畱心經世，亦不以紛華靡麗與流俗徵逐，此其所見何如也。年近六旬，遭逢家難，顛連於窮荒萬里之外，雖蒙恩宥，再效一官，而冷署清貧，殆不自贍，公乃循分修職，不自退沮，時時以忠君報國訓誡子孫，此其所見又何如也。徒據耳目所及，舉某事以推公，所以知公者，不亦淺乎？公生八子，長蔭仁監。

生蔭澤虞膳生並早卒蔭文癸卯舉人卽余壻也蔭環虞膳生蔭
慈附監生出爲公仲弟後蔭惠庚子進士蔭溥辛丑進士翰林院
編修蔭長拔貢生女五適王弼程汝瑛王應申張江城張錯孫一
松齡孫女六蔭文等將以乾隆五十三年十月二十七日葬公於
盧家園之新阡屬余爲銘余義無可辭銘曰

金百鍊而精人百鍊而成見道者明守道者貞吾悼斯人之逝也
匪徒以姻盟

右墓誌銘紀昀撰

衛詣

己亥夏枚還武林晤玉亭衛公於陳葑洲觀察席上德器粹然知
爲賢者今春粵遊路出西江蔣太史心餘寄聲問公並云兩賢相
覲必有傾襟之樂不意到端州聞公病旋卽不起其子琬歸葬中
州乞銘其墓伏思枚於公爲部民弟樹於公爲屬吏令聞懿範親
炙最深聞公喜枚來將命家人治具張飲談十日以獨夙疴而不
圖願其之遂竟殮碟繇延以至於死悲夫豈人生一見天果靳之
耶然而七十衰翁萬里忽至又未嘗非蒼蒼者示之意也章微闕
幽非枚奚屬謹按其狀而爲之銘曰先生姓衛諱詣字玉亭河南
懷慶府濟源縣人以丁丑進士授工部虞衛司主事外補山西遼

州知州調解州再遷浙江台州府知府薦卓異受 天子知調湖
州府知府旋遷廣東高廉巡道調肇羅巡道兩署按察使年六十
一歲而薨公所到有治績遼州爲山右礪礪之地民藝黍畢多通
蕩公分別五施授種棉養蠶法置機具於堂皇誅男婦紡織鉤考
勤惰不數年布絹之利賴及他郡其守台也嵎縣奸民王開經等
篡其邑令吳某至山中笞辱之勢甚張撫軍王直望會同提督進
勦槍甲齊矣公時在省入諫曰唐虞之世治苗民遠方尙以刑不
以兵嵎縣小醜毋庸大舉詣曾至其地會審某案民頗服今雖非
本屬願往擒治撫軍壯其言許之公單騎上山令人前呼曰台州
知府衛公來羣兇素懾公名咸羅拜爲首者自反接送縣令出且

訴所以辱令故公笑曰官固不良然汝等亦當死矣皆泣曰公命之死如不死也遂縛十八人歸奏斬三人流二人釋三十餘人湖州北鄉多外省軍犯張設博局誘良家子使博而陰開小典沒入其衣服日久黨繁官吏慮捕之將爲變公偵知姓名隱而不發探知某日賽神儺會諸匪擁儀從數粉墨呼呶入城公陰乘輿抵虎穴坐命諸幹役持繩索伏四門來者縛之當卽子杖派往文武衙門充水火夫給其傭嗣後城鄉肅清公性慈少所笞督然養之所在強直不撓或大府前論事不合輒謾然斂袂而起曰衛某以爲不可上游俱嚴憚之署臬篆時治獄尤慎文案稍有踳駁申旦不寐致精神越渫體爲之衰先是公從子諱哲治者從縣令起家官

國朝通志卷之十一
至大司空以廉節惠政名諫淮海開校宰沈陽隸屬下久所聞多
端公行事益得其家風云父乾德蒙 覃恩誥授奉直大夫母商
氏劉氏 封太宜人妻周氏子四人女四人孫六人銘曰

真廉勿矜大勇勿爭髦翬衛公秉志孤行爲世甘澤爲人準繩東
甌西晉異音同稱方期大用神化丹青何圖星隕痛我黎烝儲休
啟佑天道神明必有禱禧蔭及孫曾請看化臺福草叢生

右墓誌銘袁枚撰

翁耀 張經田

翁耀字明遠湖南湘潭人乾隆丁丑進士知大名元城二縣元城當漳衛之衝多水寇耀疏下流鳩工堵築兼增衛河隄工以資捍禦擢知滄州雪冤獄恤寒賤捕天津巨盜九人於境置之法累擢陝西糧儲道值金川不靖兼甘肅逆回亂羽書旁午耀從容肆應上官倚重之三攝臬篆多平反以母年九十乞養歸卒同邑張經田字丹粟父力行官汾州知府有政聲經田成乾隆辛丑進士官內閣中書協辦侍讀除嚴州府同知調東海海防同知父憂服闋發安徽歷署甯國太平池州府同知調江南督高堰山盱工著河流分合說旗丁婦與人私而忌傭工李姓並鳩其父子讞者以爲

誤中毒經田廉得其情獄具而郡守誣以失入會李京控 詔巡撫初彭齡親鞫悉如經田讞擢思州知府調署思南民婦師邱氏二女被劫有劉二楊三詣府上狀情詞詭異詰之卽二人所爲也並吐實置諸法調署安順自鎮遠至龍里路延袤六百里崎嶇甚經田倡捐夷之嘉慶丁丑擢貴東兵備道逾年所屬大旱經田先檄府縣開倉振而後聞於上官鎮遠被災尤甚郡守朱桂植於倉穀外捐貲振粥歷三四月就食日數千人經田力主持之於古州下江清江丹江荔波等廳縣勅設養濟院十餘所坐事左遷道光四年引 見仍以道員用授貴州糧儲道改修九道溪大路建橋以濟屢署布政按察使劾銅仁令雪民婦劉氏殺子婦之冤舊有

粥廠歲以孟冬至仲春舖無依幼孩日久叢弊乃籌金生息日給
早糜晚飯加襦袴焉增孤貧院額百有五十購遵義橡實蠶種分
頒各郡縣以普其利年七十告歸又六年卒經田初主講朗江值
水災決隄障乃捐百金倡設救生船及粥廠做明人倪元璐一命
浮屠法勸以一人養一命或數十命眾皆樂從歸田後值漢陽荆
州大水災民來縣者六七萬人亦倡振如前法著有黔中從政錄
無所往齋隨筆二筆三筆各一卷踴歌行草一卷弟慧田工詩文
舉京兆試官邵陽教諭懋田祿勸知縣

右傳李元度撰

--	--	--	--	--	--	--	--	--	--

陳守誠

君諱守誠字伯常號恕堂世爲建昌新城之中田里人祖 贈資政大夫世爵父進士道生君兄弟五人君爲長以入資授浙江金衢嚴分巡道年四十卒於家娶夫人魯氏後君十日以哀卒子始識君由于姊婿夏檀園先生檀園之言曰伯常天資高邁人也十餘歲卽從余學當是時資政公以寒素起家比封君業日以殖而進士君方銳志讀書一意濂洛關閩之學君則翹然以經世才自負資政公旣篤愛之進士君教以謙退禮讓不越矩度故伯常才足以有爲而不至於跡弛卒底於用者其祖若父交成之也方檀園謁選入都君從之北來乾隆丙子赴京兆試不售乃援例出仕

於浙在任三年以愛歸遂不復出又四年乃卒此十餘年中同從遊通音問者數矣予益習君之爲人得其一二事於法宜傳君之任衢初下車見官署陳飾甚侈詢所從來吏以舊例供應對君曰吾莅任甫爾卽以是累人後何以飭屬卽日令撤之還主者其在京師也有告君者曰某邑宰沒而家落一女且失所曷拯之君立畀重金爲治裝迎入門人莫測也至則亟令拜撫爲己女出資廩以歸宦族友人汪軻窮於詩君爲置田百畝軻不善治生更出資爲納學博士賴君以給者終其身君之沒弟武選約堂守詒撰次君之行事讀者咸以爲信獨未詳此三事者故余補敘之以傳君年二十時好爲詩和阮嗣宗詠懷二十七首灑然可見其曾次君

不斤斤以文章名予所以著此者知其得力於檀園先生有素也
贊曰君居鄉鄉之人仰食於君常數十百家其他好義之事不可
更僕數予聞君之病且卒也讚頌禱祠奔走於路者晝夜不絕鳴
呼此豈能強而致之哉江省有豫章溝關會城水利願歲久湮弗
治君沒後君弟守訓偕諸昆弟以萬餘金修復之亦君之志也

右傳夢曰修撰

國朝耆獻類徵初編卷二百十一補錄

監司七

彭端淑

彭端淑字樂齋丹棱人雍正癸丑進士官至廣東肇羅道著有白鶴堂詩文集先生生而穎異壯而勤學淹雅宏通沈酣經術與弟丹林馨泉並負才名世稱丹棱三彭通籍後分曹銓部能於其職歷粵東監司所在有惠政解組後主講錦江以實學造士門下多所成就年躋八秩士林奉爲圭臬稱樂齋先生子昭麟以明經歷官郡守能世其家先生爲從父有堂公業師其曾孫女又余從子婦通門姻婭知之特詳故因論次其詩而附記之

右 國朝全蜀詩鈔小傳孫桐生撰

國朝耆獻類徵初編卷二百十一補錄

監司七

周於智

周於智字明遠號愚溪嵎峨人乾隆壬戌進士歷官河南開歸道
公在豫十四年隄防屹然民無水患後謝病歸儀封大工興奉
特旨馳驛赴工仍補原官旋病卒事 聞 上爲憫惜 賞按察
使銜 敕驛護輓歸里公言以晰理事取當機不爲膠擾亦不務
鎮靜雖盛怒未嘗有疾言倨色深謹密栗人皆畏而知敬所至有
惠政如攝在平饑民遮使者道求食公至諭甫出民謂小周老爺
許我食必得食卽散其見信於民若此又如在懷慶雪新野李矩

國朝晉獻類徵初編卷二百十一補錄

監司七

梁兆榜

梁鶴圃名兆榜廣東順德人乾隆丁卯舉於鄉辛未成進士改庶
吉上明年散館奉 旨外用得鹽山縣知縣鹽山故畿南疲邑逋
賦積十餘年胥吏盤互其中侵漁過半而二三豪猾大族依倚吏
勢凌暴莫敢誰何鶴圃既抵任卽密捕胥吏易庫銀者因隨事壞
其機牙奸不得發於是勸民自入常賦無假手胥役數月民與官
習吏益失氣歲蝗太守行部鶴圃以病不能謁守故稔鶴圃賢屬
左右善視而自往督捕鶴圃病中時問蝗何如捕已盡未或曰未

也則據席作勢起曰吾當親往止之不得則約鶴圃輿中行見蝗
飛蔽野千夫駭逐禾稼蹂躪溝塍閒無復生意雨泣曰蝗災如此
捕不盡稼盡於蝗矣捕之盡稼盡於捕者矣令之不德天降大喪
禍令宜胡毒吾民爲邑民環而觀者數千人亦泣見有祠立崇臺
間之乃所稱劉猛將軍者也曰是主治蝗輿而登旣入廟長揖曰
神是饗禋祀今蝗災稼盡令爲神羞之今請於神約三日驅蝗盡
否則令固宜以身塞無狀者神亦不得享有血食越翌日報蝗少
閒又翌日則報蝗淨邑民歡然鶴圃病亦霍然起是秋熟治鹽山
五年豪猾屏息訟獄不興斷死囚一人則引問曰怨乎曰無乃給
以棺新守某墨而恣鶴圃以清白吏聞守弗善也廉之無所得則

困以事大吏有爲鶴圃解者反以詰守守愈益憤會公譙語侵鶴
圃拂然曰士不可辱也守慚陽謝持之愈急而鶴圃已入爲主客
司主事守卒以墨敗在禮曹鹽山民走數百里謁京師無虛月果
盤麪袋孟酒豚踈歡若家人婦子都人士異之則質而語曰吾使
君也是能役神驅蝗以活吾邑民者也吾使君善病今固無恙耶
其出而爲 天子活萬民也於是都人士悉鹽山治狀鶴圃遇事
持大體宗伯倚以集事嗣以京察異等出觀察長寶道值征緬師
起過湖南晏如鶴圃力也有控茶陵牧戴保豫城工不實者撫軍
委勘鶴圃稔戴牧賢不之往控者走訴京師 特命少司寇某中
丞某往會勘時保豫已調靖州牧攷於靖矣茶陵數千人束香呼

佛號謁馬首言州主賢奈何一妄男子汗吾清白刺史會勘工果
實而鶴圃終以未經親勘被罪效力軍臺竟歿臺所

論曰鶴圃之祝神驅蝗也鹽山民人人言之其事應經義非迂怪
也昔漢循吏之治蝗不入境於鶴圃其益信乎抑必有以致此者
矣語曰厚棟任重如鶴圃者惜未竟其用云

右傳周於禮撰

國朝耆獻類徵初編卷二百十一補錄

監司七

陳琮

陳琮字蘊山南部人乾隆丙子副榜官至直隸永定河道蘊山由丞倅著績河防洊擢監司所修永定河志荷蒙 睿賞付懋勤殿存貯倚眷日隆將有總河之望高衢驟隕當代惜之

右 國朝全蜀詩鈔小傳孫桐生撰

五
十
三
二
一

國朝耆獻類徵初編卷二百十二目錄

監司八

錢受毅

王啟焜

舒其紳

趙翼

朱孝純

李調元

沈之燮

秦震鈞

陳初哲

劉文徵

龔敬身

陳昌齊

李世望

李翻

王念孫

楊煒

廖寅

子思芳

補錄

李調元

A large rectangular table with 10 empty columns and a thick border. The table is oriented vertically on the page. The columns are of equal width and are separated by thin vertical lines. The entire table is enclosed in a thick black border.

--	--	--	--	--	--	--	--	--	--

158-744

國朝耆獻類徵初編卷二百十二

通奉大夫前署江西巡撫江西布政使司布政使湘陰李桓輯

監司八

錢受穀

君名受穀字黃與一字冲齋浙江秀水人曾祖治祖槃皆不仕槃
生炯嘉興縣監生以才名中年應順天鄉試授經於今大學士誠
謀英勇阿公後病歿於京師以君貴三代皆封贈如君官君孤
貧無以爲家隨母嚴太恭人依世父母以居錢文端公陳羣君宗
老也勸之學君遂刻苦自勵補秀水縣學生沈編修昌宇督學廣
東君往依之編修卒於任復從甘肅謝太守某於安徽轉至肅州

逾二十年始歸里乾隆二十二年南巡君以賦上行在得

召試賜舉人授內閣中書舍人時英勇公以參贊大臣入爲工部尙書而錢文端公子女誠以戶部侍郎兼順天府尹方貴盛交口推君常熟蔣文恪公溥遂延之賓館俾典書記後二年庚辰成進士改庶吉士明年散館授戶部主事兼筭錢法堂君通籍後廉介食貧茹素不異諸生居宣武門外距文恪公第十餘里徒步往來未嘗僦薄笨車也所居矮屋五六椽蘆簾土銜與圖書閒雜坐客無甞不惜也旣爲曹郎精心吏治尙書兆公惠侍郎安公泰咸稱其勤能二十八年擢員外郎是時天津淀河水積日久淹及田廬兆公奉命治河以君從疏濬半年積水遂涸二十九年京察

一等入直軍機處三十年擢郎中充湖南鄉試副考官三十二年擢陝西興漢道是時雲南徼外緬甸跳梁總督楊應琚弗能制上命承恩毅勇公明瑞爲將軍兼總督討之 陛辭奏請從事詔以戶部郎中馮光熊吏部員外郎傅顯河南開歸道諾穆親及君參其軍君被 命由漢中馳入雲南抵永昌授迤東道旋調糧儲道九月明公督師自永昌發君從之出宛頂撫木邦大鞬蠻結破柵十六踰天生橋入象孔迷失道趨大山猛籠就糧賊躡之三十三年正月鑿於蠻化賊來益眾事亟明公屬君護案牘先行遂歿於陣君同潰軍入關調迤西道明年七月定邊右副將軍偕經略傅公恆復進兵奏君駐盩接應糧運暨警報往來連月大雨

君日夕在泥淖中凡五月而竣事師旋又畱君於虎踞關監守關
兵且收糧儲之在各站者又明年二月復署迤東道是時各關尙
戒嚴而總督常駐永昌君亦綜理軍需局事年餘以積勞卒於官
君生康熙五十四年某月日卒乾隆三十七年十月十一日年五
十有八娶某氏子二昌祺昌壽君卒日篋無餘財總督率其屬賻
之乃得資棺以斂而歸其喪於秀水君長身戍削疏髻而壯於頰
望之蒼然若河朔人奔走四方習於勞勩故其居官也爬梳繁劇
必盡其宜聲色嗜欲之誘一無可動而山川之險阻風雨之跋涉
兵戈之閒關輾轉怡然處之每日五更輒踰壁背誦少時所習古
文詩賦長篇不遺一字迄曉而止蓋君之不自暇逸如此君與余

同 召試同直軍機房又先後從軍於滇故得君之詳無如余者
余以四十一年四月自蜀還 朝而君之卒踰三年矣昌祺等將
以某月日葬君於秀水縣某原狀來乞銘乃銘曰
少貧而孤厥苦荼也而經營四方厥黷魴也晚而從戎以大終也
其廉吏其志士也矜此勞人信煩冤也

右墓誌銘王昶撰

Vertical text on the right edge of the table:

- Top section: 日本書紀
- Middle section: 卷之三十一
- Bottom section: 三十一

158-750

王啟焜

余族弟南明之仕於蜀也四十一年而在軍需局者二十有七年
蓋 本朝之制各省用兵則總督巡撫必設軍需局主以布政使
選道府州縣之明練者與焉凡兵將之徵發糧餉之購貯器械硝
藥之製造牛馬之轉輸道途之修治銅鐵布帛之備用將軍大臣
之往來閒員佐職之選調皆主局者先爲儲侍指示羽檄倉卒朝
夕數變亦或勝負得失所關足以驚心動魄故非熟練而有識明
幹而有守不足與於此蜀自乾隆三十一年緬甸不靖 大軍進
討始調川兵又令覓雇騾馬以協馱載至三十四年大小兩金川
侵擾鄰境用兵垂六七年迄四十一年而後奏凱尋有科爾喀之

役繼又有貴州湖南苗民逆命而湖北白蓮教蔓延陝西以及於蜀故蜀之軍需局歷久而不能撤其閒任事者先後升調或緣他故去惟南明一身檣柱其閒句稽案牘料量機宜先事億度從無絀誤二十餘年中心力蓋盡於是矣南明由監生循例報捐二十五年八月補大竹縣丞越二年調補屏山縣丞三十一年委辦枬木是年六月委駐威甯解送赴滇官兵並催解牛馬三十三年辦天壇望燈杆木三十五六兩年復辦枬木三十七年升成都縣知縣三十九年升簡州知州四十四年升瀘州直隸州四十七年升成都府知府五十二年補授川東道五十五年署布政使□□□年調全省鹽茶道□□年署按察使南明之採木三次也率吏役

數千指入蠻地數千里陟巖勦觸瘴癘所獲皆巨材稱 上意
命加二級給賞緞匹及西藏用兵成都將軍率兵進總督駐打箭
鑪籌糧運而積糧未運至五六十萬總督窘驛召南明乃議檄明
正土司曉以大義土司頭目悉踊躍牛馬鬻至不旬日糧悉起運
事 聞奉 旨嘉獎賜以花翎南明雖屢擢牧守大吏因其諳練
局中藉以爲重急則使之隨營辦事送兵督運緩則歸局總理一
切無從容閒暇之日而南明亦以孤寒受 上知奮身不顧故卒
勞瘁歿於官南明名啟焜又字東白號秋汀始遷祖富一公爲蘆
澀場鹽官繼爲白牛蕩書院山長故居楓涇涇北爲江蘇婁縣境
南爲浙江嘉善縣境遂爲嘉善縣人曾祖錫旦候選州同知祖宏

澤附貢生本生父桓父象升皆監生累 贈奉直大夫晉 贈中
憲大夫如其官祖妣妣及配胡氏皆 贈恭人子三莖福建經歷
次均皆先歿次登墀議敘州同孫三長重鈞候選主簿次鍾鈞候
選縣丞又次製錦尙幼女三長適舉人謝昌鑒次許謝某亦先歿
三適監生莊燮南明卒以嘉慶三年十月初七日距生於雍正八
年四月十二日得年六十有九以五年正月某日偕恭人葬於婁
縣秋涇濱之新阡承重孫重鈞等請爲墓志南明與余同出於太
原歲久譜軼失其世次而其家楓涇及余家青浦之珠街雖兩省
相距僅三十里自少以兄事余南明受業於海甯陳先生焜而余
鄉試又出先生本房時令如舉余與南明常在官舍以是益親南

明少時長身玉立舉止閒雅時有謝景滌張思曼之目能詩集句最工書做董華亭蜀中人弄爲墨寶簿書冗雜不忘風雅修杜少陵祠於草堂寺之側又築萍廬於署中及在夔州有三白鶴並下之巽築三鶴堂同人多以詩詠其事時詩人宦於蜀者願君光旭爲按察使查君禮王君鳳儀先後爲松茂道楊君潮觀曹君焜先後爲知州吳侍講省欽爲學政每有譙集必招南明往互相吟和又自寫載酒凌雲冊以志雅尙三十六年十二月予過郟夜已三鼓矣宿其官齋殘燭熒熒然猶出梁侍講同書所書賢首經摩挲歎息蓋其清超絕俗如此年六十後使人歸稍葺其故居又建家祠於涇西置義田五百畝以贍族人將爲歸老之計其泪沒於軍

需中如蠶作繭不能自出豈其志所樂哉重針等生晚不及知予故掇而書之其亦可感也已銘曰

生山水鄉弗克居也宦山水地弗克娛也軍書旁午手口瘡也勞人草草卒病以殂也若堂若斧雲波縈紆歸厥幽墟庶神之愉也

右墓誌銘王昶撰

舒其紳

公諱其紳字佩斯蘭剛其號也任邱人年十三而孤卽克自樹立
從伯父讀書荆門州署泛覽百氏之言發爲文章沈博絕麗弱冠
補縣學生老師宿儒競相歎異以爲必以科第世其家公亦奮自
淬礪慨然有承明著作之志而太夫人急欲以捧檄慰晚景不欲
違違母志乃筮仕乾隆庚辰得四川墊江令引 見調山東滋陽
益翹然出眾之槩 聖主已一睹而識之矣到官判決如老吏然
循循撫字仍不失儒者風甲申丁內艱丙戌補陝西鄠縣庚寅調
咸陽辛卯以恭辦 皇太后慶典入都 特授榆林府知府遷擢
最速且越階爲近年以來所希有感謂 聖主知人善任斷非無

故而破格公之才略必有深契 天心者故能邀異數如是也甲午值調陝西兵征金川委公監送果以紀律嚴明得上考丁酉調同州卽以是歲調西安西安首郡最繁劇公坐理裕如巡撫畢公嘗嘆曰古所謂悃悃無華日計之而不足歲計之而有餘者殆舒君其人耶遂舉卓異得 召對辛丑甘肅叛黨初平 上念公才特調蘭州經理善後諸事宜具中窾要壬寅擢浙江鹽法道浙人聞公數理劇郡意必踔厲強幹使人凜然畏比至乃恂恂一書生莫之測也莅事後杜絕餽遺卽蔬果亦不受又似稜角峭厲者益莫之測然公意則謂巖政在督課課出於商商資於民民足而後商足商足而後課足所謂治病者求其本也故委曲調劑不見作

爲之迹而國計民生胥陰有所裨再署臬司事不博精明之名亦不博寬大之名平心推鞫細入豪芒秋讞獄牘刑部訖無所改易蓋久之久之浙人乃知公之用心而公之精力亦盡於在浙五載中矣丁未九月以積勞卒於官卒之日上官如失左右手錢塘梁山舟侍讀介介少許可與公會無半面交公歿之後乃爲公誌墓稱以所至無赫赫名而常有去後思豈非公論具在人心哉然後知 聖主特達之知非偶然也余與舒氏爲姻家因撮敘始末爲公家傳而系以贊曰

公才足以爲能吏然而卒以良吏著蓋公本讀書人也夫窮經以致用耳仕而有濟於物斯不愧儒者矣何必以科第致身始爲能

讀書哉

右家傳紀昀撰

八

趙翼

嘉慶二十年秋九月趙氏廷英昆仲等來金陵乞撰其尊甫甌北先生墓誌先生與予同里有姻聯又爲詞館前輩生平游處甚熟知其學行尤悉不可以不敏辭按狀先生姓趙氏諱翼字耘松號甌北常州府陽湖縣人其先有名孟堙者爲宋宗室元末官高郵州錄事因家常州五傳生敵明景泰甲戌進士歷山西山東按察使七傳生州爲先生曾祖生福臻又名斗燿 贈儒林郎爲先生祖生惟寬 贈中憲大夫爲先生父配丁太恭人生先生及弟汝明汝霖趙氏遷常久家中落父中憲公以授徒爲生計先生生有異稟三歲識字十二歲爲科舉文一日輒成七篇時令甲末以詩

試士特好爲之兼爲古文十九歲入縣學游學都門才名動輦下
劉文正公時爲總憲延至家纂修 宮史以直隸商籍入學中乾
隆十五年庚午科北榜舉人補官學教習十九年會試中明通榜
用內閣中書明年補官又明年入直軍機尹文端公傅文忠公皆
倚重先生扈從 行在或伏地草奏下筆千言文不加點一切應
奉文字非先生不辦二十六年中辛巳科進士 殿試呈卷第一
高宗皇帝以國朝已來陝西未有狀元遂以第三卷互易卽王
文端也授翰林院編修明年京察一等記名在翰林時任撰文修
通鑑帽覽壬午科分校順天鄉試乙酉科爲順天武闈鄉試主考
官癸未丙戌科俱充會試同考官得士尤盛三十一年冬授廣西

鎮安府知府府境極邊民淳訟簡而常社倉穀有出輕入重之弊
粵民償穀以竹筐以權代槩有司因購馬濟滇軍別製大筐斂穀
事罷遂以爲常民苦之先生開府倉聽民用舊筐自權以納穀於
是民皆持羨穀以去飲食醉飽權聲溢闔屬城有控橫斂者則
縛其監倉奴及書吏痛懲之鎮安民由是感激每出行爭肩輿先
生過其邨送歷他邨亦如之老弱饋餉雞豚酒醴先生辭之不得
無煩縣令供頓矣其後有爲先生立生祠者會以辦案不合總督
李公侍堯意幾被劾適有 特旨令先生赴滇參軍事是時明將
軍瑞征緬甸失事殉難緬酋遣使求和副將軍大學士阿公里袞
奏其事 上不許時阿文成公桂以總督來將軍大兵停征奉

命以偏師勦南坎頓拐等處兩將軍出行令先生守大營護將印一切緩急應援皆得便宜行事及大學士傅文忠公來滇經略兵事議以大兵渡戛鳩江進剿卽大金江上流也令提督以偏師五千從普洱進遙爲聲援先生謂戛鳩普洱相去四千餘里大兵旣渡戛鳩之西則偏師宜由江東岸近地進取猛密夾江而下造船以通往來庶兩軍可以互應遂如先生言入告其後渡戛鳩之兵遭瘴氣多疾病而阿文成公所統江東岸一軍獨完又以此兵敗賊於蠻暮老官屯卒以蔽事時三十四年也明年調守廣東廣州府先是總督李公固欲調先生使他守諭意先生不可曰鎮安天子所授吾受上司恩調善地他日何能自行其志至是人服其

能自立云海盜拒官兵而竄盡獲之得一百八人按律皆當死先生念諸盜無殺人案乃條別其輕重戮其魁餘多遣戍者其他平情折獄類此明年擢貴州貴西兵備道威甯水程兩鉛廠舊由糧道管轄大小官吏漁利虧空案發巡撫司道以下多罹重辟因改令貴西道經理先生以立法方始凡短發工價運費諸弊盡剔除之又催在途未運銅斤速抵蜀省上司方以是爲先生功旋以廣州讞獄舊案奉部議降級奉旨送部引見當路欲奏畱先生先生以母老力辭歸里侍養者五年暨終制遂不復出五十二年閩督李公侍堯征臺灣過常州邀先生贊畫軍事偕至泉州李公故精嚴事少寬假先生閱歷兵事久謂惜費則成功遲而費轉多不

惜費則成功速而費轉少凡軍裝口糧一切擘畫從寬濟軍爲李公繕摺奏請得旨軍皆挾纊時賊初起提督等率兵過海前督常公青來將軍督師咸謂不日蕩平先生難之告李公宜以實情上達并函書廣督調兵待用及大兵不利總兵爲賊所陷游擊被賊果賴粵兵以濟李公以是服先生預策之善事平欲奏起先生堅辭乃止先生年過六十歸後以著述自娛主講安定書院往還平江一帶所至名流傾倒傳寫詩什江左紙貴同時袁大令枚蔣太史士銓與先生齊名如唐之李杜元白而先生高才博物旣歷清要通達朝章國典尤邃於史學家居數十年手不釋卷所撰廿二史劄記鉤稽同異屬詞比事其於前代弊政一篇之中三致

意焉所爲詩無不如人意所欲出不拘唐宋格律自成一家凡撰
陔餘叢考四十三卷廿二史劄記三十六卷甌北詩集五十三卷
皇朝武功紀盛四卷簷曝雜記六卷唐宋十家詩話十二卷論
世者以爲 國家中葉極盛之世文章耆壽必有應運而興爲一
代冠冕先生其人矣方先生七十時兩江總督費公涇漕督蔣公
兆奎皆出先生門每過存先生咨詢風土言不及私兩公益重先
生嘉慶十五年庚午科鄉試先生八十有四重赴鹿鳴筵宴奉
旨賜三品冠服先生素和易生平無疾言遠色服食節儉家稍豐
裕凡少賤時有德於先生者皆厚酬之曰財債當償心債先不可
負也里中偏災則捐千金爲措紳倡至十九年四月十七日以疾

終於里第春秋八十有八配劉恭人繼配程恭人皆溫恭淑慎治家勤儉族黨無閒言先後卒在先生前側室蔣氏子廷英候選同知廷偉縣學生先卒廷俊縣學生候選通判廷彥府學生候選鹽運司經歷女長嫁國子監生沈景蒼次嫁邑庠生金裕恩次嫁候選州同湯詒憲次嫁江西試用縣丞高德葆次嫁國子監生盧慶錄次嫁直隸試用從九品蔣純健長孫公桂直隸候補縣丞次忠弼次慶齡次申嘉次鳴盛次公樾次景謨次覽次鴻文次僧善曾孫長增口次增榮次增祿次增祥廷英等以二十年十一月五日葬先生於馬蹟山丁太恭人之昭穴附以程恭人先葬劉恭人於下程橋已四十餘年以遺命不復遷附銘曰

出奇無窮公之文乃以筆陳籌三軍決勝帷幄辭書勛翩然歸里折角巾桐鄉樂社俎豆陳瓣香不墜韓杜親安樂壽考完其真松邪柏邪五湖濱死而不朽元氣存

右墓誌銘孫星衍撰

先生姓趙氏諱翼字耘松號甌北常州府陽湖人也生三歲日能識字數十二歲學爲文一日成七藝人皆奇之乾隆庚午舉順天鄉試已而選授內閣中書入直軍機大學士傅文忠公汪文端公咸倚重焉辛巳成進士殿試進呈一甲第一而陝西王文端公杰居第三 純皇帝謂自國朝以來陝西未有以第一人舉者遂易文端爲第一而先生之才則固已 心識之矣丙戌由翰林編

修授廣西鎮安知府鎮居廣西極邊民瀆訟簡而倉穀出入吏緣
爲奸先生痛革其弊鎮民悅服每巡行邨民輒舁入其邨謂我公
至矣奉酒食爲恭敬所治皆如之先是鎮民與安南民入雲南土
富州爲奸事發捕獲百餘人而其魁農付奉願逸去前守以是罷
官已而付奉死於安南獲其子并獲其尸驗之良是總督李公侍
竟疑其爲前守道地不之信先生申辨李怒劾之適 朝廷用兵
緬甸 命先生赴滇贊畫乃追劾疏還明年返鎮李公乃示意監
司欲先生稍折節而移之守廣州自助先生不肯遂以他屬而適
奉 特旨調先生廣州監司乃服先生之有守也在廣州決獄平
獲海盜一百八人按律皆當死先生詳讞分別殺三十八人餘道

戊辛卯擢貴西兵備道而以廣州他讞事降級調用先生遂乞養
親而歸丁未臺灣民林爽文作亂李公赴閩辦軍事道過常邀先
生偕往時兵將雲集咸謂不日蕩平先生詢察情形亟請李公密
調粵兵爲備旣而總兵郝壯猷敗遁遊擊鄭嵩被殺賊勢大振而
粵兵適至人心始安已乃籌海運增雇值給衣裝奏輒報 可李
公夙以綜覈爲政先生每事濟以寬大迄事平先生之力居多始
先生贊畫滇軍傅文忠公爲經略進征緬甸議大兵由夏鳩江進
而命提督五福由普洱進先生曰夏鳩普洱按圖相距不過三寸
而實去四千里而遙兩軍旣進聲息不相聞進退維谷此危道也
大兵欲渡夏鳩河則偏師宜由蠻暮老官屯進夾江而下庶兩軍

可互爲聲援文忠從之先生之善籌軍事多類此臺灣既定李公
欲奏起先生固辭之因遊武夷徧歷浙東山水之勝一發之於詩
先生固善詩自少遊京邸歷館閣與諸賢士大夫相酬唱歸田後
朋遊故舊杯酒相過從日賦詩爲笑樂其詩與同時袁簡齋蔣心
餘齋名世所傳甌北集也其他著述凡十餘種而陔餘叢考廿二
史劄記尤爲人所稱道云先生與肅俱以乾隆庚午得舉越六十
年而爲嘉慶庚午先生年八十有四而肅亦年八十循例重赴鹿
鳴筵宴 欽賜三品銜而肅亦得四品銜乃相與會於鍾山屈指
知交零落殆盡先生喟然曰某少孤貧不自振謬以非才入侍館
閣分校多士中年游登繁劇奔走軍旅未垂白而養拙邱園上獲

緜養慈母下獲撫字孫曾今又叨蒙 上賜爵秩逾等生人之遇
可謂榮幸皆 兩朝聖人高厚之恩也相與泣然者久之今歲四
月先生卒於家其子以狀訃乃按其事而傳之先生娶劉氏繼程
氏先先生卒子廷英廷偉廷俊廷彥廷偉先卒孫十人曾孫四人

右家傳姚鼎撰

雲松性情倜儻才調縱橫而機警過人所遇名公卿無不折節下
之初受知於汪文端及入中書直軍機處傳文忠尤愛其才旋以
及第改翰林數年簡放知府出守廣西鎮遠時緬甸用兵 詔選
鄰省幹才助蒐軍實君駐永昌半載會文忠將督兵采入遣之還
粵又爲李制府所賞調廣州并登薦剡擢貴西道尋以母老不復

出迄今幾三十年同時與袁子才勝心餘友善才名亦相等

右湖海詩傳張維屏錄

先生撰廿二史劄記攷證精審持論明通又撰陔餘叢考一書雖未及顧氏之日知錄錢氏之養新錄然於文字事物之間或究其源流或證其譌誤不特多聞之有助亦爲解惑所取資又撰皇朝武功紀盛一編以連篇累牘所未能備述者而簡括出之亦足徵史才也惟簞曝雜記體例稍雜然國家掌故及滇黔各省土風物產皆略可藉以攷見蓋凡先生所撰著均能使人增益見聞通知時事較之斷斷考據於無用之地者似爲勝之

甌北先生晚歲退閒取唐宋諸家全集再三展玩尋繹得識各家

獨至之處故所撰歐北詩話抉摘精微指陳得失語多切當非僅見方隅橫生議論者可比也其論列詩家梅村之後獨舉初白蓋飭白之詩空靈變化有廣大教主之風先生詩與之相近故不覺爲鍼芥之投然合觀全體漁洋之高秀竹垞之厚重初白亦有所未逮惟初白生當王朱並峙之時獨能陶冶性靈自成面目此所以爲不可及而先生舍王朱而特舉之亦可云獨具隻眼者矣

右聽松廬文鈔張維屏撰

朱孝純

朱孝純字子穎號思堂漢軍人乾隆壬午舉人官至兩淮鹽運使
著有海愚詩鈔

科場撥卷受撥者意多不愜此亦人情然亦視其卷何如耳壬午
順天鄉試余充同考官得一合字卷文甚工而詩不佳因甫改試
詩之制可以恕論遂呈薦主考梁文莊公已取中矣臨填草榜梁
公病其何不改乎此度句侵下文改字題爲始吾於人也四句駁
落別撥一合字備卷與余先視其詩第六聯曰素娥寒對影願免
夜眠香題爲月中桂已喜其秀逸及觀其第七聯曰倚樹思吳質
吟詩憶許棠遂躍然曰吳剛字質故李賀筌篈引曰吳質不眠倚

桂樹露腳斜飛溼寒兔此詩選本皆不錄非曾見昌谷集者不知也華州試月中桂詩舉許棠爲第一人棠詩今不傳非曾見王定保摭言計敏夫唐詩紀事者不知也中彼卷之開花臨上界持斧有仙郎何如中此詩乎微公撥入亦自願易之卽朱子穎也放榜後時已九月貧無絮衣蔣心餘素與唱和借衣與之乃來見以所作詩爲費余丙子扈從時古北口車馬壅塞就旅舍小憩見壁上詩剝殘過半惟三四句可辨最愛其一水漲誼人語外萬山青到馬蹶前二語以爲雲中路遠巴山色樹裏河流漢水聲不是過也惜不得姓名及展此卷此詩在焉乃知針芥契合已在六七年

前相與歎息者久之子穎侍余最盡禮歿後其二子承父之志見

余尚依依有情翰墨因緣良非偶爾何嘗以撥房爲親疎哉

右灤陽續消夏錄紀昀撰

子穎爲都統龍翰之子承其家學能畫尤長於孤松怪石擅逸氣鬢髯不多有兩莖緣脣而下長二尺許風吹飄然撚之頗自意也作令四川獨遊峨眉經旬乃返後以迴避當量移他省時大兵方討金川子穎單騎赴營觀戰關久之而去其倜儻奇偉如此愛朋友凡知名士如姚郎中姬傳王太守夢樓皆所深契者晚爲揚州鹽運使方欲招致大江南北諸賢爲文酒之會而遽以風痺解職姬傳謂其不可一世之氣勃然動於紙上夢樓謂其豪宕感激之意屢見於詩者信也

國朝孝廉列傳卷之二

右蒲褐山房詩話王昶撰

孝純工山水知泰安府時曾作泰岱全圖

右墨香居畫識馮金伯撰

李調元

李調元字兩村號醒園四川羅江縣人乾隆癸未進士由庶吉士改主事歷官至直隸通永道著有童山詩集

兩村觀察性好金石尤喜藏書嘗刊布蜀中先賢著述自漢迄明罕傳祕本彙成叢書名曰函海專以表彰桑梓嘉惠後學意甚善也暇時涉獵詩畫畫學小李將軍不失法度

右墨林今話蔣寶齡撰

兩村觀察襟懷瀟灑跌宕不羈家藏書多至萬卷嘗輯函海一書卷帙繁富又愛才若渴撰兩村詩話人有一聯片語之佳者輒采而錄之

右聽松廬文鈔張維屏撰

沈之燮

觀察沈公肫胎名族通曉時務起家州縣累擢監司與上官意不合拂衣而歸優游鄉里者十有五載貴而不驕鄉邦以爲矜式予比年假館吳門暇輒訪公談諧竟日公長於予七歲而步履矍鑠勝予數倍常歎羨目爲地行仙今春示微疾捐館灑然若無累者公之子培嘗從予游因請予志其墓予不得辭沈望出吳興而吳中之沈尤蕃衍多達人公之先世明兵部郎中某以名德祀鄉賢再傳至 皇朝翰林侍讀學士朝初公卽學士曾孫歲貢生曾虹之孫湖南零陵縣知縣華之子諱之燮字汝枚蔭園其號少隨父任溫清之暇兼習吏事乾隆二十八年授河南獲嘉縣知縣三十

年調祥符縣三十五年遷許州知州四十年大計以卓異薦四十年引見記名卽擢山西甯武府知府四十五年調平陽府四十六年題升分巡冀甯道以四十八年引疾歸里其卒以嘉慶三年三月三日春秋七十有八卽以其年七月十五日葬元配耿淑人繼配任淑人子五人墳坊壇培均孫十人秉銓秉鐸秉鉦秉鈐秉鑿秉鏐秉鎰秉鏡秉銀秉鐔曾孫一人公筮仕之始廉幹識大體尤習於刑名其在祥符以聽獄爲何恭惠公燭所知恭惠任臬使日它郡有疑讞多委公會鞠公亦爲盡力所平反甚眾其尤著者光州兪牛兒新野李拒獨二事牛兒故無賴一夕村民阮志被竊控官言牛兒等夜行竊縛事主輪姦其婦州獲犯旣招伏矣公

以昏夜行竊何由圖姦志被縛既呼牛兒姓名當殺以滅口何又從容成姦再三詰之志詞窮始言牛兒實竊非姦乃鄰人慫恿欲重其罪以除害耳牛兒等遂得不死李拒獠者李閻氏之姪閻氏無子養拒獠爲嗣爲娶陳惟善女拒獠隱官者也陳氏不安其室逃歸者數矣一日惟善送女至壻家還至中途女復趨至惟善憤怒縊殺其女並自縊焉縣役鄭純士者索賄於李弗得乃言閻氏與拒獠通令其兄閻國祥殺之縣令入其言掠治拒獠當抵極刑獄已成矣公覆驗得其情白上司請釋三人而成純士縣令亦得罪乃有左袒新野令者謂公枉斷故出入人罪蜚語播京師部臣卽以入告 詔提人犯令軍機大臣與刑部會審公以原問官亦

赴質詢及會議日大臣頗有爲新野令地者詰公詞色甚厲公極
言拒稱冤狀申辨再三諸郎官驗拒獨受刑傷痕經年不滅皆曰
殆天意也遂以實奏請如原斷而公治獄明恕聞於海內矣公在
許日臨穎有殺人獄已審正兇擬抵矣大吏欲翻其案訊囚以好
語誘之囚曰我實殺人不敢誣好人乃止在山西再署按察使事
秋讞多從輕比嘗曰罪疑惟輕古之訓也我敢不勉乎公達於從
政雖遇盤錯恢乎有餘在豫日久最爲上官倚重亦未嘗曲意求
合其觀察冀甯入 覲日或勸以謁要人謝曰吾外吏秩卑敢游
卿相之門乎公五世祖兵部公久祀郡學鄉賢閭百數十年而公
之考繼之公乃扞建祖孫鄉賢祠以志一門盛事又特爲學士建

祠捐田八十畝以供烝嘗易簣前七日猶親往宗祠致祭拜跪如禮其治家敦族周卹故舊多可稱者銘曰

吳興之望昌於吳世德趾美慶有餘懿哉觀察名實孚親民司牧眾所愉雪冤肺石回瘠枯如唐徐杜漢張于朱輻擁節腰銀魚年未七十賦遂初元豐十老入畫圖鬱鬱佳城白日徂紀德示後久勿渝

右墓誌銘錢大昕撰

秦震鈞

秦震鈞字酉經江蘇無錫人國學生以乾隆三十二年授臨清州判踰年王倫反壽張震鈞適權州事預爲戒備而賊已至嬰城固守凡十七日賊每以大礮擊城危如累卵矢盡糧絕城竟得全擢臨清知州累遷浙江都轉鹽運使以病免復出爲濟東泰武臨道卒於官方賊攻臨清有婦女千人羅拜城下乞入城副將葉信持不可震鈞曰是吾百姓忍棄之耶竟納之居家孝友好施與其善舉甚多

右傳秦濂撰

陳初哲

乾隆五十有二年六月二十七日湖北荆宜施道前翰林院修撰
陳公永齋卒於里第春秋五十有一越三年將卜葬於吳縣某鄉
九世祖儋敏公賜塋之旁先期公之仲弟中書舍人希哲屬予志
其墓石蔣上舍業咸亦爲之請乃按故兵部侍郎蔣公元益所述
家傳敘次之公諱初哲字在初別號永齋世居蘇州之吳縣自儋
敏公以文學經濟歷官都察院左都御史爲明正統中名臣厥後
代有文學隱而未曜曾大父元揚好善能教其子大父震品學醇
厚從故學士何義門先生游號爲入室弟子 贈中憲大夫父樹
勳博通古今沈毅闊達以國學生游秦閩聞公卿皆折節延爲上

客相國尹文端公總督兩江尤器重之嘗語人曰立嚴有體有用
人也以公貴 封中憲大夫公幼有異稟弱冠已負文譽補元和
縣學生乾隆二十五年舉鄉試益潛修古學與仲弟希哲以詞賦
相淬厲吳中有二陳之目三十年 聖駕南巡昆弟並以獻賦
召試行在仲弟名列高等授內閣中書而公以論誤寫一字置乙
等亦得文綺之 賜三十四年會試中式 廷試條對詳贍纒纒
千餘言而書法尤端重不苟讀卷大臣擬列第二 上嘉其切直
特擢第一元和分縣以來登狀元者自公始而封君與王太恭
人具慶在堂年未及耆鄉閭誇爲盛事授翰林院修撰分習國
書公一過目卽曉其竅要閱二年散館復列第一 上喜曰漢人

中不易有此尋充方略館纂修官入直武英殿兼協修起居注益以勤慎稱三十八年 詔開四庫館公復與修纂每校一書畢卽條其撰述本旨評論當否悉中冑繁時館臣例得薦騰錄生數人公所舉皆寒素士總裁諸城劉文正公新建裘文達公咸歎其公正尋充文淵閣校理再充會試同考官一充陝西鄉試正考官兩遇京察俱列一等四十三年 特旨授湖北荆宜施道甫莅任遇歲歉卽捐廉以振饑者明年江水暴漲溢沙市隄公令吏民載土囊權塞之親履隄上督視七晝夜水漸退民居得無恙又明年出俸錢加築隄益以固歲旱依春秋絲露祈雨法又步禱龍神廟兩應時降荆州向有權關使者歲一更易稅額屢缺 上令裁去

以大吏兼轄督撫奏公領其事檢束吏役勿分外需索稅額既足
商民亦無怨言四十八年丁王太恭人憂奔喪旋里越二年又丁
封君憂殯斂之禮壹遵古法故宅在城東隅公與仲弟各拓數楹
以爲封君娛老之地至是遵遺命悉以讓季弟同哲而各買新宅
公所居在古雪衡於屋旁築樓三閒擬奉先人粟主爲家祠而庭
中稍置坡石顏曰小蓬瀛有栖心物外之志工垂成而奄忽下世
悲夫 國初詞臣沿明舊制凡進士第一人無外用者 今天子
慎重吏治內外一體遂有以大魁而授監司者自會稽梁公國治
鎮洋畢公沅及公而三然兩公皆曾轉坊局公直以修撰得之以
是知 上之將大用公而銜恤痛深旋復摧折此朝野所深惜者

也公初娶張恭人壬申舉人鵬之女早卒繼娶蔣恭人例贈奉政
大夫仙根之女善文翰庀內外事甚飭人以爲得賢內助子兆雄
早卒次兆炎孫若芝俱幼公以儒學登上第而內行滄備孝友任
卹人無閒言家居不喜與長吏還往亦不臧否人物遇故舊謙抑
自下識度宏遠人莫窺其際詩文冲和恬雅似其爲人書法似顏
魯公晚年不輕下筆友朋得其寸楮爭藏弄之銘曰

鳳翔千仞鵬搏九霄毛羽旣成攬身最高木天芸閣珠玉揮豪匪
惟文章經濟克劭盤根錯節小試孟勞霖雨一滴膏澤崇朝温飽
匪志行誼足式歷試無玷斯爲全德天不假年中道而息大名旣
成遑爭晷刻鬱鬱佳城儔敏之側青松白雲垂聲無極

右墓誌銘錢大昕撰

劉文徽

公諱文徽字予受號荷池一號淑庵行八寶慶府武岡州人也先世居江西安福縣之前溪明屢遷至武岡遂占籍焉世有隱德曾祖明經諱源昌祖處士諱之儀父庠生諱鼎璟皆以公貴 贈如其官公生而穎異幼入塾不與羣兒戲甫長下帷攻苦鑽研六經宋儒之書旁及諸子百家寒暑不輟古文好昌黎南豐時文好震川海陽每一篇出沈雄精奧權奇倜儻鄉之老宿皆斂手以府試首補弟子員食餼於庠試輒高等戊子舉於鄉己丑成進士辛卯殿試除戶部額外主事補江南司主事有聲省曹閒歷貴州司員外晉雲南司郎中己亥癸卯兩次京察皆居最記名以道府用

甲申補河南府知府值睢州二汛漫口公聞馳赴鉅工督屬縣照分段濬引河一例深暢副合龍限其後河患醜渠再興役俱迅蒞事元臣視河者咸稱其能公察吏持大體不苛刻屢治重獄無枉縱偃師武生某暴橫里中奪人妻虐其夫幾死縣僅擬城旦公憮然曰此而不痛懲無怪奸民輕國法也論改遣新疆三川猾徒始屏戢郡有周南書院公以諸生文體卑鹵擇師教以法而自嚴甲乙豐獎予遂振起購大木建狄梁公祠於院後掘地得前明福宮柱礎十基益固棟宇赫然訪得梁公後裔居谷水鎮者予以冠帶奉主人祠俾隨諸生行禮觀者如堵丙午戊申己酉三科登賢書者七人前此未有也中原癸卯甲辰大旱赤地千里風日蕪灼公

奉檄河北散籽種兼撫卹晝夜馳數百里歸蠲戒設壇祈雨東郊
九龍臺高二百尺井居臺半素靈異公捧金盃率僚屬科頭行烈
日中登臺乞水奉諸壇有進秦隴開辱泉驚龍致雨法曰刮潭公
曰吾必試之灋河小龍泉是日徒步出郊士民千餘採香捧公以
行丞徒鼓勇剌水鼓震震邨山動未幾雲大合雨隨車蓋如注
民大有秋冬例煮粥賑遠近鳩鵠來數萬人公懲積弊捐重金購
米以助紳商感動踊躍爭飲米大集值長至雪降於階民相慶以
瑞雪名其堂擇紳主廠事日親詣徧嘗方散給予老幼棉襦訖事
無一餒斃者四鄰相傳以河南爲法而東都亦自是連歲慶蓋藏
矣己酉膺卓薦首 恩準晉河南糧鹽道出洛日鬢髮半白倩畫

師作洛下勸農圖紀五載勤勞意嘗謂其友曰某終身夢魂長在
嵩鞏閒也先是豫省漕幫六月始抵通州公受事俸次自衛輝移
楚旺衛洹二水之交水充裕通艘乃飛催各屬漕集兌畢卽星夜
趨行楚漕弁之積愆者以警十二月初旬卽全幫抵德州是夜大
風曉河盡凍咸以爲神庚戌春正催幫行河凍須鑿冰弁丁苦之
公禱於風神廟三日東風冰解水溢兼趨山東漕艘俱於仲春二
日抵通倉場侍郎奏 聞奉 硃批好時 駕幸 東陵公迎
鑾於小召 行宮 召見 上問豫省漕來迅故公以民艱急公
河水暢流對 上霽容曰豈止此卽日降 旨各省漕運俱以河
南爲法是年隨中丞入都辦 萬壽慶典各省道員俱跪道左

上忽問河南糧道爲誰 召公近御前詢鹽務事甚悉奏對稱

旨辛亥以僱次行署僦民居開兌不便捐貲新建曠地設倉廩無
露積患壬子河北大水奏留辦賑公復捐貲助賑並施粥及棉衣
如在東都時癸丑膺卓薦首引 見時 上詢豫省民情甚悉且

諭天氣炎熱不必謝恩速回任朕總墊記汝等公官豫凡三觀
天顏皆蒙 溫旨洵異數云嘉慶元年楚北教匪煽亂充斥襄

澗開豫帥檄公於信陽羅山堵禦公規畫設隘二十餘所迺上帥
書略云襄陽賊與孝感賊盤踞久暫不同胡家砦與平靖黃土諸
關相距各遠遠不同信羅中隔之應山 更安黃陂無賊黨民能協
力防守與鄧州有黨爲招引者不同宜審地利察賊情據要害嚴

紀律密偵謀相機剿禦是以胡家砦一平賊不敢東嚮鄧州一殲賊不敢北越得其要領也若槩於近楚一線舍旻置隘張皇驚擾且糜餉帥趨其言又上籌楚匪四策一急宣曉良民邪正大義勿甘爲賊脅從驅前列當慘戮一慎招鄉勇令老成紳士募素所信識者勿墮賊詭計冒充一急諭教官紳士開導富民榮以頂帶令助餉充軍實保邨莊一鄉勇與官兵本非儔伍宜令分途進剿以協心力勿致前後猜忌推諉債事皆中機要當事議招回民糾鄉勇公極諫回民性狡悍分之則各事生業聚之則密相號召更教以技擊如虎添翼雖暫爲以毒攻毒計而後患大不可不防迺止此尤公謀慮之遠者會桐柏新野戒嚴自募鄉勇驍健者厚給衣

食訓練奮激無不以一當百賊聞風不敢犯而公年已六十有六
久奔命炎暑溼毒中嬰勞疾日就散亂恐誤疆場急請退帥據情
入告奉 上諭劉文徵在任辦事尙無貽誤今患病不能就痊著
回籍調理未戒途遽於丁巳孟春十九日歿於公廨易篋時猶問
賊匪消息若何無一語及家事嗚呼公之才 天子旣屢嘉予矣
使天假以年必能奮戎行出奇策蕩滌妖氛以爲報效乃齋志遽
終未竟其用惜哉公宅畔古豫章一本日執卷吟哦其下有讀書
秋樹圖歿之日樹忽崩圻其半州城前明曹進士碑雷雨圻一角
數千里精靈感應亦異事也公承先志建宗祠以合族繼悉遵禮
則篤友于諸兄 覃恩賜封者二人諸姪皆令有成就鄉人仕豫

虧帑限急慨以重金代補有竟不能報者配尹恭人有淑德聞鄉
黨子四士拔候補同知士擢候補員外郎士拱士舉尙幼孫二人
公生平著述尙未彙成帙僅荷池文章詩草傳於世

論曰余與公交深客東都知治行尤悉公性坦易然遇大事侃侃
力爭無少徇大吏欲於洛城北開舊穀水渠通漚備灌溉公抗言
邙山下唐宋來久爲糧田廢田開渠失民業且成周時穀洛壞王
宮魏晉開陽渠俱受害不可行又有議鞏西與鴻溝相距二百餘
里於山谷閒鑿渠可接賈魯河通商船公又言天陵侯山亂石阻
閼勞民傷財必無成功宋時原有漕汴洛渠一事其跡久湮今黃
河南岸山壁立萬仞無可疏濬議亦寢民至今德之公嗣請余作

家傳余於傳中既詳臚禦賊諸策而附二事於後於以見公貫串
經術通達時務爲有體有用之學非絺章繪句徒取科第者比鳴
呼豈易言歟豈易言歟

右家傳張九鉞撰

龔敬身

公諱敬身字配懷一字匏伯其先隨宋南渡遷餘姚後遷杭州著籍仁和縣曾祖諱煜累贈朝議大夫祖諱茂城太學生累贈朝議大夫考諱斌邑增生累封朝議大夫例封中憲大夫妣薛氏封恭人封公厚德裕後能教其子公岐疑卽有成人度年十一遭母喪哀痛特至及長至性過人篤於父母昆弟凡與人必誠執事必敬不爲厓岸斬絕之行而其中介不可易自處約至服官終其身不改乾隆二十四年舉於鄉尋考充咸安宮教習滿三歲以知縣用三十四年成進士改官內閣中書公弟禔身亦以舉人官內閣公之謹愨禔身之穎敏一時稱兩龔轉宗人府主事職兼

纂修 王牒既成遷吏部稽勳司員外郎兼考功司事己亥充順天鄉試同考官尋遷禮部精膳司郎中兼祠祭事保舉御史引見記名四十八年以郎中俸滿授雲南楚雄府知府公居官所至輒盡職願以爲京職簿書而已太守達有司親民必民與官休戚一體呼吸相聞煦嫗其疾痛苟可以利益於民不以官易七邑之民感其誠訟者皆不赴縣赴府七邑令長亦感其誠不敢不盡心民事大吏知其能倚重之全省刑名有疑必委復讞多所平反五十二年大計卓異奏擢迤南道而公以父憂去官矣楚雄舊使民出官夫官馬減其雇值往來賓旅雜遞咸利是而民重困又夫數十名馬十餘匹日伺候堂上爲儀衛名曰站堂公曰何用此也罷

之凡夫馬悉平雇於民永禁官夫馬勒於石首縣民徐姓訟羅姓
舅姑殺其女以無賴子見屍井中爲證公使縣令鞠之井實無屍
令信無賴語窮治羅姓誣服公一日自鞠之杖無賴及徐徐不服
公令後堂引徐女出曰汝等其識此人耶二姓驚駭歎服則由被
虐逃備他鄉公早使人覘得之者也大理府突以民變聞大吏驚
勒所部兵將進檄公往度形勢時大理民以勒增鹽價爲苛政羣
起殺縣役府縣官不敢出眾聞兵且至益洶懼公單騎入眾中諭
之曰汝等皆好百姓奈何作所頭事余楚雄龔知府也來活汝汝
等甯欲活耶公在滇滇民無不知龔知府者千萬厥角環拜泣曰
幸公來何以救我公曰兵之來爲汝等聚眾也眾苟不聚兵何施

眾悉散去杖數人以復大吏其事遂靖先是滇省鹽不由商官按
民戶分鹽斂價相沿已久復議增價公議曰按戶給鹽胥役踞
民飲恨久矣若再益之虐民何以堪必滋事變至是乃更請停各
郡增價之令順甯府廠銅缺額大吏以爲憂公奉檄往勘至則虔
祀山神銅卽大旺未逾月竟足額遠近咸異之巡撫譚公尙忠嘆
曰銅無知乃識廉吏孟伯周不得專美於前矣公之歸也楚郡之
人祀公於郡城東迎恩寺 國朝百五十年郡守戶祝於是者張
公允隨及公二人而已訟棍飭永荷校者二人公行時縣釋之叩
頭舉酒於旁公曰爾不我怨而我餒乎對曰如公爲官其敢怨乎
小人從此不爲不肖矣非公政無缺失烏能姦宄格心如是五十

三年封公卒於家初封公就養都門以瀕道遠不往公常不自安
稟請終養辭旨甚哀大吏以格於例不敢奏及聞喪痛不欲生喪
畢遂引疾不赴銓偕諸弟晨昏情話種蒔花木以爲樂益公天性
孝友與弟澡身視身理身治身相愛善而視身在都同官同居如
左右手歲丙申至戊戌視身及妻潘孺人及妾王氏相繼病歿視
身次子麗正先爲公後遺孤六人履正繩正京正守正及二女皆
幼穉或初咳守正方出遺腹嘔號滿前公出入顧復之瀕則盡挈
以行養教一如麗正無纖毫別異二十年來宦學婚嫁一一頭角
嶄然履正官廣東鹽大使繩正爲諸生有名京正官南河從九品
守正官翰林院庶吉士女皆歸士族廉俸無幾不問田舍惟以八

百兩主祭祀墳墓一千八百兩主宗姻賙卹昏喪之費分委澡身
治身經理又買地桃源嶺葬族中無後者居恆誠子弟以儉曰吾
惟儉故能廉且吾節損自奉稍稍分贍宗黨不亦可乎公爲諸生
時以理學文章自任以程朱韓柳爲指歸晚年嘗以古文彙付緹
正輯若干卷藏於家生雍正十三年七月二日卒嘉慶五年九月
一日年六十六娶陳氏 封恭人 封朝議大夫諱文釗女福建
延建邵道嘉謨妹撫育遺孤某人之力居多生雍正十二年六月
十日卒乾隆五十七年四月二十四日女一適福建興泉永道潘
本義次子鹽大使立誠麗正嘉慶丙辰進士禮部祠祭司主事娶
余氏孫一自珍聘余次子驢女孫女一許字朱氏麗正以嘉慶七

年十月甲寅奉公柩與陳恭人合窆於施家村之原以公與余交
四十年知公最深請爲神道之辭余不敢辭也謹書其大端以爲
碑銘曰

古之良史最重循吏馬班之書不傳孝義惟孝能循本無二事後
世分之源流殊致我聞陽城終身偕弟以刺道州心勞撫字世風
旣澆子姪異視不有哲人何以觀世原鶴鍛羽每言灑涕諸子悽
惻吾敢不子夫人一心飲食教誨封胡羯末駢枝成器公之愛民
與子無二中夜叩天甘霖遂沛革其巫觋迪之道藝其學未竟卷
懷自闕楊播匙箸姜肱枕被兄弟怡怡湖山杖履子官於朝夙夜
無寐天不憖遺凋我善類不敢寢門哭君風義公之文章昌黎元

氣我實不文曷銘公隄刻石新阡幸無諛愧

右神道碑銘段玉裁撰

公諱敬身字配懷其先直隸涿州人後世遷浙江遂著籍仁和公以乾隆二十四年舉於鄉尋考充咸安宮教習歲滿以知縣用三十四年成進士改官內閣中書是歲公弟禔身亦以中正榜官中書每直或沐休歸必偕出入省中號曰二龔公以矜愨禔身以精敏並稱於時焉轉宗人府主事兼纂修 玉牒官歷吏部考功員外郎禮部精膳郎中舉御史記名尋以郎中俸滿除雲南楚雄府知府五十二年大計卓異擢迤南兵備道父喪去官以嘉慶五年九月庚辰卒於家公居官所至輒盡職臨事毅然持可否於大僚

無所屈節然廉簡不爲煩苛內辦而外寬屬吏無以窺其際楚雄
向設例價出民間夫馬給官使令名曰官夫官馬後雖賣客廝隸
以私出率冒用甚者輒不給價又日值夫數十名馬十餘匹備知
府出入儀衛名曰站堂民甚苦之公歎曰民困矣官又益濫法不
可常也且本府自有衙役安用此遂一切準民雇罷官夫馬示禁
勒於石滇鹽積引歲深官課不起先是大吏倡議覈民戶析引配
給公議曰引不銷鹽價貴耳鹽價貴民便於食私雖禁不爲止故
價愈增引銷愈窄莫若汰冗費以縮鹽價私鬻匙所利則易爲禁
民食官必多如是何患額引不暢銷耶按戶給鹽吏雖察難爲均
且民有羨鹽而官強予之則鹽棄物也而責其償民何以堪旣而

大理府屬果以鹽擾民倉卒聚而謀官弗能禁馳報曰民變省垣大驚督撫勒所部兵候進止以楚雄鄰郡急檄公視之時府縣官久不出民相語兵且至眾益洶洶公至屏從者單騎馳入諭之曰汝曹好百姓奈何作所頭事余楚雄龔知府也來活汝須臾兵至悉戮矣民故識公名不意卒至聞公言相顧不知所爲因環拜泣曰救我救我公乃悉遣散之返報懲數人因請禁抑配寬下戶其事遂靖順甯廠銅缺額至累萬公奉檄就勘比至適銅大旺未逾月竟足額遠近咸異之巡撫譚尙忠歎曰銅無知乃識廉吏孟伯周不能專美於前矣公聞之笑曰是偶然耳滇銅之出也設廠於四川之瀘州凡陸運至此貯焉京師所運銅皆取於廠任丞倅一

人爲厥員聞令道若府卽稽察至則厥員者盛供帳厚饋遺以爲常及公與是役秋毫無所受他日公歸里守杭州者乃昔厥員也數就公執禮甚謹語人曰龔公正人也其爲人所服如此雍正中張允隨守楚雄有功於民其去也楚雄民相與祠於郡城東之迎恩寺公之去也民亦祀焉蓋 國朝百五十年守之尸祝於其土者二人而已曾祖諱煜祖諱茂城考諱斌皆以公貴先後 封贈如公官娶陳氏 封恭人公性至孝年十一遭母喪哀毀如成人及領鄉薦北上跪請訓於父翁曰忠孝非兩事只此心耳公終身服膺焉公以弟視身子麗正爲嗣方視身歿於官遺孤子女皆幼公撫之有恩及麗正嗣視諸姪無間也公享年六十六歲子麗正

嘉慶元年進士禮部祠祭主事孫自珍夫人先公卒葬於杭州城
之北曰施家村麗正將以嘉慶七年二月壬寅奉公合窆以書來
言曰願有述同文不獲辭謹卽聞於麗正者以詮次爲之狀俾夫
有道而能文者銘焉

右行狀程同文撰

陳昌齊

公姓陳氏諱昌齊字賓臣一字觀樓雷州海康人先世由莆田徙瓊州二世祖孚中宋進士瓊州科目自孚始入祀郡鄉賢祠曾祖英相卜宅於雷凡數遷乃定居海康之南田村祖全夫諸生父龍溪恩貢生皆贈中憲大夫如先生官先生少有神童之目十一歲居母喪哀毀如成人十六歲補弟子員以選拔貢成均庚寅辛卯聯捷進士入翰林散館授編修甲午典試湖北乙未充會試同考官旋轉河南道監察御史巡視西城嘉慶丙辰升兵科給事中辛酉補刑科給事中巡視東城甲子出爲浙江溫處道己巳因事望誤部議降調遂解組歸先生遇事敢言其初轉御史也奏各省

首府宜請 旨簡放以杜夤緣直省督撫政治宜令學政隨時稽察以防弛縱京師各門宜嚴章程以杜勒索均下部議覆廣東海防舊分三路以廣州爲中路惠潮爲東路高雷廉爲西路前明倭寇來自閩海東路實爲咽喉今則中東二路爲總督提督駐劄之區獨西路僻在一隅而廉州一郡又與安南接壤海賊恃爲接應銷賊之地久之遂與陸匪連結接濟糧食器械又導之掠人口劫財物懸所得男婦姓名於通衢限日取贖近海居民稍有力者遷居避之輒訪其父祖墳墓插標勒金否則發掘無餘人人震恐先生丁巳奉諱家居備悉情狀辛酉服闋後卽據實陳奏明年又奏緝捕洋賊事宜其略云今春以來凡離海五十里內外處所掠財

帛焚廬舍劫人口不一而足其尤甚者在高州有青平墟橫山墟數百人焚劫殆盡在雷州則有海康縣牛路村陳家被劫男女七名口遂溪縣那郁村梁家被劫男女十八名口陳村陳家被劫男女八名口俱勒銀數千或至一萬兩查屢次由海上岸之洋匪率不過一二百人至行劫時輒有陸居會匪多人持械助兇每行劫後又在海濱招夥給丁壯等安家銀每人數十兩誘令下海沿海居民類皆自少採捕爲生習拳勇熟水勢向爲匪等所畏懼自經匪等招誘從匪者往往而有因思重賞之下必有勇夫可以爲盜卽可用以捕盜似宜令地方官明張告示有能相率出洋勦捕或乘匪等上岸併力殲擒送官驗實者除將所得軍械交官外其財

物船隻併陸路上或有匪黨產業一槩給予獲匪之人充賞卽已
經聽誘下海之丁壯若能設法殲擒多匪連船械等物運來投首
亦准免罪爲民一體給賞其擒獲旬引助兇之會匪確有證據者
亦照此辦理則當該匪行劫在塘汛切近之地官兵自可聞信趨
剿或官兵未到之時丁壯亦必圖賞力捕仍須令地方各官詳稽
戶口妥編保甲以清續行入匪之源於各埠頭訪擊濟匪糧物於
各市鎮嚴緝代匪銷贓以絕水陸勾連之路庶幾洋面肅清而地
方可臻甯謐矣奏入 上召見詢問再三迨之溫處新任卽飭令
各營武弁協同畫工出海繪浙閩海洋全圖繼悉備具每汛口弁
兵稟報殺賊情形及道里遠近稍有虛妄必加申飭與提督李公

長庚深相結納凡接見武員必加禮曰海氛未靖正武夫效命之日也向例擒獲盜夥多或百餘名少或三四十名除各船盜首外其餘大槩審問每年下海有無與官兵打仗有無過船接賊問者輒以爲煩先生按名喚訊無論老少不遺一人語屬吏曰問官高坐堂上不過盡一日之勞猶以爲苦武員冒險捉賊其苦更何如耶巴圖魯一等侯德楞泰奉 命按閱閩浙營伍議於各海岸添設弁兵晝夜巡邏不許一人下海令水米器具無所接濟不數月可盡斃侯風采嚴厲屬吏莫敢置對先生進曰侯未身履其地也閩浙兩省皆環海居民耕田而食者十之五捕魚爲業者亦十之五若禁其下海則數萬漁戶無以爲生激變之咎誰當任之侯默

然久之曰公言是也永嘉有胞弟誤用屠刀格兄致斃聽訟師指引認木柴毆傷刑訊十年獄未具先生曉之曰汝明驗刀傷早以誤殺援赦木柴斃命則故也非誤也訟師利汝財以延歲月耳犯大驚叩首於階曰公活我指使者實某也先生按律定擬並置訟師於法一時稱爲神明其遇事平反多此類當降調時制軍阿林保調兩江總督欲奏調江蘇辦理河務新制軍方公維甸又欲以諳練海疆奏畱原省補用先生並辭遂歸生平博極羣書嘗取漢書史記十三經注疏凡陸德明經典釋文所未備者錄之爲經典釋文附錄又著歷代音韻流變考鄰舍不戒於火並所藏書俱燼後欲重輯之而未就也戴東原先生應 詔至京一見輒心折所

校水經注先生指其譌舛處東原以限於官書未能更正常以爲恨邵二雲編修著爾雅正義成質之先生爲駁正三十餘條歸里修雷州府志海康縣志制軍阮雲臺先生修廣東通志聘先生出總纂志事兼掌粵秀書院庚辰十月通志草槩略定卽歸歸二十五日而卒年七十八歲著書已刻者呂氏春秋正誤二卷淮南子考證六卷楚詞韻辨一卷測天約術一卷臨池瑣談一卷賜書堂集六卷未刻者大戴禮記正誤老子正誤荀子正誤天學勝說一卷營兆約旨一卷囊玉祕旨別傳一卷子三人著先卒簡優貢生箎邑庠生

右傳吳應遠撰

陳昌齊字賓臣一字觀樓雷州海康人乾隆辛卯進士由翰林歷
官中允復左遷編修歷兵科給事中轉刑科給事中出爲浙江温
處兵備道部議鐫級遂歸先生治績別有記載高郵王觀察念孫
序賜書堂集曰先生於書無所不讀自經史子集以及乾象坤輿
之奧六書四聲九賦五刑之屬星算醫卜百家眾技之流靡不貫
穿於胸中故所著書如經典釋文附錄天學胙說測天約術及大
戴禮記老子荀子楚詞呂覽淮南諸書考證皆有以發前人所未
發又曰其發爲言亦皆肖其心之所得使人讀其文知其奧藏之
不盡輪寫之不竭此則通人之文無意求工自然拔俗者也今觀
先生文集不必一一求合古人而抒胸中之所欲言如見黃河九

曲知其發源者遠也

右嶺南文鈔小傳陳在謙撰

先生論學謂不當分漢宋爲二漢儒有傳經之功宋儒有體道之實漢儒所長在訓詁宋儒所長在義理且程朱未嘗不從訓詁入也謂明人言說文過於分近人言說文過於合謂今世宗漢學者失之拘墟

其掌刑科給事也疏言粵東洋匪會匪相爲狼狽屢苦瀕海民若不及時懲創誠恐釀患日深且會匪藉洋匪爲去路洋匪精則會匪自消

先生自編修至中允十餘年歷充三通館纂修官四庫館纂修兼

分校官 國史館纂修官

右登雲山房文彙張維屏錄

李世望

公諱世望字蘭臺號玉樵系出宋忠定公其後由梁溪徙崑山遂爲崑山人曾祖鳴球祖緝熙父惇歲貢生舉鄉飲大賓皆 贈如公官妣皆淑人公少積學受知於尹文端錢文敏兩公名課甚走書幣延致者趾相錯年四十七始成進士授刑部主事充提牢時捕繫山東亂民王倫餘黨又金川逆酋就俘囹圄爲滿公襪被值宿宣勤最著遷員外郎總辦秋審處引律比例如衡之平先後掌部務者爲劉文正公舒文襄公英文肅公皆倚公如左右手 純皇帝知公名授雲南迤東道丁父艱服闋補湖南岳常澧道旋調鹽法長寶道擢長蘆鹽運使乾隆丁未庚戌 翠華兩幸津淀公

登蒙 召對公以一書生受 天子特達之知不十年官至監司
位三品 恩接備厚禮賚優緝人咸爲公榮而公冰兢淵惕益矢
勤慎處膏腴之地而淡泊一如寒素其在長寶也平巇價清鼓鑄
修江隄以衛民田勘水災以請民命其在長蘆也儉以恤乏商惠
以寬丁力謹出納以杜僣漁嚴關防以絕饋送任楚時先後三署
臬使多所昭雪與甯某甲誣乙謀殺其子公廉得子論甲如律桂
陽民女爲惡少圖姦致死陰賄女家寢其獄公立寘之理其發伏
摘奸多類此所至興復書院好獎飾士類遇事盤錯殫心集慮不
敢稍有苟且 朝廷方擢用公而公遽得疾引還詠歌林泉者十
二年教子孫以禮法處媼族有恩惠以嘉慶八年九月卒年七十

有八配王氏 贈淑人子以健乾隆辛丑進士山西鳳臺縣知縣
刑部河南司主事孫三存厚光祿寺典簿培厚郡庠生增厚曾孫
二德郊德祁以健將於嘉慶某年月日葬公於某原來請銘銘曰
學早成名晚達四十七始釋褐魚縱壑鴻過風衣繡多七載中汝
分藩汝陳臬領鹽官置飛雪瀟湘水渤澥波李使君惠澤多賦歸
來闕梅窩閱一紀怡嘯歌垂八秩始返真子隆隆孫振振馬鞍山
陽吉壤新我銘公藏勒貞珉蟠根奕葉垂千春

右墓誌銘孫原湘撰

按李公乾隆
壬辰進士

臣等謹將各省情形
分列一二

臣

李翮

國家倚東南財賦而浙江居十之三大府總督浙江福建者行部過浙江所取州縣公使銀且二十萬州縣力匱則盜正帑應徵索而歲稽覈其上供之數以後歲所供揜之自前協辦大學士覺羅吉慶公巡撫浙江躬廉潔率屬歲裏所餘益帑總督徵索悉不應其爪牙支格者悉以禮遣之行之數年而浙江之財賦大贏其時左右吉慶公提綱舉凡使眾畫一者曰分巡杭嘉湖道李公翮警敏強毅君子也公山東金鄉人字逸翰曾祖忬祖爾傑皆縣學生父來鵬副榜貢生妣周氏公以乾隆三十八年進士補祠祭司主事升儀制司員外郎郎中改福建道監察御史升禮科給事中轉

吏科掌印給事中除分巡杭嘉湖道署布政使一署按察使再以周太恭人年老乞養歸後服闋赴部奉 旨發陝西以道員用旋以疾歸卒年六十有六公在禮部以清謹聞充雲南副考試官以能得士聞爲御史給事中以敢言聞有列卿之子冒得官公發其罪同官有庇囚者公亦發之 高宗純皇帝嘗下 特旨獎其伉直巡視中城北城明科教肅姦宄平道塗飭市城眾不敢犯赴官陝西抵畱壩廳教匪大至公募鄉勇拒守七晝夜賊始退畱壩獲全移駐興安奏記領兵大臣請鄉勇各守堡無調發有警則互援自是鄉勇心始固教匪不能侵多解散者在行閒與眾其甘苦上下山谷皆單騎歷險阻忍飢渴以致得疾不竟其用論者尤惜焉

始公之在浙江也吉慶公知公賢事皆取決而總督以前事銜公會公復署按察使義烏民何世來等倡邪教相署置造違禁物有以急變告者公曰此愚民耳白吉慶公毋以兵過江自馳至義烏檄府縣官次第縛之以邪教奏而總督得守備報具反狀奏之且擁重兵自福建向浙江揚言浙江縱反者當窮治吉慶公大撓公曰福建摺過浙江屬耳今浙江急驛以邪教所署置及違禁物續奏可先達 至尊 至尊知福建邀功不錄也後得 旨令總督還福建毋妄動終公去職總督未嘗能以聲色加公後一年總督之事遂敗敬初仕浙江公已交替嘗謁公公貌循循然如無所能者而浙中大小吏言及公之抗總督皆動色以爲不可及嗚呼屬

官不敢犯大府虞其以法相中耳一嚙笑一指揮不敢逆而公乃驟視其公使銀至二十萬其毒公當何如然大府之技充之至以黨逆中人止矣而公脫然始終名高身泰雖公之智計足以投抵閒隙摧落機牙然非宸扆之抑邪昊穹之右善何以至此其至此則人理天道之的然可見者也世之俯首終身如檻羊繼犬者亦奚爲哉亦奚爲哉且敬嘗計之一行省可減二十萬十行省即可減二百萬歲歲儲峙不外糜不私沒朝廷內撫諸夏外御屬國用何患不充事何患不理用充事理則有司取之於民何患不平況乎不徇大府之欲僚屬必不敢汙不屈大府之威政事必不敢暇一事就軌萬理咸備敬均可爲天下決之公之行甚修事甚

辦而此一事所係極重又敬仕浙江時所習知者故推論以表公
之阡使後世有所興起焉公配周恭人繼配周恭人側室朱宜人
子四庭芬國子監生候選州同知庭禧拔貢生南城兵馬司指揮
庭業優貢生正白旗官學教習庭英幼女三長適候選縣丞周嘉
謨次適周之勉次適候選知縣楊大勳嘉慶十五年十一月初九
日庭芬等葬公於金鄉小樓莊之兆

右墓表懽敬撰

王念孫

王念孫字懷祖吏部尙書文肅公安國子生數歲卽能讀尙書文肅公口授諸經皆成誦都下有神童之目八歲屬文偶作史論斷制有識由是文肅教之以忠恕正直立身之道且延載君東原爲之師十四歲扶櫬南歸學與行老成所不逮也服闋補州學生以大臣子迎 鑾獻文冊 賜舉人乾隆四十年成進士選庶吉士乞假歸謝絕人事居湖濱與李君惇賈君田祖汪君中劉君台拱程君瑤田以古學相勵凡四年入都改工部主事遂究心治河之道洞澈古今利弊爲導河議二篇上篇導河北流下篇建倉通運累遷郎中擢御史晉給事中掌吏科印在官十餘年凡錢局諸差

及京察外任傳滿保送知府皆力辭識者嘉異之嘉慶四年 仁
宗親政之始先生疏劾宰輔某是時不乏彈章惟先生疏援据解
義最爲得體特蒙 嘉納海內爭傳誦焉是年春 命巡淮安漕
秋又巡濟甯漕盡汰陋規道路所經有關吏治民瘼者皆奏之蒙
採納施行尋授永定河道積弊一清六年夏大雨彌月水漲溢奪
職逮問尋奉 諭曰水漫過盧溝橋面不但人力難施亦非意想
所及王念孫可加恩發河工效力七年督辦河間漫工 賞六品
服暫署永定河道八年 諭曰王念孫於水利講求有素可賞主
事銜畱直隸周歷通省有關涉水利事宜悉心紀載交直隸總督
彙奏辦理乃上書總督顏公檢臚陳議輔水利顏公據以入告會

河南衛家樓河決 命隨賈尙書清查勘且籌新漕又 命馳赴
台莊隨同尙書吉綸治河務尋奉 旨署山東運河道九年實授
在任數年查工剔弊節帑數十萬十五年調永定河道 召詢河
務甚悉甫旋任東河帥請啟蘇家山開引黃水入微山湖以利漕
運 召入都決其是非先生奏引黃入湖不能不少淤原非良策
然暫行無害並陳運河情形皆 詔許之是年永定河水復漲溢
先生自引罪得 旨以六品休致時年六十有七道光五年 詔
曰王念孫年登耄耋重赴鹿鳴筵宴洵屬藝林嘉瑞可賞給四品
銜以光盛典是時年八十二矣十二年正月子引之官禮部尙書
以先生病奏請給假蒙 宣宗皇帝召見垂問明年九十歲宜善

爲調養且 諭以服人獲之法越數日卒先生初從東原戴氏受
聲音文字訓詁遂通爾雅說文皆有撰述矣繼見邵學士晉涵爲
爾雅疏段進士玉裁爲說文注先生遂不復爲撰廣雅疏證三十
三卷凡漢以前倉雅古訓皆搜括而通證之謂訓詁之旨本於聲
音就古音以求古義引伸觸類擴充於爾雅說文之外無所不達
然聲音文字部分之嚴則一絲不亂此蓋藉張揖之書以納諸說
實多揖所未及知者而亦爲惠氏定宇戴氏東原所未及古音自
顧氏江氏戴氏皆有考正金壇段氏分十七部爲益精段氏之分
支之脂爲二部也發前人所未發先生昔亦同見及此因段書先
出遂輟作然先生所分乃二十一部按之羣經楚詞斬然不紊更

有爲顧段諸家所未及者尤精於校讐凡經史子書晉唐宋以來古義之晦誤寫校之妄改皆一一正之著讀書雜誌八十二卷分逸周書戰國策管子荀子晏子春秋墨子淮南子史記漢書漢隸拾遺凡十種一字之徵博及萬卷其精覈如此先生性方正居官廉直不受請託畢生以著述自娛學者稱石雁先生善善惡惡出於至誠喜怒必形於色教子幼以朱子小學諸書長以經義長子引之能傳其學

右事略李元度撰

丙辰元日 上旣受禪和坤以擁戴自居出入意頗狂傲 上待之甚厚遇有奏 純廟者託其代言左右有非之者 上曰朕方

倚相公理四海事汝等何可輕也。坤又薦其師吳稷堂省蘭與
上錄詩草說其動靜。上知其意吟詠中毫不露圭角。故坤心安
之及。純廟崩後王黃門念孫廣侍御興等先後劾之。上立命
儀成二王傳旨逮坤並命勇士阿蘭保監以行。坤毫無所能爲。控
制上相如縛庸奴。真非常之妙策。恭讀。味餘書室彙中。唐代宗
論有云。代宗雖爲太子。亦如燕巢於幕。其不爲輔國所譏者。幾希
及。帝卽位。若苟正輔國之罪。肆諸市朝。一武夫力耳。乃舍此不
爲。以天子之尊。行盜賊之計。可愧甚矣。乃知。睿謀久定於中。

右錄宗室昭榘撰

楊煒

君姓楊氏諱煒字槐占一字星園五世祖兆魯福建布政使參議自無錫遷於郡爲武進人曾祖企震直隸新河縣知縣祖振裕考授州同知考良弼福建涪州場鹽大使君生而穎異年十七補陽湖縣學生員名在第三時一二名爲君從兄倫及同姓印曾有三楊之目丁酉中順天舉人戊戌成進士改庶吉士散館以知縣用選授河南柘城時妖民王景亂初定民多流亡以時勸耕撫卹備至方旱禱雨輒應又開濟瀆池邑中田疇被其利調署商邱縣民張景仲一日仇殺十八人傷六人亟往捕景仲已自投至執兵直入縣門見君伏地請死曰是二十四人皆漁利虐貧民民負此曹

錢僅三百索利十倍時來詬辱且詈及民母母憤且病故盡殺之
君疑非實曰官非素有德於民民亦安肯來就死地等死耳焉用
飾辭哉然知縣例免官奏上有旨改革職畱任調固始城圮宜
亟修君恐稽時日捐俸爲倡不兩月而工畢以母憂去免喪選直
隸平鄉擢江西南安同知調袁州巡撫知其能畱審積案署饒州
知府餘千人黃景成者爲盜賊淵藪黨以千計莫敢捕君至三日
卽以計鉤致一郡稱神明調署南昌初甯州民劉聯登滋事州改
爲義甯而匪籍田畝多爲奸民侵占更數州牧不能理巡撫以君
攝州事曰此非君不辦君卽日之官剖決新舊獄訟觀者悅服然
後出行各鄉據籍履勘無敢欺者萍鄉饑民作不靖守令飛檄申

報巡撫令君速往且謂事苟便則爲之毋數數請命君召爲首數人責以大義更勞苦之曰大府知汝飢且奏請開倉發粟矣於是袁民歡呼解散大府益契之保堪勝知府南昌缺人例於各府中揀選調補君已奉升授所遺員缺之 旨督撫復彙請卽以君補南昌遽蒙報 可蓋異數也省會事繁庶獄由此定讞君悉心研鞠期於各當後以樂平民朱夢蘭代人輸米稅爲奸利巡撫委君與饒州守樂平令參聽讞旣定其黨走京師控愬 上命兩江總督提審總督故好事有先入之見欲坐樂平令罪以君當承審奏請解任於是率司道坐堂皇儀衛甚盛提審諸守令解任者眾皆屈膝君獨依會典庭參侃侃陳說無所屈總督怒曰是南昌知府

國朝書林卷之三十一
逢迎上官攬持審案者耶君曰燁不才承乏首郡上官委之聽獄
豈能故諉公卽燁上官使工逢燁不知自公始乎總督大怒罷
審越日以承審草率入奏坐革職以恩准捐復加捐道員分
發廣東候補請訓時上知翰林出身當歷郡縣諭曰好爲
之但正己率屬道比知府易爲也初署南韶連又署高廉時福建
海盜蔡牽竄突高廉境君隨總督進剿牽旋逸去君留廉州防堵
久之得替廉州獲盜五百名檄君訊虛實弔月而竣旋署按察使
凡兩月餘結案逾二百時廣東蠶戶張保烏石二爲洋盜分東西
路游奕總督百齡公自勦張保檄君仍攝高廉當烏石二與總兵
樊君雄楚酌度事機簡練鄉勇外則招徠裔從內則嚴備制禦電

白尤盜船出沒君時時畱駐投誠者以千計盜眾相戒不復登岸
烏石二之就戮君實多方招之及將來降張保度先之者受上賞
遂先降於香山并誘擒烏石二以自贖使非君烏石二不至張保
亦不能速降而君未嘗自言其功且未嘗以大吏之混其功爲言
也調署雷瓊往來外洋以搜索餘黨爲事在粵八年權按察鹽運
及各道者前後凡十次終未能真授一缺人爭惜之而君所至盡
職不以任之久暫歧視也身既久勞故一病不起君生乾隆十四
年八月四日卒嘉慶十九年正月二十八日春秋六十有六君善
書臨池無倦詩敏而富尤好次韻疊出不窮天性不飲而喜酒人
饌客必精腴聲色之好略無矯情與人交一出坦易獨於封疆之

國朝名媛詩歸卷一百一十一
威不少挫又能不矜不伐脩然自遠此則意氣識量有以過人而
非徒勿視其巍巍已也在河南兩充鄉試同考官得士頗盛所著
有西溪草堂集若干卷配蒸人徐氏有壺德先君十二年卒子鼎
高書高皆候補知府鼎高工五言詩後君二年卒女子子四人陳
彬金孝雋湯貽恩張昆元其婿也孫四人書高既乞訂君詩而墓
道之石未立復以爲請予與君及君從弟煥交自羈貫過從最數
無以辭也爰揭其大都如此

右墓表趙懷玉撰

廖寅 子思芳

余昔在京師早耳熟兩淮都轉復堂廖公之名道光三年主鍾山講席適公冢孫均觀察此地公就養衙齋觀察本先中丞兄典京兆試所得士故以通家禮識公蓋藹然仁義人也逾七旬杖履猶健無何觀察中蜚議罷官公遽旋里而觀察緣事羈未行越歲聞公訃衰絰踵門請讓神道之碑余重其誼乃敬諾按狀公諱寅字亮工復堂其號系出明功臣德慶侯永忠侯子大理寺少卿德有居蜀後有諱銳者徙順慶之鄰水至公高祖明命族始大明命生長碧於公爲曾祖妣某氏良碧生忠謨於公爲祖忠謨弟忠誥則本生祖也兩祖皆以公貴 誥贈中憲大夫祖妣馮本生祖妣杜

並 贈太恭人考貞泰經明行修好善不倦鄉人宗仰之累 贈
至中議大夫妣劉 封太淑人初公考年四十餘未有子禱於里
之華銀山生公實惟乾隆十有七年四月庚戌公承累世忠厚之
遺至性劬劬奮勵績學補弟子員旋食餼家先中落值饑饉愈窘
恆徒步數十里負米供親足爲繭裂己亥 恩科舉於鄉應禮部
試不利歸丁內外艱居閭門者十二載乙卯下第後大挑一等以
知縣分發河南尋令葉嘉慶建元湖北邪教揭竿起葉當孔道師
旅旁午公勤晝夜毫髮不累民民感悅秋奉檄赴新野軍營轉赴
唐縣葉人走籲行省攀留公仍返葉補乘葺館善政畢舉誦知翟
家井從逆響應將敵血猝率役擒渠餘駭散賊焚保安驛戕其丞

公得信馳往則已潛遁日擊流離涕霑襟乃按戶賑撫存活甚夥
當是時川陝楚豫間狼奔豕突煽動無常我兵雖屢勝隨撲隨熾
迄未得要領五年夏擾連賈邲地與葉鄰葉戒嚴公長子思芳觀
察爰也夙著武略在籍團義勇防堵闔邑賴之又隸元戎數建勳
及是省公於葉公畀任守衛事因徧閱村堡備征繕境內稍安劉
之協者盜魁也倡亂惑眾久稽誅 嚴旨督緝州郡悉竭力偵捕
公亦令長君巡歷物色之一日歸近城見二人繫馬坐樹旁語深
隱疑焉飭門者伺狀俄二人緩轡來飲肆中有識爲劉之協者以
告公趣長君易服行至則雜酒座睥睨良久出不意直持其肋斷
袴帶賊俛繫袴遂被縛并執其一公鞠得實曰敗於鄧勢孤思迂

道入南陽故過葉也亟申大吏飛章聞械至都刳磔西市上
嘉公能 敕銓部以知府處公入 覲 賜花翎踰年 命知江
蘇鎮江府鎮江爲糧艘往來要區渠岸陡隘須歲濬治否則壅
公開丹陽九曲河築牖以時啟閉漕運通灌漑尤溥頌德者比之
召父杜母遷江西吉南贛甯道兼轄關務贛處豫章上游控閩粵
俗悍慮生姦宄關百貨雲集稽察嚴則又病商公調其柔剛宣諭
化導正稅外勿取錙銖胥吏洗手前後在贛最久綜密靜鎮不爲
赫赫聲初權布政使受代還途次訪聞會昌有匪徒蜂聚卽密召
兩邑宰授機宜會哨果獲首惡置之法未幾安遠之太平堡復洩
洩縣官不能制請用兵公攜長君親莅之欲牖其蒙先自製三字

歌分布衢巷辭意肫懇愚氓見而傳誦各引去距堡單騎入剗切
曉譬紳耆憬悟咸爇香迎馬首繫其豪魏朝宗等以獻而安遠靖
公復爲條列規制剗萌芽俾蕃子姓讀者多泣下方事之殷也或
謂公可藉邀優敘公曰民失教內訟不暇忍以數萬生靈博升階
神鬼容乎其盟心矢寬愛如此尋授兩淮鹽運使鹽引額銷兩淮
之數甲天下而私梟出沒丁乏商困鹺政壞公履勘場竈卹貧窮
通廢滯精釐剔嚴勸懲設誠致行生理殷軫故所在爭赴屆歲除
一夕納課至二百萬蓋前此未有也十有八年滑縣軍興責餉急
公籌畫百端源源催解用頓饒淮南北災石米錢六千殍亡相屬
公捐俸倡賑諄勉羣商輸廩穀咄嗟立辦哀鴻漸蘇喜振拔單寒

風雅士有加禮既增孝廉堂膏火員額人才輩出暇輒偕名流分
題聯詠新希賢詩社於桃花庵文采照一時滑之役制府百文敏
公恐賊南竄雅知長君才調往徐州協禦俄委同候補令王君鳳
翥購覓大逆劉第五而導者熒聽誤收繫名姓符者一人致罹重
譴公坐失察遂鐫級然引見猶準降捐道員長君亦蒙宥尋長
君卒於吳門公哭之慟因乞假展墓自是公垂老無復出山之志
矣竊嘗綜觀公宦跡若與賊爲始終得賊而擢得非賊而休邪教
蔓延股糾錯殲一隊長必師武臣力經艱劬而後克之數年中戰
場燐火痛深國殤劉之協尤起事封疆假令竟兔脫誘脅益繁何
能遽帖耳俯就宜畢而公乃不動聲色巨憝剪除功豈不偉若夫

博搜逆黨誼係 君父公切抱臣子義憤歧舛非無因而泄泄者
或用爲訾警嗟呼公果有意邀功則會昌安遠之事唾手卽得奚
以謝弗爲且謀獲究未成於誤殺也此觀過知仁 睿皇帝所由
終保全而無嫌於公者歟公在金陵訓觀察擊甚余進謁則指觀
察語余曰忝師門乞匡其不逮謙光可挹愧余之無以相裨也性
嗜書畫而彌篤注易宗朱子而參用明儒來氏之說已成帙其餘
詩文集若干卷公於四年正月乙亥行抵蜀之長壽寓舍而歿年
七十有四配邱太淑人子二長卽思芳前江蘇候補道次思莊候
選府同知孫十四長卽均嘉慶庚午科順天舉人江南鹽法道次
圻河南布政司經歷思芳出次增邑庠生次培殤思莊出次垣次

堉思芳出次同曾殤次堪次域思莊出次堉次堉思芳出次堉次
堉次堉思莊出曾孫八鑾章慶熙麟趾鉉章黼昭麟昭長馨長齡
女二皆適名門孫女十曾孫女八公生平敷歷實績暨居鄉給義
田於族公經籍於邑矜憫解推不勝數金石刻體尙謹嚴故舉大
端云銘曰

狡獪宜殛鶴鷗宜雉繫惟公力螻蛄是充饘饌是供繫惟公功昔
時負戴搔癢在背傷祿不逮初政所治瞻父母慈諸梁之遺曲阿
開濟民曰吾福推心置腹卻兵作歌章貢漸磨再造爾家處脂無
潤歸鶴知信素心相印在郡十題傑館有二鶴飛去人謂素心相印必重來果然乃作歸鶴亭記題紹
綏堂題武矢費于孫有慶公以宋代遠祖廟有堂曰紹綏堂蜀山兀兀貞

石可伐我銘勿沒

右神道碑銘朱琿撰

廖思芳

乾隆五十九年陝西白河教匪事發安徽太和縣人劉之協乘亂入河南郊縣聚眾爲寇自稱天王劉之協從者日眾是爲教匪大頭目於是陝西河南湖北四川教匪皆起 朝廷遣將命師迄難討滅至 仁宗睿皇帝嘉慶五年始平而禽獲賊首劉之協以成大功者則潁水廖君思芳也君爲復堂都轉寅長子始都轉宰河南葉縣葉居賊之衝晝夜集兵城門爲守禦計君以省親至葉見賊勢日張又念其父部署軍務不遑甯處慨然曰懟惡未禽賊氛

何日息乎男兒正當殺賊以報君父耳日夜籌所以辦賊者一日偕探騎出城外五里許於柳樹下見一人露膊坐狀貌奇偉眉通於鬢心怪之返以其狀語守城兵朱中林已卽返署已而其人偕一人至中林給使入城猶豫未卽入其人指中林語偕至者曰此朱掌櫃也遂同入酒肆命酒豪飲酒酣陰語中林曰彼偉然上座者非他劉之協也中林急走報君方脫鞵使婢子洗足聞訊徒跳出手拉之協取佩刀斷其禪帶之協俯躬護禪遂掘其項縛之時嘉慶五年六月二十八日己卯也蓋之協敗於鄧州失其眾思迂道入南陽再起故過葉而思芳所見狀貌奇偉露膊坐柳下者卽賊黨冀大榮也之協旣禽賊眾遂解竄經略額勒登保等得以

次勦滅川陝豫楚四省乃平是役也固廖公晝夜焦勞嚴詰姦宄
之力然出死力助之者不可謂非長公子功事 聞 仁廟以葉
縣功最擢廖公江蘇鎮江府知府 賜孔雀翎旋擢江西分巡吉
南贛甯道後官兩淮都轉鹽運使所至以廉能稱思芳性忼爽散
金結客有古豪俠風然非其人輒嚴拒茲事齟時蓋嘗聞之余叔
父云其後思芳以禽獲劉第五爲忌者所誣下獄瘐死世稱冤獄
嗚呼教匪之爲害烈矣劉之協以妖術惑眾禍連數省 朝廷用
師至七年之久糜費以巨萬萬計使非禽治首惡燎原之火其燄
豈能一旦遽滅耶然則廖思芳之功不誠偉哉

右書鄧瑤撰

國朝著獻類微初編卷二百十二補錄

監司八

李調元

李先生調元字雨村羅江人乾隆癸未進士改翰林院庶吉士授吏部主事官至直隸通永道著有童山詩文集先生少負才名以春蠶作繭詩受知於錢香樹先生鄉會掄魁文名大譟通籍後分司銓曹典試粵東所拔多知名士旋以畫彙事受高廟特達之知遂有督學粵東之命差竣授直隸通永道以與屬員互訐被議歸里纂函海類書搜采遺書三百餘種楊升庵先生箸作表章尤多家有萬卷樓藏書頗富詩文敏捷天才橫逸不假修飾少作多

K320.49

1573313

文和特刊研究生附覽

國朝全蜀詩鈔小傳孫桐生撰

可存晚年有率易之病識者宜分別觀之

右 國朝全蜀詩鈔小傳孫桐生撰

158-864



21101000160802